



2

ALEXANDRI  
NEVYLLI  
ANGLI,

Defuroribus Norfolcien-  
sium Ketto Duce,  
*Liber unus.*

 Eiusdem   
NORVICVS.

  
W R Robinson

LONDINI,  
*Ex officina Henrici Binne-  
mani Typographi.*

Anno salutis humanæ  
civ. 15. lxxv.







In obitum amplissimi Præ-  
fulis, Matthæi Parkeri Cantuar.

Archiepiscopi eiusdem

Alex. Neuylly carmen.

**S**IC CONSTAT mortale nihil: sic luminis oras  
Quæ subeunt, abeunt: rapit (heu) rapit omnia tellus  
Quæ peperit: refugusq; vigor mortalibus auum  
Decurtat miserum: dociles non parcere Parca  
Sic occant nimium: sic sic abrupta beati  
Stamina Parkeri, tantum dant flere misello  
Orbatoq; gregi, quantum bona commoda vita  
Voluerat aureolus cursus, plebesq; regendi  
Gnarus amor, sollersq; animus, fluidosq; premendo  
Mite supercilium, mens & lentando modesta.

**ET MEA** qua tanto viduata tamæna patrono est,  
Luget in abruptum: rursus decidua fatis:  
Rursus inhorrendas mundi sensura procellas.  
O bene cœlicola, tanto quod functus honore  
Euicit linguasq; hominum, nigrasq; loquelas.  
Quas spargit numerus, quas sacra insania ructat:

**ERGO IACE** venerande heros: & murmure stulto  
Inuidia maiorq; omni, felixq; peracto  
Obdormi stadio: nos hic tua facta sonamus:  
Te pleniù, & amore tui: te flemus ademptum.  
Te te magne pater nos hic veneramur, amamus,  
Et tanti aternùm mirabimur acta magistri.



Libri post defunctum  
patronum editi,  
Protopopœia.

**F**lebile principium (si quid præfagia monstrent)  
Fortuna auspiciū prosperioris habet.  
sed quid habent veri præfagia inania? quæne  
Possit ab hoc tanto spes superesse malo?  
Da (Deus) auspiciū signis melioribus oro:  
Huic metuo diras ominis inesse minas.  
Haud facile optatum cursu contingit honorem,  
Turpiter in primo carcere lapsus equus.  
Haud facile optati portus contingit arenas,  
Infœlix patrijs mersa carina vadis.  
sed grauior fortuna mea est, & tristius omen  
Ante ferè erepta est, quàm data vita, mihi.  
Ecce extrema mihi vixdum superaddita lima,  
Vix signata suis pagina prima typis:  
Cum decus (heu dolor) ille ingens, decus occidit ingens,  
Pars anima, & vita magna columna mea.  
Fata queror nostris nimium contraria rebus,  
Syderaq; auspicijs facta proterua meis.  
Nam tua dum properant nimium, & mea fata morantur  
Te mihi surripuit, (Spes mea) meq; tibi.  
Infœlix ego quid merui? cur Posthuma proles  
Nascer, & in seros differor vsq; dies?  
Ast quia non tecum patiantur viuere fata?  
O vnam in tumultu dent latuisse tua.

G. A.



Ad librum post defunctum  
patronum editum, Carmen  
consolatorium.

**N**on benè venales poscunt praeconia merces,  
Hadera laudatrix, vilis vina decet.  
Cetera praesignes sibi quærant scripta patronos,  
Claraq; Magnatum nomina fronte gerant:  
Nil opus ascitis titulis tibi, pone querelas,  
In te praesidij est satq; superq; tibi.  
Seu tibi diffidas, αὐδῶν tandem aspice Αλεξίη,  
Is solet esse alijs, is tibi Αλεξίς erit.  
Is pater est, idemq; simul pater, atq; patronus,  
Ille dedit vitam, & proteget ille tuam.  
Insuper ex merito Norfolkia tota patrona est,  
Angliaq; ex merito est tota patrona tibi.  
Adde quod ex alijs, vita exemplaria prisca,  
Si quem delectent scripta, patronus erit.  
Deniq; si quis erit qui quid memorabile gessit,  
Vel non diffidat posse, patronus erit.  
Nenè aliquis desit: cuius nunc funera luges,  
Ipse etiam inuita morte patronus erit.  
Nam fera quod potuit diro mors abstulit vngue,  
Terra quicquid erat, cetera non potuit.  
Corpore nam posito fama est & honore superstes  
(Quippe ab honore nihil mors violenta rapit.)  
Corpore deposito vivit virtute superstes,  
(De virtute nihil mors violenta rapit.)  
Corpore deposito mente est, animaq; superstes:  
(Sacra ex mente nihil mors violenta rapit.)  
Ergo & honore suo, virtute & mente superstes  
Is tibi maiori parte patronus erit.

G. A.





In Alexandri Neuylli Kettum

Thomæ Drantæ carmen.

**E**RGO Neuylleo vulgare Kette cothurno,  
Tuq; furorq; tuus, scelus excidiumq; tuorum?  
Utq; in grande nefas, atq; in sua vulnera versi,  
Plebs hominum ruit, & sociarunt fœdera fures?

Ilicet est actum: totus de nomine puro  
Tolleris, fama; niger turbare cæcos

Ad manes: tu voce viri, tu voce Neuylli  
sordescis, pollentis opes & numina lingua  
Te vitiant, te, te, præstans facundia perdet.

O mihi post nullos memorande Neuylle disertos,

O docti pars multa chori: ceu namq; puellus

Ingenio, genio, calamo, sermone, puellus

Anteibas, ita virq; viros, ita maximus unus

Omni atate viges, & nos post terga relinquis.

Nec sua quæ tanto præcellit Musa nitore,

Cui triuiale nihil, nunquam cui frivola cura,

Tam modicis fluere venis, inflaret auenas

Tam tenues, fieretq; humilis sub iudice mundo.

Te nisi non albi tereret lex ferrea fati,

In peius rerumq; vices, & moriger arctis

Præsulis imperijs animus flexit, fecitq; minorem

Marte suo, veteriq; bonum de more labare.

Cumq; tui valeant humeri, nec ferre recusent,

Et tuus antistes iam non sua iussa suburget.

Sumito materiam Iouio vel Casare dignam,

Desine tu Kettos, atque indiga dicere castra,

Hæc arbusta tace, teq; his exsolue myricis.

Tu cane vel reges, vel regia, maxima semper

Magne sona: canor & florens te gratia fandas

Intulerint cælo, potes, ô potes, esse beatus.

I puer aurato iubeas velentur amictu,

Quæ sua prælustris perarabit cumq; Neuyllus.



# In historiam Alexandri Neuylli, Hendecasyllaba.

**VIRBIVM** ne putabū abs auara

Demissum Styge? posse vel renasci

Hospitem Pythici? vel enonari

Bis fata? ac iterum sepulta reddi

Terra corpora? quale fabulosa

Solent fingere per iocum Poeta

Monstrum, quale vel impetu minore

Format Pythagoras renatus Orco.

Iurabis Linij, Salustijq,

Casariq, Demosthenisq, Graij.

Calores veteres adhuc vigere,

Tulliumq, quietē Tusculana;

Novis sedulo rebus occupatum.

Nempē, qui novus exit hic libellus,

Nescis, utiū vī, dulciū vī,

Prior, melior, Latiniū vī,

Maior, purior, elegantior vī.

Vnus ut referat fere vniuersos.

Sed nec numina fallier licbit,

Nec, quos cymba tulit, reuexit.

Exspectas igitur, quis hos poliret

Libros? historiāq, tam eruditā?

Ille qui sapienter emulatus,

Quos atas prior exstulit, vel ipsos

Aequauit Zephyro secundiore.

Huc qui transtulit Atticos colores,

Romanūq, salem, decusq, lingua.

Cui cū munera summa largiantur

Pelasgi, Latijq, doctiores:

Nulli, quid tamen ut suū reposcunt.

Atqui vis propius videre quis sit.



Est, dico, studiosus omniū huius  
 Virtutis bene quæq; ponderantis  
 Hic quos longa premebat, inuida q;  
 Nube condidit atra nox, recludit  
 Fastus, historiamq; cæciorem  
 Ornat luce decenter insolenti.  
 Hic nobis patrios lares, domosq;  
 Auitosq; focos, fecitq; nobis  
 Incunabula nostra notiora.  
 Hunc ergo maneat ( fauente fato, )  
 Sæcula postera nepotum:  
 Ut mistus Rhetorum choro, iacentes  
 Terras despiciat volante fama,  
 Nos cui brevis, ac inerte vena  
 Ignoti, procul à foro remoti  
 Admirabimur hæc, silebimusq;.

## Typographus Lectori.

D Edimus operam equidem ( quantum in nobis fuit ) vti liber iste  
 purus & integer, nullisq; respersus lituris hominum in manus  
 perueniret. Sed dum Author longius abesset, & pericula ( sic folia  
 appello quæ non serio, sed periclitandi tantum gratia excuduntur )  
 ad eum sæpè, nulla, prima raro, secunda verò nunquam deferrentur:  
 factum est vt nostra diligentia industriæq; non vndequaque re-  
 sponderis euentus: nonnullaq; ( imprudentibus nobis ) errata irrepse-  
 rint. Ex his quadam expunximus: reliqua ( propterea quia id in  
 excuso iam codice minus commodè fieri posse videretur ) quemadmo-  
 dum corrigenda sint, te Lector optime admonendū curauimus. Vale.

## Errata præli.

Prior numerus paginam, secundus lineam denotat.

21. 21. labefactandam, lege labefactandum 79. 8. metuentes, lege  
 metuebant. 81. 1. spe, lege ope. 94. 1. incensæ, pro incensæ.  
 95. 6. subdebilitatem, lege subdebilitatam. 98. vlt. Ita, lege Item.  
 120. 1. & 2. animos vincendi, lege animis viuendi,

Quadam inciderunt alia, quæ quàm aptè potuimus  
 quibusdam in locis emendauimus.



REVERENDISSI-  
MO IN CHRISTO PA-  
TRI EDMUNDO ARCHIE-  
PISCOPO EBORACENSI,  
ANGLIAE PRIMATI,  
ALEXANDER NE-  
VILLVS S. D.



OGITANTI

mihi ( Præsul illu-  
strissime ) cuinàm  
potissimùm labores  
consecrarem meos,  
tu maximè eo mihi  
munere dignus oc-  
currebas , qui am-

plissimis tùm in honoribus, tùm fortunis,  
quibus diuina te clementia circumfudit,  
maximarũ quoq; virtutum splẽdore cir-  
cumfluis. Nam cùm Cantuariensis (ille  
magni nuper nominis Heros) cuius per-  
illustri persona spes meæ dudum nitebã-  
tur omnes , ab illiberali me otio, ad hanc

b. scribendi



scribendi curam sollicitudinemq; traduxisset: nunquam suspicari (nedum vereri) mihi in mentem venit, fore uti meis optimis per inimica semper atque peradversa fortuna consilijs, tam subito, tanto mererum mearum presidio orbaret. Sed quemadmodum nihil est in vita quod non mihi sæpissimè fors iniecerit, quo me vexaret acerbi, neque vnquam tam secundis ventis usus sim, quin ij mihi protinùs reflarint: ita huius præstantissimi Antistitis interitus, plagam mihi certè inflixit acerbissimam & sempiternam.

Et verò is miserijs huius molestissimæ vitæ perfunctus, integris sensibus, ætate optima, è vita, tanquam è scena benè peracta fabula discessit, meo autem magno malo detrimentoque interceptus extinctusq;, incredibile mihi præ cæteris omnibus fui desiderium reliquit. Proinde cogor à pontifice, ad pontificem, id est ab amplissimo & propè coelesti viro (mortuo



tuo tamen) ad viuum te, & præfulem, &  
virum veris virtutum laudibus præstan-  
tem, confugere. Quis autem hos libellos  
exceperit, si tu reieceris? Aut quem mea  
Posthuma proles tutorem inuenerit si tu  
aspernabere? Aut cui denique hij nostri  
labores, viuentis Archiepiscopi imperio  
suscepti, & morientis testamento com-  
probat, grati erunt atque iucundi si tibi  
Archiepiscopo & optimo, & sapientissi-  
mo minùs probabuntur?

Verùm enim uerò maxima spe sum,  
fore vt sicuti is nuper nobis solatium, or-  
namentum, ac columnen exstiterat, (sem-  
perque proculdubiò exstitisset, si semper  
per etatem viuere licuisset) sic tu vicissim  
(nam quis te vno aut sanctior vnquam,  
aut dulcior est habitus?) nostræ sis orbi-  
tati solitudiniq; præsidio futurus.

Neq; porro me ea deterrent, quæ sunt  
in te summa omnia, eximius vitæ splen-  
dor, grauitas admirabilis, doctrina pere-

b. ij.

gregia,



gregia , singularis prudentia, præsertim  
cùm tantis illustratus excellētissimarum  
virtutum luminibus , permultum meæ  
obscuritati (ex tua amplitudine) splēdo-  
ris adferre poteris:isq; vir sis qui in omni  
vita, cum prudentia perinsigni, incredi-  
bilem quoq; comitatem coniunxeris.

Itaque licet fortassis cuiquam audacter  
nimis , atque subrusticè facere videbor,  
qui te tantum Præsulem tam pænè nullus  
affari non dubitem , tamen minori sum  
verecundia , propterea quia hoc quod  
rogo, & tuæ personæ aptissimum erit , &  
demortui Antistitis volūtati, (si quis vita  
functis sensus inest ) in primis consenta-  
neum. Rogo autem, ut quandò is mori-  
ens hos mihi libellos, (quos nunc ampli-  
tudini tuæ dono dedicoque ) typis per-  
uulgādos reliquerit : (qui funesto omine  
suscepti, & post defunctum patronum in  
lucem editi, hominum ora cōspectumq;  
horrent atq; refugiūt,) hijs tu ad gratiam  
&



& nostrorum hominū existimationem  
commendationi atq; decori esse digneris.  
Tum si tenues tibi nimium atque ieiuni,  
nimium rerum ac verborum inopes vi-  
debuntur, & iccirco doctissimis perpoli-  
tissimisq; tuis auribus indigni, feras tamē:  
ijsque oculis, eodemque quibus omnes  
bonos intueri soles vultu, contemplerē.  
Quod æquissimo te facturum animo  
(Præsul optime) confido: tum quia potes,  
tum quia soles benefacere quàm plurimis:  
estq; hoc naturæ tuæ, tuisq; dulcissimis,  
suauissimisq; moribus coniunctissimum.

DEVS Opt. Max. amplitudinem  
tueatur tuam, concedatq; vt vbi per diū  
nobiscum in terris lætus atq; hilaris vixe-  
ris, inter cœlites tandem cum **CHRI-**  
**STO IESV** æuo perpetuo ac sem-  
piterno perfruare. Londini. a. d.

VII. Kalend. Decemb.

CIO. IO. LXXV.

*Amplitudini tuæ deuotissimus,*  
ALEXANDER NEVYLLVS.



et non solum hominibus eximium  
commune bonum, decorabile dignum  
Tunc illi etiam ad minimum appetunt  
nuncium etiam de verborum more  
desunt, delectatio doctrinae proprii  
taliando, tunc gaudia indigna sunt  
ipsae oculis, eodemque quibus omnes  
bonae in oculis videntur, et in  
Quod expulsum te in istum animo  
(Prelat opus) confidendum dicitur  
tunc quia solus beatorum dicitur  
est, nec naturae, tunc dulcissime  
transistit, moribus communis  
DEVS O. M. N. I. A. B. I. N. D. I. C. A. T. I. O.  
tunc etiam, concedat, ut in ordine  
nobiscum in rebus, tunc in vix  
in inter omnes in eum CHRIS  
STO IESVS, et in proprio actum  
pium perficitur, in ordine, a. d.  
VII. Kalend. Decemb.  
C. D. C. LXXV.  
Magnificum in deum  
ALEXANDER NEVILLVS












Reuerendissimo in Chri-  
sto patri D. Matthæo Cantua-  
riensi Archiepiscopo, totius Angliæ

*Primate & Metropolitano,*

ALEXANDER NEVILLVS.



IVINITVS  
contigisse puto  
(Præsul am-  
plissime) vt  
quã Deus opt.  
max. amplitu-  
dini tuæ sedem  
ac domicilium  
esse voluerit,  
eadem sit etiã  
hoc difficilimo

tempore mœrori meo ac solitudini perfugium.

Nam cum insigni ac propè admirabili laude a-  
pud omnes bonos circumfluas, cumq̃ tibi summum  
dignitatis decus vniuersi tribuant, & singularis

A.

cuiusdam



cuiusdam sapientiæ atq; cōstantiæ laudem imper-  
tiant, in his tantis molestijs, quibus vndiq; circum-  
fusus sum, quid mihi accidere potuit, vel ad præ-  
sentis vitæ cōditionem illustrius? vel ad præteriti  
temporis solatium iucundius? vel ad futuræ ætatis  
spem præstatius? quàm in domo tanti Pontificis,  
tanta virtute, facilitate, & morum elegan-  
tia redundantis assiduè versari? Itaque sic affi-  
ciebar interdum, vt quoties istius rei mihi in mē-  
tem venisset (venit autē sæpissimè) toties omnes  
illæ curarum vndæ quæ in animo perpetuò effer-  
uescebant meo (quasi mare ventis cessantibus)  
continuò deferbuerint. Et certè, dum nihil vndiq;  
nisi pudicum, nihil nisi pietatis, pudoris, ac conti-  
nentiæ plenum intueor, sit, nescio quo pacto, vt de-  
syderio acriori, ac multò (vt mihi videor) vehe-  
mentius incenso, ad illarum rerum imitationem  
inflammor. Accedit huc etiam, quòd non plus opi-  
bus & potentia, quàm illustri humanitatis laude  
præcellas: neque solum eos, qui tibi famulantur,  
fortunis ac facultatibus iuues, verū etiam gratia,  
fauore, consilio, auctoritate, beneficentia sustētes.  
Vndè



*Vndè adeò factū est, vt tacitā inconsideratæ teme-  
 ritatis meæ reprehensione non magnoperè per-  
 timuerim, quòd amplitudinem tuam his meis li-  
 terulis tam fidenter affatus sim. Neq̃ enim fieri  
 potest, vt humilimum amplissimus, aut sui obser-  
 uantissimū humanissimus Pontifex aspernetur.  
 Quapropter ardentissimis votis ac precibus obte-  
 stor, vt hos industriæ meæ flosculos verius quàm  
 fructus, quos honori tuo obtulero, (obsequij & a-  
 moris monumentum erga te mei) læta fronte ac  
 benigna suscipias. Quod te facturum pro illa tua  
 præstanti pietate, qua omnes omnium literatorū  
 hominū conatus, ac studia prosequeris magnope-  
 rè sanè confido. Etenim labores hos meos quos in  
 Ciuium Norwicensium rebus gestis te aucto-  
 re explicandis suscepi, Amplitudini tuæ consecra-  
 re decreui. Qua in re tum cultus & obseruantia  
 in te meæ, tum mentis meritorum erga me tuorū  
 non immemoris excusatione, tam inscitia crimen  
 quàm impudentia labē deprecabor. Nam cū  
 tua me amplitudo ad scribendum potissimū im-  
 pulerit, & mihi (quod aiunt) currenti quasi cal-*



car abhibuerit, inhumanum me esse certè oportebat, & non solùm bonitatis tuæ oblitum, verum etiam officij prorsus immemorem mei, si tibi neq<sup>3</sup> hortanti obsequerer, neq<sup>3</sup> imperanti. Preterea cùm te tanta dignitate, consilio, prudentia, ætate, vigilantia, & (quod caput est) grauissimis plerumque rei christianæ publicæ muneribus implicitum Presulem, ea semper mente præditum perspexerim, nullæ vt te vnquam cogitationes à præclarissimarum disciplinarũ studijs & Musarum veluti complexu abstrahere potuerint, dũ omnia omnium antiquorum hominum monimẽta scrutaris, omnium doctrinarum ac disciplinarum omnes libros exhauris : cumq<sup>3</sup> domi semper tuæ Academiam quasi quandam literatorũ hominum florentem animaduverterim, qui perpetuò præceptis adhortationibusq<sup>3</sup> inflammatis tuis, sui quotidie fructus ingenij proferre consueuerint, profectò mihi nisi inertiae nequitiaeq<sup>3</sup> maculas inũri voluissem, aliquid tale præstandum aut certè conandũ fuit, in quo significatio saltem nonnulla industriæ ac voluntatis ostenderetur meæ. Præsertim cùm

tu



tu (vir talis ac tantus) semper mihi & ad sus-  
cipiendam, & ad ingrediendā horum studiorum  
rationem, auctor & princeps exstiteris. Videlicet  
in hanc cogitationem (prudentissime Pontifex)  
perpetuò incumbis, vt domi semper tuæ doctrinæ  
atque humanitatis studia, à cunctis celebrentur:  
maximaq; delectatione perfunderis quoties do-  
mesticos tuos literis ac bonarum artium discipli-  
nis deditos conspexeris: Solesq; eos quos in fami-  
liam asciscis tuam, imprimis cohortari vt erudi-  
tionem ac pietatem ardenti desiderio consecuten-  
tur. Quæ quidem me impulerunt vt ego quoque  
mihi in istiusmodi rebus pro virili parte elaborā-  
dum statuerim, nō tam vt tibi gratificarer (quā-  
quam quid est quod flagrantius exoptem?) quā  
vt mihimetipsi prodessem, planumq; cunctis face-  
rem quibus domi tuæ studijs ac cogitationibus  
tempus traduxerim. Feci itaque quod debui, &  
feci equidem non inuitus, vt onus illud quod tu  
mihi imponendū putāris alacri mēte subierim.  
Quod si me quandoq; oppresserit (fieri enim non  
potest quin tanto impar oneri sustinendo, saepe-

A. iij.

numerò



numerò succubuerim ) tuæ erit humanitatis,  
(Præsul optime) iacentem patrocínio subleuare  
tuo. Præsertim cùm dum tibi imperanti, & ad  
hanc me quæstionem pertractãdam crebrius ex-  
citanti, non parere nefas esse duxerim, plus in me  
forsitan oneris quàm perferre potui receperim.  
Vtcunque erit, non patitur tua te tam excellens  
naturæ bonitas cuiusquam indignitatem asper-  
nari, & ego is sum qui cùm in præstanti tua vir-  
tute spes meas omnes defixerim, nullius alterius  
iudicium magnoperè reformidem.

Et quanquam non defuturos quosdam suspicor  
( ut sunt nonnulli huius ætatis homines morosi  
nimium & difficiles ) qui mihi, nescio quod te-  
meritatis & imprudentiæ crimen infligent, ta-  
men & aliorum exemplis me cōsolabor, & tem-  
pora magis amica virtuti sperabo, nec me fœli-  
cem minus si probris onerarint, quàm si laudibus  
ornarint, existimabo.

Alterum est genus hominum eruditissimorum  
atque in bonarum literarum disciplinis assiduè  
versantium, quibus ego magnoperè cupio studium

&amp;



& industriam probari meā. Hiji si fortè in scriptis nostris pauca admodum (imò potius nulla) deprehenderint, quæ sitim illam suam rerū præclarissimarum inexplebilem restinguant, sic habeant cupisse me optima, præstitisse mediocria, polliceri vberiora. Dent igitur tenuitati & inopiæ veniam meæ, sciantque hæc quæ nos hijs libellulis aridè sanè & ieiunè complexi sumus, non ex Academicorum fontibus, sed ex industriæ nostræ riuulis profluxisse. Neque porro à me præreptam cuiquam, sed potius omnibus præbitā scribendi ansam existiment, si qui fortè post hac, aut per se meliora indagauerint, aut accepta ab alijs perfectius ædiderint: cū nihil interim mihi magis unquam in votis exstiterit, quàm ut quæ inter scribendum, vel per incuriam omissa, vel per inscitiam incognita exciderint, ea à peritiorè tandem artifice plenius pertractentur. Tu autē Præsul dignissime, fauoris tui radios in hos teneros ingenij mei foetus transfundere digneris, eosq; patiare tui nominis amplitudine illustrari. Quā sint ibecilles, quā tennes, quā nullarū viriū vides,



vides, sine sanguine, sine succo, nullis neque re-  
ligata ossibus, neque nervis astricta. Lucem me-  
diusfidius perferre non poterunt, si non admi-  
rabilis tua bonitas illorum cœcitati clementiæ  
tuæ lumen prætulerit. Nihil erit mihi vel ad  
opem firminus, vel ad desiderium optabilius, vel  
ad nominis mei existimationem accumulati-  
us, quàm si tu mihi præsidio contra importunissimos  
maleuolorum hominum impetus fuisse videbe-  
re. Qua quidem in re quantum poteris non sum  
certè nescius (potes enim quantum vis) ut au-  
tem velis quantum potes, es mihi per illam tu-  
am incredibilem qua vincis penè omnes huma-  
nitatem vehementius obsecrandus. Nihil ha-  
bet fortuna tua maius quàm ut possis, nec natura  
tua melius quàm ut velis, subsidio esse quàm plu-  
rimis. Perge itaq; quod facis (præsul amplissi-  
me) favere bonis, odisse improbos, virtutem ex-  
tollere, oppressis opitulari, eruditos tueri, præmijs  
amplificare, consilio, auxilio, misericordia suble-  
uare. Nihil mihi crede magnificentius, nihil  
præclariùs, nihil admirabiliùs, nihil neq; naturæ,  
neque



que moribus tuis omni elegantia & suauitate  
perpolitissimè accommodatiss. Hæ sunt veræ virtutes,  
dignæ summo viro, dignæ Pontifice, te verò vi-  
ro optimo & Pontifice amplissimo dignissimæ.  
Verumtamen non committam ut qui ad hanc  
scribendam epistolam ut tibi labores hos dicarè  
meos initio me contuli, nunc te hominem om-  
nium sapientissimum, ad eas vitæ rationes hortor  
& excitem quas ab ineunte ætate perpetuò com-  
plexus es, ne aut insolens viderer si prudentissi-  
mum, aut impudens, si præstantissimum, aut  
meæ conditionis oblitus, si illustrissimum ad-  
monere coner. Itaque finem scribendi faciam:  
illud tamen prius profitebor, quamuis ubiq; gen-  
tium existant multi, quos singularis tua boni-  
tas liberalitate non leuiter consperserit sua, sed  
planè obruerit: mortalem tamen viuere neminem  
qui plus se tibi debere existimet quàm ego debeã,  
neminem qui id libentius præ se ferat & agnos-  
cat, neminem deniq; qui si quando opus fuerit,  
tenuissimas vitæ suæ facultates pro dignitate tua  
alacrius profuderit. Cuius voluntatis, ac officij  
B. serui.

*seruitutem mei quo testator omnibus esse posset,  
tibi posterisque tuis harum literarum testimonio  
sempiterno astringi.*

*Christus optimus maximus amplitudinem tuam  
nobis & christianæ Reipublicæ (cum sum-  
ma semper dignitatis amplificatione)  
quàm diutissimè sospitem seruet,  
& incolumem.*

*Amplitudini tuæ humilimus,  
Alexander Neuillus.*





# ALEXANDRI NEVILLI

de Furoribus Norfolciensium Ketto Duce.

LIBER VNVS.



PTAREM  
equidem, vt hæ  
populares tem-  
pestates, & sedi-  
tionum procel-  
læ, quibus pa-  
tria nostra (tē-  
pore Edouardi  
regis sexti) for-  
didissimorum  
hominū scelere  
& perfidia per-

culsa & afflicta fuit, aut nunq̃ contigissent, aut  
(si fieri posset) illarum memoria penitus ex  
omnium mentibus excinderetur. Sed quo-  
niam præterita mutari nō possunt, & hæc ma-  
cula proditionis à perniciosissimis ciuibz pa-  
triæ nostræ impressa, altius insedit in populi  
Norfolciēsis nomine, ad memoriam sceleris

B.ij.

sempi-



sempiternam infixa, quàm vt penitus deleri, aut prorsus extirpari queat: faciliè patior oblatam mihi hanc huius historiolæ conscribendæ facultatē, vt omnes intelligant quibus inijs hij tanti tumultus excitati sint, ac qua tandem virtute compressi: penitusq; perspiciant vulnera illa, ac seditionū scelera patriæ nostræ non à bonis viris & fortibus inflicta, sed à desperatorum hominū flagitiosissimis gregibus iniusta fuisse. Illud certè apud omnes constat, incredibilē ex istiusmodi rerū cognitione utilitatem ad posteros dimanare: magnosq; proculdubiò fructus cōsequentur homines boni, si ad hæc exemplorum documēta acriter animos intenderint: & ex ijs ipsimet sibi salubrē ac frugiferam vitę disciplinā instituerint. Cōtraq; impij ac turbulēti ciues, si qui fortè sunt huiuscemodi (quales esse in hoc regno vel nullo, vel non ita multos cōfido) ex aliorum calamitatibus sapere sibi condiscāt: aut saltē si id facere nequeāt (nequeunt autem quia nolūt) horū miserabiles exitus contuentes, perhorrescant.





**ANNO** Christianæ salutis  
 millesimo, quingentesimo,  
 quadregesimo nono, cū ad  
 regē Edouardum, eius no-  
 minis sextum, nōnulli graui-  
 ter conquesti essent, agros  
 publicos intercipi, & à priuatis quibusdā ho-  
 minibus circunsepīri: eius rei cura auctori-  
 tate regia hominibus grauissimis ac integer-  
 rimis delata est, quæstioq; constituta, iussiq;  
 vt primo quoq; tempore de istiusmodi quæ-  
 relis anquirerēt: & de tota re quā fieri pos-  
 set maturē, cognoscerent atque deliberarent.  
 Quod cū exisset in vulgus, palamq; fieret,  
 varijq; rumores dissiparentur, ac inter cætera  
 Cantianos fossas compleſse, & agros (quon-  
 dam publicos) scrobibus ac sepiū munimētis  
 interclusos aperuisse, id quia similiter in pro-  
 uincia Norfolcienſi factum non esset, de ple-  
 be homines quidam tenues ac seditiosi, apertē  
 fremere ac indignari cœperunt. Exin im-  
 mani se scelere ac nequitia constrinxerunt, vt



ipsi contra quàm fas esset, atq; iniussu regis idē  
facere conarētur, quod in Cantio factitatum  
esse audierant: cupiētes (vt exitus docuit) non  
tam agros publicos iniuria quorūdam circū-  
septos patefacere, quàm nefariam, nefarijs se-  
sibus inclusam, omnia pereundi perdendiq;  
libidinem in rempublicam profundere. Ex  
quo bellum patriæ perniciosum, & sibi-  
met ipsis exitiale conflagrūnt. Nam cū fama  
istius nefandæ societatis multorum sermone  
percrebuisse, passim clandestina cōcilia iniri-  
coepta, multiq; multis in locis, obscuri & ig-  
nobiles viri suam Fortunam conqueri, ac in  
generosorum atque nobilium potentiam in-  
temperantius inuehi cōpērunt. Enimverò  
intollerandam iam procerum potentiam vi-  
deri, suam verò cōditionem miserimam. Hos  
affluere delitijs & omni rerū copia circum-  
fundi, languidisque liquefacti voluptatibus a-  
uaritia duntaxat ardenti, & flagrantissimis  
cupiditatum facibus inflammarī, se labore &  
vigilia penē enectos, nihil aliud in omni æ-  
tate



tate facere, nisi sudare, algere, esurire, sitire. Quæ quidem quamuis misera sint & indigna (sunt autem proculdubio indignissima) ferri tamen posse, si non hijs efferuescentibus malorum delectationum fretis immersi, aliorum inopiam calamitatemque insolenti nimis fastidio insectarentur. Nunc verò se suamque fortunam hominibus superbissimis, omniq; mollitia & otio defluentibus ludibrio esse, eam rem (sicuti debet) tantum menti dolorem inurere, tantamque famæ turpitudinem infligere, nihil ut sibi nec ad commemorandum acerbius esse possit, nec ad tollerandum iniquius. Illam verò agri possidendi conditionem miserabilem ac planè servilem videri, ad procerum libidinem tenere se omnia, non liberè, sed ex præscripto & tanquam ad domini voluntatem ac nutum: continuo simulac quisquam aliquem ex purpuratis istis offenderit, fortunis omnibus exui, priuari, deturbari. Quousque tantam dominandi libidinem inultam sinerent? Iamque eò deuenisse illos crudelitatis & auaritiæ, ut non cōtenti sint omnia



» omniā rāpere, spoliare, & per vim ac scelus  
» adipisci, quę in luxū muliebresq; delitias pro-  
» fundant: nisi etiā sanguinem penē ipsum, me-  
» dullāq; ex venis & ossibus exfuxerint. Agros  
» publicos sibi ac suis subleuandis à maioribus  
» relictos adimi, prædia quæ patrum memoria  
» cōmunia essent, ea nunc fossis ac sepibus di-  
» stingui, pascuis scrobes circumduci, omnes fi-  
» bi aditus intercludi. Quicquid volucrū cœ-  
» lum continet, quicquid piscium mare cōple-  
» ctitur, quicquid frugum terra parit & fundit,  
» hoc omne illos deuorare, consumere, absor-  
» bere. Naturam non sufficere ad libidinem  
» explendam, nouas quoq; artes excogitasse, &  
» tanq̃ disciplinas voluptatum, condire, suffire,  
» aromatibus circumfluere, suauia suauibus af-  
» fundere, omnia deniq; vndique cupiditatum  
» instrumenta, ac lenocinia libidinum conqui-  
» rere: cū illi interim herbis ac radicibus  
» vescantur, ac continuo labore tabescant.  
» Enimuerō quòd viuant, quòd spiritum  
» ducant, quòd libero cœlo ac aëre fruantur  
in-



indignari. Nō posse amplius tantam ac tam  
crudelem iniuriā perferre, nec æquo animo  
nobilium superbiam intueri: ruituros se po-  
tiūs in arma, & terrā coelo misturos, quā post-  
hac tā atrociam paterētur. Naturam vt illis, sibi  
quoq; prouidisse, corpus & animam dedisse,  
nū cætera inuidisse? Formā cū habeant ean-  
dem, & sortem nascendi cōmunem, cur ha-  
berent vitam dissimilem, & disparem fortu-  
nam? Videre se ad extrema ventum iam esse,  
velle quoque extrema experiri. Septa distur-  
bare, fossas complere, aditum ad publica vni-  
cuiq; patefacere, omnia deniq; quæ illi nō mi-  
nus nefariè, quàm auare crudeliterq; circum-  
sepsissent solo adæquare. Nec vtique pas-  
suros se amplius oneribus inuitos præmi,  
nec tantum dedecus admissuros, vt in his ma-  
lis cōsenescentes, posteris miserā ac lugubrem  
Rempub, relinquunt, & multò quàm à maio-  
ribus acceperāt peiorem. Quamobrem om-  
nia se tentaturos, neq; vnq̃ nisi rebus ad arbi-  
trium compositis quieturos. Cupere se liber-  
tatem



« tatem, & permixtam omnium rerum licen-  
« tiam: hanc velle, alioquin huius tumultus e-  
« undem qui vitæ finem futurum.

His irarum fluctibus & querelarum veluti  
tempestatibus iactati, concitarunt se inuicem  
perditi ac profligatissimi nebulones, passisque  
velis ad ea scelera prouecti sunt, quibus & pe-  
riculū patriæ, & sibi metipsis exitiū intulerūt.  
Ac non ita multò post contigit, vt ludi ac spe-  
ctacula VVyndhamiæ celebrarentur, anti-  
quitatis ita instituta, vt biduò, duabusq; nocti-  
bus perpetuis continuarentur. Ad quæ cū in-  
gens omnium ordinum concursus fieret, pro-  
ditores nequissimi in hoc solummodò intenti  
erant, vt virus inuidiæ suæ in patriā euomerēt  
loci tātum oportunitatem ac temporis exspe-  
ctantes. Itaq; primū clandestini fiebāt coitus,  
hominū huc & illuc discurrentiū, deindè se-  
cessiones & occulta colloquia: ad extremum  
verò tumultuari omnes & apertè insanire  
cœperunt. Cūq; inaudissent Robertū quen-  
dam Kettū, Coriariū, hominem ferum ac a-  
grestem,



greſtem, importunaq; audacia ac violētia ef-  
frænata præditum, agri aliquantulum quod  
aliquando publicum fuiſſet, circumcluſiſſe, ad  
eum pleni furoris ac amentiaē cōuolauerunt,  
illiquē quæ ab illis conſilia pacis perturbandæ  
inita fuiſſent exponunt, ac vehementer ab illo  
depoſcūt vt quicquid publici circumſepſiſſet,  
protinùs reuulſis ſeptis, ac ſolo adæquatis, pa-  
triaē atque illis communi vtilitati conſulenti-  
bus conēderet.

Kettus, vt qui iſdem furorum flammis ar-  
deret, quibus iſti conflagrauerunt, facilē paſ-  
ſus eſt ſeſe in ſocietatem tam execrandi faci-  
noris aſciſci. Reſpondit omnia ſe facere para-  
tum, præſtoque ſemper futurum non ad re-  
primendam ſolū, ſed ad comprimendam  
procerum potentiam: ſperare ſe breui effe-  
cturum, vt ſicut illos ærumnæ, ſic iſtos ſuper-  
biaē pœniteat. Multa nefanda, quæ per hōs  
annos perpēſi eſſent, oſtendit, multas iniuri-  
as ac calamitates quibus affecti, afflictiq; fuiſ-  
ſent: Iubet mactē virtutē eſſe potentiam hāc  
tantam

» tantam, tantam auaritiam, tantam ac tam in-  
 » auditam in omni genere crudelitatem, Deo  
 » hominibusq; omnibus iniuriam ac execran-  
 » dam videri. Damna quæ Rebus publicis, a-  
 » grisq; communibus, ab importunissimis do-  
 » minis importarentur, ab illorum iniurijs se  
 » vindicaturum pollicetur, daturumque ope-  
 » ram, vt cui agro ille fossam circundedisset, id  
 » denuò sibi cum omnibus publicum ac com-  
 » mune fiat, illamq; sese primo quoq; tempore  
 » suis manibus completurum. Addidit ad ex-  
 » tremum, se commodis illorum nunquam de-  
 » futurum: habituros illum non comitem dū-  
 » taxat, sed Ducem, non tantæ rei gerendæ so-  
 » cium, sed signiferum, authorem, principem.  
 » Omnibus deniq; consilijs non interfuturum  
 » solū, verumetiam perpetuò præfuturum.

His illi despiciatissimi viri, ac omniū qui vn-  
 quam post homines natos exstiterunt turpis-  
 simi, vocibus accensi: cū vndique circum-  
 fusi & gratulabundi succlamassent, repentē  
 velut agmine facto in agrum quēdam Ketti  
 villulæ



villulæ VVyndamiæ continentem & adiūctum, omnis multitudo sese effudit, ibique (sicut constituerāt) fossis terram obducunt. Quod cū fecissent tanq̃ effrænes equi, ad eam quam opinionis errore sibi confinxerāt viuendi licentiam adhinnientes, partim audacia ipsimet sua, & hoc inani rerum successu confisi, partim Ducis adhortationibus, & clamoribus, tāquam facibus ardentibus inflammati, incredibile dictu est, quantis iam furiarum flammis ad pacem perturbādam, & statum Reipublicæ labefactandam exarserint.

Exindē Hetherfetum proficiscūtur, (quod oppidulum nō longē distat à VVyndamia) atque illic in agrum Flowerdui cuiusdam impetum faciunt, fossas complent, septa deturbāt, claustra refringunt. Ad hos tumultus magna lis & altercatio orta est, cū Flowerduus dolore & iracundia grauiter excandescens, Kettum acrius increpasset, illiq; crimini daret, vtpotē qui hanc plebem indomitam & rebellem conciuisset: subindē eum nefarium

C. iij.

virum,



virum, patriæ pestem, & fugitiuorū ducem appellans. Atq; ab hoc quidem Flowerduo (quoad licuit) illorū sceleri occursum est, retardatq; conatus: factumq; quantū potuit à fide inermi fieri, cōtra perfidiam instructam & armatam. Quibus illi dictis factisq; vehementius accensi, cū Ketto vociferabundi circumfusi, clamoribus, querelis, ac mutuis adhortationibus omnia complessent, tādē ab illo auxiliij fidem (qua se recens deuinxerat) implorant, & exposcunt. Ille vt qui omnem spē futuri sceleris, in maleficiij præsentis euentu defixisset, non amplius sibi cunctandum ratus, bono vt sint animo hortatur, seq; libertatis authorem ac vindicem sequantur. Quæ esset illi à Repub. imposita persona non excidisse, salutem illorum nihil prius, nihil antiquius sibi fore, vtpotē pro qua opes ac vitam (res secundum illos charissimas) alacri mēte profusus sit.

Fama istius flagitiosissimæ vocis vndiq; omnes sceleratos ac perditos viros conciuat, adeo



adeò vt repētē magni seruatorum ac fugitiuorum greges, in Kettiana castra confluxerint. Quibus ille scelerū satellitibus, atque administris stipatus, cū tā Hetherfeti, q̄ VVyndhamiæ impressa flagitiorum suorum vestigia reliquisset, atq; omnibus penē locis quacunq; incederet, vastitatem intulisset, decimo die Iulij ad locum Etonensi syluæ vicinū peruenierunt. Huic syluæ continentes & adiuncti sunt agri cōpascui ciuitatis Norwicēsis, quos multorum inopū ac pauperum boues depascuntur, illisq; publicitūs custos præficitur, cui vnaquaq; hebdomada singuli, singulos oboles dependere consueuerunt. Ad hos agros quod illis viua sepes & fossa prætēderetur, ne pecora palantes vsquam dilaberentur, ex infima plebe Norwicensi quidam, pridie quā rebelles urbem versūs iter fecerunt, præcipiti rabie & amētia districti cōuolauerūt. Publica ea pascua esse (sicut erant) vociferantes, nec se amplius publica passuros scrobibus obuallari aut sepibus premūniri. Adeò cæco impetu à mente



mente & ratione auersi ferebantur, vt quæ maiorum prouida ac sagax industria in communem vtilitatem sepfisset, ea suis manibus ipsi rescindere conarentur. Vix dum in superiori parte agri scrobem demoliti sunt, cum permulti nefarij ac pestilentes viri, quorū auribus rumor auram aliquam istius perniciosissimæ conspirationis afflauisset, è ciuitate clā dilapsi, cum Kettianis militibus sese coniungunt. Qui id vt facerent, eò citiùs adducebātur, quòd proditores isti nequissimi impurissimo scelere suo, salutem semper Reipub. necnō cōmunis vtilitatis curā prætexuissent.

Harum rerum nuntijs in ciuitatem celeriter perlatis, Prætor (Thomas Coddus is dicebatur) re noua trepidus, protinùs huic malo prospiciendū sibi putauit, elaborandumq; vt hij tumultus (si qua ratione confieri posset) primo quoq; tempore comprimerentur. Quam ob rem ex primoribus vrbis aliquot, ac patribus accitis, (Aldermanni ij dicuntur, & semper Prætori in concilio adsunt) ad hos

motus



motus sedandos in Kettiana castra contēdit. Ibi illos omnia nefanda patrantes inuenit, atque in luxum & epulas effusos. Ac primū pecunia ac blandis pollicitationibus illos pellexit, vt incoepto desisterent, & domū quisq; suam decederet. Illi verò nihilominus sceleris instantes, quicquid erat vspiam clausi, aut muniti refringunt. Prætor cū omnia frustra tentasset, neq; prece, aut pretio quicquam profici vidisset, quo mentes proditorū, à tanti sceleris dritate, ad cogitationem pacis auerterentur: confestim in ciuitatem reuertitur. A cuius discessu seditiosi rati id quod erat, quodq; ex rumusculis quorundam hominū qui ad illos ex vrbe profugerant, subodorari cœperunt: si diutiùs distracti ac populabundi vagarentur, protinùs illorum consilijs nullo negotio occurri, & obsisti posse, huic rei præuertendum existimantes, tutissimum ad id sibi visum est, vt execrandæ suæ societatis asclæ vnū in locum contraherentur. Vndè ex templò ad syluam Etonensem perrexerunt, D. quam



quam cùm vndique oculis perlustrassent, & castris ponendis minùs idoneam ac commodam inuenissent, publico consensu decretum est, vti illinc primo quoq; tēpore Mousholdiam proficiscerentur, eumq; locum potissimum deligerent, in quo scelerum suorum sedes, ac rapinarum latibula constituerentur.

Proindè cùm hoc consiliũ omnibus arrisisset, iamq; nox nec opinantibus interuenisset, missi continuo ad Prætorem qui illi renuntiarent: Sibi esse in animo sine vllō maleficio iter  
» per ciuitatem facere, & propterea quòd via  
» illa esset multò facilior & expeditior, rogare  
» vti eius voluntate, id sibi facere liceat. Prætor ad hæc: Inimico esse illos & hostili animo in Rempub. quapropter non daturũ se illis per ciuitatem itineris faciendi facultatem. Dein eos vt seditiosos, & omnia perturbare, ac cōfundere cupientes, asperinis verbis perstrinxit, & minantibus vocibus, ac ad terrorem vndique instructis, à tanti sceleris immanitate deterret. Deniq; si furere pergant denuntiat breui



breui futurum, vt tam perditos conatus, horribiles exitus consequantur. Tantū verò abfuit vt ad hanc orationem illorū furor deferbuerit, vt multò quā venerint obftinatiores, & in proditiōis propofito obfirmatiores, à Prætore recefferint. Cæterū Kettiani hac fpe conatuque depulsi, noctem illam totam in Etonenfi fylua delituerunt.

Interea Prætor primoribus vrbis in cōciliū conuocatis, quamprimū ad illos de Repub. refert. Ibi diu multumq; deliberatū fuit, veluti ab his quorum animi in ancipites fententias distraherentur. Nonnulli cenfent celeritate opus eſſe, protinūs, ac ſine mora profligandos: deſperatione ac rabie furentes ſi non primo quoq; tempore reprimerentur, toti Pro- uinciæ exitium ac peſtem illaturos. Alij contrā ſentiunt, rem eſſe maximi diſcriminis, de- liberationis verò ac conſilij ſummi. Hanc reſiſtendi celeritatem, vt forti ac magno animo profectam, ſic lubricā & præcipitem videri, nēpè cuius omnis laus in euentu defixa foret.

D.ij.

Eum



Eum autem vt semper ancipites, sic plerūque miserabiles exitus sortiri. Proin suadere se, urbem vti muniant, custodias, vigiliaſq; intētiūſ instruunt, oppidanos per muros, vrbisq; opportuna loca disponant. De cætero quoniam lege **DE VI ET ARMATIS HOMINIBVS**, cautū est, ne quę copie iniussu Regis contrahantur, nihil tentādum, sed eius voluntatem authoritatemq; expectandam arbitrari. Facile huic sententiæ inclinant omnium animi, vt quę è re nata optima visa sit, & ad quemuis fortunæ impetum tutissima. Missique extemplò, qui maximis itineribus ad Regiam contenderent, ijs datae literæ, in quibus omnia diligentissimè perscripta sunt: iussiſque, vt festinatione quanta adhiberi posset maxima, ad Regios Confiliarios perferrentur.

Postridiè eius diei, (vndecimus is erat Iulij) coniurati, cū vt per urbem iter illis facere liceret, à Prætore impetrari nō posset, omni spe præcisa protinūs (id quod optimum fa-

ctu.



ctu videbatur) Pontem Heilefdonium trans-  
ire decreuerunt. Quod cum commodè fieri  
nō posset per pontis angustiam, quæ iter præ-  
bebat perarduum ac difficile, & iumentis ac  
vehiculis transducendis impeditissimū, ma-  
gnam vim lignorum in flumen conijciunt,  
atque ita fasciculis & arborum truncis con-  
gestis, viros, equosq;, atq; impedimenta om-  
nia, trans amnem conuexere. Hunc in modū  
fluuium transgressi, insequenti nocte Dray-  
toniæ confederunt: proximo die Moushol-  
diam versūs cōtendunt, septis ac sepibus vn-  
diq; reuulsis. Quinetiam Sacellum Corbetti  
cuiusdam diruerunt, omnibusque locis stra-  
gem ac ruinam miserabilem intulerunt.

In hunc perditissimū sceleratissimorū ho-  
minum gregem, omnia delentem ac vastan-  
tem, & quacunque insisterent præcipiti rabie  
ac furore ruentem, fortè fortuna dum specu-  
landi causa qua venerant incautiūs progre-  
deretur, inciderunt Rogerus VVoodhofius,  
vir ordinis equestris, & Apelyardij fratres:

D. iij.

hos



hos comprehendunt, secumque inuitos trahunt. Exin collem D. Leonardi vrbi Norwicensi ex aduersum cœpère : quo in loco Comes Surreius, præclaram exædificauerat & plenam dignitatis domum, cui infra flumen publicum præterlabitur (quod medium inter ciuitatem & collem interfluit) habetque ex occidente & meridie syluam ac villulam Thorpensensem, ex oriente verò ac septentrione cōpascua Mousholdica, quæ amplius millia passuum sex in longitudinem ac latitudinem protenduntur. Hic illi furorum cubilia, ac quasi castra locarunt : & in syluosis illis latibulis canum instar delitescentes, omnia iura diuina & humana polluerunt. Quinetiam domum illam magnificentissimam homines impurissimi inuasērunt, atque omnibus in locis scelerum suorum impressa vestigia reliquerunt.

Iam verò quicquid vspiam est infimæ & abiectæ plebis confluit : omnisque fex & sentina populi Norfolciensis in hæc se castra refudit



fudit. Prætereà magna multitudo Suffolci-  
ensium, & hominum etiam in alijs locis, at-  
que regionibus degentium, campanarum  
tinnitu, & incendio specularum excita, con-  
gregatur. Addunt etiam sceleri scelus: Nam  
immanem hanc tantam nequitiam, & inau-  
ditam omnia delēdi libidinem, specie fictæ ac  
simulatæ sanctitatis adumbrant. Sacerdotem  
adhibent: hunc rebus diuinis, ac votis quoti-  
diè manè ac vesperi suscipiendis præficiūt. In-  
super viros optimos, & quā religionis ac do-  
ctrinæ, quā virtutis ac innocētix laudibus in-  
signes, ad horum scelerum societatem adiū-  
gere conantur. Inter quos fuerunt Robertus  
VVatsonus concionator, Thomas Coddus  
Prætor ciuitatis, & Thomas Alderichius de  
Aula Mangrenēsi, vir quoad vixit omnibus  
charus atq; iucūdus. Hos tres quòd se tā nefa-  
ria pactione, & perfidię fœdere deuincire re-  
cusassēt, inuitissimos coēgerūt omnibus inter-  
esse cōsilijs, & vnà cū Ketto seditionis archi-  
tecto, cūctarū rerū administrationē suscipere.  
Quod



Quod quidem accidit percommode, nam si quando contigisset, (contigit autem sæpissimè) Kettum, aut ex conspirationis principibus aliquem (vt erant proni nimis ac præcipientes ad omne flagitium) consilio furibundæ ac vesanæ multitudinis incitatum, aliquid sceleris ac nequitiae machinari, quod tãdem aut urbem, aut agros, & regionem vrbi vicinam afflixisset, horum perprudens & solers industria, istiusmodi pestiferos conatus sæpenu-merò repressit.

Quanquam Kettus ardens scelere, & agrestibus suorum instinctus furijs, solebat interdum mandatorum velut ex autoritate perscriptorum formulas emittere: quæ KET-  
TIANA DIPLOMATA dice-  
bantur: ad quæ nonnunquam intemperantissimus helluo, honestissimorum virorum nominibus abutebatur. Horum diplomatũ exemplum subiunximus.

Nos Regis amici ac Delegati: *pecoris & cuiusvis generis commeatus conquirendi, necnon*  
in



*in castra Mousholdica deferendi potestatem, omnibus concedimus, quocunque in loco deprehenderint, dummodò ne qua vis aut iniuria honesto ac pauperi cuiquam inferatur. Cunctis ex imperio denuntiantes, prout honori ac Maie-  
 stati Regiæ, Rei<sup>q</sup> publicæ afflictæ, prouisum & cōsultum volunt, nobis Delegatis, & his quorū nomina subsequuntur dicto audientes esse.*

*ROBERTVS KETTVS.*

Et tum ordine longo alij consequebantur: namque Delegatorum numerus erat ingens, quippè qui præter illos huius nefandæ societatis principes ex omnibus centurijs duos sibi viros asciiuissent. Erant autem cēturiæ viginti sex. Atque his & huiuscemodi diplomatibus permulti nobiles & optimi viri, quos vulgi furor ac rabies reos fecisset, comprehendebantur: multi ac si fontes essent Mousholdiā perducti, atq; illic in custodiam ac carcerem cōclusi. Prætereà valli ac sepimenta quibus agri publici circumscripti ac muniti erant, talium

E.

diplo-



diplomatum auctoritate reuellebantur, multisque è locis multi citabantur, ut horum tumultuum socij ac participes exsisterent. Atque hæc omnia fiebāt his tribus, Prætores, VVatson, & Alderichio, non tacentibus solum & conuiuētibus, verumetiā ad speciem interdū consentientibus. Tempestati identidem obsequi coactis, quò patriæ tum fluitanti in alto, procellis seditionum atque discordiarum subuenirent. Ne si nequicquam obsistendo aduersum infestūque vulgus conciuissent: & ipsi met sibi præfens exitiū, & patrię lamētabilem conflassent interitū. Quę proculdubio si tum palàm reclamassent, (tanta fuit rabies, adeoque effrænis) rapinis, incendijs, atque omnibus publicis exitijs perculsa concidisset.

Interea ciuitas Norwicensis de hoc rerum statu sollicita, & tantis de tumultibus anxia & suspensa, incerta spe, & diuturna expectatione pendebat. Neque adhuc à Regia Maiestate quicquam allatum fuit, nec quid illius Consiliarij fieri decreuissent intellectum: & ciues



ciues horum iniussu nihil audēdum rati, imperium Regis expectantes in vrbe manebāt.

Accidit autem eādē tēpestate, vt multis in locis multi obscuri & ignobiles viri in armis essent, tanquā communi sceleris consensione deuincti, ad Rempub. dilacerandam conspिरassent. Etenim quāuis agrestiū furor multō magis ac atrociūs in prouincia Norfolciensi, quā alibi vspiā exarserat, tamen & eadem fatalis cuncta perturbādi lucus per omnes penē regni partes diffusa, nō Norfolcienses duntaxat, verumetiam Buchingamienses, Oxonienses, Surreienses, Estsaxones, Cantianos, Cantebrigenses, multosq; insuper mortales iisdem tumultibus implicuit. Vndē adeo factū est, vt cū omnis consiliariorū cura & cogitatio in his tantis seditionū flāmis exstinguēdis consumēretur, (ne si incēdio protinūs nō subuenissēt tota Respub. deflagrasset,) tardiūs aliquantulū quā cupiebant ad hos Norfolcienses motus reprimendos accesserint.

Gliscit interim seditio, nec remittit ali-

E.ij.

quid,



quid, sed indies ingrauescit, ita vt sexdecim  
pænè millia sordidissimorum hominum in  
Kettiana castra cōuenerint. Atq; hi quidem  
Ketto duce omni se præsidio munire cœpē-  
runt. Multisq; è locis bellicos apparatus ac  
instrumenta in castra conuexērunt. Insuper  
magnam vim pulueris bombardici, & tor-  
mentorum cuiusuis generis numerum ingē-  
tem. Ad quæ diripienda huc & illuc passim  
discurrentes, multorū nobilium domos per-  
uagati, eosq; depeculantes, quicquid peco-  
ris in agris, aut pecunię in ædibus, aut frumē-  
ti in horreis reperire possent, impiè nefarieq;  
auferentes, (inspectantibus etiam dominis)  
in castra deportarunt. Atqui quamplurimi,  
cū hūc in modum cuncta vastassent, com-  
pilassent, exinanissent, ac miserabilem vbiq;  
que vestigia posuissent, rerum omnium stra-  
gem ædidissent, maxima prædæ parte auersa  
& clāculū in speluncas retrusa, furtim quis-  
que sibi, quantū rapinarum in latibulis coa-  
ceruari potuit, congefferunt. Re comperta,  
&



& ad Kettum & cæteros **GVBERNATORES**, (sic enim dici volebant) delata, huic incōmodo primo quoquo tempore mēderi cupientes, communi cōsensu decretum, locum aliquem deligendum, in quo Iudicia exercerētur. Quercus erat annosa, & patulis diffusa ramis, hāc tignis atq; trabibus trāsuer-  
sim iniectis contabulauerunt: ibiq; plerunq; circūfusa plebe consistentes, de querelis & litibus (si quæ fortè cuiq; intenderētur) prout visum est, statuunt atq; decernunt: & nōn-  
ulorum interdum solutā nimis ac efferuescen-  
tem omnia rapiendi cupiditatem arctioribus  
vinculis cōstringūt. Hanc **QVERCVM REFORMATORIAM** nuncupa-  
runt, in quam initio aditus nulli dabatur, prę-  
terquam Ketto, & Gubernatoribus. Ex qui-  
bus nonnulli, & inter hos Prætor ciuitatis vt  
qui maximè, & Alderichius, & alij quos an-  
teā diximus inuitissimos talem in numerum  
ascriptos, omnibus modis quantum in se fuit  
vehementer cōtenderunt, vt plebeculam in-  
E.ij.                    finam



firmam & ieiunam ab hac tã importuna prædandi licentia coercerent. Quem in finem idētidem Quercu conscensa, orationis gravitate perpulerunt, vt aliquem interdum, si non exitum, at saltem modum, tantis rapinis, ac tã effusæ in omni intemperantia violentiæ constituerent. Fuerunt item & alij grauissimi viri, & Theologi præstantissimi, qui omni opera, studio, ac diligētia cōnixi sunt, plebem tumultuantem, & (legum iam vinculis laxatã) in omne se scelus ingurgitantem, à rapinis & incendijs quibus omnia miscuerant, ad pacis cogitationem traducere. Atque hij quidem de die in templis concionando, de nocte verò armati intrà ciuitatem excubando, nihil prætermiserunt, quod esset aut cum officio sanctissimorum Theologorum, aut cōstantissimorum subditorū fide coniunctum. Insignis tū inter cæteros Doctoris MATTHÆI PARKERI prudentia, fides, & integritas fuit. Vir venerabilis, ac omni semper virtutis decore circumfluens. Ac tum  
quidem



quidem professor sacrae Theologiae fuit, hodie verò (tempore illustrissimae Reginae Elizabethae) Cantuariensis sedis Archiepiscopus amplissimus. Huic cum esset in animo boni pastoris officio ac munere defungi, videretque omnia furorum ac flagitiorum flammis circumfusa, fecit id quod & prudenter decuit, & constantem oportuit. Nam & in sceleribus redarguendis fortem se praebuit & magnanimum, & in periculis cautè deuitandis, sagacem & industrium. Vnde & Deo, & regi praestitit quā debuit fidem: & sibi metipso diligenter consulendo, adhibuit eam, quae à sapiente imprimis requiritur, prudentiam.

Euenit autem ut cum die quodam, una cum amicis quibusdam in Kettiana castra cōtenderet, Kettum & alios eius societatis affines, in Quercu stantes, & inter se de rebus varijs differentes inuenerit. Quo quidem tempore Praetoris Coddii egregia virtus enituit, audiebaturq; vox illius magnifica planè & viro forti dignissima.

Nam



Nam cum Kettus scelerum signifer illi cupidius instaret, ut traditis clauibus, omni<sup>q</sup>ue potestate sibi permissa, semetipsum Prætura abdicaret: enimvero Coddus ferociter respondisse dicitur, animam se potius daturum & ipsam e corpore vitam, quam aut per scelus ciuitatem perfidiosissime desereret, aut fidem erga Regem per metum & ignauiam flagitiosissime abijceret.

His vtrò citroque iactatis, inclinato iam in vesperum die, Matthæus videns miserā plebem vndique potu luxuq; demersam, ad temulentos & ebrios, quā cibo potuq; onustos, quā cœli solisq; ardore cōfectos, parum profecturam orationem sanā ac sobriam existimans, eo die nihil sibi dicendum putauit. Quamobrem cuncta furorum ac tumultuū plena relinquens, in ciuitatem regressus, postridiē manē (dies is erat Veneris) cum fratre Thoma Parkero (qui postea Norwici Prætor fuit) in Kettiana castra reuertitur. Exin (mirabile dictu) omnes sub quercu orationi



ac precibus intentos inuenit, mediumq; inter illos Letaniam dicentem Thomam quēdam templi D. Martini vicarium. Matthæus oblatam iam sibi dicendi facultatem conspiciatus, Quercum conscendit, ibique concionem habuit, prudentiæ, grauitatis ac modestiæ plenissimam. Erat autem omnis illa oratio in tres potissimum distributa partes, quarum prima sapienter eos admonuit ne ijs quę sui sustentandi causa in castra comportassent, dissipatis atq; consumptis, mundi fructus ac munera diuinitus concessa, per luxum ac nequitiam impurissimè profunderent. Tum ne priuatas & occultas inimicitias persequentes, iracundia aut vlciscendi libidine intemperatius elati, manus cruore ciuili respergerent: nēue illos quos instar hostium haberent, custodia aut vinculis coērcerent: vitāue cuiuspiam nefariē aut crudeliter adimerēt. Extremum fuit, vti communi vtilitati consulentes, incepto desisterent, nec fecialibus aut internuntijs regijs fidem detraherent, sed debitum

F. Regiæ



Regiæ Maiestati honorem, etiam in tenerâ & imbecilla ætate deferrent, quò ipsi postea florescentibus annis firmata iam virtutis stirpe, & altis tanquam radicibus defixa, incredibili cùm voluptate, tum lætitia perfruerentur.

Hoc in loco cùm omnes dicendi nervos contendisset, cunctique concionanti benignè attenteq; audientes circumfunderentur, clamore cuiusdam sceleratissimi ac infimi hominis obstrepi coeptum est. Quousque (inquit) hunc mercenarium doctorem perfereamus? qui à generosis prætio conductus huc accessit, vocem adferens venalem, & linguam mercede constrictam. At nos illorum intolerandæ potentiae frænos iniiciemus, illosque tergiuersantes & inuitos, legum nostrarum laqueis implicatos tenebimus.

Tum verò fremere plebs, ac apertè indignari coepit: multiq; dicto huius furibundi ac vesani hominis incitati, asperrimis eum verbis & minantibus insectantur. Auditæq;

VOCES



voces nonnullorū horribiles & infestæ, quæ etiam aures ipsius Matthæi perculerunt. Ac ex ijs quidam ferociter inclamarunt : Optimum esse vt quoniam tam bellè locutus esset tamque lepidis & verbis & sententijs orationem conspersisset suam, telis sagittisque confixus, descendere cogeretur. Enimvero tum viro optimo pavor iniectus, & ad hunc pauorem, insuper alterius mali suspecti & occulti terror adiunctus. Senferat enim sub pedibus hastarum cuspides ac spicula, magnoque in timore fuit, ne ab irata multitudine transfigeretur. Postea tamen nullam ab his tanti timoris causam existisse intellectum, quippè pænè omnes qui sub arbore constiterunt, Matthæum summo in honore habebant, eumque omni amore & beneuolentia complexi, aduentu illius mirificè lætabantur. Sperabant enim fore, vt illius oratione impulsæ ac mansuefacta plebs, aut languidior ad scelus & nequitiam facta penitus resipisceret, aut saltem

F.ij.

aliquid



aliquid de tanti furoris atrocitate remitteret: atque ita illi (qui omnes aderant inuitissimi) maiorem libertatem nansciscerētur. Vt cunq; fuit, ingens tum eum horror perstrinxit, magnoque in periculo constitutus videbatur, cū ecce tibi de repente Thomas ille (quo de antè diximus) templi D. Martini Vicarius, ascitis tribus aut quatuor Æditimis, *Te Deum* Anglico sermone musa solenni, & modorum interuallis, ad aurium voluptatem elegāter distinctis, cōcinere cœpit. Cuius illi cantus suauitate perfusi, (Musica enim insolentes erāt) crudeles & efferæ mentes insueta delectatione delinitæ, paulatim deferbuerunt.

Matthæus hanc oportunitatem nactus, nō exspectādum sibi putauit, dum aut hij canere desijssent, aut illi furere de integro cœpissent, atque ideò de Quercu descendens, cum fratre quā dabatur exitus castris excessit. Euntibus illis per collem D. Leonardi ad portas Pockthorpenfes, denuò inferunt se & alij eius societatis affeclæ, tumultuosissimis eum clamor-



clamoribus infectantes. Qui quidem multis de rebus secum expostulantes contenderunt, maximè verò de magno Sigillo quo concionandi potestas fuit illi permiffa. Videns itaq; Matthæus omnes contactos hoc scelere, velut inecta rabie ruentes, tantorum tumultuum pertæsus, ac patriæ malis ingemiscens, clàm quàm potuit elapsus, fratrem Thomam Parkerum post se reliquit, qui cum illis de rebus omnibus disceptaret: atq; ita sese illorum furori subtraxit. Postridiè eius diei ædem D. Clementis ingressus, è lectionum altera (quæ tum publicè in templo legebantur) denuò causam arripuit, ad dicendum aliquid de hijs perniciosissimis tumultibus, multis coniuratorum circumuolitantibus. Ac tum quidem nihil dixerūt, sed exitum illius de templo expectantes indignabundi circumfistūt. Egredium protinùs insecuti, intelligere se aiunt illū tres vel quatuor cantharos habere expeditos & habiles, qui Regi deseruiant, monent vt statim à prandio præstò sint, se illis confestim



vsuros. Matthæus aut nihil, aut pauca sanè respondit, sed Hyppatro celeriter accito, iussit vt alijs detractis soleis, vngulæ ad viuum refecarentur, alios verò calcantho viridi superinfuso obliniri, medicamentis delibutos, ac si nimio labore & cursu fatigati conficerentur. Seditiosi ita rem habere suspicati, ac postea illos dum veluti pastum ducerentur, hos pedibus fascijs deuinctos, illos calcantho perfusos cernentes, conquieuerunt. Matthæus non ita multò post veluti deambulandi causa portis egressus, ad duo millia passuum à ciuitate, præstò sibi ad pontem Crynkelfordensem equos inuenit. Quibus conscensis, Cantebriam versùs contendit. In itinere verò quæ viderit, quæque audierit, quosque tumultuantium (quibus in via occursum est) furias ac scelera conspexerit, singula persequi laboris esset propemodùm infiniti. Veruntamen Dei benignitate omni hoc motu & populari concitatione defunctus, tanti tandem periculi securus, Cantebriam incolumis

lumis peruenit.

Huius igitur amplissimi viri veluti diuinitus demissa vox & oratio, ad hunc modum ab hominibus despiciatissimis, & ab omni non solum salute, verumetiam spe derelictis, nequiter neglecta, & contempta fuit. Quam etsi tum furore & amentia cœci & præcipientes, velut exitialem, ac tantis ac tam perditis vitæ rationibus inimicam & infestam aspernati sint & respuerint: postea tamen proculdubio ex calamitosissimis casibus qui consecuti sunt, diuinæ vindictæ horror omnium mentes perfudit. Nam cum (vt antea diximus) huius cœlestis orationis caput exstitisset, vt tanto improbitatis velut incendio in animis restincto, protinus resipiscerent, ne longius progressa prodicionis impietas, patriæ propediem funesta foret & horribilis, & sibi metipsis ad extremum lugubris & exitiosa: enim uero omnia quæ à voce illa persapienti & verè diuina veluti fata populi Norfolciensis concinebantur, euenerunt: & ipsi à scelere ad scelus



scelus delapsi, iustas tandem ac debitas tanto furori poenas persoluerunt.

Interea verò seditiosi (quos antea diximus nobilium bonis ac fortunis inhiantes, omnia furtorum ac rapinarum scelere refudisse) exsaturati iam spolijs, à prædâdi libidine ad vim crudelitatemq; conuersi, per omnem regionem Norfolciensem terrorem & periculum cunctis qui non ab illis stetissent denunciante incedunt. Iamq; nobilibus vndique quâquâ versûs flagitij se furor inclinasset cõprehensis, ac in castra perductis, tantus omnibus horror illatus est, vt cuncti domibus ac patrijs sedibus relictis, vestitu mutato, ne fortè in itinere ac fuga cõspecti cognoscerentur, in loca deuia demigrarint: & omnia ab illis extrema metuentes, in speluncarum latibula, ac sylvas densissimas sese abstruserint. Multi etiam coacti sunt carris equisq; si haberēt, suis vti, si non haberent, aliundè cõquirere. Hisq; imperatum, vt laborem & sumptum de suo impendentes, frumentum commeatumque  
in

in castra Mousholdica deueherent. Quibus quidem (nisi protinùs parüissent) ab agris & ædibus vastitas, à liberis & vxoribus vis denuntiata est. Prætereà quoscunque nobiles ac generosos comprehendissent, (comprenderant autem quàmplurimos) eos arctissimis vinculis astringunt, ac si semetipsis in omni scelere nequiores exstitissent. Multiq; Norwicum in custodiam traditi, atq; ex his nonnulli in Prætorium, (vulgò Aulam Gildensem appellant) alij in carcerem publicum, quidam in ædes Comitum Surræi, instar furum conclusi. Huc accedit quòd si quando rei pecuniarię inopia premerentur, (premebantur autem sæpissimè) ex publico ærario semper huic difficultati subueniendę necessitas, Prætori crudeliter imposita fuit. Quorum importunissimis efflagitationibus si tum Prætor restitisset, enimuerò ærario exhausto & incenso, omnium fortunis miseranda lues, & pernicies accessisset. Et quidem sæpenumerò eius compilandi nefaria ab istis consilia inita

ooidug G. sunt,



sunt, remque sine dubio transegissent, si non  
Prætoris sedulitate ac diligentia, semper hac  
de spe conatuque depulsi fuissent. Nihilomi-  
nùs tormēta multa & apparatus bellici quic-  
quid comparari potuit, (metuentes videlicet  
ne quando quid aduersi contingeret) è ciui-  
tate in castra transtulerunt. Cunctisque ciui-  
bus indictum vt primo quoq; tempore præ-  
stò sint, qui se (si opus sit) tueantur atque de-  
fendant. Regios se amicos vociferantes, &  
iniurijs diuexatos, legum ac Maiestatis Re-  
giæ tutelam defensionemque suscepisse. Nec  
hoc contenti, Regis etiam nomine ad scelus  
& nequitiam abusi sunt. Diplomata quedam  
erant Regia, in quibus quorundam Nobili-  
um nomina perscribebantur, hijsque potestas  
delata fuit à Rege, iussiq; labēti Reipub. pro-  
spicere, videreq; vti hij motus primo quoquo  
tempore compescerentur. Hæc nacti, nobiliū  
nominibus deletis atq; inductis, sua nomina  
inscribi fecerunt, Regijsque figillis auulsis, &  
ad sua commentitia diplomata affixis, ijsq; in  
publico

publico propositis, plebem imperitam, tantæque fraudis insciam deceperunt.

Iamq; eò sceleris ac dementiæ deuenerunt, vt nec à Gubernatoribus, nec à Ketto quidem ipso, seditionis Architecto & principe, tanti tumultus furor ac impetus retardari potuerit. Prætereà non solùm ij qui tantorum scelerum societatem cum illis coire recusassent, hostes iudicati, sed & multi boni ciues qui cum liberis & vxoribus conseruandi sui causa, ex vrbe profugissent hostium loco habiti. Qui quidem tanti periculi terrore tectis expulsi, cum nullo loco diutiùs consistere auderent, per multitudinis efferatæ vim ac rabiem, dispersi, dissipatiq; huc & illuc vagabantur. Multisq; lamentationibus ac lachrymis illorum temporum iniquitatem deflentes, conditionem patriæ miserrimam deploraerunt. Vrbi etiam incendium atque deflagrationem minitabantur, adeò vt ij qui in ciuitate remanserant, nihil aliud nisi



rerum omnium labem atque ruinam exspectauerint. Castrorum verò horribilis ac miseranda facies. Nam cum in illa magna multitudo vndique ex Anglia perditorum hominum latronumq; conuenisset, quos spes praedandi, otijque cupido ab agricultura quotidianoque labore auocauisset, tanta fuerunt flagitiorum monstra quae conceperunt, tantaeque in omni genere nequitiae ac libidines, ut eas quodammodo horreat ac reformidet oratio.

Illud certè constat, sicut omnium agris ac aedibus vndiq; vastitatem & solitudinem infandam intulerunt, sic quaecumque in castra deuecta sunt, lustris & helluationibus nequissimis celeriter consumserunt. Adeo ut incredibile penè videatur, ac portentisimile, quoniam modo illa, tam multa, tam exiguo temporis spatio deuorauerint. Nam praeter cygnorum, anserum, gallinarum, anatum, & volucrum cuiusuis generis numerum infinitum, ad tria millia bouum & ouium viginti diebus paucis in castris luxuriosissime absunta sunt.

Insuper



Insuper viuariorum vallis ac sepimentis (in quibus bestiolæ delectationis causa concluduntur) perruptis atque refractis : quicquid vsquam damarum conspici aut comprehendi potuit, crudelissimè confecerunt. Nihil erat clausum libidini, nō ratio futuri temporis adhibita, non ijs quæ postea acciderunt malis prouisum, nulli sceleribus ac nequitie termini defixi, sed miserandum in modum dissipata omnia & exhausta fuere. Tantæque ouium passim cædes, reliquiq; pecoris trucidationes factæ dicuntur, vt veruex drachma publicè veni erit, capitibus atq; extis, velut escis contemptissimis fastiditis atque reiectis, propterea quòd nullus inuentus fuit, qui illis in tanta delicatioris cibi copia vesceretur. Quid hic nemorum vastationes, ac sylvarum strages commemorem? quibus radicitus penè extirpatis atque defectis, omnem eam materiam quæ erat cæsa, aut incendunt, aut (quod multò foediùs fuit) in scelerum suorum sedibus ac latibulis exstruendis infumunt. Addi-



tur ad hanc tam atrocem licentiam, (talium plerumq; factorũ semper comes) crudelitas. Hominibus honestissimis ac integerrimis, à fœdissimis belluis, omniq; diritate teterrimis, catenæ iniectæ sunt, multisq; manicæ cõpedesque impactæ, quibus bini pariter reuincti, acerbissimum illum quasi carceris cruciatum ac carnificinam diutissimè pertulerunt.

Custodes etiam ad omnes portas & vrbis introitus dispositi, ne qui fortè elaberentur, iussiq; vicorũ submagistri vti viderèt ne quis vrbe excederet. Magniq; agrestium ac rusticorum hominum greges coacti, quibus præstitutum vt certis in locis vigilias & excubias agerent. Ijs à vicorum submagistris (vulgò Constabularij dicuntur) omnia ad libidinem & luxum suppeditabantur, adeò vt tantis, ac tam profusis sumtibus multi honesti viri, re familiari valdè comminuti, funditùs conciderint. Odium autem quod inclusum in animo, in omnes conceperunt, id crudelissimè in eos quos cõprehenderant, expromserunt.



VWhartonus erat quidam, (magno vir præditus animo, sed minimè populari:) hunc dum in Ciuitatē ad carcerem & vincula duceretur, ingens seditiosorum caterua circumsepsit atq; muniuit, destinata videlicet quæ ei præsidio foret, ne fortè in itinere à vesana multitudine violaretur. Sed nec VWhartonum sua probitas & fides, nec seditiosorum diligēs custodia satis tutata est, parumq; abfuit quin interficeretur, multiq; mortem illi & interitum intentarunt, corpusque illius plurimis in locis hastilibus & spiculorum cuspidibus perstrinxerunt.

Accidit autem vt eodem penè tempore quo hæc fiebant, contendentibus illis ad urbem, Moultonumq; quendam instar captiui trahentibus, (cuius odio deflagrarunt immani quòd esset vaferrius semper, venaliquè vir ingenio (erat enim leguleius:) nec non sicuti opinio fuit diris votis, ac horrendis superstitionum portentis, inferorum manes elicere consueffet) dum itaq; (vti supra dictum est)

Moulto-



Moultonum hunc mulierculæ cuiusdam in-  
dicio, in sylvis paulò antè repertū, atq; ex ve-  
pribus & dumetis, in quæ se melioris inops  
consilij recens abstruserat extractum, omni-  
busque oneratum probris & contumelijs se-  
cum pertrahunt, cœlum non sine ingenti au-  
dientium stupore, horribili tonitru contre-  
muit, maximique imbres grandine permisti  
defluxerunt, terræque repens labefacta est,  
vtpotè quæ non longè à Quercu (quam Re-  
formatoriam appellarunt) in immensam al-  
titudinem defedit. Cæterum tantum abfuit,  
vt ad hæc veluti diuina prodigia expauesce-  
rent, vt iam perindè ac si cœlesti voce incita-  
rentur, ardentiores ad omne nefas, & multò  
quàm antea fuerāt inflāmatiores exstiterint.

Neq; porrò minori tempestate conflictatæ  
sunt nobilium mentes, quos agrestes sæuitia  
insigni, atq; feritate detestabili furentes, catē-  
nis iniquissimè constrinxerant: qui omnes  
aut mortem quotidie pertimescebāt, aut ipsa  
morte diriora tormenta, & quæcunq; ab im-  
puris



purissimis latronibus cogitari potuerunt terrissima. Etenim nonnulli ac si quid nefandi sceleris admisissent, in desperatorum hominū coetum, tanquam ad iudicium vocati, ac pro Quercu constituti, veluti è vinculis causam dicere cogeantur. Cumque ab imperita & agresti multitudine quæsitum fuisset, quid de illis fieri decreuisset: vno veluti ore ab omnibus cōclamatū est, **SUSPENDEANTVR, SUSPENDEANTVR.**

Denuò sciscitantibus illis, cur hac tam truci voce vterentur in ignotos præsertim, & nullius noxæ aut criminis conscios, ferociter responsum est: usurpari illam vocem ab alijs, & ideò se vicissim eadem vsuros. Neq; prætereà quod dicerent habebant: quanquam alijs hanc huius crudelissimi clamoris rationem adferebāt, Generosos eos esse, & ideò de medio tollēdos, scire enim se, quòd si quando illi victoria potirentur, omnes sibi sint cruciatus, acerbitatesque perferendæ. Proin præstare vt his quos iam in potestate haberent, vita pri-

H.

uatis,



uatis ~~ipsi~~, ipsi demùm otio ac securitate perfruantur, quam illis vsuram vel vnus horulæ ad viuendum largiri, à quibus postmodũ veluti pecora trucidarẽtur. Adeo inuisum iam nobilium nomen erat & exosum, vt furore penè plusquàm hostili flagrantes, infime fortis homines, non nobiles tantùm, sed ipsam etiam (si fieri posset) Nobilitatis stirpem dele-re funditus & excindere concupierint.

Hunc igitur in modum cùm omnis propè Regio Norfolciensis huius funestissimi tumultus tempestate perculsa & afflictata fuisset, ac iam viginti ferè à primo dies elapsi interfluxissent, nihilque interim v-bique fieret, nisi vastationes, incendia, rapinæ, omniaque non modò miseranda visu, verumetiam auditu horrenda: tantus omnibus bonis, ac præcipuè ciuitati Norwicensi dolor iniustus est, vt ad hunc patriæ tam lugubrem aspectum assiduo pænè mœrore ac lachrymis contabuerint. Resistere autem huic tantæ improbitati, per illam quæ  
iam



iam vndique in castra conuenerat perditorum hominum multitudinem nequibant, & (quod caput erat) arma sumere iniussu Regis, lege, vt antè diximus, prohibebantur. A cuius consiliarijs quoniam nihil adhuc perlatum fuit, vrbi perniciem & deflagrationem quotidie metuentes, abscissa propemodum omni salutis spe, omnisque consilij inopes, intra muros permanserunt.

Erat autem tum fortè Londini Leonardus quidam Sothertonus, ciuis Norfolcien- Norwiche sis, qui illinc velut è flamma, & communi incendio vitæ conseruandę causa profugit. Hūc Regij Consiliarij ad se accersunt, & de illo omnia seditiosorum consilia sciscitantur & exquirunt. Sothertonus quæ sciret, enunciat: ingentem nefariorum colluuiem confluisse, ab his omnibus locis calamitatē ac pestem inferri, numerum indies augeri, nihil sceleris fingi aut excogitari posse, quod non conceperint, homines optimos cōprehenso,

H.ij.

ac



“ ac in vincula ductos, domos direptas, agros  
“ vastatos, sylvas incensas & prostratas, pecus  
“ omne trucidatum, præ rabie ac furore nihil  
“ vspiciam intactum inuiolatūmve relictum, sed  
“ populari petulantia cuncta confundi: vrbi  
“ etiam nisi celeriter cōsultum & prouisum sit  
“ interitum & ruinam impendere. Sperare se  
“ tamen, atq; etiam inaudisse, permultos esse in  
“ illis castris ac scelerum speluncis, qui propo-  
“ sita sibi apud Regem veniæ ac impunitatis  
“ spe, arma abiecturi sint, & Maiestatis Regiæ  
“ clementiam amplexuri. Obsecrare ergo, &  
“ vehementer ac demississimè contendere, vt  
“ publico edicto Rex fidem astringat regiam,  
“ fore omnibus impunè, qui ab illis castris di-  
“ scesserint, posse ita facilimè hos coetus dissi-  
“ pari. Comprobato consilio, ex Regis autho-  
“ ritate & sententia statuunt atq; decernunt.  
“ Maiestati Regiæ placere, ægrotæ atq; affli-  
“ ctæ Reipublicæ, primo quoque tempore me-  
“ dicinam adhibere, quò à periculosissimis illis  
“ motibus, & seditionum malis, quibus eam  
“ perfidiæ



perfidia pestis involuisset expiata, conuale-  
sceret. Verū tamen omnia experiri velle, pri-  
usquā id quod in illa contactum esset atque  
pestiferum (ne reliquo corpori noceret) am-  
putaretur. Proin decreuisse: poenas iamdiu  
improbitati, nequitia, sceleri, ac libidini debi-  
tas tantisper differri, spem salutis cunctis si in-  
coepto absisteret, denuntiari, fidem Regiam  
interponi, omnem seueritatis metum præci-  
di, dummodò possint clementia & mansue-  
tudine ad pacem sanitatemque perducī. His  
igitur hunc in modum deliberatis atque sta-  
tutis, hoc solummodò restabat, vt hæc Maie-  
statis Regiæ misericors clementia plebi è ve-  
stigio proponeretur. Fecialis ad id missus,  
(qui eodem Leonardo Sothertono Comite  
ad celeritatem adhibito) magnis itineribus  
Norwicum contendit. Illinc in castra conti-  
nuò progressi, caduceator propter Quer-  
cum stans fecialibus indutus insignibus, clara  
voce ita vt omnes, qui vndique circumfun-  
debantur, loquentem exaudierint. Audite

H. iij.

(inquit)

« (inquit) audi tu scelerū signifer Kette, & vos  
« omnes quotquot adestis, audite.  
« Etsi mos maiorum, & huius imperij digni-  
« tas, & nominis Regij Maiestas postulare vi-  
« deatur, vt vos qui nefaria in patriam arma  
« sumfistis, & in apertam coniurationem ac  
« latrocinium vosmetipsos coniecistis, hostium  
« instar ferro ignique profligati, debitas scele-  
« rum quæ concepistis poenas sustineatis: ta-  
« men Maiestatis Regiæ tanta mansuetudo est  
« atque clementia, vt quos ad poenam & sup-  
« plicium sceleris atrocitas deposcat, eos tamen  
« pro singulari & incredibili benignitate con-  
« seruatos velit & incolumes. Proin iubet vt  
« protinūs omnes arma deponatis, castra hæc  
« & furorum cubilia relinquatis, domum de-  
« cedatis, errori si id feceritis veniam largiri, ac  
« omnium quæ suscepistis flagitiorū impuni-  
« tatem. Sin autem in sentētia, & perfidię pro-  
« posito permanseritis, se cuncta maleficia &  
« scelera quæ patraſtis, acerrimē, vt par est, ac  
« omni supplicio vindicaturum, nec pas-  
surum



furum hæc quæ resecanda sunt & sanari non „  
poterunt, longius ad perniciem totius Regni „  
dimanare. „

Hoc cum magna (vt antè dictum est) voce  
promulgasset : ab omni pænè multitudine  
conclamatum est, REGIAM MAIE-  
STATEM DEVS TVEATVR  
INCOLV MEM. Is clamor cum idē-  
tidem redintegraretur, multi in genua pro-  
uoluti, hanc tantam & tam inauditam cle-  
mentiam ac misericordiam laudibus ac la-  
chrymis profecuti sunt. Quam quidem om-  
nes tum proculdubiò complexi fuissent, vt-  
potè quorum animi pudore ac metu sensim  
infringi, ac remollescere cœperunt, si non sce-  
lestissimæ nonnullorum voces, Ketti que ad-  
hortationes perfidiosissimæ, eos à pacis co-  
gitatione auersos, denuò ad sceleris consensi-  
onem retraxissent. Ille asperè sanè & feroci-  
ter respondit.

Consuesse Reges flagitiosis hominibus nō „  
innocentibus & integris veniam dilargiri. „

Nihil

« Nihil se meritum, nec vllius sibi culpæ con-  
« scium, proin eam vt inanem ac suis rationi-  
« bus inutilem aspernari. Exin conuersus ad  
« suos, rogat ne se deserant, nèue animo conci-  
« dant, sed meminerint quo se fœdere obstrin-  
« xerint: paratum se qui vitam (si opus sit) pro  
« eorum salute profunderet.

Hæc vbi rabidè iracundeque dixisset: Fe-  
cialis homini turpissimo, & tot perfidiæ no-  
tis insigni, imminutæ Maiestatis crimen in-  
fligit, eumque proditorem teterrimum, &  
summi sceleris reum pronunciauit. Iussitque  
deindè Ioannem Petibonium Prætoris ensi-  
ferum, latroni profligatissimo actionem per-  
duellionis intendere. Enimuerò tum tumul-  
tuari coëptum est, vtrisque hinc atq; illinc, nō  
minùs pertinaci, quàm pernicioso certamine  
contēdentibus. Fecialis videns iterum labare  
plebis animos, (quos antea pacis denūciatio-  
ne nō nihil emolliuerat) & Ketti verbis velut  
furiarum stimulis instinctos, à salute quā pri-  
us amplexuri videbantur, denuò ad scelus  
nequi-



nequitiamque deuolui, castris excefsit. Multique eum nihilominus mortales confecuti sunt, qui abiectis prioribus confilijs armisque depositis, Regis se fidei permiferunt. Hij omnes vnà cum Prætore & Thoma Alderichio in ciuitatem ingrefsi.

Prætor continuò portas obstrui iubet, præcipuè verò eam quæ Episcopalis seu Pontificia nuncupatur, quòd illac è vestigio (nisi celeriter huic confilio obuiam itum fuiffet) feditiosi in oppidum irrupturi viderentur. Ad hæc omnes generosi quos antea diximus, à Kettianis in carcerem coniectos, leuati vinculis & è custodia emiffi fuere, adhibiti que in concilium, quæfitumque ab illis qui potiffimum hostium impetus retardari poffent: rationesq; initæ vrbis defendendæ, ne perditorum introitu ac militari licentia omnia diriperentur. Placuit ad extremum ciuitatem quaquâ verfus muniri, portas murosque afferuari, custodias vigilasque disponi, itinera intercludi, quò commeatus supportandi facul-

tate vñdique incisa atq; prærepta, coniurato-  
rum animi cibariorum inopia, & bellandi tē-  
dio perculsi languescerent.

His de rebus, dum remotis arbitris multa  
inter se ( vt fit ) deliberabundi ac consultan-  
tes egissent, trepidi à portis nuntij superue-  
niunt, rem atrocem incidisse prædicantes.  
Multos esse ciuium qui se horum scelerum  
communione cōstrinxissent: ex his nonnul-  
los è Kettianis militibus quamplurimos in  
vrbem intromisisse. Cū hoc tantum repē-  
tini periculi præter opinionem contigisset, &  
seditiosi in vrbem ingressi, cuncta protinùs  
direpturi viderentur, isq; metus omnium a-  
nimos perstringeret, à primoribus vrbis fa-  
cilè impetratū est, vt generosi denuò in car-  
cerem cōcluderētur. Ne fortè cōspectis ijs in  
ciuitate solutis, ac demptis, quę recens iniecta  
fuere vinculis, seditiosorum animi furoris &  
irarum pleni, ad cædem & sanguinem irrita-  
rentur. Conuocati omnes atq; iterum in cu-  
stodiam conclusi. Postea tamen intellectum  
hostes



hostes vrbe qua venerant, egressos, in castra recessisse. Prætor ac primores hoc periculo defuncti, videntes cōiuratos, omniū iam fortunis vndiq; perniciē aq; interitū machinari, totos se in ciuitatis cōseruandę cura defigunt. Quāobrem decē maioribus tormētis versūs hostes in fossa (quæ castello circūditur) directis, & ad vrbis defensionē (si qua vis ac impetus fieret) aptē dispositis, quibuscūq; in locis, ac potissimū in ijs quæ vetustate iam dilapsa corruerunt, custodias vigiliasq; constituunt. Quibus protinūs ibidem cōsistere iussis, vt si qui nocturnus hostiū terror incideret, continuo lapidibus, telisq; disiecti, vrbe portisque depellerētur: ceterę multitudini imperatū, vt ad quemuis euentū armata omnis in foro, & in trāsuerfis viarū diuerticulis præstolaretur.

Et quoniā apparebat tormenta (quæ quidē prius diximus) in fossis & murorū ruinis defixa, nec hostibus multum obfutura, nec ciuib; quicquam ad defensionem opis allatura, idcirco Prætoris imperio ea omnia in planiciē

confestim deuecta sunt: ijsq; prata quæ inferiori vrbis parti subiacent, celeriter instructa. Noxq; ferè tota quæ infecuta est, crebris atq; infestis vtrinque tormentorum emissionibus absumta fuit.

Postero die coniurati vicissim cernentes, ex illo nocturno tumultu, plus vrbi terroris quàm cladis illatum ( propterea quòd glandes quæ è bombardis emitterentur, ciuitatem tranfvolantes, damni nihil fecissent) tormētis quæ habebant omnibus è summo in planum deductis, ijsq; ad radices montis defixis, urbem quater de integro cœpère.

Verùm enim uerò quòd non ita multò post totis castris cibariorum inopia premi cœptū est, quò commodiùs posset ex finitimis locis commeatus subuehi, inducias cum ciuibus pacisci decreuerunt. Iacobum quendā Guilielmum, & Radulphum Suttonum, homines impurissimos, ac de infima ciuium Norwicēsium plebe postremos, huic muneri defungendo præfecerunt. Hij protinùs illinc cū indu-



induciarū vexillo ad portas profecti, & permissu ciuium ad Prætorem & Senatū introducti, demū ita locuti traduntur.

Dux noster Kettus, eiusque commilitones, „ ab hac ciuitate & à vobis Prætore, patribusq; „ paucorum dierum pacem & inducias deposcunt. Quò sibi per urbem (sicuti nuper fieri „ consuevit) detur commeatus supportandi facultas. Quam utiq; nisi concesseritis, per vim „ se in oppidum irrupturos, atque cuncta ferro „ flammaque deleturos denunciant. Prætor ad „ hæc respondit. „

Proditores esse illos tēterrimos, perfidia & omni inaudita nequitia coopertos. Nolle se „ eorum iniquissimis postulationibus quicquā „ deferre: nec si velit, licere quidem: præsertim „ illis (hominibus qui vnquam post homines „ natos exstiterunt) turpissimis. Tot illos, tanta „ ac tam intolleranda facinora suscepisse, vt nō „ solū è ciuitate excludendi, verumetiam ex „ finibus humanæ naturæ (si fieri posset) penitus exterminandi viderentur. Regiam ab illis „



Maieſtatem imminutam, patriam vaſtatam,  
« Norwicensem penè omnem ciuitatem qua-  
« quà verſus depopulatam, ſibi poſteriſq; æter-  
« num ſcleris & perfidiæ dedecus inuſtū, per  
« vim ac nefas vexata, polluta, perturbata, diſ-  
« ſipata omnia: tamen vt in ciuitatem admittā-  
« tur rogare? vt ſint eo iure quo ciues? fructuū  
« ac munerum diuinorum participes? inopiæ  
« demū vt ab his ſubueniatur deprecari? Quid?  
« non poenitere ſclerum quibus ſe obſtrinxif-  
« ſent? ne pudere quidem? Enimuerò ſtatuer  
« nō poſſe ſcleratioresne ſint qui hæc patrarint,  
« an impudentiores qui iſtæc poſtularint. Spe-  
« rare verò ſe à Prætore, & eodē Prætore, quem  
« nuper carceris contumeliam perferre coëge-  
« runt, ab hac vrbe, quam funditūſ exciſam cu-  
« piunt, à populo Norwienſi, cui vim ac belli  
« terrorem vndiq; intulerunt, annonam & cō-  
« meatum (veluti furoris pabulum) ſubmini-  
« ſtratum iri, cuius tandem dementiæ videri?  
« Eant ergò eant, & Ketto conſcleratorū fla-  
« gitioſiſſimo duci hæc renūtient. Ciues Nor-  
wienſes



wicenses Regiæ Maiestati, non patriæ prodi-  
tribus & belluis immanissimis obtempera-  
turos. Se ne tanti quidem facere pericula &  
terrores, quæ vrbi ab illis intenderentur. Ir-  
rumpant, vastent, deleant, excindāt, proster-  
nant, depopulentur omnia, dūmodò vindicē  
sciant & ultorem Deum, & tantorum tandē  
conscientia scelerum perhorrescant. Datturos  
enim proculdubiò eas propediē pœnas, quas  
ipsimet sibi furore & amentia contraxissent.

His in castra ad Kettū & comites celeriter  
perlatis, impotēti ira odioq; (tanq̃ œstris) per-  
citi, clamore truci ac infesto vociferantes de  
colle decurrerūt. Cūq; propè ad portas per-  
uenissēt, omni vi cōnixi sunt in vrbē irrūpe-  
re, sed telis sagittisq; repulsi, eo conatu destite-  
rūt. Ac tum quidem quicquid erat tormēto-  
rum, (quæ antea diximus in subiectos vrbi  
cāpos delata) id omne à nostris in hostes effu-  
sum: cæterum in magna tormentarij pulue-  
ris inopia, & libratorum imperitia, parum  
aut nihil sanè profectum. Verum <sup>tamen</sup> ~~etiam~~ multi  
sagittis



sagittis confixi vulnerabantur, quæ cum in terram frequentes decidissent, puberes rusticani (quorum erat numerus ingens) & alij de fece homines sordidissimi eas legere solebant & ad hostes deferre. Adeoq; omnes exarserant animis, ut inermes etiam pueri (perindè ac si vis quædam illos à sensu mentis abstraxisset) passim discurrentes, omni verborum contumelia nostros lacefferent.

Addebatur huic maledictorum importunitati facinus odiosum & immane. Etenim (legentibus tamen honos præfandus est) quidam ex illis clunibus detectis, & ad ludibrium in nostros versis, truci clamore ac ululatu cuncta complentes, palam, spectantibus omnibus, ea fecerunt, quæ ab homine verecundo scribi non possunt. Sed natibus transiectis, nonnulli dignas (uti par fuit) sceleris poenas dependerunt. Quinetiam ferunt quosdam ex illis sagittas in corpore defixas (horrendum dictu) ipsos suis manibus è recenti vulnere extraxisse, illasq; (ita uti erant) cruore & sanguine stillan-



stillantes, ex coniuratis ijs qui circumsterant dedisse, quo in nostros refunderentur. Tanta inerat in omni pænè ætate cuncta delendi cupido, tantaque sanguinis hauriendi sitis.

Interea verò cum ex altera parte ciuitatis horribilis clamor oriretur, AD ARMA, AD ARMA, Ciues si viri estis AD ARMA: hostes in vrbe sunt: illucq; omnes de repētè, vti trepidantiū mos est vbi maximè tumultuantium voces strepitusque exaudiuntur, concurrissent, coniurati de superiore loco omnia cōtemplātes, & oppidanos raros in muris, & pro portis conspicati, extēplò eam partem ciuitatis quam defensoribus vacuam vidissent inuadere statuerunt. Ibi pueri ( de quibus antea diximus ) & ex illa colluuione agrestium, turba ingens, rem ausi sunt non modò visu mirabilem, sed & auditu profectò incredibilem. Namque inermis cæteròqui multitudo, pars fustibus & gladijs, alij baculis, sparibus, aut lanceis, ( vt quemq; casus

K.

arma-



armauerat) instructa, in fluuium quo vrbs ad  
portā ( quæ Episcopalis appellatur ) alluitur  
præceps se demisit. Quem intrepidè tranātes  
& ad portas tumultuosissimis clamoribus  
vociferabundī deuolantes, omnium mentes  
tāto horrore perfuderūt, vt nullus pænè ex-  
sisteret qui non eū diem sibi vrbiq; fatalē fu-  
turum crediderit. Itaque pauidi ferè omnes  
consternatiq; diffugerunt, & qua cuiq; daba-  
tur iter in domuum ac tectorū abdita (vrbem  
indefensam relinquentes) obstrepserunt. At  
cōiurati omnibus portarū claustris reuulsis,  
quodcunq; tormentorū & instrumenti mili-  
taris reperibant è ciuitate in castra transpor-  
tarunt. Ibi cū è nostris nonnulli ex harum  
rerum miserabili intuitu, dolore ac cōmise-  
ratione perculsi, voce flebili, ac oculis lachry-  
mantibus, hanc tātā à ciuitate calamitatem  
deprecarētur: à pueris, & rusticanis, qui ludi-  
bundi circumsteterunt, proditores appellati,  
ac indignissimum in modum omnibus pro-  
bris maledictisq; lacerati, afflictisq; fuēre.

Sedenim



Sedenim patefactis iā (vt antea diximus) portis, cum omnia seditiosorum audacia violentiaque permiscerentur, (frequentes enim ē castris in oppidum conuenerant) Fecialis (namque adhuc in vrbe fuerat, necdum dies vltima à Maiestate Regia multitudini præstituta, ante quam liceret sine fraude ab armis discedere præterierat) cum Prætore in forum magna multitudine ciuium circumfusus deuenit. Ibi Regis nomine denuò denuntiat vti arma deponant, castra relinquāt, domum (quisque suam) decedant, misericordia & clementia Regia supplices vtantur, si fecerint saluos se fore, omnisque supplicij securos: alioquin nihil aliud nisi acerbissimos cruciatus, mortem, extrema denique omnia expectanda. Huic cum dixisset arroganter sanè & asperè à seditiosis succlamatum est: Iret in malam pestem malumque cruciatum, cum suis inanissimis pollicitationibus: insanire ipsum qui talibus blanditijs in illorum aures influens, confideret eos



« verborum lenocinijs delinitos, oppressos ad  
« extremum & circumuentos iri. Istiusmodi  
« verò misericordiam detestari se, & modis  
« omnibus execrari, vtpotè quæ extrinsecus  
« lubrica & inani impunitatis obiecta spe, pe-  
« nitùs omnem insidiosissimè salutem præcidat  
« & amputet.

Fecialis videns cunctos furori & nequi-  
tiæ veluti mancipatos iam, & addictos, nec  
posse vllò vel supplicij metu, vel impunita-  
tis spe, de sceleris cogitatione deduci: infe-  
cta re, vrbe confestim excedens, ad curiam  
reuertitur. Protinùs à cuius discessu coniu-  
rati Leonardum Sothertonum ad se acciri  
iubent, quò illi vincula inijcerentur, quòd is  
se comitem feciali in itinere coniunxisset.  
Sed Sothertonus re intellecta, veritus ne in-  
sana & turbulenta plebs, odio quo in omnes  
bonos incitata flagrabat, corporis illi carnifi-  
cinam, necémue infligeret, clanculùm apud  
suos in ciuitate delituit. Deindè Kettus præ-  
torem, Robertum VVatsonum, Guiliel-  
mum



mum Rogerum, Ioannem Homerfonum, Guilielmum Bramptonū, & alios complures comprehensos, ē ciuitate in castra, atque indē in custodiam deduci iubet. Quamobrē omnibus catenæ iniectæ, atque in montem Surræium conclusi, ibique ad extremū coniurationis diem in carcere, ac vinculis detenti, tandem pars dimissi, pars verò crudelissimè interfecti sunt.

Dum hæc & huiuscemodi in castris tumultuosissimè geruntur, Kettus cernens eò iam rem deuolui, necesse vt sit illi aut cruenta victoria contra patriam potiri, aut dignum moribus factisq; suis exitum propediem sortiri, commodissimum suis rationibus existimauit si copiæ quàm possent maximæ contraherētur. Quamobrem omnes vndiq; qui conciri poterant fugitiuos, & homines tam à re quàm à spe derelictos, præmijs ac pollicitationibus illexit, vt sese ad societatem huius execrandi tumultus adiungerent. Itaque incredibile est, quantam & quàm penè innumerabi-

K. iij. merabi-



merabilem facinorosorum hominum multitudinem de repente conflauerit.

Attamen ciues indignè ferebant Prætorem suum virum optimum & integerrimū, à flagitiosissimis ficarijs, & sanguinis vt iam videbatur sitientissimis vinciri, & victo insuper carceris contumeliam & dedecus impingi, metuentes etiam ne tandem ab illis ciudelissimè per vim morte mulctaretur, eò quòd pars eorum multa atrocìa illi minitarentur: pars verò honestissimi viri nomen scurrili & insulso ridiculo, necnon periculoso ( vtpotè quò mors illi quodammodò portenderetur ) perstrinxissent. Nam cùm Coddus nominaretur, piscis autem sit marinus, quem nostrates **COD** appellant, ( qui idem Latinis Capito nuncupatur ) in Prætoris optimi nomine ac periculo ansas ad risum & ludibrium alter alteri inuicem subministrantes, identidem clamare & vociferari solebant, vti omnes crastinò conuenerent, Capitonis caput eo die publicè in castris  
denario



denario vñum iri. His de causis veriti,  
ne à seditiosis grauius aliquid in eum sta-  
tueretur, Prætoris de se optimè meriti pe-  
riculo mirificè perturbati, ad Thomam Al-  
derichium certatim de hac tam importuna  
audacia, violentiaque effrænata questum  
venerunt. Fuit hic Alderichius vir (vti  
antè diximus) omnibus vehementer cha-  
rus, tantumque prudentia, grauitate, &  
modestia perfecit (erat enim impigro atque  
acri ingenio) vt immanissimis etiam ho-  
stibus illius nomen plerumque terrori existi-  
terit. Nam cum illum omnes magnope-  
rè dilexissent, singularem eius humanita-  
tem ac modestiam admirantes, in tantam  
(etiam apud seditiosorum principes) autho-  
ritatem breuè peruenit, vt eius neque consili-  
um, neq; inceptum vllum frustra vnquam  
ceciderit. Itaque multis bona, quæ per vim  
à coniuratis adempta fuerant, illius opera re-  
stituta sint, multiq; Rebellium pestiferi co-  
natus eius prouidentia ac sedulitate restincti.

Hic



merabilem facinorosorum hominum multitudinem de repente conflauerit.

Attamen ciues indignè ferebant Prætorem suum virum optimum & integerrimū, à flagitiosissimis ficarijs, & sanguinis vt iam videbatur sitientissimis vinciri, & victo in super carceris contumeliam & dedecus impingi, metuentes etiam ne tandem ab illis crudelissimè per vim morte mulctaretur, eò quòd pars eorum multa atrocia illi minitarentur: pars verò honestissimi viri nomen scurrili & insulso ridiculo, necnon periculoso ( vtpotè quò mors illi quodammodò portenderetur ) perstrinxissent. Nam cū Coddus nominaretur, piscis autem sit marinus, quem nostrates **COD** appellant, ( qui idem Latinis Capito nuncupatur ) in Prætoris optimi nomine ac periculo anfas ad risum & ludibrium alter alteri inuicem subministrantes, identidem clamare & vociferari solebant, vti omnes crastinò conuenerent, Capitonis caput eo die publicè in castris

denario



denario vānum iri. His de causis veriti,  
ne à seditiosis grauius aliquid in eum sta-  
tueretur, Prætoris de se optimè meriti pe-  
riculo mirificè perturbati, ad Thomam Al-  
derichium certatim de hac tam importuna  
audacia, violentiaque effrænata questum  
venerunt. Fuit hic Alderichius vir (vti  
antè diximus) omnibus vehementer cha-  
rus, tantumque prudentia, grauitate, &  
modestia perfecit (erat enim impigro atque  
acri ingenio) vt immanissimis etiam ho-  
stibus illius nomen plerunque terrori existi-  
terit. Nam cum illum omnes magnope-  
rè dilexissent, singularem eius humanita-  
tem ac modestiam admirantes, in tantam  
(etiam apud seditiosorum principes) autho-  
ritatem breuè peruenit, vt eius neque consili-  
um, neq; incoëptum vllum frustra vnquam  
ceciderit. Itaque multis bona, quæ per vim  
à coniuratis adempta fuerant, illius opera re-  
stituta sint, multiq; Rebellium pestiferi co-  
natus eius prouidentia ac sedulitate restincti.

Hic



Hic igitur cū quanto in discrimine Prætoris salus ac vita versaretur, intellexisset, indignitate rei permotus, ad Kettum in castra perrexit, monet vti Prætori vincula adimeret, eumque è custodia liberaret. Ad hæc Kettus cū veluti cogitatione defixus, verbum nullum emisisset: Alderichius clara voce inclamans, non te pudet proditor nequissime, non dico hominem innocentissimum, sed Prætorem, id est Regiæ maiestatis vicarium fidelissimum, carcere ac vinculis coercere? Adeone ferox & cruentus es, vt cū omnium fortunas ac bona luxu ac libidine dissipaueris, satiari iam non potes nec expleri, nisi ad extremum innocentium etiam sanguinem exorbueris? Quin ergo homo omnium quos terra sustinet sceleratissime, eum confestim de custodia deduci iubes?

Hæ verborum tanquam faces acriter in Kettum intentæ, tantam siue hominis qui loquebatur verecundiam, siue quod verisimilius est ex scelerum conscientia metum ac

for-



formidinem incusserūt, vt quod alij precibus atq; omni cōtentione impetrare nequissent, id ille minis ac orationis grauitate perfecerit. Cuius prudentia Prætor libertatem adeptus, etsi prorsus omnem illā turbulentissimi temporis procellam deuigare nō potuerit, tamen & carceris acerbitem & vitæ periculū felicissimè subterfugit. Quamobrem facta illi vltro citroq; in ciuitatem com̃eandi facultate, multis postea ciuiū in ijs malis quæ tum urbem oppressere subsidio fuit illius probitas & industria. Et quoniam omni tempore ad gubernacula ciuitatis sedere nequibat (quippe qui plerumq; perpetuò in hostium castris cōmorari coactus fuerat:) Augustino quodā Stuardo in illius locum suffecto, omnem vr̃bis defendendę curam (se absente) delegauit. Qui quidem ascitis sibi Henrico Bacono, & Ioanne Atkinsono vicecomitibus, ciuitati diligentissimè præfuit, omnesq; oppidanos (nisi qui fortè immaniores exstissent) in officio facilè continebat.

L.

Cæte-



Cæterum hic operæpretiū erit referre, quā tristes & tetrici Iudices exstiterūt in eos quos captos, & in vinculis detentos, omni ludibrio & ignominia crudelissimè affligerunt. Quorum tanta fuit atrocitas & nequitia, vt quos singulari primum & inaudito scelere violassent, eos ad extremum diuexatos, & acerbissimis affectos iniurijs, stolidissimæ & insanissimæ multitudini iugulandos obiecerint. Indicto namq; die, quo comprehēsi velut rei in publicū producerentur, vt præposito Iudiciorum more quæstio de ijs exerceretur: Kettus palam omnibus inspectatibus, arborē quā vocant **REFORMATORIAM** conscendens, (ordine vnoquoque nominatim citato) ab affeclis & scelerum cōscijs qui circumfusi steterūt, sciscitari solebat: quidnam illis videretur? Ibi furiosissimi nebulones, de vita innocētissimorū hominum quæsitores ac iudices constituti, si nihil de reo cōperissent, **BONVM VIRVM** eū esse, **BONVM VIRVM**, & absolui debere



debere conclamarunt. Sin autem tenuissima alicuius leuissimi criminis suspicione, illius qui nominaretur fama perstricta fuisset, aut quæuis vel minima res reperiretur, qua fortè quempiam ex illis aliquando offendisset, **SUSPENDEATUR, SUSPENDEATUR** respondet aliquis: cuius voce cætera plebes velut furijs instincta, tametsi hominem albus aterue fuerit penitus ignoraret (vtpotè cuius antea nomen ne audierit quidem) tamen idipsum semper vociferari consuevit.

Atq; hunc in modum proditores pēstiferi, non iudicio & ratione ducti, (ne sui fortè dissimiles viderētur) sed cæco ac repētino quodā impetu animi (quasi turbine) correpti, vno persæpè verbo, & vesano veluti furoris nutu, viris integerrimis miserrima & crudelissima supplicia inflixere. Tanta certè vis morbi, atque vti tabes omnium animos inuaserat, vt alienatis propè sensibus, & tantorum scelerum atrocitate stupefactis, omnia



iura diuina & humana immani furore & audacia polluerint.

Paucis ab illo tempore interiectis diebus, rei militaris præfectura, belliq; administrandi potestas, **GVLIELMO PARO** Marchioni **NORTHAMTONI-ENSI** ex imperio regis delata est: iussūq; uti protinus Norwicum cōtenderet, daretq; operam ut quoniam hij tanti furores, clemētia ac mansuetudine consopiri nequiuissent, Kettianos perindē ac proditores & Maiestati Regiæ hostes immanissimos ferro flammāq; persequeretur. Northamtoniensis ex sentētia rebus omnibus paratis compositisq;, cum mille quingentis militibus (sicuti imperatum fuit) paulò post Norwicū proficiscitur. Erant autem illo in exercitu reguli duo, Sheffieldensis, & VVentworthēsis, præterea Anthonius Dēny, Richardus Southwellius Radulphus Sadlerus, Ioānes Gatesius, Thomas Pastonus, Henricus Bedingfieldus, Ioannes Suliardus, Gulielmus VValgruius, Ioan-



Ioannes Cutzius, Thomas Cornwalleyfius, equeſtris ordinis viri. Ad hæc Armigerorū, & Generoſorum, tam Anglorum quàm Italorum, cateruæ ſplendidiffimæ.

Cū iā mille tantū ab vrbe paſſuū abeſſet Marchio Northamtonienſis, fecialē conſtitim præmiſit, qui vrbi (ſicuti mos eſt) niſi paruiffet, bellū indiceret. A quo omnibus quæ fieri cōſueſcunt, in ciuitate promulgatis atq; tranſactis, Auguſtinus Stuardus vrbiſ prætor, celeres protinūſ nuntios dimittit, qui Coddō Prætori renūtiarēt, (inuitiſſimū hūc antea diximus in Ketti caſtris detentū) quæ mandata Regio nomine ciuitati à Marchione Northamtonienſi proponerētur. Hiſ eādem qua proſecti ſunt celeritate reuerſis, demū feciali à Prætoſe reſponſum. Nihil ſibi „ vnquam in vita accidiffe triſtius, quàm hæc „ mala quæ à ſeditioſiſſimis hominibus inuecta, „ patriam ac ciuitatē Norwicenſem, antea flo- „ rentem, iam pænè inexpiabili ſcelere peruer- „ tiſſent. Se quantum humana ratione proui-



“deri potuit) omni spe adnixū, vti hij tumul-  
“tus primo quoquo tēpore profligarētur: ne-  
“quissē tamen præ scelerum rabie quibus im-  
“plicate omniū mentes tenerētur. Carceris se-  
“terrorem, mortis pericula, omnes deniq; acer-  
“bitates pertulisse, ac nunc quidē ab hostibus  
“vndiq; circūseptū teneri, alioquin (sicuti par-  
“erat) ad Marchionem Northamtoniensem  
“cōfestim vēturum fuisse. Verum enimverò  
“quò facilius ciuitatem in officio contineret,  
“eius tuendæ auctoritatē Augustino Stuardo  
“homini industrio delegasse, ne fortē se absen-  
“te, plebs per imprudentiā laberetur. Urbē in  
“illius potestate futurā, seq; (si Kettus permit-  
“teret) libenter ad eum iter in castra susceptu-  
“rū, & suas, ciuitatisq; fortunas, eius fidei per-  
“missurū. Hijs properē per fecialem ad Nor-  
“thamtoniensem delatis, Proprētor cōtinuò cū  
“vicecomitibus ac magno ciuiū numero sub-  
“secutus, in Northamtoniensis castra conces-  
“sit. Cui ense tradito (insigne is est Regiæ ma-  
“iestatis & potentiæ, atque in maximis An-  
glia

glia ciuitatibus prætori semper præferri con-  
suevit) demonstrat quemadmodum prætor ipse  
(quod maximè in votis erat) venire nequi-  
ret, se tamen atq; primores ciuitatis suæ ad-  
se, qui urbem, se, suaq; omnia in fidem atq; po-  
testatē Regiā transdaret: fateri permultos op-  
pidanorum exstitisse, qui deterreri non potue-  
rint, quin cū his consentirent, maximā tamen  
optimorum ciuiū partē in fide ac officio per-  
mānisse, neq; se cum reliquis cōiunxisse, neq;  
cōtra maiestātē Regiam omnino coniurasse:  
hanc paratā esse, & imperata facere, & eum  
exercitūq; in ciuitatem accipere. Northam-  
toniensis oppidanorum animos verbis cōfir-  
mauit, pollicitusq; est sibi ciuitatē curæ futu-  
rā, magnam se habere spem, fore vti hij tanti fu-  
rores, quibus nunc omnia arderēt, breui cō-  
pescerentur. Quæ cū dixisset, Southwellio  
ensē tradidit: quē ille (qui honos semper à no-  
stris, Præfectis regijs antiquo more & solenni  
deferatur) nudo præ ferens capite, Northam-  
toniensi in ciuitatem præibat. Qui per por-

tas



tas D. Stephani ingressus, protinùs indicit, uti omnes ad se in forum conuenirent. Ibi diu deliberatum, multaq; à multis tam ad vrbs defensionem quàm ad hostium impetus retardandos excogitata. Tum vigiliæ in muris & prò portis excubiæ, omnibusq; in locis (si quæ fortè infirmiora videbantur) armati ad quemuis euentum collocati.

His constitutis rebus atque peractis, Northamtoniensis sub noctem, venit in domum Proprætoris, ibique cum cætera multitudine Nobilium, ac Generosorū cœnatus est. Peracta coena, cuncti in illis ædibus, etsi itineris tædio, ac æstu languidi, armati tamen, ne incauti opprimerentur, ea nocte conquieuērūt.

Atq; hic casu ne, an consilio euenit, nondū satis comperi, factum tamē est, ut Itali quidā cum magna Coniuratorum manu (multis utrinq; vulneribus acceptis & illatis) conflixerint. E quibus vnus, cū intrepedantius se in medios hostes inferret, vir fortissimus, primū multitudinem circumuētus, ad extremū captus,

captus, & ignominiosissima morte affectus est. Nam vestibus omnibus, & armis (quibus indutus erat sumtuosissimis, & affabrè sanè factis) detractis, nudum eum (multis tamen prius affectū probris & cōtumelijs) de quercu in arce Surriensi suspēderūt. Magnū equidē omnes acceperunt dolorē, ex tā crudeli, ac miserabili morte optimi viri, ac militis præstantissimi, hancq; tam atrocem ignominiam ab illo (si licuisset) pecunia (quanta certè æstimari non potest) libētissimè redemissent. Verūtamē ex huius calamitate, statim initio perspectū, qualis & q̄ detestabilis in ijs qui contra patriā scelerata arma sumserūt inesset immanitas. Quanquā nō ita multo post consilio diuino (neq; enim malos diu cōsistere patitur inultos innocentū profusus cruor) Caymus ipse qui author huius tantæ crudelitatis exstiterat, eodem genere mortis, etsi nimium feras, dignas tamen tam execrabili sæuitia pœnas suscepit.

At enim Northamptoniensis nocturnos

M.

hostium



hostium in urbem introitus metuens, iussit ut custodiæ, & vigiliæ, (quas antea diximus diuersis in locis dispositas, in muris, & portis, cōstitisse) acerbius, & diligentius (quā vulgò fieri consuevit) circumirentur. Quò (nostrorū tū oculis tū animis in omnes hostiū conatus paratis atq; intentis) si quæ fortè nocturni tumultus procellæ exsuscitarētur, eorum cōsilijs facilimè, ac nullo negotio occurrì posset & obsisti. Quod quidem à cēturionibus sedulò factum fuit, cæteriꝫ omnes milites in foro excubabāt, qui magna lignorū strue exstructa, eandem incenderunt, ne si quid fortè contingeret, nostri tenebris & locorū inscitia impediti, hostiū insidijs, imprudentes, & incauti, circumuenirentur.

Edwardus V Varnerus, (equestris ordinis vir) & tum tribunus militum (Mareschallū vulgò appellant) tesseram dedit. Thomæ autem Pastono, Ioanni Clero, Gulielmo Valgrauio, Thomæ Cornwaleisio, Henrico Bedingfeldio, (exploratæ virtutis, atq; pruden-

multorū .M. tia

tia viris ) diuersæ vrbis partes ad defensionē ipsius distributæ sunt. Qui omni studio rem complexi, summaque cum alacritate officio functi suo: tūc huc, & illuc, perpetuò circūcurstantes, nostrisque nunc voce, nunc vultu, nūc labore, & alacritate ipsimet sua, vim & aculeos addentes, pestiferos rebellium conatus prudentissimis consilijs anteuertunt.

Porro cunctis iam rebus ex sententia confectis, Northamtoniensis, quiq̃ue cum illo venerant omnes (ijs solummodò exceptis, quibus, vt diximus, propugnandę vrbis cura incubuit) corpora diurno fessa labore, quieti tradere constituerunt.

Iamque suavi sopore, nostrorum hominum membra deuinxit somnus, cū concubia ferè nocte coniurati, ac si iamiam in urbem irrupturi forent, terribili tormentorum tonitru, horrificisq; omnia circum clamoribus permiscuerint. Quanquam certè percommodè ea in re accidit, vt ferreæ

M.ij.

pilæ



pile, quæ maioribus è tormentis in urbem dis-  
sploderetur, perpetuò suprà nostrorum ca-  
pita volantes, non magnoperè nocerent, siue  
eas ignis vis, impetusque, violentiùs abstule-  
rit, siue libratorum manus infidæ (nam sunt  
qui pecunia corruptos putent) tormenta sua  
altiùs aliquantulū quàm expediret, de indu-  
stria direxerint. Quæ quidē dū hūc in mo-  
dū (quāuis semper sine damno) creberrimè  
tamen, ab impuris importunisq; latronibus  
excercerentur, continenti fragore, reboatuq;  
horrifono tantum terroris inuexerāt, vigiles  
vti nostri qui in muris, quiq; in portarum  
stationibus constiterunt, (AD ARMA)  
sæpiùs conclamarent. Idq; cū crebrò fie-  
ret (neq; enim hostes vnquam furere desti-  
terunt) Northamtoniensis qui se, si quid in  
urbē tumultuosius coniurati machinarētur,  
protinùs acciri iusserat, à Tribuno militum  
excitatus, ijs quos in exercitu habebat nobi-  
libus ac generosis stipatus, in forū descendit.  
Deincēps quò paucitati atq; infrequētiae mi-  
litum

litū prospiceretur, oppidūq; facilius propugnari posset, consiliū cœperūt huiuscemodi: uti omnes auersæ ab hostibus portæ, muro-rūq; ruine obstruerētur, rati sic nec militē ad mœnia defendenda defuturum, si copiæ angustius contraherentur, & hostem sine periculo vrbis introitu arceri posse.

Rebus hīs institui iam cœptis, & ad exitū pænè perductis, seditiosi ad vnū ferè omnes, rapidissimi torrentis more, è speluncis deuoluti suis, dissonis cum clamoribus, atq; vlulatus feris, inconditisque, ad urbem decurrerunt. Ibi ferro, igniq; portas comburere, atq; exscindere conantur alij, alij muros conscendere: fluuium tranare nonnulli: multi per loca humiliora, & vetustate collapsa mœnia, in oppidum sese iniicere. Cōtrā nostri omnia moliri cœperunt: magnaue vi contendere: ingressum hostem vndiq; fortiter repulerunt: aduentum iam, & influentem, viriliter represserunt: hastis, sagittis, gladijs, omni telorum genere profligarunt:

M. iij.

eoque



eoque rem deduxerunt, vti fractus paulatim atq; imminutus irruentium vigor, fluctuare aliquātulum incoeperit. Cæterum pugna fit inflāmatissimis vtrinq; armis, sæua, peratrox, cruenta, (si qua alia) dū in vrbē per vim infundere se niterētur hij, nostri autē illos omni aditu prohibere. Itaque ad horas ferè tres, acerbissimis inter se conflictati odijs decertarunt, cōmissumq; acrius (suprà quā quis crederet) & ardentius, diuersis in locis præliū: euetu certè adeò dubio, & ancipiti, vt nisi nostrorū hominū ad repugnandū ardor mirificus, Pastonij verò, Valgrauij, cæterorumq; equitum peregregia virtus, & planè inexsuperabilis exstitisset: ea nox nostris proculdubio vna omnium calamitosissima cōtigisset. Tanto siquidem furore rebellium mentes ignitæ atque incensæ fuerunt, tantaque bellandi libidine, vt quamuis mortiferis concissi vulneribus, pugna tamen abstinere noluerint, sed semianimes, & suo, atq; alieno, immergi cruore, ad extremū vsq; spiritū, nostris indigna-

supra  
iii. M  
indigna-

indignabundi restiterunt. Multi etiā pectō-  
ribus ferro transfixis, & fœmorum nervis,  
atq; poplitibus incis, (horresco referēs) ge-  
nibus immixti tamen, tam diris exagitabantur  
furijs, nostrorum vt nates atque crura inter-  
mortuis iam pænè manibus, & planè exsan-  
guibus conuulnerarent. Verūmenimuerò  
nostri inclinatam iam tandem hostium vim  
& subdebilitatem animaduertentes, impetu  
adeò vehementi sese intulerunt, vti sustinere  
repugnātes diutiùs, aut cōsistere nequierint,  
sed viribus vndique protrit, atque contu-  
fis, ingenti cum strage suorum (trecēti enim  
in illa pugna ceciderunt) ex oppido expulsi,  
reiectique, in perinuisa cubilia denuò sese  
condiderint. Quo nostri prælio defuncti,  
(paucis ex suis desyderatis, vulneratis ve-  
rò paulò pluribus) aduersus omnes hostiū  
insidias securi, id quod supererat noctis, (su-  
perfuit autem non multum) quieti dederūt.

Craftinus autem vbi illuxisset dies,  
ex oppidanis nonnulli ad Northamto-  
niensem



nienſem detulerunt, permultos eſſe coniuratorũ in Ketti caſtris, quorũ in animis omnis iam furor reſtinctus deferbuiſſet, hos per facile & nullo negotio impelli poſſe, vt ab illa cõſcelerata perditorum hominum ſocietate deſciſcentes, ad officiũ cogitationẽ & ſalubriora cõſilia ſeſe traduci finãt. Pertæſum enim iamdiu ſclerum quæ perpetrãſſent, præſtoq; eſſe ad portas Pockthorpenſes, quatuor vel quinque millia hominum, qui nihil aliud exſpectent, nihil deſiderent, niſi pacem & veniam, quæ ſi iam tandem ab illo proponeretur, cõfidere ſe illos è veſtigio arma abiecturos, & Regiæ ſe clementiæ miſericordiæque permiſſuros. Northamtonienſis ex hoc nuntio, incredibili ſanè lætitia ac voluptate perſuſus eſt, vtpotè qui maluerat facilem & incruentã reportare victoriam, quàm (eſſi perduelles eſſent & nocentes) lugubrẽ tamẽ, & ciuili ſanguine reſperſam. Fecialem vnã cum Tubicine conſeſtim dimittit, iubet fidem vti Regiam interponeret, impunè fore omnibus

omnibus qui ab armis recederent. Hī continuo ad portas Pockthorpenſes progreſſi, neminē tamen illic inueniunt. Verū fecialis buccina ſignum dat, ad quod cū ab hoſtibus effuſiſſimē de Monte decurſum eſſet, Flotmannū quendam (hominem ferum & immanem) conſpicatus, (princeps enim de colle deſcenderat) clara voce fecialis conſiſtere iubet. Quærenti quidnam eſſet? & cur tubæ cantu illos ad colloquium conciuiffet: Fecialis: Abi (inquit) & à Marchione Northamtoniēſi, huius belli præfecto tuis, renūtia: Maieſtatem Regiam monere, vti iam tandem reſipiſcant, & his tantis furoribus finem imponant: ſi fecerint: ſaluos ſe fore: & illius clementia tutos, & incolumes, neq; cuiquam quod admiſiſſet ſcleris, fraudi futurum.

Ad ea Flotmannus (vt erat volubili ſemper lingua, & ad petulantem loquacitatē celeritate quadam præcipiti) ſuperbē, minaciterq; reſpōdit: Quod ad Northamtonienſem attinet, ſe ne tanti quidem facere, nullius neq;

N.

virtutis



“virtutis, neque consilij, neque fortunæ  
“virum, sed eum contemnere, & pessimè  
“odisse, tanquam infamem, leuem, impu-  
“rum, atque alienæ semper opis indigentem:  
“perfidia denique, atq; omni proditionis tur-  
“pitudine delibutum. Regiæ salutis, dignita-  
“tisque propugnatores, se semper acerrimos  
“existisse, eaq; mente perpetuò futuros, illius  
“vt incolumitate suas, omniumque bonorum  
“fortunas, inniti arbitrentur. Arma se indu-  
“isse, non contra Regem, sed quæ Regi, sibiq;  
“in posterum salutaria futura confidant: neq;  
“vlla, vel concepti sceleris cōscientia, vel læsæ  
“maiestatis dedecore illigari. Ecquid enim  
“aliud conari? quàm regium nomen, maiesta-  
“temq; defendere? cōmuni saluti prospicere?  
“legum libertatisque iura tueri? semetipsos,  
“coniuges, liberos, fortunasq; suas cōseruare?  
“rem deniq; publicam ( indignis vexatā mo-  
“dis ) ab inimicorū suorū detestabili superbia,  
“libidine, crudelitate, vindicare? Proin cul-  
“pæ expertes à pœna ita immunes ac liberos  
esse

esse debere. Nam quod persplendens ille »  
præco, multoq; perinsignis auro, ad speciem »  
præclara sibi quædam & magnifica dudum »  
proposuisset: id eo sanè fieri cōsilio, vt aut in- »  
fidiosa pacis cōditione, libertatis reciperan- »  
dæ studia restingueret, aut ipsos salutaribus »  
quibus septi fuerāt præsidijs nudatos, omniq; »  
ope exclusos, truculentissimis belluis deuo- »  
randos obijceret. Impunitate igitur (inquit) »  
tua qui deliquerint, fruantur: per nos licebit: »  
nos qui hijs armis, atque innocentia tecti no- »  
stra, securi tutiq; sumus, nullius vnquam mi- »  
sericordiam implorare decreuimus. Etenim »  
prostratā iam pænè Rempub. & generosorū »  
indies importunitate labefactatā, & impulsā, »  
aut hijs conatibus, ex miserabilibus in quibus »  
iam diu iacuit ruinis, ad pristinā dignitatem »  
excitaturi sumus: aut (quod viros fortes, ma- »  
gnoq; præditos animo decet) capitis periculo »  
audacter decernentes, in prælio (nequaquā »  
prodita, quāuis oppressa libertate) morituri. »

Vix dum finem fecerat huius furiosissimæ

N. ij.

oratio-



orationis(homo mortalium omnium perfidiosissimus, cum repens de improuiso clamor omnem quaquà versus urbem peruassisset,horribilesq; exaudirentur hominũ trepidantium,& **AD ARMA** conclamantium voces,quibus omniũ vndiq; aures personauerũt. Namq; hoc ipso tempore dũ hæc ad portas Pockthorpenfes fierent, coniurati insanabili rabie ac pertinacia incitati,per loca quædam propter infirmorũ hospitia in urbem irrumpentes,hostilem in modum omnia ferro igniq; vastantes incedunt. Verũtamen à nostris in planicie iuxta palatium Episcopi Noruicensis celeriter occursum est, ibique pugnatum diu sanè atq; acriter,circa centum & quadraginta hostium cæsi,& ex nostris militibus aliquot, vtrinq; autem multi grauissimis vulneribus affecti.

Sed omnium oculos mentesque miserabili luctu ac horrore perstrinxit **DOMINI SHEFFELDII** mors indignissima. Hic dum(vt fit) generis ac dignitatis, magis quam

quàm salutis suæ memor, viuidus, & ferox,  
reiq; gerendæ percupidus, in confertissimos  
hostes alacrius & incautiùs pugnans inuehi-  
tur, fortè fortuna, ab rapido cursu circuma-  
gēdo equo effusus, in fossam præceps deuol-  
uitur. Ibiq; vir nobilissimus à sicario scelestis-  
simo crudelissimè interficitur. Cumq; hanc  
tam dirā, & atrocem à se mortem, omnibus  
modis, quā præmia maxima pollicitādo, quā  
nobilitatem, nominisq; splendorem sæpiùs  
indicando, deprecaretur: tantum afuit illo-  
rū vt animos, aut hominis, aut nominis, cō-  
miseratio subierit, vt eò ferociores exstite-  
rint. Posteaq; de facto (velut gloriosissimo)  
inter se contendentes, ad laudem eius tam in-  
uisi facinoris, ita cuncti animis exarserant, vt  
pænè ad vim ventum sit, cū vtrinq; incen-  
derētur, ad decus & gloriam, quæ apud suos  
proposita videbatur ei, qui homini splendi-  
dissimo, fatale illud vulnus, ac mortiferum  
influxisset. Sed omnium opinione, Fulcus cē-  
teris palmam præripuit, qui palam prædica-  
bat



bat (Deum detestans) à se claua ictum interisse. Vt cunque fuit, vir clarus & honoratus, hoc tam tristi fato functus, occubuit. Et Fulco non ita multò post (vindice Deo) debita tanto sceleri præmia persoluta sunt.

Verùm enim uerò dici non potest quantũ semper in vtramq; partem valeat ad victoriã, amplissimorũ virorũ interitus. Etenim hostes cognito hoc tam lugubri casu, infestiores fieri cœperunt, & ad præliũ cõmittendũ alacriores: nostri autẽ sensim animis imminuti, paulatim elãguescere: adeò vt cõiurati letitia elati, magno vndiq; clamore quasi explorata iã victoria, sublato, in vrbẽ (quã dabatur iter) nostros hostiliter insequẽtes, inuolauerint. Qui partim multitudine oppressi, (viginti enim pænè millia cõiuratorũ erant: nostrorũ autẽ mille tãtũ quingenti) partim autẽ huius illustrissimi adolescẽtis clade perculsi, vrbe cesserũt: diuersisq; itineribus per deuia tota nocte inter saxa, vepres, & virgulta dilapsi, Londinum tandem omnes reuerterunt.

At

At ciues tot tantisq; onerati atq; obruti malis, cum omnia vndiq; hostium plena essent, vim ac cædem, cunctaq; quæ in captis vrbi- bus fieri solent hostilia metuentes, omni spe abiecta, è ciuitate diffugerunt. Tantoq; pa- uore plerumque omnium animi defixi fue- runt, vt multi mentibus simul luctu, metuq;, à sensu rerum suarum abalienatis, vxores & liberos, omnesq; fortunas in hostium pote- state relinquerent. Multi verò suam quisque spem, sua consilia (communibus deploratis) exsequentes, quicquid esset auri, argentiue, & supellectilis pretiosi, in cloacas puteosq; de- merferunt. Urbem verò totam quaquà ver- sùs perculit luctus, & mulierum puerorūq; ploratus, qui cum hostiū clamore, & flammæ sonitu, & ruentium tectorū fragore permi- stus, horrendo cuncta compleuerat sono. Nam coniurati statim à Northamptoniensis discessu tectis ignem iniecere, isq; per domos vicosq; horribili flamma diffusus, magnā vr- bis partem celeriter absumpsit. Etenim quæ  
erant



erant ad vicum Holmensem ex vtraq; parte incēdebātur omnia, hospitiaq; quæ plebi inopi ac valetudinariæ destinabantur, tum Episcopalis, Pockthorpenfis, Magdalenensis, Bearestretenfis portæ, multaq; prætereà varijs in locis ædificia conflagrauerunt.

Accidit autem peropportunè, vt eodem tempore, magni imbres de cœlo defluerent, quibus ignis celeriter restinctus, nequaquā tam passim, ac latè quā hostes volebant, per-uagatus est. Ad hæc proditores diuitum domus ingressi, eas diripuerunt, exhaustas etiā nonnullas igni concremauerunt. Tantaque, & tam varia, nefandæ crudelitatis exempla vbique ediderunt, vt iam non homines, sed immanes belluæ formam hominum indutæ, in urbem ingressæ viderentur. Etenim satis constat, illa tempestate ciuitatis speciem, tam lugubrem, ac miserabilem exstitisse, cū nihil aut oculis hauriretur, aut auribus conciperetur, nisi vlulatus, cantusque hostium dissoni, fletus muliebris, virorū clamor, & huc &

& illuc discurrētium strepitus, tum ferrum, flamma, ruinae, cæteraque (quæ ne narrando minora faciam prudens prætereō) vt nō videntium solū mentes oculosq; horror perfuderit, verum etiam audientium aures & animos incredibili mœrore perculerit.

Capta igitur hunc in modum à coniuratis vrbe, incēsa, direpta, deserta, cū omnia vndiq; (præterquam ab hostibus) solitudo occupauisset, (nam qui in oppido remanserāt, obferatisianuis in intima ædium sese abderant) Proprætor solus, velut ad spectaculum occidentis patrię à fortuna relictus, consilij, & auxiliij expers, cū de summo ædium cuncta flammis ac ruinis vastata vidisset, ratus, hostes non ita multo post, sicut ædibus stragem intulissent, sic hominibus vicissim vim ac mortem illaturos, occlusis foribus domi se continebat.

At coniuratorum intereā manus ingens, velut agmine facto, per portas Augustinenses in urbem irrupit, cunctiq; præcipiti cursu

O.

ad



ad Proprætoris domum delati, fustibus & ijs  
quæ fors obiecerat baculis armati, fores ef-  
fringere conatur. Demùm ignis subijci coe-  
ptus, ad quem terrorem Proprætor cùm co-  
horruisset, ianuam (namque omnes serui in  
fugam se proripuerant) recludit. Protinùs  
illū comprehendunt, palliumq; (quo tū for-  
tè utebatur) detrahunt, proditorē appellant,  
necē deniq; minitatur indignā, nisi indicaret  
quo in loco Northātoniensis delituisset. Cū  
ille, discessisse omnes respōdisset, eam vocem  
cūcti clamore ac indignatione tumultuosif-  
simè exceperunt, omniq; impetu in ædes ir-  
ruentes, loca quelibet furacissimè perscrutā-  
tur. Deindè ad prædam dilapsi, spolijs onusti  
recesserunt. Sed multi, partim pecunia alijsq;  
rebus à proprætoe acceptis, partim cuiusdā  
hominis voce, qui illa intolleranda esse dixit,  
& furta ac flagitia omni supplicio vindicāda  
repressi, sarcinas oneraq; quæ prius asportaf-  
sent denuò in officinas coniecerunt. Verū-  
tamen permulti ciuium, quorum domus se-  
ditiosi

ditiosi intrarunt, cum Northātonienses tantum querere præ se tulissent, omnibus fortunis exuti spoliatiq; sunt. Præcipuè verò eorū ædes despoliauerant, qui vrbe cesserunt, illos proditores, Maiestatiq; Regiæ hostes aper-  
tissimos esse prædicantes, bonaque illorū se in fiscū redacturos. Ceterū oppidanorū nōnulli id consilij coeperunt, vt panem ac potū, omnisq; generis alimenta furiosissimæ multitudini exhiberent: quibus misera ac ieiuna plebs delinita, nonnihil à rapinarū rabie cō-  
quieuit. Nihilominus quàmplurimi, hac in-  
expectata calamitate accepta, magna dāna, iniuriasq; pertulerunt, tantisq; depressi diffi-  
cultatibus fuerūt, vt semper postea dū vixe-  
rant (viuunt autē adhuc etiā nōnulli) dome-  
sticis rebus implicationes exstiterint. Subit  
interim rebellij animos (vt videbatur) futu-  
ri tēporis recordatio: proinā vi ad salutis curā  
cōuersi, Proprætori, vrbisq; primoribus im-  
perāt, vti ostiatim à ciuibus, ad omnes portas  
custodiæ vigiliæque quotidie instruantur:



ni fecerint, mortem ac cruciamenta acerbissima interminari.

Prætereà in templo (horrendum dictu) in templo Dei optimi maximi, proditores importunissimi, quoties pluuia decidisset, furorum suorum castra locarunt. Eoq; progressa est improbitas & audacia, cunctaq; delendi libido, vt nec sapientissimorum hominum voces, nec diuinæ vindictæ terror, nec mulierum lamenta, & lachrymæ, eos à scelere auocare potuerint. Etenim foeminæ, postquam cæde inermium temperatum conspexissent, frequentes sese in vijs obiecerant, vti patriæ parcerent rogantes, sibi, suisque, homines se meminerint, hominibus natos, satis in illos, quorum causa arma ceperunt, sæuitum, inijcerent modò frænos iræ, pacem veniamq;, atque omnia proculdubio bona à Maiestate Regia cōsecuturos. Sed vt antea dictum est, nec minæ, nec sapientum consilia, nec precū blanditiæ, neque vlla denique res, potuit eos à tanta flagitiorū atrocitate deterre: donec patriæ

patriæ miserandam cladem, & sibiipsis dignum talibus sceleribus exitiū tandem contraxissent.

Namque Rex postquam intellexisset maiestatem suam indies magis magisque minui: nefariorum hominū cœtus augeri: cuncta hoc execrabili insanissimi tumultus furore permisceri: clementiam & mansuetudinem regiam cōtemni: nullū iam misericordiæ locum relinqui: lenibus remedijs nihil profici: insanabiles esse animos, & letali huc contactos: omnem denique salutis spem penitus ademtam, nisi eam solā quæ in vi & suppliciorum atrocitate defixa foret: hanc primo quoque tempore adhibendam existimavit. Quamobrem in Comitatu Lincolnienſi, & varijs Regni regionibus, delectus institui, ac militem conscribi iussit, magnūq; Helueticorum numerum accersiri, ratus (id quod res monebat) sceleratā iam gētem stirpemq; penitus interficere debere, alioquin si latius se dissiparet, vicinamque plebem sceleris contagione

O. iij.



tagione inficeret, tum demùm difficulter sisti posse, <sup>cum</sup> illius pestis feruor longiùs peruagatus, atque in regni tanquam venas ac viscera illapsus, omnes eius partes funestissimis perfidiæ flammis inuoluisset. Huic exercitui IOANNES DVDDLEIVS comes VARVICENSIS, peregrinæ nobilitatis admirandæque virtutis vir, præficitur: illiq; literis mandatisque Regijs imperij summa defertur.

Hæc autem tū apud nostrates opinio omnium ferè sermone percrebuit, huius amplissimi Comitæ tantam eo tempore animi magnitudinē ac rei militaris sciētiam exstitisse, vt aut ab hoc superari, aut à nullo certè profligari posse viderentur. Harum igitur rerū voces in vulgus crebrę sparę disseminateq;, aliquā exercitus, apparatusq; regij, rumoris auram Kettianis afflauerat. Postea verò cū pro certo comperissent delectus illos, Ducem, arma, cohortes, omniaq; bellici terroris instrumenta, in se instituta, parata, in-

tenta

tempta fuisse, confirmare se indies, ac omnia circumspicere, ac periclitari coeperunt, quò instructiores essent ad resistendum. Tantum abfuit ut eorum immanitatem & audaciam vlla vel ratio imminuerit, vel terror infregerit.

Hunc in finem cum multa quotidie à seditionis tumultuosiùs fieri animaduertissent, ciues quidam, vim, cædem, rapinas, incendia, omniumq; rerum lamentabilem interitum metuentes, demum ne inuiti etiam ab illis stare cogerentur si in ciuitate remanfissent veriti, rebus omnibus quæ raptim coaceruari poterant, in vnum congestis, ijsq; aut in terram defossis, aut cæmentariorum opera, latere lutoue circumclusis, noctu clam ex urbe profugerunt.

Varuicësis interea, postquam semilite lã domestico q̃ externo, pecunia, armis, cunctisq; quæ bello vsui sunt, instruxisset, omnibus copijs circumfusus Lōdino proficiscitur. Fuerunt in illo exercitu Marchio Northamtoniësis,

(penes



(penes quem rei militaris administratio nuper fuit) Villoughbæus, Poijsius, Braius, multiq̃ue alij proceres illustrissimi: prætereà equitum, armigerorum, generosorum, Heluetiorum, & cuiusvis ordinis militum circiter millia penè quatuordecim. Cùm ad Catebrigiam peruenissent, ibi, ad castellum Varuiceni obuiam fit à primoribus aliquot urbis Norwicensis, cæterisq̃ue ciuibus, quos paulò antè diximus, ex formidabili & perinsana coniuratorum audacia, timore cōcepto, cōfusus, perterritosq̃; ex oppido profugisse. Hij squalore, & sordibus obsiti, & in genua prolapsi, vniuersi se ad pedes illius proiecerunt, flebilibusq̃; eum vocibus atq̃; lamentis vehementius obsecrare coeperunt: Ne quid grauius in se statueret, nullius se culpæ conscios, Regiam tamen clementiam ac misericordiam deprecari. Incredibilem fanè dolorem, ex hac miseranda patriæ clade ac vastitate cōcepisse, extrema omnia perpeßos demum quò vitæ consulerent, fugere è ciuitate coactos,

coactos, ferro, flammaq; ab vrbe, ab vxore, „  
à liberis, & pænè à complexu suorum diuul- „  
fos & eiectos. Tantis in miserijs (quibus vn- „  
diquè premerentur, nihil tamen aliud obte- „  
stari, nisi, vt si in hoc communi, & summo „  
omnium timore, per errorem & impruden- „  
tiam, inscios se aliquo scelere implicauissent, „  
id ne fraudi sit, sed vt huic omnium dolori „  
& precibus condonaretur. Varuicensis  
ad hæc: Intelligere se quāto in periculo fue- „  
rint, magnamque eam perditorum hominū „  
proculdubiò vim exstitisse, quæ ab omnibus „  
ijs rebus eos, quæ tantum non vita cario- „  
res sunt, abstraxisset: fateri nihil illos (quod „  
sciat) perperam admisisse. Quòd urbem in „  
tanto terrore reliquissent, humanum id qui- „  
dem & ferendū videri. Vna in re paulò im- „  
prudentiores fuisse, qui initio, hīs tantis ma- „  
lis non obstiterint, per paucos quidem fortes „  
& prudentes viros, momento temporis illos „  
coetus discussuros, si recentire, se pro salute „  
patriæ intrepidè obiecissent. Veniam nihilo „

P.

tamen



et tamen secius quam peterent concedere, Regiamque cunctis clementiam impertiri. Iubere in super ubi se telis militaribusque rebus instruxissent, parati uti sint qui agmen sequantur, colla tæniolis circumuincti, quò à ceteris discerni queant.

His peractis, Cantebrigia proficiscitur, & ad .X. Kalendas Septemb. omni cum exercitu Intwoodiam peruenit. Distat autem Intwoodia Norwico, ad duo ferè millia passuum, ibique Thomas Greshamius quidam (equestris ordinis vir) domum habuit sanè per amplam & ornatam, in qua Varuicensis eo die, & in sequenti nocte cum suis permansit. Armati tamen omnes fuerunt, & ad prælium instructi, si quid fortè tumultus repentini hostes exciuisent: qui quidè è speculis & turribus cuncta quæ fierent cõtemplabantur. Varuicensis intereà dum (ut ante à dictum est) cum omnibus copijs V Intwoodie cõsedisset, facialem mittit, qui Regis nomine vrbi, ciuibusque (ut mos est) bellum denunciarèt, nisi portis quã primum

primū patefactis, atq; reclusis Regium exercitum in oppidum intromisissent.

Kettus ubi fecialem ad portas peruenisse intellexisset, Augustinū Stuardū proprætorem & Robertum Ruggū vrbis primores, adire eū iussit, & ab illo quid postulātū venisset sciscitari. Ij per posticū emissi, recognita, feciali respōdēt: Miserrimos sese arbitrari omniū qui vnquā vixerūt mortaliū, tot tantisq; cladibus & animo, & corpore perfunctos, vt ad earū memoriā totis artubus cōtremiscant. Veruntamen hoc vnū prātereā etiam ad summā calamitatē, doloris & dedecoris adiungi, quòd eam quam Regiæ maiestati fidem deferre & debeant, & cupiant, hoc tempore prestare nequierint. Infelicissimos sese existimare, quorum in illa tempora ætas incidisset, quibus implicita, semper aut vitæ, aut dignitatis discrimen subeundum foret. Nihilominus benè se de Regia Maiestate sperare, vtpotè qui nullo horum se scelerum consensu deuinxerint,



« sed ea (quantum certè fieri potuit) à ciuibus  
« suis magna cum rei familiaris iactura, & in-  
« credibili semper vitæ discrimine depulerint.  
« Vnum hoc insupèr à Varuicensi demississi-  
« mè deprecari, vt quoniam in vrbe Kettiano-  
« rum innumerabiles essent inermes, inopes,  
« ac nudi, quos (præterquàm quòd metu &  
« flagitiorū conscientia, astricti tenerentur, cæ-  
« teroqui huius societatis pertæsum esset, (vt-  
« potè qui cupiditatem ipsam malefaciendi,  
« furorū satietate repleuissent) rem sæpiùs fru-  
« strà tentatam, semel tamen iterum experiri  
« dignaretur. Magnoperè sese confidere de-  
« monstrant, si hoc tempore impunitatis spes  
« denuò proposita sit: fore vti protinùs sine  
« cæde ac sanguine ab armis discedatur. Æter-  
« nam eius rei ad posteros memoriam futurã,  
« & gloriam quauis victoria præstantiorem: si  
« pacem ac tela ciuili nequaquã imbuta cruo-  
« re domum reportasset.

Fecialis continuò à colloquio Proprætoris  
in castra Varuicensis digressus, cuncta quæ  
ab

ab illo didicisset demonstrat. Varuicensis, cui nihil antiquius fuit, quàm vt (si qua ratione confieri posset) incendium hoc, tam periculofum, & acerbum, sine cruore ac sanguine restingueretur: statuit & ipse quoq; huiusce rei consilium, non facinorum, quæ designassent atrocitate, sed dignitate Regia, & regni vtilitate metiri.

Metuebat insupèr ne Generosi qui vincti in carcere ac custodijs detinebantur, magnis indies terrorum iactati fluctibus, tandem ab illis crudelissimè interficerentur. Namque mortem illis quotidie interminabantur, & permultos ex ijs, ac præcipuè Rogerum VVoodosium, equestris ordinis virū, omni verborū contumelia lacerarunt. In quo sanè viro violando atque vexando, inauditam illam suam atque insatiabilem animi crudelitatem exercuerunt.

His igitur de causis placuit denuò experiri possentne iam tandem veniæ & impunitatis spe, de sceleris errore deduci. Dimissus ad id



statim cum tubicine fecialis, quibus urbem ingressis, obuiam fit protinùs à quadraginta seditiosis, qui bini pariter incedentes (erant autem omnes in equis) multo cum plausu, ingentiq; clamore à porta diui Stephani ad Episcopalem perrexerunt. Exin tubicen bucine cantu signum dat, ad quod cum confertim de colle magni coniuratorum greges confluxissent, citato cursu equites ad illos diuolarunt. Iubent uti utraque parte viæ ordine directo consisterent. In quem cum se è vestigio retulissent, fecialis cum tubicine, ciuitatisque primores duo, per medios hostes progressi, magnis vndiq; clamoribus ac vociferationibus excepti sunt. Nãq; singuli capitibus denudatis, vno veluti ore ac consensu ad vnũ ferè omnes cõclamarunt: **VIVAT EDOVARDVS REX. VIVAT EDOVARDVS REX.** Collaudati ob id à feciali & primoribus ciuitatis, atque ordinem quem tenerent uti eundem paulisper conseruarent rogati: fecialis cum eum

eum in modum ducentos quinquaginta ferè  
passus cōfecisset, tandem collis cacumen cō-  
scēdit. Ibi sacris ac sollemnibus velatus infi-  
gnibus, paululū moratus, (nondum enim  
Kettus venerat) demū ita locutus fertur.

Non ignorare illos ex quo primū sce-  
rata arma in patriam cōperunt, quot quan-  
tisq; modis, omni studio, labore, sollicitudi-  
ne, Regia Maiestas eam in curam incubue-  
rit, vti à scelerum atrocitate, qua omnia iura  
diuina atq; humana violauerūt, ad aliquam  
officij, & salutis suæ cogitationem, (conuer-  
sis tādē voluntatibus) traducerentur. Nō  
semel tātū, sed sæpius iterū atq; iterū, pa-  
cis præcones, atq; internūcios ad illos misisse,  
quos tamen despectos semper, atq; omni af-  
fectos ludibrio, detestabili furore ac perfidia  
neglexissent. Nunc verò (prò Deū immor-  
talem) quò ruerent? quò se fortunaſque suas  
exitiabili vefania præcipitarent? quem perfi-  
diosissimis furoribus modū? quem impuri-  
simis consilijs exitum imponerent? Quousq;  
pesti-



« pestiferis incitati cupiditatibus, quas semel a-  
« nimos vincendi spes falsas atque perinanes  
« imbibissent, lætali semper vanitate confecta-  
« rentur? Quousq; turpissimam exitiosæ pro-  
« ditionis impietatem, ementitis verborum ti-  
« tulus, condecorarent? Quousque horribiles  
« impuritates, atq; nequitias, fallacissimis vir-  
« tutum integumentis inuoluerent? Quousq;  
« deniq;, earum rerum, fatali desyderio tene-  
« rentur, quas si assequi liceret, atque indipisci,  
« totius continuo Reipublicæ interitus, longè  
« acerbissimus, atq; luctuosissimus accideret?  
« Quin potius iā tandē circūspicerēt paulisper,  
« atq; animū, mentemq; adhiberent, REM-  
« QUE suam PVBLICAM, (de qua  
« omni in sermone non perinsulse minis, quā  
« nefariè, impieq; gloriari solerent) intentiori-  
« bus oculis acerrimè cōtemplarentur. Enim-  
« uerò tū facilimè perspicì posse, fidelēsne sub-  
« diti sint, & bonorum ciuium nomine digni,  
« qui contra maiestatem Regiam hostilia ar-  
« ma induerint: qui despiciatissimorum homi-  
num

num, flagitiosissimos greges cōflauerint: qui patriæ (communi omnium parenti) impias, atq; sacrilegas manus intulerint: qui plebis fecem, & mortalium vilissimos, (omni pænè ex Anglia excussos) in Rempublicam, ad bonorum interitū, & regni disperditionem immiserint: qui maximam ornatissimæ ciuitatis partem acerbissimo incendio deleuerint: qui permultis fortibus, atque integerrimis viris foedissima vincula iniecerint: nonnullos autem exquisitissimis cruciatis tormentis pernecarint: qui refertissimas domus penitūs exhauserint, vicinaq; villulas compilarint: qui multorū (nuper diuitum, nunc autem illorum immanitate, miserorum atq; egentium) fortunas, ad se, in sua nefanda castra funesto latrocinio transtulerint: qui falsas leges, falsas literas, falsa diplomata, Regis nomine cōfinxerint: qui templa Dei optimi maximi profanauerint: priuatorum hominum domus prostrauerint, agros circumquaque perculerint, & affligerint: qui cogitationes

Q.



“ tationes omnes, studia, conatus, ad depopu-  
“ lationes, exdes, vastationes, incendia, rapi-  
“ nasq; cōuerterint: qui deniq; nihil superesse  
“ siuerint, quo progredi longiūs posset furoris  
“ rabies & amentia, quin id totū, aut profun-  
“ dissimæ libidines absorpserint, aut importu-  
“ nitates tæterrinx dissipauerint. His cū se  
“ tot, tantis, ac tam horrendis, flagitiorū fœdi-  
“ tatibus, Deo, Regi, Reiq; publicæ, obstrictos  
“ videāt: cumq; iam eum in locū res suas, for-  
“ tunasq; omnes, deductas animaduertāt, atq;  
“ ita planè profligatas, & perditas, peiore vt  
“ conditione quàm nunc sunt (sunt enim pes-  
“ sima) ne si cupiant quidem, esse queant,  
“ tum ipsi secum recordentur, quàm in im-  
“ mensum malorū mare præcipites sese deuol-  
“ uerint: cogitentq;, quid pertimescendum sit  
“ illis, quorum capitibus semper impendeant,  
“ (quæ vitari certè nullo pacto poterunt) di-  
“ uini numinis ira, & inuictissimus violati in-  
“ festique Regis exercitus. Etenim decreuisse  
“ maiestatem suā, nō pati diutiūs herere hoc tā  
“ malum

malum in visceribus regni sui, neque tam fe-  
ram, immanem, & intolerandam audaciam,  
ulteriùs impunitam & inultam relinquere.  
Itaque delegisse Comitem Varuicensem,  
(celebris gloriæ, multique nominis virum,  
& huic rei à maiestate sua præfectum) qui  
illos ferro, ignique persequeretur, iussisseq;  
vti nunquam priùs desisteret, quàm hanc il-  
lorum tam tetram & horribilem societatem  
radicitùs excidisset. Nihilominùs tantam  
esse eius immensæ bonitatis, atque clemen-  
tiæ magnitudinem, vt quem perditorum fa-  
cinorum (si perseuerarent) vindicem con-  
stituerit, eundem quoque (si secùs fecerint)  
misericordiæ suæ interpretem atque admi-  
nistrum esse voluerit. Quam nisi iam de-  
terioribus posthabitis consilijs, amplecte-  
rentur, Varuicensem per omnia sacra iu-  
rare, nunquam eam posthac cuiquam ob-  
latam iri, sed se (sicuti sibi à Rege imperatū  
fuit) omnes eius perniciosissimæ coniura-  
tionis socios, satellites, ministros, adiutores,



« vt maiestatis regiæ hostes infestissimos fer-  
« ro, ignique persecuturum : neq; antè perse-  
« quendi finem facturum , quàm illi qui hoc  
« nouo, inaudito, inexprabili parricidio, cuncta  
« polluisent, & se tam insanis scelerum flucti-  
« bus obruisent, meritas Deo, Regique pœ-  
« nas, debitasque persoluerint.

Hæc cum dixisset, etsi multi de rerū euen-  
tu magnoperè solliciti, & quâ angore con-  
scientiæ, quâ flagitiorum suorum recordati-  
one conuicti, cohorruiſſent : tamen plæriq;  
omnes huic orationi grauitè infensi, ita inti-  
mis exarserant sensibus, vt facialem protinùs  
clamoribus vndique infestis, maledictisq;  
« conscinderent. Nonnulli eum proditorem  
« esse vociferarunt, non à Rege missum, sed à  
« nobilibus instructum, & subornatum, qui il-  
« los in fraudem impulsos, verborum blandi-  
« mentis atque delitijs consopiret, quò faciliùs  
« veluti cōniuentes, incauti, & nihil triste for-  
« midantes, opprimerētur. Alij veniam illam  
« ad speciem quidem præclaram, & magnificā  
videri,

videri, sed reuera exitiosam tandem, & lu-  
 gubrem futuram, vtpotè quæ nihil aliud  
 esset, nisi **DOLIOLVM CAPI-**  
**STRIS REFERTVM.** Tunicam  
 autem illam pictam, auroque distinctam &  
 illustrem, neutiquã esse fecialia insignia, sed  
 quiddam ex Papisticis consutum ornamen-  
 tis. Multa prætereà in illum (pestilenti ve-  
 cordia turbidi atque præcipites) rabidè fu-  
 riosèq; coniecerunt, dum quaquaueversus cū-  
 cti, acerrimis in eum vocibus, & mortem re-  
 dolētibus, virus acerbitalis suæ profunderēt.  
 Nihilominus fecialis illinc cū Ketto digres-  
 sus, alio in loco eadē quæ ibidem promulgas-  
 set, cæteræ plebi, (namque antea præ multi-  
 tudine omnes audire nequierant) proponit.

Accidit autem vt prius quàm orationi finē  
 imposuisset suæ, scelestissimus puer nates fla-  
 gitiosissimè denudarit: facto insuper fœdis-  
 simo, addita sunt verba fœdiora. Qua indi-  
 gnitate quidam permotus (nam cis flumē e-  
 rant ex nostris aliquot, qui eò speculatum

Q. iij. venerant)



venerant) puero fistulæ glande plūbea suprà  
renes, plagam repentè mortiferam inflixit.  
Quod coniurati cū conspexissent, equites  
duodecim de sylua furiosissimè conclaman-  
tes decurrerūt: Circumuenimur ô socij, nisi  
prouideritis, circumuenimur. Nōne vi-  
detis commilitones nostros coràm trucidari?  
ac tormentis transijci? Quid speremus sparsi  
& inermes, cū etiam iam armatis vis infe-  
ratur? Enimuerò fecialem nihil aliud cona-  
ri, nisi vt cuncti insidijs circumclusi debilita-  
tiq; à nobilibus contrucidemur. Hæc cū  
dixisset, dissipati omnes, ac veluti repentino  
furore conciti diffugerunt.

Attamen Kettus feciali se adiunxit, eratq;  
illi in animo Varuicensē coràm affari: iamq;  
collem pænè Sturtelhensem descenderant,  
cū ingens eum seditiosorum caterua cla-  
moribus infecuta, ad vnum omnes vocife-  
rari cœperunt. Quonam iret rogātes? se pa-  
ratos omnem (quamuis vel acerbissimam)  
cum illo fortunam subire. Quin si longiùs  
progredi

progredi perrexisset, habituros illos itineris, etiam comites, ac vitæ necisque participes. Fecialis cum à tergo tantam hominum confectionem vim vidisset, Kettum rogabat uti hos concursus ac tumultus sedatum retrò cederet. Qui cum ad suos se retulisset, protinus conticuerunt, cunctique cum illo ad castra reuerterunt.

At Varuicēsis cum vniuersos furore quodam, & cæco veluti mentis impetu ad interitum præcipientes ferri animaduertisset, neque ullis aut precibus aut pollicitationibus, neque porro supplicij denunciatione permoueri, uti à tam foedo incepto absisterent, pacis spem tam à se, quam ab alijs sæpius frustra tentatam, in æternū sibi dimittendā putauit, & tandem de bello agendū. Itaque confestim ad portas diui Stephani exercitum ducit, (quas cataractis dimissis, perduelles occluserant) iussitque magistros libratorum regios, ita bombardas pro portis locare, ut ijs deturbatis, atque tormentorum impetu refractis,



refractis, militi in urbem aditus præstrueretur. Quæ dum fierent, ab Augustino Stuardo proprætore intelligit, ianuam esse auersam (quam vulgò æneam appellât) hanc ab illis maximis defixis trabibus, ijsque terra lapidibusque repletis munitam, nihilominus nullo negotio distrahi atque perrumpi posse. Munitores accersuntur, ijs imperatûm ut refringant. Effracta porta, per patentem eam nostri primùm in urbem ingressi, multis interfectis, hostem eo loco facillimè submouerunt. Iamque tormentariorum præfectus, catractis disclusis, atque diruptis, dimidiam ferè portæ partem, frequenti tormentorum ictu quassatam disiecerat, cum Northamptonensis, & Druryus quidam (perspectæ fortitudinis vir) cum cohortibus suis, illac in urbem inuolantes, Kettianos istinc quoque multo inflicto vulnere, multisque trucidatis, è vestigiò depulerint. Ex altera item parte urbis, Proprætor perfecit, ut portæ Vestuicenses aperirentur, quibus reclusis patefactisque, Varuicen-

Varuicēsis omni cum exercitu intromissus, resistente pænè nullo, in forum peruenit. Ibi sexaginta ferè hostium deprehensi, in quos confestim militari more animaduersum est. Indicta enim causa, omnes protinùs ( vt in bello fieri consuevit ) manifesti sceleris conuicti, vltimo supplicio afficiebantur.

Ac non ita multò post, vehicula ac impedimenta omnia, quæ propter tùm subuectionum difficultates, tùm frequentes, ac repētinās hostium incursiones, aliter importari nequirēt, per illam quoq; portam in oppidũ introducuntur. Sed accidit (vt fit) calorum temeritate & inscitia, dum nostri grauioribus negotijs implicarētur, vti ad portam Episcopalem Mousholdiam versùs, vrbe excederent. Quod ex seditiosis quidam conspicati, missis qui auersos calones adorirentur, nostros impedimentis omnibus exuerunt. Qui ex hoc incredibiliter gauisi (nā antea ab istiusmodi rebus imparatissimi fuerunt) carros tormentis, ac puluere sulphureo,

R. omniq;



omniq; militari instrumento onustos, in castra perduxerunt. Sed peropportunè cū cohorte sua Drurius interuenit, qui (neque tamen omninò sine militū iactura) vehicula quædā ab hoste recuperauit. Deindè perduelles hoc cōsiliij cœperunt, vt in trāsuerfis platearū diuerticulis, cateruatim ex insidijs subsisterēt: rati nostros incautos, & viarū insuetos, propter tūm locorū insolētiam, tū vrbs magnitudinem, celeriter confici posse. Quamobrē vicatim distributi, pars ad diui (quē vocant) Michaelis, pars ad Simonis, alij ad Petri, nōnulli ad Vymerensem vicum, parati omnes ad præliū, instructiq; cōstiterunt. Ibi nostros necopinantes adorti, tres vel quattuor generosos, prius quàm quispiam subsidio venire posset, crudelissimè interemerunt. Re cōperta, & in forū diuulgata, Varuicensis omni cū exercitu ad hostem submouendū proficiscitur. Cū per plateam (quam vulgò Ioannis vocant) ad templum diui Andræi peruenissent, hostes de improviso magnam sagit-

sagittarū vim atq; procellam in nostros effuderunt. Sed sagittantibus illis, & terram cœlo miscere conantibus, denuò cum scloppetarijs suis, sūmæ pernicitatis atq; peritiæ iuuenibus, derepentè infert se Druryus, tātamq; vicissim tormentorum tempestatem (grandinis ritu) refundit, puncto vti temporis trepidātes omnes in fugam impulerit. Circiter centū & triginta interfecti: multiq; dum in cœmiteria & sub muros correperant comprehēsi, & acerbissimo supplicio affecti fuēre. Cætera omnis colluies ad castra Mousholdica, velut in sentinā refluxit. Quibus exhaustis, ciuitas (quòd tātam pestem euomisset, forasq; proiecisset) recreari tandem, & magnoperè releuari videbatur.

Seditiosis itaq; hunc in modū reiectis, vrbeq; depulsis, *Varuicensis* quò oppidum cōmunitus fieret, muros militibus, rebusq; ad hostem repellēdum idoneis instruxit: iussitq; vti protinùs cunctis in vijs armati collocarentur, omnesq; aditus in urbem, portæq; (extra vnā aut  
R. ij. alteram)



alteram)obstrueretur. Namq; per illas nostri magnam tormentorum multitudinem deuererunt, quæ parata inibi stabant & instructa, quò postridiè Mousholdiam deportarentur. Se denim Kettiani rati nostros magna pulueris sulphurei, cæterarumque rerum omnium (quibus tormenta exerceri solent) penuria laborare: videntesq; insuper ad impedimenta & vehicula passim stare ex nostris quosdã (quos tùm propter paucitatem (nec enim multi erant & incompoti) tũ quòd de superiore loco decurrentium impetus, sustinere nequaquã posse videbantur, magnoperè despexerunt) oblata sibi per insignem rei benè gerendę facultatem existimarunt. Itaque dum *Varuicenses*, quã ab vrbis defensione, quã à cæteris rebus distentissimi, maioribus curis impediretur, Milo quidam, vir (vt videbatur) audacissimus, & pilarum eiacularandarum peritissimus, oportunitatem eius facinoris, tempusq; diligenter aucupans, Præfectum libratorum regium tormēti glāde transfixit. Quem illi exanimem cōspicati,

cati, pars nudi & inermes, pars baculis, clavis,  
ac bidentibus instructi, phanatico veluti cursu  
instincti, de colle in nostros impetum fecere.  
Ne primā quidē impressiōis procellam tu-  
lerunt (tantus omni ex parte terror fuit, & tā  
necopinata hostium vis) sed inconditis vlula-  
tibus & strepitu horrifono obstupefacti, per-  
territi; (impedimētis omnibus carris; reli-  
ctis atq; desertis) magno cū clamore cursu;  
effuso, vndiq; fugæ se mandarunt. A pluri-  
bus itaq; paucis hunc in modum dispulsis atq;  
fugatis, seditiosi tormenta quædam quæ inibi  
deprehenderunt, carros; cunctis rebus quæ  
bello vsui forent onustos (priusq; auxilio à no-  
stris veniri posset) in castra comportarunt.  
Quæ sanè res peraduersa nostris & incōmoda  
fuit. Nam præterq; quòd instrumētum militaris,  
quo se hostis instruxit postea indiguerint:  
Kettiani libratores, pilis ferreis, quæ è bom-  
bardis, & tormentis quæ ceperunt, in nostros  
creberrimæ infensissimæq; torquebantur, vr-  
bem vehementer afflixere. Multisq; interfe-

*Quamobrem  
seditiosi Wallij  
dispulsis &c.*

*omnia*



ctis, tormentorumq; rabie laceratis, atque dis-  
cerptis, hoc insuper addidēre sceleris & ne-  
quitiae, magnam vti muri partem, turrimque  
quæ in summo Episcopalis constiterat portæ,  
furiosissimè deturbarent. Quanq̃ certè (diuini  
numinis clementia) ea tūm populi Noruicē-  
sis fortuna fuit, vt circumuolitantes tormen-  
torum pilæ, siue casu, siue consilio, siue (quod  
magis reor) collibrātium (vt interdū accidit)  
temeritate, & inscitia altiùs emissæ, domuum  
tectasine damno, præteruolauerint. Quæ res  
vtiq; nisi contigisset, ab impurissimis latroni-  
bus, deterrimisque, continenti tormentorum  
impetu ædificijs vndiq; disiectis atq; deterfis,  
maximæ vrbis partes, leui momento constra-  
tæ, æquatæq; solo concidissent. Atquæ equi-  
dem proculdubiò detrimētum opinione om-  
nium maius publicis rebus eo die importa-  
tum fuisset, si Druryus, virtute sua, & haud  
contemnenda militum strage, hoc incōmodo  
expiato, hostibus profligatis atque repulsis,  
maximam eorum quæ tūm auerterūt, partem

non

non præripuisset.

Varuicensis post hæc, quarundam portarum ingressibus concisis, atque aggere obseptis, in pontibus & vicorum flexionibus, ac diuerticulis, diuersa suorum præsidia disponit, magnamque armatorum manum ad portam Episcopalem constituit, cui Dominum VVylloughbæum præfecit: sicque omnia milite circumsepsit, atq; munivit, vt ea nocte hosti introitum in urbem, vndique præcluserit.

Postero tamen die, seditiosi flumen transgressi, circa locum quendam quem Counsforth appellant, incendio terribili, & ad aspectum sanè perlugubri cuncta permiscēt. Nam omnibus duarum parœciarū ædificijs exustis, ignis ita latè se diffudit, vt vicina plæraq; loca horribili flamma comprehēderet. Domus erat quædā in qua Mercatores Noruicenses, ea quæ Yarmoutho deuexissent, deponere cōsueuerūt: huic ignis illatus, quo momento temporis domus ipsa, vnàq; maximus frumenti



frumenti numerus, multæq; honestissimorum negotiatorum fortunæ concremata, deflagrauerunt.

Fama est (neque absonum fidei videtur) decreuisse illos totam urbem incendio dele-  
re: atq; eo consilio quibusdam tectis ignem  
iniecisse, quò videlicet vniuersi ad arduas  
domus discurrentes, seditiosi eodem tēporis  
puncto, portis omnibus inundantes, nostros  
dissipatos, & mutuo interclusos auxilio, hinc  
flamma, illinc ferro constringerent. Id pru-  
denter animaduersum, & hostium conatus  
fefellit, & nostros eam in sententiam addu-  
xit, vt ignem passim per tecta, populabunda  
velocitate grassantem, vagari finerent, neq;  
orientem eum quamprimùm restinguerēt.

Veruntanē cū nostris ista hunc in mo-  
dum omni ex parte infoeliciter accidissent,  
calamitates alias super alias perpetuò accu-  
mulāte fortuna, multorū animos ingens stu-  
por ac mœstitia defixit, adeò vt desperatio-  
ne ac timore languescerent (deficiente iam

ad

ad omnia consilio) pænè succūberent. Hij  
 Varuicēsem adeūt, demōstrāt vrbē esse ma- „  
 gnam, portas omnes aut fractas, aut exustas, „  
 summā propugnantīū paucitatem, hostium „  
 verò copias ingentes, defendi non posse, ro- „  
 gāt enixè vti saluti consulat, ciuitatem relin- „  
 quat, nèue rem in summum discrimē deduci „  
 sinat. Varuicensis (vt erat corde semper  
 excelso sanè, & inuicto, tū acer, & vehemens  
 in ferro vir, omnisq; insolens infamiæ) Quin „  
 igitur (inquit) tam citò animis concidistis? „  
 Tantāne derepentè offusa menti caligo, vir- „  
 tutis aciē perstrinxit, vt hoc aut vos velitis, „  
 aut me viuo fieri posse arbitremini? Ego vt „  
 vrbem relinquam? prius ferrum, prius flā- „  
 ma, prius deniq; omnia, quàm tantam mihi, „  
 vobisue ignominiaē aut dedecoris labem a- „  
 sperferim. „

His dictis, gladiū distrinxit, fecēre idem  
 & cæteri nobiles (aderant enim frequentis-  
 simi) iussitque vti alter alterius ensi (militari  
 more in maximis periculis interdū hoc fieri

S. consueuit)



consuevit) osculum & sacræ crucis signum  
imprimerent, & iureiurando, sanctoq; fœ-  
dere conceptis verbis vniuersi se deuinci-  
rent, nō prius istinc discessuros, q̃ aut hostem  
funditus profligauissent, aut vitā pro Regia  
maiestate dimicantes fortiter profudissent.

Dum hæc fierent, seditiosi alia ex parte op-  
pidi, qua nostri illos minimè ingressuros re-  
bantur, in urbem perumpunt, sed cū iam  
penè ad pontes peruenissent, à nostris celeri-  
ter occursum est, multisq; cædibus vulneri-  
busq; repulsi, fuga quā intrarunt præcipites  
se effundunt. At Varuicēsis, quò hanc hosti  
urbis adeundę potestatē penitus præriperet,  
iussit omnes pōtes quaquāuersus interficendi.  
Posteā verò quibusdā de causis secus impe-  
ratū: isq; tantum qui vulgò Carmelitarū di-  
citur interruptus: cæteris omnibus perstre-  
nui milites præsidio impositi, cunctaq; loca,  
& præcipuè portę, quod illę maxima ex par-  
te omnes, aut prostrate cōcidissent, aut incē-  
sæ deflagassēt, hominibus impigerrimis, &  
in

in militari re exercitatisimis, tuēdē ad quos-  
uis repētinos casus trāsdite. Vndē adeò factū  
est, vt improuisi, atq; nocturni hostiū impe-  
tus, omnes omniū cassi, & inanes exstiterint.

Postridiē eius diei (is fuit. a. d. VII. Kalen.  
Septemb.) Heluetiorum mille quadraginta  
peracres (vt vulgus hominum existimabat)  
bellatores & egregij, Lōdino ad Varuicēse  
venēre. Hij lætis acclamationibus à nostris  
suscepti sunt, qui multistormentorū bombis  
gaudiū atq; alacritatē significarūnt suā. De-  
mum per vicos domusq; diuisi, & à ciuibus  
perliberaliter perq; benignē accepti inuita-  
tiq;, vt nostrorū animos exsultātes, & rei be-  
ne gerēdē fiducia subnixos ad certā spē ere-  
xerūt, sic hostiū mentes, noua iā cōfusas for-  
midine, consternataq;, ad haud dubiam fu-  
turi interitus cogitationem depresserunt.

Intereā verò seditiosi, nihil aliud nisi bonorū  
omniū sanguinē exsorbere cupiētes (cuius iā  
spē aliquā auidissimis imbiberant animis) in  
eo rem totā verti existimarūnt, si Varuicēsis

S. ij.

copiæ



copiæ, primo quoquo tēpore profligarentur. Et certè sicut Deum optimū maximum deseruerunt, sic ab illo spreti vicissim, abiectiq;, diabolo sese constringendos dediderunt. Hic anili superstitione mentes imbuerat, perficitque vti cæcis ariolorum ineptijs impliciti, vicinam quandam cōuallem veluti huic fatalem bello deligerent.

Quanquā equidem (sicuti memoriæ proditum est) non defuere portēta, & manifesta diuini furoris indicia. Namq; anguis ex columna lignea in gremium vxoris Ketti dilapsus, non tam multorum pectora terribili pauore perculerat, quā Kettum ipsum anxijis impleuerat curis. Sed hīc forsan operæpretium erit referre, quā futili opinionis errore inflati, sese ad exitiosa deuoluerint, cū quæ reuerà iram & vindictam, (vti videbatur) diuinam portenderunt, væcordi feritate atq; pertinacia tumentes, vniuersi neglexerint. Tātam certè noctem humanae menti diabolus offundere consuevit, quoties

quoties eam scelere demerfam conspexerit. „  
 Etenim cum multa essent vaticinationū de-  
 liramenta in vulgus relata, ex quibus nescio  
 quam victoriolæ spem exsuxerant: in con-  
 ditos tamē quosdam & infulsos versūs (stul-  
 tæ animorum truculentia indices) præcæ-  
 teris omnibus amplexi sunt. Qui cū crebris  
 quotidie sermonibus vsurparentur (falsi si-  
 quidem vates singulis pæne momentis hu-  
 iuscemodi ineptias auribus instillarunt suis)  
 res erat exempli post natos homines planè  
 inauditi, quæque omnem exsuperet fidem,  
 quemadmodum ad eorum mentionem fu-  
 ribundos sensus incitarint animaduvertere:  
 tum quanta & quam inani lætitia gestierint,  
 intueri. Perinde ac si illis vnis versibus certa  
 sibi salus & victoria, nostris autem interitus,  
 & miserabiles fortunarum omnium ruinae  
 portenderentur.

Hij autem erant istiusmodi:

The cutty gnooses, Hob, Dick, & Hick, with clubs and clouted shoon,  
 Shall fill by Dussyn dale with slaughtered bodies soon.

S. iij.

Quos



Quos nos (vt potuimus) Latino sermone  
expressimus, *Rustica plebs clavis, & agresti induta perone,  
Duffoni vallem miseranda strage replebunt.*  
Hij cū quotidie & (vt suprà dictū est) vbiq;  
decātarentur, sceleratissimorū hominū mē-  
tibus, id veneni dæmon infudit, vt ambiguo  
falsi, fortunę loci, spēs suas delegare decreue-  
rint. Itaque omnibus scelerū suorū latibulis  
atq; speluncis (quas passim ex ligno ipsimet  
sibi cōstruxerāt) incēsis (adeò vt fumus ē tot  
simul distantibus locis ortus, toti pænē cœlo  
veluti noctem induceret, subiectasq; plani-  
ties atra caligine integeret) indē in vallem  
Duffonensem cum vexillis, ac signis mili-  
taribus viginti perrexerunt. Tanta erat se-  
ditioforum prædæ spēs, impunitateq; al-  
lecta multitudo. Ibi omnia cōari, atque  
moliri cōeperunt, quò nostris aditum, &  
negotij conficiendi spēm adimerent: adeò  
vt momento temporis vallo, aggere, mu-  
nimentisq; se circūseperint, fossas vijs trans-  
uersas

uersas perduxerint, itineraq; omnia sudibus  
stipitibusq; in terram defixis intercluserint.

Hæc cum Varuicensis intellexisset, statuit  
& ipse quoque belli fortunam periclitari vt  
quos lenitate ac patientia frangere nō potu-  
erit, eos vi & armis superaret. Insequēti itaq;  
die (is fuit. a. d. VI. Kalend. Septemb.) in-  
structo exercitu per portam Costliniensem  
cōtra hostem iter ingreditur. Adiunxerant  
se comiti Marchio Northamtoniensis,  
VVylloughbæus, Poijsius, Braijus, Am-  
brosius Dudleyus Varuicensis filius, &  
prætereā nobilium, ac fortissimorum viro-  
rum cohortes lectissimæ.

Prius tamen quàm in hostiū cōspectū ve-  
niretur, Edmundū Knyuettū, & Thomam  
Palmerium, equites ex aula perillustres, at-  
que altero totidem sciscitatum dimittit, vel-  
lent ne nunc demum furores deponere suos,  
& sceleris, crudelitatis, perfidiæ, belli deniq;  
contra patriam faciendi consilia abijcere.  
Tantam esse nimirum & tam incredibilem  
bonita-



bonitatis atq; clementiæ Regiæ magnitudinem, vt quamuis impietate pænè indelebili maiestatem ipsius, dignitatemq; polluissent, seseque sempiternis turpitudinum notis maculisque conspersissent: admissorum nihilo tamen secus facinorum veniam pacemque semel iterum cunctis (vno aut altero excepto) denuntiari iusserit: dummodò ex hoc cursu malignitatis atque nequitiae iter iam tandem (pœnitentia ducti) ad obsequium tranquillitatemq; conuerterint. Sin verò in amentia peruersæ, atq; impiè persistere decreuissent, extremaque omnia experiri, nunc demùm adesse scirent, malè sanæ leuitatis atq; perfidiæ pœnas suæ: ipsumq; Varuicensem, quāquam serum, certum tamen, tam nefandæ coniurationis vindicem. Hijs hoc vnum, idque ferocissimè ab omnibus responsum: **SE NOLLE.**

Quibus ad Varuicensem relatis, non longiori oratione milites peracri iam pugne desiderio deflagrantes, cohortatus est, quàm  
Vti

vti fortiter hostem inuaderent, nèue pertur-  
barentur animo, sed eam quam conspiceret  
seditioforum multitudinem, non homines,  
sed feras, omni diritate præditas existimarēt.  
Nec se ad pugnam, sed ad poenam venisse  
arbitrarentur, eam confestim à flagitiosissi-  
mis latronibus deposcerent, pestem patriæ,  
pietatis atq; officij stragem, belluas denique  
truculentissimas, maiestatiq; regiæ feritate  
insanabili reluctantes, prosternerent, afflige-  
rent, delerēt. His dictis, quia nō longiùs ho-  
stes aberāt, q̃ quò glans è tormento propelli  
posset, prælij committēdi signū dat. At Ket-  
tiani nostros contra se venientes conspicati,  
suos ita instruxerūt, omnes vti nobiles quos  
damnatorum more catenatos, durissimisq;  
vinctos compedibus secū duxerunt, in pri-  
ma acie locarint. Id eo consilio factum, quò  
nostri, à nostris interficerentur. Sed Dei im-  
mortalis numine & incredibili militum vir-  
tute contigit, vt (secus quàm hostes volebāt)  
omnes penè incolumes euaserint. Milo si-

T. quidem



quidem ( hunc modò Kettianum librato-  
rem esse diximus , artifque tormentariæ  
scientissimum ) ferrea pila , regio vexilli-  
fero foemur percussit : quæ per equi hume-  
rum , quo is vectus fortè incedebat , altiùs  
adacta , ipsum quoque equum , eodem  
vulnere transfuerberavit. Id nostri indignè  
ferentes, displofis vicissim tormentis, horri-  
biliq̃ue pilarum procella in hostes effusa,  
ordines perrumpunt . Quibus continuo  
impulsis , atque perturbatis , omnes nobi-  
les qui in prima fronte constiterunt , fugiẽ-  
tes , belli tempestatem deuitarunt. Etenim  
nostri equites, postquàm hostes crebris tor-  
mentorum, sclopetorumq̃ue traiectionibus dis-  
pulsos fugatosq̃ue conspexerunt, subito om-  
nibus copijs prouolarunt, impetumq̃ue in  
illos fecerunt , quem tantum afuit illi uti  
sustinuerint, pecorum ut instar , promis-  
cuè , citato cursu , cuncti præcipientes in  
fugam proruerint. Cæterum cum ex in-  
sequentium strepitu , atque clamore , in  
ultima

ultima iam perfidiæ obstinatione, feroces  
ac præferuidæ mentes, tacitas nescio quas  
odij atque doloris flammæ, corripuissent:  
(velut feræ) ex desperatione & scelerum  
memoria, in rabiem versi, è fuga se re-  
pentè conuertentes exitiabili peruiacacia,  
nostris aliquandiù restiterunt. Veruntam-  
en tantus fuit pilarum vis, tantusque  
nostrorum hominum (qui victoriæ per-  
auidi effrenatiùs in aciem hostium per-  
ruperant) irruentium ardor, ut Kettia-  
næ cohortes undique acri impetu, pulsæ,  
protritæque, nullo pænè negotio loco  
pellerentur. Itaque Kettus, uti dux in  
scelere strenuus, ita Imperator in bello  
ignauus, ubi aduersa omnia vidisset, or-  
dines interrumpi, suos disijci, nostros in-  
festos inferri, neque salutis, neque præ-  
sidij ullam spem, animo varius, & im-  
manium facinorum conscientia exæstu-  
ans, fugæ se mandans, clam suis pugna  
excessit.

T.ij.

Ea



Ea res vtiq; postquàm cognitum est, du-  
cem è prælio profugisse, incredibiliter hosti  
animos minuit, tantumque breui temporis  
momento perfecit, vti omnis ille ardens nu-  
per, ac vehemens repugnandi feruor, pro-  
tinus ad tam necopinatæ fugæ famam elan-  
guescens refrixerit. Quamobrem primùm  
murmur, & tacitæ querelæ, post clamor, ad  
extremùm verò vndique fuga fieri coëpta.  
Effusos nostri equites perceleriter insecuti,  
stragem ingentem dederunt. Namq; ad tria  
millia quingenta cæsi, & fauciorum magnus  
numerus, cùm omni ex parte dissipati, aut  
vulnerarentur, aut trucidarētur. Quod qui-  
dā è seditiosis animaduertentes, sublata om-  
ni prorsus, vti rebantur, veniæ spe, efferatos  
iam multis immanibus factis animos, ad ma-  
iora inuicem in ea desperatione salutis scele-  
ra exaceruerunt. Itaque peruicaci audacia cō-  
fertim è fuga se recipientes, prælium redin-  
tegrare decreuerunt: prædicantes, malle se  
fortiter dimicantes occumbere, quàm fugi-  
entes

entes (pecudum ritu) contrucidari. Porro, vbi se telis, alijsque rebus (quæ humi passim inter acervos cælorum corporum stratae iacebant) instruxissent, & verua, fudes, stipitesq; præacutas solo infixissent, fidem astrinxere, aut illic se vitam viriliter proiecturos, aut victoriæ demum compotes futuros. Itaque cum alter alteri propinassent (ominis id erat instar, & signum animarum morti deuotarum) precibus votisque solemni more susceptis, ad pugnam se confirmant.

Varuicensis re intellecta, facialem mittit, monet uti arma deponant, impunè fore si fecerint, secus omnes ad unum interituros. Respondent perlibenter se ab armis discessuros, si scirent illam impunitatem sibi salutare futuram, sed animaduvertere in suæ societatis homines undique sæuiri, id adeo indicio esse, mentionem hanc veniæ à nobilibus infidissimè inductam, nimirum quò falsa & perinani clementiæ spe (veluti laqueis) circumretiti tandem atque deuincti, ad cruciatum

T. iij.

omnes,



omnes, & cædem constringerentur. Et reuerà quicquid illi præ se ferant, scire se tamē perq; bellè intelligere, veniam eam nihil aliud esse, quàm **DOLIOLVM RESTIBVS & CAPISTRIS REFERTVM.** Proin mori decreuisse.

His relatis, Varuicensis ingemuisse dicitur turbæ iamiam perituræ, atq; commiseratione ductus, denuò misisse qui sciscitarentur: Num si ipse veniret, & coràm fidem obligaret suam, arma abiecturi forent. Conclamant omnes, id si fecerit, fidem habituros, & regis se arbitrio, potestatiq; permissuros.

Nec mora: Varuicensis protinus ad illos pergit: fecialem publicè litteras regias legere iubet, quibus recitatis (quòd eæ veniã omnibus persanctè polliceretur) ijs cõfisi, arma abijciūt, cunctiq; vno veluti ore gratulabūdi exclamant, **VIVAT EDOVARDVS REX. VIVAT EDOVARDVS REX.** Atque ita multi mortales,

mortales, velut è fati faucibus erepti, Varuicensis prudentia ac misericordia conseruati sunt. Confecto prælio, præda omnis eodem die militi permissa, atq; Norwici publicè in foro diuendita.

Illud insuper memorię proditū est, nobiles complures, ac primores etiā aliquot ciuitatis, in ipso tumultu & ardore pugnæ transfossos, etsi ingentem pecuniam, magnaque munera militibus dedissent, quò suę vitæ, incolumitatiq; prospiceretur.

Postero die quorūdam hominum nuntijs ad Varuicensem perfertur, Kettum dum equus labore languescens fortè (vt fit) itineri succubuiisset, fugæ pertæsum in horreum correpsisse. Illic à duobus seruulis cuiusdam Richesij de Swannington comprehensum, domumque illius deductum asseruari. Missi protinus equites viginti, qui illum ibidem in sordibus, lamentis, luctuque iacentem offendentes, ex sanguinem metui, ac vitæ diffidentem, desperantemque suæ, vinctum



vinctum Norwicum pertraxerunt.

Eodem die iudicia exerceri cœpta, quæstionesq; de ijs qui coniurassent habitæ in castello, multiq; mortales patibulis suffixi, acerbissimo cruciati supplicio, necatiq; fuere. Dein nouem, qui eius tumultus antesignani & principes exstiterunt, de Reformatoria Quercu suspensi: complures item eorum affines facinorum in crucem sublati: ijs (incisa protinùs resti) in terram dilapsis, (sunt hæc apud nostrates proditorũ supplicia) abscissa primùm quæ procreandi causa affinxit natura, tùm viscera viuis extracta, & in ignem iniecta, caput amputatum, idq; fixum in pilo, & in turris fastigio defixum, reliquũ corpus in quattuor partes laceratum atq; dissectum, eæq; totidem in locis sparsæ, atque ad terrorem omnibus propositæ.

Verum enim uerò agrestibus hunc in modum deletis, permulti nobiles iracundia & vlciscendi studio vehementiùs incitati, animum Varuicensis ad crudelitatem incedere

cona-

conabantur. Qui non paucorum poena cō-  
tenti, volebant omnem penitus stirpem sce-  
leratam exscindi: adeoq; acres in eo fuerūt,  
& peracerbi, vti Varuicēsem coegerint pa-  
lām ad illos hac oratione vti. Adhibendum „  
esse modum: cum ne fortè in puniendo ex- „  
cederent, in primis cauendum. Scire se ma- „  
leficia eiusmodi acerrimè vindicari debere, „  
& atrocissimo supplicio cōstringi. Sed quo- „  
usq; progredērēt? ecquid semper sese im- „  
placabiles inexpiabilesq; præberent? nullum „  
deprecationi, nullum veniæ, nullum miseri- „  
cordiæ locum relinquerēt? An essent & ipsi „  
agricolæ futuri, & terrā aratris perstricturi? „  
Hæc oratio vindictæ cupiditatē magnoperè  
sedauit, perfecitq; vt multi qui antea ad im-  
manitatem toti exarserant, postea tamen ad-  
uersus miseram plebeculam longè humani-  
ores exstiterint. Sub noctem trucidatorum  
cadauera sepulta sunt, ne ex tabe corporum,  
lues morbiue progignerentur.

Postridiè eius diei (inciderat is dies in ante

V.

diem



diem. III. Kalendas Septemb.) præclarissimus, ac in summa sapientia & fortitudine illustrissimus princeps Varuicensis, vnà cum cæteris omnibus nobilibus ingentiq; nō virorū modò, sed etiam fœminarum omnium generum, ætatū, ordinum turba, templū diui Petri ingressus est: ibiq; Deo optimo maximo gratiæ actæ, & ob rem peregre regiè gestā supplicationes habite. Quibus peractis, cum omni comitatu vrbe excessit.

At ciues superfundenti se lætitia, vno consensu omnes Varuicensem in cœlū laudibus efferre, de illo omnia bona prædicare, plausibus, hilaritatibus, gratulationibus, implere, miscereq; omnia, magnificentissimisq; verbis tanti ducis famam, tātæ virtutis memoriam cōcelebrare, vitā suam, cōiugum, liberorūq; animas, fortunas deniq; vniuersas, illius dūtaxat prudentiæ, fœlicitati, fortitudini acceptas referre. Statuerunt prætereā, ad notam, & ignominiam illorū temporū sempiternā, vti eo ipso quo hostes fusi sunt die, eūcti tēpla

pla adirent: ibiq; preces à sacrorum ministris  
solemni instauratæ ritu, quotannis celebra-  
rentur. Quibus de more susceptis, decreue-  
runt insuper concionem in publico fieri, ad  
quam vniversi conuenirēt. Quæ cōsuetudo  
ex huiuscemodi introducta principio, etiam  
ad hæc quoque tempora permanauit.

Sedenim horum omnium scelerum signi-  
fer Kettus, Londinum ynà cum Gulielmo  
Ketto, homine plurimis flagitiorum turpi-  
tudinibus infami, fratriq; suo, (non tam san-  
guinis communionē, quàm morum imma-  
nitate, & perditissimis vitæ rationibus con-  
iuncto) pertractus est: atque in turrin Lon-  
dinensem coniectus.

Interiectis autem aliquot diebus, etsi ma-  
nifeste perduellionis cōuicti, & omnium iudicijs  
ignominijsq; cōscissi, flagitiorū suorū consci-  
entia conciderint, tamen ad Iudicū subsellia  
traducti, more maiorū quæstio de ijs habita  
est. Cōdemnati ducuntur Norwicum alter,  
alter VVindamiam, vbi de vtriusq; suppliciū



sumtum fuit. Etenim Roberto Ketto Norwici in castello catenę iniectę sunt, collumq; in laqueum insertū, atq; ita de terra vius in crucem sublatu, ad diuturnam tanti sceleris memoriam pepēdit : donec infœlix & triste cadauer, turpi tandem dilapsu tabo defluxisset. Gulielmus autem Kettus, VVindamię unde omnes illi furores velut à fōte redundarunt (namq; inibi ambo habitauerūt) consimili mortis genere excruciatu interijt.

Atq; hunc in modum ciuitas, omnisque regio Norfolciensis (cū ad sexaginta ferē dies, hęc impura & mortifera perfidię pestis ad multorum perniciem & interitum peruagata, cuncta lamentabili clade concussisset) Deitādē optimi maximi benignitate, & Varuicēnsis præcellentissimi principis admirabili virtute, hoc tam funesto ac lugubri perfuncta tumultu, conquieuit.

**FINIS.**

ALEXANDRI  
NEVYLLI  
ANGLI,  
NORVICVS.



LONDINI,  
*Ex officina Henrici Binne-*  
*mani Typographi.*  
Anno salutis humanæ  
cic. d. lxxv.







## Lectori.



*E ME (LECTOR optime) existimes vel famæ desiderio (quo sanè nō conficior) vel præmij inuitatum & illectum spe, (quod nunquam concupiui) ad scribendum accessisse. Enim uerò non sum ita mentis inops, ita omnis consilij egenus, ut in hac tanta mea vel eruditionis, vel ingenij mediocritate, vel huius peruersissimi seculi maledicendi libidine (nam quæ tempora inimica magis virtuti?) ullam aut laudem, aut lucrum expectem. Vidi equidem vidi, & longè antè præsaga mens atq; præscia futuri prospexit, fore ut hic labor meus non meo certè (quod quidam forsân suspicabuntur) iudicio, sed alieno susceptus imperio, in popularis inuidiæ procellas, & varias maleuolorum reprehensiones incurreret. Sed ego is sum, qui sicuti doctorum atq; prudentiū*



AD LECTOREM

*iudicia permagni semper ad laudem & decus interesse putarim, ita insipientium perpetuò susurros ac murmura neglexerim.*

*Et verò nisi præstantissimi & optimè de me meriti præsulis authoritas, quæ mihi istius operis aggrediendi cupiditatem iniecerat, eadem perficiendi quoque necessitatem imposuisset, ( siquidem moriens uti liber typis quàmprimum peruulgaretur testamento cauerat ) citius ( mihi crede ) in cribro ad Antipodes pernauigassem, quàm in re tam sterili, atque pertenui vel industriæ meæ vel ingenij nervos intendissem.*

*Porro autem cùm animo ob eas vitæ acerbitates atque ærumnas quas in me simul vno eodemq; tempore quasi conflauerat atque profuderat fortuna incredibiliter angerer: omnesq; mihi vndiq; venti reflauissent, quò aspirare mens mea tantis malorum mōtibus circumclusa potuerit certè non reperio.*

*AD HÆC accedit, cùm neq; ingenio, ( quod mihi quidem minus quàm mediocre est )*

est) neq<sup>3</sup> arte aut studio dicēdi (quibus in re-  
bus aut nihil, aut non multum sanè temporis  
impendi) neq<sup>3</sup> usu & exercitatione quicquā  
valerem, ecquid mirum si cogitationes &  
spes meæ vniuersæ, tantis difficultatibus de-  
pressæ funditū concidissent? Quibus cum  
rebus omnibus ab omni prorsus scriptione  
deterrerer: ægerrimè passus sum ijs me lit-  
teris atque laboribus inuolui, quæ plus mihi  
dedecoris viderētur & molestiæ, quàm splē-  
doris aut emolumenti allaturi. Quid enim  
mea intererat, qui qualesuè fuerint Nor-  
uicenses, vndè orti, quibus primū vrbs au-  
spicijs nata, quibus deinceps aucta, quos cu-  
ria Prætores, quos habuerit Ecclesia Pon-  
tifices? quæ omnia etsi ad legendum alijs v-  
tilia videbuntur, & fortassis non ingrata,  
(neque enim contrà disputo) mihi tamen ad  
scribendum permolesta sanè atque periniu-  
cunda fuere?

Veruntamen clarissimi (vt antea dixi) &  
sapientissimi Antistitis voluntati obtempe-  
Xx. iij. randum



# AD LECTOREM

randum fuit. Cuius cū animus multum se  
 & assiduè in huiuscemodi rebus inuestigan-  
 dis peruolueret quid facere potuit abstrusis-  
 simæ cognitionis, & perreconditæ pontifex  
 vel ad nostram utilitatem præstabilius, vel  
 ad nominis sui famam præclarius, quàm si  
 eā antiquitatis notitiam, quæ in illius pecto-  
 re semper vixit (fragilitatis cōscius huma-  
 næ) nobis (æternis literarum monumentis  
 custodiendam) relinqueret?

Cæterum quot capita (ut ait ille Orator  
 omnium maximus) tot sensus. Neq̃ enim  
 defuturos quosdam arbitror (nam quid per-  
 uersius huiuscemodi ingenijs?) qui tam pru-  
 dentissimi Præsulis studium, quam meam  
 qualis ea cunq̃ videbitur industriam, im-  
 probaturi sint.

Sed tanti est apud me (Lector humanissi-  
 me) leuissimorū hominum ineptias & ma-  
 ledicta subire, (quem enim illi mortalium  
 maledicentiæ spiculis non confixere?) dū  
 modò doctos atque prudentes si quæ fortassis  
 minus

AD LECTOREM.

*minùs probabuntur æquiores inuenero.*

*Qui tamen si se mihi iusta petenti, duriores præbere in animum induxerint, ( quod eos facturos minimè reor, quandoquidem sapientium nomine atque dignitate nihil alienius) communi me nihilominus omnium qui unquam scripserunt conditione consolabor: & eius viri autoritate qui recusantem, & quiduis me potiùs facere cupientem ad hanc scribēdi audaciam impulerat (vel apud iniquos et inuitos Lectores) omne tam temeritatis quàm inscitiae crimē deprecabor. Vale.*

*X. Kal. Decemb.*

*CIO. IO. LXXV.*



Alex. Ne. amico suo ingenuo atque  
omni humanitate perpolito, Tho.

Dranta Archid. Leuicensis.

*Quisquis inexpletum seros decurrere in annos  
Ardet, honorato nomen sumpturus ab ore,  
Ille Neuylleo splendet Apolline : quisquis  
Sons animi, probitatis inops, & degener alta  
Virtutis, nocuis audax occalluit ausis,  
Quiq; miser meruit laniantis dentibus aui  
Rodier, innumeris populataq; nomina linguis  
Linquere, longeva nec se subducere labi,  
Ille Neuylleo calamo vilescat utroq; est  
Par : culpae malos : dignos aut tollere laude.*

*Tu mihi, tu teneris, ita note, Neuylle, sub annis,  
Te melos, & pulchra iuuenilis gloria lingua,  
Te studium semper flagrans, te nobilis ardor,  
Et decorauerunt caelestis sensa cerebri.  
Ac velut emollita foco bona cera calenti,  
Antea formarumq; atque omnis imaginis exors;  
Quaslibet admittit facies, & protinus omnes  
Fingitur in vultus, rerumq; capacior exstat:  
Sic in multiplices fandi decor inclytus vsus  
Electitur ille tuus, diuinique aetheris haustus  
Quodlibet audendi faelix, sacer impetus omnes  
Quos velit egregios fluit obsequiosus in actus.*

*Certè ego, de docto potatus plurima fonte,  
Quiq; hederas potui fronti vinxisse sequaces,  
Offulsus meliore deo : te dispare canna  
Tentabam, pronumq; tua me cedere Musa  
Sapè quidem solitum non ullus, amice, negabo.  
Quantus eras tum, cum memori quamplurima sensu  
Eruit in medium, vel cum centena profatu  
Extudit illustri tua mens diuinior arte?  
Quantus eras vel cum, fluuiorum lenè labantum*

*Instar*

Instar iſt ſermo? vel cum nervoſior eſſet  
Intentanda acies, & acuti cordis acumen?  
Quantus cum tumidis certabas rhetore roſtris  
Grandia fulmineo iaculatus verba rotatu?  
Quantus, quantus eras ſemper cum maximus ille  
Effingendus erat Cicero, veſtigia preſſis  
Cum ſignanda notis? diſ, diſ quam plurimus uſque  
Egregias laudes, fama & decora alta tulisti?  
Non tu nullus eras, nec eras non maximus inter  
Pernaſſi proceres, & amœni ſontis alumnos?

Quin ego qui poteram varias fulgere per oras,  
Inſcribiq; polo meritis, & diuice cantu  
Frangebar fatiſq; malis, hominumq; nocenti  
Inuidia: rebus latè ſpoliabar: & omne  
Viluit in lites ſtudium, vitamq; leuandam.  
Me malus exedit liuor, me inſcitia lucri,  
Me dolus, amiſſis dubiq; in rebus amici  
Fortuna pepulere bona: ſpiſſiq; cerebri  
Fex hominum fauſto vita de tramite truſit.

Heu nihil inuita fas quenquam poſſe crumena  
Nunc patrare boni: nunc, nunc obiere patroni  
Non cauonantes doctorem premia, Muſa,  
Muſa inhonorata languent, ſquallentq;, gemuntq;,  
Inſpidus gliſcit numerus: nummo geritur res.

O anima pars grata mea generoſe Neuylle  
Diuis orte bonis, cui corpore viuida virtus,  
Frontis bellus honos, & amicie mentis honeſtas.  
Quaq; deos ſtatuunt: ſi quid mea carmina poſſunt  
Semper in innumeros Virtute Neuylle decores.  
Ecquid & inſeſtis iactatus quando procellis  
Hac mecum documenta reſerſi? fallerſue tacendi  
Deſugis incuruos hominum reprehenderet honores.

Tu quoq; non paucis iamdiu dum quaſſe periculis  
Pondere nutaſti grandi: te præſulis Aula  
Excipit hoſpitiſ, ſed ſic vt dicere velles  
Nordonicum populum, mitraq; ſtolaſq; patreſq;,  
I.



Qui pedes gestarunt illic, ita pluribus ike  
Mæcenat voluit vester, quia paruulus inde  
Creuerat, & ditem scandeat fortè cathedram.  
Sic tu tam lautus rerum memorator herili  
Imperio, modicamq; urbem, modicumq; Senatum  
Ingenti premis ore: seges tibi creuit ab illo  
Id populus curet potius, tradantq; parentes  
Obscuri gnatis, & musset quisque viritum.  
Ingenys apta est hæc area turpiter hyrtis  
Dicere quot patres, quot segnis quisque sedebat  
Lustra patrum, quota scita dabant, fatuq; popello  
Addiderant ritum, vel quot conuiuia ciues  
Secum agitant leti, quibus est authoribus orta  
Urbs: quibus & templum: quæ vix ego stans pede in vno  
Dictarem vetulis nisi plus vel patribus ipsis  
Urbs, vel ciue suo magis increbresceret orbi.  
Nec tamen his teritur tua laus, aut fama loquendi,  
siue canas culices vox est tu cycnea cantu,  
Nec si grandifono pangas regalia plectro,  
Id stolidus pendet mundus satrapæ supini,  
Sordidulimè gregum patres, ita vergit in æra  
Mens hominum, surdaq; cupit ditescere fama.  
Tu tamen ut non sint pulchra sua premia laudi  
Maeste animis, musisq; mica, virtuteq; fulge,  
Mors ruit, & mundi volat irreparabilis ætas,  
Sola virescitur virtus, & vis maiora patrandi.  
Actibus augustis infer te te arduus æstris.



**Errata quæ in hoc volumine occurrunt,  
vbi notandum est quod numerus  
primus paginam, secundus  
lineam denotat.**

6. 11. debilitatis, lege debilitatus. 18. 15. stadiroum, lege stadiorum.  
19. 3. abaducta. lege abducta. 32. 11. Tertia, lege Territa. 40. 1. Britanni-  
cam, lege Britanniam. 41. 11. conflictu, lege conflictu. 43. 6. quid, lege  
quod. Ibidem. 15. colon: pro cōma, 77. 10. Ordiuico, lege Ordouico. 94.  
8. illorum, lege pontificum. 109. 1. duxit, lege perduxit. 117. 2. pontifica,  
lege pontificia. 142. 5. a. d. Kal. lege a. d. XII. Kal. 163. 6. vti, lege vbi,  
173. 3. ijs, lege ij. 208. 5. Balliua, lege Balliuorum.





# Alexandri Neuylli Norwicus.



R B I S Norwicē-  
sis historiā per-  
scripturus sum : non  
absolutam illā qui-  
dem, aut suis vndiq;  
numeris perfectam  
(neq; verò id medi-  
ocri est artis & in-  
genij) sed vt in tanta rerum obscuritate  
fieri, à me præsertim potuit, breuem, illu-  
strem, & apertā. Etenim cū multa dies  
deleuerit, nec pauciora fœda barbaries,  
ac nonnullorum incuria deprauauerit,  
veritatem tātis in sordibus demersam, in  
integrū restituere, maius est certè quid-  
dā quā homines opinantur, pluribusq;  
molestijs circūfufum. Nam cū senio,  
ac æui labentis, tāquam faucibus, ipsa ve-  
tustas multa cuiusvis generis deglutierit:

Aa.

tum



tum rei literariæ quantum cladis inue-  
rit, dici equidem vix posse existimo. Et  
certè iure optimo expulsam se veritas, &  
omnibus è locis eiectam, & exterminatã  
conqueri posset: si nõ horum temporum  
foelicitas magnã nobis virorum optimo-  
rum copiam, & in omni eruditionis ge-  
nere excellentium profudisset: quorum  
opera ac labore, obscurata prorsus bona-  
rum artium studia, & extincta, denuò  
dilucere cœpissent. Hi desertam pænè ab  
omnibus veritatẽ, ac velut in alieno pe-  
regrinante solo, hospitio susceperunt,  
vulneraq; illa sanarunt, quę tempora ini-  
mica virtuti inflixerunt: tum pristinam  
oris, ac formæ dignitatem restituerunt  
eam, cui vel hominum improbitas, vel  
(vt aliò culpa deriuetur) fortunæ quædã  
fatalis calamitas turpissimas maculas im-  
pressisset. Veruntamẽ quantũ ornamentum  
ac splendoris, singulæ, à singulis sibi viris,  
artes asciuerint commemorare, neq; pro-  
positum

positum est mihi hoc loco, neq; certè necessarium. Historia verò vt se poliuerit, limarît, illustrarît, omnemq; vetustatis veluti fecem absterferit : qui non videt coecus est : qui videt, nec agnoscit, tamen ingratus. Verum enim uerò quanquam multi singulares viri, ac pænè admirabiles hoc in genere elaborarînt, multumq; operæ ac studij in nostrarum antiquitatum monumentis peruestigandis adhibuerint, tamen cùm omnes omnium industrias animo ac cogitatione complexus fueris, reperietur vnus, qui quantum cæteris dignitate præstiterit: tantū omnes huius eximiæ virtutis laude superaauerit. Primus namq; is (quod sciam) antiquitati Britannicæ, depressæ prius in tenebras, atq; in cœno iacenti dexteram porrexit : eamq; princeps in hominum coctus deduxit, vt quæ antea vel librariorum inscitia, vel temporum iniuria deformata delituerant, ea nunc typis æneis excusa, &



nouis tanquã depicta coloribus, omnium ora vultusque non reformident. Etenim cùm huic præsuli amplissimo Deus optimus maximus summam patriæ semper iuuandæ voluntatem, & non minimam cum voluntate facultatem tribuisset: eo sanè animo perpetuò fuit, vt naturam nihil habuisse melius existimaret quàm vt vellet, nec fortunam maius quàm vt posset, rei literariæ afflictæ vehementer & percussæ subuenire. Tātū itaq; cōsecutus est, quantū & voluit vir omniū optimus, & potuit præsulum præsul amplissimus.

Vigent ergo ( vt antea dixi ) tūm huius maximè , tūm aliorum illustrium virorum industria, bonarum literarum studia , artesque optimæ indies illustrantur: adhibentur etiam & cohortationes, & præmia, vt & gloria adolescentes illecti, & commodorum spe compulsi, ad honestarum scientiarum studia incenderentur. Nam vt de me ipso coniecturam faciam,

faciam, quem esse nihil in literis fateor,  
(vt aliquid tamē sim quotidie laboro) di-  
ci non potest quantū huius præstātissimi  
præfulis bonitate incēsus, ad ea studia ex-  
arserim, quæ (de virtutis via deflectens)  
dudum demens abiecerā. Etenim cū me  
aulicæ iam leuitatis, vitæq; pertesū, ac rei  
familiaris angustijs vndiq; implicitū, sibi  
ab epistolis asciuisset, erectus mente atq;  
animo, coepi flagrantius multo, ac inflam-  
matiore quā vnquam antea voluntate,  
in bonarum artium studijs disciplinisque  
versari. Vndē factum est, vt & effu-  
sam illam & vagam iuuentutis meæ li-  
centiam, arctioribus vinculis astringe-  
rem, & quæ antea mihi in otio, ac vo-  
luptatis veluti regno degenti, ex ani-  
mo effluxissent, ea (tanquam postli-  
minio) domum reuocarim. Sed ac-  
cidit sanē iniquo meo fato, vt quem in  
tenera ætate cognitionis, ac scientiæ ardo-  
rem, aduersus nescio quis meis optimis



studijs genius repressisset: Eū nunc huius  
clarissimi Pontificis præsidio excitatum  
denuò, & ardentem, imbecillitatis meæ  
recordatio restinxerit. Nam cū vndiq;  
intuerer viros admirabili scientia, & co-  
pia florentes, mihi autem ipse meæ tenu-  
itatis conscius forem, quamque nullis in-  
structus essem optimarum artium disci-  
plinis, longumque iter vidissem ad illa,  
quæ iam alij cōtigissent, desperatione de-  
bilitatis in ipso pænè cursu concideram.  
Itaq; cū hanc historiolum illustrissimi  
Pōtificis imperio ac auctoritate suscepis-  
sem, rei magnitudinem ac difficultatem  
cogitatione ac mente complexus, cœpi  
ipsemet mihi diffidere, omnemque peni-  
tus perficiendi spem abijcere. Etenim  
cū istæc ætas, nihil nisi egregium &  
excellens admiretur, omniumque aures  
eloquētissimorum hominum scriptis, ac  
vocibus circumsonent, quis mihi locus  
erit adolescenti infantissimo, & nullis op-  
tima-

timarum artium disciplinis instructo.  
Veruntamen si sustinere tantam rem nō  
potero, testificor me inuitum, & domini  
mei (vt par est) amplissimi, ac optimè de  
me semper meriti imperio obsecutum,  
hanc scribendi impudentiam suscepisse.  
Iniquus autem erit lector, quisquis ino-  
piam & imbecillitatem meam pro cri-  
mine posuerit, meque imprudentiæ po-  
tius condemnauerit, quia quod debui nō  
potuerim, quàm industriam pro-  
bauerit, qui quod potui  
certè voluerim.

(::)

BRITAN-





**B** RITANIAM  
 omnium insularū  
 quas cōtinet terra  
 rū orbis nobilissi-  
 mā, & esse, & mul-  
 tis à retrò seculis  
 exstitisse, cunctorū  
 iam pænè literis ac  
 linguis percrebuit, siue naturam loci, si-  
 tū sue speciem atq; pulchritudinē spectes,  
 siue vbertatem soli, siue gentis rerūque  
 à gente gestarum magnitudinem. Hæc  
 in tres est diuisa partes, quarum vna An-  
 glia, Albania (Scōtiam hodie appellant)  
 altera, tertia Cambria siue VVallia nū-  
 cupatur. Harum maxima, & cæterarum  
 omnium florentissima Anglia est: sem-  
 perque fuit: quondam Albion dicta, de-  
 incepta Britania: quod nomen genti à  
 Bruto inditum, ad hanc vsque ætatem à  
 Britocambis (antiquis huius terræ inco-  
 lis) vsurpatur. Hi etenim Britanum  
 hodierno

hodierno die sua lingua *Britvvn* & *Britannos* plurali numero *Britaniaid*, & *Brython* appellant: quæ voces proculdubio à rege Bruto dimanauerunt. Nam quòd Polydorus homo Italus ( magni certè ingenij vir, mediocris verò fidei auctor ) libros suos nescio quibus coniecturarum deliramentis resperfit, Britanniaëq; & nomen, & originem aliundè deriuauit, id certè nullius momenti esse debet, præsertim cùm Ioannes Pryseus ( equestris ordinis vir ) viuenti adhuc Vergilio, vanitatis & mēdacij dicam impegerit, multiq; post Pryseum scriptores grauiissimi, leuissimi Itali errores & commenta refutauerint. Britannia ergo antiquitùs ( quod fatētur omnes ) dicta fuit, ab eaque ( teste Plinio ) adiacentes insulæ Britanniaë denominatæ sunt, multiq; scriptores antiqui & illustres, huius insulæ mentionem fecerunt, nempè Aristoteles, Cleomedes, Cæsar, Cicero, Di-



onifius Halicarnassæus, Diodorus Siculus, Diō, Eustathius, Mela, Herodianus, Plinius, Plutarchus, Pausanias, Ptolomæus, Strabo, Eutropius, Lāpridius, Vopiscus, cōpluresq; alij Poetæ, Philosophi, historici, partim Græci, partim Latini: qui omnes Britanniam hanc, & minores huic circūfusas insulas (velut maiori appendices) Brytanas, siue Brytanicas cognominauerunt. Nam quamuis Plinius (antiquitatis indagator acerrimus) secūs fortasse cuiquam sensisse videbitur, sic enim scribit: *Albion ipsi nomen fuit cūm Britannia vocarentur omnes*: tamen & ipsemet Plinius Britanniam appellatam fuisse fatetur, & Aristotelem magistrum secutus (cuius hæc sunt verba, *ἡ αἰ Βρετανικαὶ Ἀλβιον καὶ ἱερν*) insulam vocabulo veteri, & suo iam seculo prorsus obsoleto, ad notā cæterarū prudenter distinxit. Alioquin quid quæso causæ esse putemus, quod neque Tacitus, neque Cicero, neq; ipse Cæsar,

Cæsar, qui harum rerum (quo fuit certè ingenio) obseruantissimus semper fuit, neq; tot præterea politi scriptores, atque concinni, qui eius insulæ famā scriptis celebrarunt suis, Albionis vnquā meminerint, sed vno veluti cōsensu Britanniam vniuersi nuncuparunt. Veruntamen vt cunque hæc ab alijs accepta sunt, haud equidem in magno ponā discrimine: mihi certè satis erit ad id quod proposui, si ex his quæ dicta sunt, lectores & nomen insulæ, & nominis originem cōprehendāt.

Quales autem ab initio mortales regionem hanc incoluerint, quas res gesserint, quibus ex oris hanc in terram deuenerint, (quamuis Cæsar & Siculus aborigines, & *αυτοχθονες* eius inhabitatores fuisse arbitrentur) quemadmodum post (deuictis atq; deletis à Bruto, & Troianorū reliquijs, gigantibus, & veteribus huius regni incolis) regio in tātā magnitudinem excreuerit, vt à Britanis



ad Saxones, à Saxonibus ad Normānos decursu temporis imperium defluxerit, ea subtiliùs perscrutari nequaquam mihi quidem in animo est: quādoquidem has res accuratè plæriq; commentarijs perscripserunt suis, & ego nō totius mihi gētis, sed vnius duntaxat ciuitatis historiam explicandam suscepi. Ad cuius vrbis amplitudinem atque splendorem permagni mihi sanè interesse videtur, si priùs quàm ad eius res gestas illustrandas peruenerō, totius insulæ situm, formamque depinxerō. Etenim & ipsa sibi ciuitas excelsior quodammodò & augustior videbitur, si insulæ huius vniuersæ, velut filia matris, condecorata laudibus resplendescat, & nostræ gentis atq; nationis ignari homines, clariùs perspicient, quantam, & quālis populi urbem scriptis nostris celebraturi sumus.

BRITANNIA igitur insularum (vt suprà demonstraui) omniū maxima,

xima, atq; populosissima, cui quōdā Albion nomen fuit, nūc autem Anglia vocatur, Oceano circūflua, inter septētrionē & occidentē sita est, à Germania, Gallia, Hispania, maximis Europæ partibus multo interuallo disiuncta. Hanc quondam sicut Siciliam continenti adiunctam fuisse nonnulli existimarūnt, maritimisq; indè æstibus abruptam atque diuulsam: qua de re Virgilius:

*Et penitus toto diuisos orbe Britannos.*

Et Claudianus etiam Poeta:

*Paruit & nostro diducta Britānia mūdo.*

Quæ quidem opinio siue vera sit, siue falsa, (quis autem rem tam veterem pro certo affirmare audeat?) diuturnitate tamen temporis extabuit.

Habet à meridie Galliam Belgicam, cui aduersæ sunt *Rutupiæ*, vrbs sanè perantiqua, & (Bertiniano teste) regum quondam sedes: de qua Lucanus libro sexto:



*Aut vaga cūm Tethys, Rutupinaq̃ue litora  
feruent,*

*Vnda Caledonios fallit turbata Britanos.*

Ab Anglosaxonibus olim ( sed corrup-  
tè) *Repteacester* dicebatur, à nostris autē  
hodiè *Richborow* nuncupatur. A Mori-  
nis porro siue Picardis ( namq; id hodiè  
genti nomen est) breuissimus est in An-  
gliam transmissus (sic enim Iulius Cæsar  
commentariorū quarto scribit: ) & dein  
quinto: *Ex Iccio portu* (Caletū nunc di-  
citur) cōmodissimū esse in *Britaniam* trans-  
iectū didicisse se demonstrat. Quāquā non-  
nulli (inter quos est Strabo) à Gessoriacō  
Morinorū gentis litore proximo, trans-  
missū putēt, stadiorū ter centū viginti sex;  
nōnulli autē millia passuū quinquaginta.  
Plinius etenim ad hunc modū scribit: *Ex  
aduersò huius (nempè Rhēni) sita est Bri-  
tania insula, Græcis nostrisq̃ monumentis  
clara, inter septentrionem & occidētem ia-  
cet, abest à Gessoriacō Morinorū gentis li-  
tore*

tore proximo traiectu quinquaginta millia  
passuum ad minimum. Hæc Plinius. A  
Septétrione autem Oceano infinito pa-  
tet, vbi inter Britanniam & Hispaniam  
dispersæ interiectæq; sunt multæ mino-  
res insulæ, quas Orchadas appellant:  
inter quas omnium extrema Thule est,  
cuius Vergilius meminit Georgicorum  
primo:

*Tibi seruiat vltima Thule.*

Quibus de insulis quandoquidem per-  
multi multa scripserunt, operæ prætium  
erit, neq; proposito (vt arbitror) alienum  
nostro, si quid quisq; hac de re monumē-  
tis prodiderint suis, ipsoꝝ verbis luculē-  
ter expresserō. Quod quidē tū demū fa-  
cere decreui, cū ad vrbiū & ciuitatū Bri-  
tanicarū descriptionē peruenerō, quoniā  
is mihi locus ad hāc rē aptissimus videtur.  
Nūc autē de situ, quæ restāt Britanię, bre-  
uiter (vt coepimus) persequamur. Ha-  
bet autem ipsa Britania clarissimas estate  
noctes,



noctes, & multa luce conspicuas, adeò vt mediò sepè noctis tempore (vt Bedę verbis vtar) in quæstionem intuentibus venire soleat, vtrũ crepusculum adhuc permaneat vespertinum, an iam aduenierit matutinum. Qua de re Cleomedes, (auctor sanè grauiſſimus) sic scribit:

*In Britannia quũ sol circa Cancrum est, diem longissimum facit, vt decem & octo horarum sit dies æquinoctialium, nox autem sex, vnde etiam tum nocte lumen emicat, sole ipso secundũ finientem procurrente, & supra terram lucem emittente. Et certè æstate dies lōgissimi sunt, hieme verò breuiſſimi, adeò vt horarum ferè sex spatio Decembri mense conficiantur. Forma insulæ triquetra est, eaque ita vndiq; distincta portibus, & munita mari, vt nihil ad eius defensionem firmitus ab ipsa penè natura excogitari posse videatur. Cuius speciem & magnitudinem, quoniam viri quidam omni exculti doctrina, atq; eruditione*

ditione præcellentes, scriptis suis memoria commendarunt, haud ab re fuerit, si eorum quoq; sententiolas breuiter subiungam. Cæsar itaque (vt ab eo potissimum exordiar) libro commentariorum suorum quinto hunc in modum scribit.

*Insula natura triquetra, cuius vnum latus est contra Galliam, huius lateris alter angulus qui est ad Cantium, quò ferè omnes naues ex Gallia appelluntur, ad orientem solem, inferior ad meridiem spectat. Huius latus tenet circiter millia passuum quingenta. Alterum vergit ad Hispaniam atq; occidentem solem, qua ex parte est Hybernia. Huius est lōgitudo lateris (vt illorum fert opinio) septingentorū millia passuum. Tertium est contra septentrionem: cui parti nulla est obiecta terra, sed eius angulus lateris maximè ad Germaniam spectat. Hoc millia passuum octingenta in lōgitudinem esse arbitrantur: Ita omnis insula est in circuitu vicies centena millia passuum. Cum Cæsare cōsentit*

Cc.

Diodo-



Diodorus Siculus, cuius hæc sunt verba: *Est hæc insula triangulari forma Siciliae similis, latera habens inæqualia cum protendatur per obliquum Europam versus. Vbi minimum à continenti abest, promontorium est quod appellatur Carion, procul à terra quo tempore mare fluit, stadijs ferme centum: alterum promontorium (Velerium nomine) abesse aiunt à continenti navigatione dierum quattuor, reliqua pars quam Orcham appellant, ad mare spectat. Minimum latus Europæ adiacens protendi asserunt stadijs septem millibus. Lateris secundi longitudo à Carione vsq; ad promontoriū stadiorum complectitur quindecim millia. Tertium latus stadiorum millia viginti. Ita uniuersæ insulae ambitus stadiorum, & milliū duorum & quadraginta. Hucusque Siculus: Mela autem sic scribit: Inter Septentrionē & Occidentem profecta gradi angulo Rhēni ostia prospicit, deindē obliqua retrò latera abstrahit, altero Galliam, altero*

altero Germaniam spectans. Tum rursus perpetuo margine directi litoris ab tergo re-  
abducta, iterum se in diversos angulos cu-  
neat, triquetra, & Siciliae maxime similis.  
Plinius verò sic: Britanniam circuitu patere  
trices octies centena viginti quinque millia  
Pytheas & Isidorus tradunt: triginta iam  
propè annis Romanorum armis notitiã eius  
nò ultrà vicinitatē sylvæ Caledoniæ propa-  
gātibus. Agrippa lōgitudinē octingēta millia  
passuum esse: latitudinem millia ter centum  
credit. Hæc Plinius. Solinus item de Bri-  
taniæ magnitudine scribens, ad hunc  
modum loquitur: *Finis erat orbis ora Gal-  
lici littoris nisi Britania insula non qualibet  
amplitudine, nomen pænè orbis alterius me-  
reretur, octingentis enim & amplius passu-  
um millibus longa pōrrigitur, ita ut eum in  
Caledonicum vsque angulum metiamur. In  
quo recessu Vlissem Caledoniæ appulsū ma-  
nifestat ara Græcis literis inscripta voto.  
Multis insulis nec ignobilibus circumdatur.*



Exposui de magnitudine & specie huius Insulæ doctorum quorundam hominū sententias: restat nunc ut de fecunditate soli, & admirabili gloria gētis pauca quædā pari breuitate perstringamus. Ac primum de magnitudine cōmodorum quæ percipiuntur ex cœli temperatione, fecunditate terrarum, aliarumque utilitatum opportunitatumque complurium copia: multa dicere superuacaneū arbitror, præsertim cū Deus optimus maximus nihil in toto penè terrarum orbe, hac Insula sollertiùs fabricarēt, nihil meliùs, nihil præstabiliùs, nihil pulchriùs, nihil utiliùs. Etenim ut illa quæ sunt voluptatis magis quàm utilitatis præteream, camporum amœnitates, piscatus, venationes, aucupia, multa; eiusdem generis, quibus ad delectationem nostrā abutimur: qualia sunt illa? quanta? quàm præclara? quàm omni laude & prædicatione digna, quæ terra humano generi v-

bertim

bertim fundit, fruges, fructus, pecora, pisces, ferri, æris, plumbi, nonnullisq; item in locis, auri, argentiq; reconditas venas? Quid hîc vrbium, ciuitatumq; situs cōmemorem? Quid templorum venerandam maiestatem? Quid priuatarum ediū magnificentiam? Quid nobilium in tanti regni dignitate sustinenda amplitudinem? Pontificū in religione ac sacris ritē procurandis pietatem? Eruditorum in omni genere doctrinarum excellentiam? Militum in prælijs ineundis fortitudinē? Negotiatorum in mercibus importādis sedulitatem? Opificum in rebus singulari artificio fabricandis sollertiam? Rusticorum in agris colēdis parsimoniam & industriam? Quid deniq; cætera, quæ sunt innumerabilia, persequerer omnia, tam admirabili ordine descripta designataque, vt nihil neque ad vsum præclariùs, neq; ad speciē pulchriùs esse possit? Adde huc pisces annes, riuos liquidissimis



aquis profluentes, balnearum fluuios in morbis depellendis saluberrimos, camporum immensitates vndiq; arboribus, floribus, herbis viridissimis vestitas, asperitates sylvarum & nemorum densissimas, montium altitudines, amœnitates vallium, adde ouium greges, armenta boûm, equorum reliquique pecoris vim innumerabilem, auium siluestrium domesticarumque numerû incredibile: multaq; prætereà, quæ si enumerare cuncta conarer, vereor ne in infinitum progrederetur oratio. Ac ne fortè quis istæc à me ad libidinẽ fingi arbitretur, quò patriam immeritis laudibus ornarem meâ, quorundam mihi scriptorum testimonia hac de re proferenda existimaui. Etenim quæcunque talibus de rebus in lucem edidero, cunctos tamẽ hortabor, ijs fidem ne adiungant, nisi quatenûs probabili nixa ratione, firmissimis probatissimorum auctorum sententijs comprobabuntur.

Mamer-

Mamertinus igitur Romanus, in panegyrico Maximiniano dicto, sic scribit: O (inquit) *fortunata, & omnibus beatior terris Britania: meritò te cunctis cœli & soli bonis natura donauit, in qua nec rigor nimius hyemis, nec ardor æstatis, in qua segetū tāta fecūditas, vt muneribus vtriusq̃ sufficiat & Cereris, & Liberi: in qua nemora sine immanibus bestiis, terra sine serpentibus noxijs: contrà pecorum mitium innumerabilis multitudo, lacte distenta, & onusta velleribus, cæteraque omnia quæ propter vitam diliguntur: longissimi dies, & nullæ sine aliqua luce noctes.* Hactenus ille. Quæ omnia scriptor quidam perantiqui sanè nominis, & eruditionis haud spernendæ, luculentissimis versibus expressit.

*Illam quidem longè celebri splendore beatam  
Glebis, lacte, fauis, supereminet insulam cūctis  
Quas regit ille deus, spumanti cuius ab ore  
Profluit Oceanus.*

Et paulò post:

*Testes*



*Testes Lōdonium ratibus, Wintonia Baccho:*  
*Herefordia grege, Winecestria fruge redūdās:*  
*Batha lacu, Salebyra feris, Cantuaria pisce,*  
*Eboracum Syluis, Excestria clara metallis.*  
*Norwicum Dacis, Hibernis Cestria, Gallis*  
*Cicestrū, Norwagenijs Dunelma propinquās.*  
*Testis Lincolia gens infinita decore,*  
*Testis Eli formosa situ: Rouecestria visu.*

Confirmat hoc quoque Solinus his ver-  
 bis: Circuitus (inquit) Britaniae, quadra-  
 gies octies septuaginta quinque millia passuum  
 sunt, in quo spatium magna & multa flumina,  
 fontes calidi, opiparo exculti apparatu ad v-  
 sus mortalium, quibus fontibus praesul est  
 Mineruae numen, in cuius aede perpetui  
 ignes nunquam canescunt in fauillas, sed  
 ubi cinis tabuit, vertitur in globos saxeos:  
 praeterea ut taceam metallorum largam va-  
 riamque copiam, quibus Britania solum un-  
 dique generum pollet venis locupletibus. Ga-  
 gates hic plurimus optimusque est lapis, si de-  
 corem requiras: nigro gemmeus: si qualitate:  
 nullius

*nullius ferè ponderis: si naturam: aqua ardet, oleo restinguitur: si potestatem: attriti calfactus applicata detinet æque vt succinum. Hæc Solinus: Beda verò magnæ doctrine vir, & ingenio præditus eximio, hūc in modum de Britānia scripsisse fertur: Optima frugibus atque arboribus Insula, & alendis apta pecoribus, ac iumentis, vineas etiam quibusdam in locis germinans: sed & auium ferax terra marique generis diuersi, fluminibus quoque multum piscosis, ac fontibus præclara copiosis. Et quidem præcipuè issicio abundat, & anguilla: capiuntur autem sæpissimè vituli marini, & delphines, necnon & balenæ, exceptis variorum generibus conchiliorum, in quibus sunt & musculæ, quibus inclusam sæpè margaritam omnis quidem coloris optimam inueniunt, id est, & rubicūdi, & purpurei, & iacinthini, & prasini, sed maximè candidi. Sunt & cochleæ satis superque abundantes, quibus tinctura coccinei coloris*  
Dd. *efficitur.*



efficitur, cuius rubor pulcherrimus nullo unquam solis ardore, nulla valet pluviarum iniuria pallescere: sed quò vetustior, eò solet esse venustior. Habet fontes salinarum, habet & fontes calidos, & ex eis fluuios balnearum, omni ætati & sexui per distincta loca iuxta suum cuiq; modum accommodos. Aqua enim (vt S. Basilus dicit) feruidam qualitatem recipit, cum per cætera quædam metalla transcurrit, & fit non solum calida, sed & ardens. Est etiam venis metallorum, æris, ferri, plumbi, & argenti fœcunda. Gignit & lapidem Gagatem plurimum optimumque: est autem nigro colore gemmeus, & ardens igni admotus: incensus serpentes fugat: attritu calefactus applicita detinet æquè vt succinum.

Iam verò quantum belli gloria floruerint huius regionis incolæ, quàm inuicti semper animi robore exstiterint, quo in rebus gerendis consilio, virtute, fœlicitate, quantum potuerint, quid effecerint, qui,

quī, qualesq; fuerint, ea si oratione com-  
plecterer omnia, & Polydoro perfidia  
labem æternam inurerem, & nostrarum  
rerum rudes, singulari tantæ fortitudinis  
admiratione perfunderem. Sed cū (ut  
anteā demonstraui) ciuitatem tantum-  
modò Norwicensē illustrandam su-  
scepi, eò mihi contento semper cursu  
vela facienda sunt, neque tam vastum  
mare ingrediendum, ne si fortè de via  
semel deflexerit oratio, aut longis er-  
roribus fatigata (veluti ventis cessanti-  
bus) languescat, aut in ipso portu re-  
rum magnitudine (tanquam fluctibus)  
obruatur. Quanquam quid est in hac  
causa quod orationis magnoperè indi-  
geat? præsertim cū tot præstantissimorū  
hominum scripta nostrę gentis laudibus,  
& incredibili factorum fama vndiq; cir-  
cunsonent. Nam ut illa antiquiora cras-  
sissimis inuoluta tenebris præteream,  
quæ quidem tanta ignorationis caligine

Dd.ij.

longa



longa obsepsit vetustas, vt penè à conspectu omni luceq; remouerit: quis est adeò rerum Britānicarū insolēs, illud vt ignoret, quantum à Bruti in hanc insulam aduentu, vsque ad hæc tempora nostra natio nominis sui gloriam virtute bellica propagauerit. Percurre omnes omnium scriptorum annales, veteraq; rerum Britānicarum monumenta scrutare, quotq; reges à Bruto vsq; ad Calsiuelaunum regnarint, qui, qualesque fuerint, animaduerte, omnem denique illam mille quadraginta annorum historiam euolue (totidem enim annos à Bruto ad Cæsaris in Britāniam aduentum regnatum est) tum demùm manifestò apparebit, quantum ætas illa militari laude refulserit. Quid quod Polydorus Virgilius ipse, scriptor alioquin nomini (vt apparet) Britānico infensissimus (imbelle enim & infidum hominum genus Britānos appellat, multisque in locis iniquissimis calumnijs nostræ

stræ

stræ gentis honori inuidiosissimè detrahit) coactus tamen fuerit populo Britānico virtutis testimonium impertiri.

Anglicæ enim historiæ suæ (sic enim appellat) libro primo ad hunc modum scribit: *Secutum est postea tempus militaris gloriæ, non item aliarum virtutum prorsus sterile, quo reges fuerunt Reginus, Morganus, Ennanus, Idwallo, Riuius, Geruntius, Catellus, Coyllus, Porrex eius nominis secundus, Fulgentius, Eldalus, Androgeus, Vrianus, & Eliud.* Sedenim de Polydoro posthac fortassis aptior erit dicendi locus, qui tantum afuit, historiam vt vnquam puram, & integram, omnisque expertem labis cogitarit: vt etiam quæ ab alijs castissimè descripta sunt, turpissimè corruperit, librosque nonnullos veteres manuscriptos (certissimos Britānicarum rerum indices) homo Italus, (vt fertur) exemplo post homines natos pessimo exusserit. Itaque nihil illius scriptis con-

Dd. iij.

temtius,



temtiùs, nihil leuiùs, nihil inquinatiùs existimari iam coeptũ est, præsertim cũ nuper viri quidã nõ vulgari eruditione præditi exstiterint, qui illius vanitatẽ ac perfidiam apertẽ coarguerint. Constat ergò (vt eò vndè digressi sumus reuertamur) vel hoc Polydoro teste, multis seculis ante Cæsaris in Britanniam transmissum, gentem Britãnicam bellicosissimam existisse. Videamus nunc ecquæ macula turpitudinis & ignauix contracta sit, postquam Cæsar omnium ( vt ipsi gloriantur ) gentium victor instructa classe, insulæ potiundæ spe impulsus Britãniam inuaserat. Quod autem indicium exstare potest maius, & ad insignem memoriã fortitudinis Britannicæ, & ad iustam Romani nominis turpitudinem, quàm quòd constat Cæsarem imperatorem talem ac tantum, qui propè totum terrarum orbem sui nominis fama repleffet, bis à Britãnis fustum, ignominiosã nescio cuius

cuius victoriolæ umbram domum reportasse. Etenim si veram gloriam & solidam concupierit, (erat autem laudis avidissimus) qui fit quòd non gētem omnem subegerit, sicuti Galliam, Germaniam, finitimosque populos continuis prælijs subiugauerat. Quid est quod cum Cantianis tantum (hominibus equidem semper ad laudem & gloriam natis) & circumvicinis oppidulis conflixerit, neq; insulam altius penetrarit, sed in litoribus semper & extremis regionis oris constiterit. Quæ res impulit virum prudentissimum, & rei militaris scientissimum, ut impolitis adhuc rebus, & acerbis tam subito recesserit. Illud equidē negari non potest, illū adipiscendæ huius insulæ spe, & Romani imperij dilatandi desyderio in Britāniam nauigasse. Credibile itaq; est, tentatis insulanorum viribus, omniq; tanti facinoris perpetrandi facultate præcisa, voluntatem quoque præstantissimo duci



duci defuisse. Et quidem quanquā Cæsar ipse, (quo fuit certè ingenio) multiq; alij conati sint ex ignominiosa fuga illustrem victoriam (tanquam portentum aliquod & monstrum) progignere, tamen non defuere magni nominis quidā poetæ, qui res illas vti gestæ fuerant, carminibus depinxere suis. Etenim Lucanus insignis poeta Pharsalidos secundo, de Cæsare sic scribit:

*Tertia quæsitis ostendit terga Britannis.*

Et Tibullus qui eorum temporū æqualis fuit, & Cæsari perfamiliaris, ad Messalā hunc in modum scripsit:

*Te manet inuictus Romano Marte Britannus.*

Tibulli ergò (id est) viri ingeniosissimi ac vndecunque doctissimi testimonio, qui mentiri neq; audebat propter Cæsarum amplitudinem atque potentiam, neque volebat (erat enim illorum amantissimus) neq; potuit ne se impudenti mendacio

dacio, præfenti hominum teste memoria,  
 cōstringeret) huius inquam Tibulli ex-  
 cellentissimi poetæ testimonio, Cæsare  
 gentium iam omnium domitore defun-  
 cto. (recens enim in senatu viginti tribus  
 vulneribus confossus interijt) manebat  
 nihilominus (vt illius potissimum verbis  
 utar) *Inuictus Romano Marte Britannus.*  
 Quod si verum sit (est autem proculdu-  
 biò verissimum) nunquam Britannia à  
 Cæsare deuicta, sed Cæsar à Britānia re-  
 pulsus profligatusque, aut cruentam &  
 turpem victoriam Romam reportauit,  
 aut quod verisimilius est (iuuat namque  
 Lucani verbis uti,)

*Territa quæsitis ostendit terga Britannis.*  
 Sed hæc poetarum testimonia sunt: ve-  
 niamus ad historicos. Eutropius de bello  
 Gallico sic scribit: *Nauius onerarijs,*  
*atque actuarijs circiter octoginta præpara-*  
*tis, in Britanniam transuehitur Cæsar, Bri-*  
*tānisq; bellum infert, ibi acerba pugna primū*  
*Ee. fatigatus,*



*fatigatus, deindè aduersa tempestate correptus, in Galliam reuersus est.*

*Et postea:*

*Iterum primo vere in Britanniam transuectus, equitatus primo congressu à Britannis victus, ibique Labienus Tribunus occisus est, & secundo praelio cum magno suorum discrimine hostes in fugam vertit. Huc accedunt quæ scripta sunt à Dione Cassio consulari, (magni sanè nominis viro) Cæsar cum Britannis contra animi sui sententiam bellum composuit, postulatis adhuc pluribus obsidibus, quorum tamen exiguam partem accepit: Ita in continentem reuectus est, & quæ inibi concitata se absente fuerant, sedauit, nihil neque sibi, neque Romæ ex Britannia adeptus, &c. Atque hij quidem domestici testes sunt: verumtamen tantum abest, vt aut Britannorum fortia facta depresserint, aut Cæsaris victoriam altiùs extulerint, vt nescio quid subtriste & impeditum præ-*  
*le*

se ferat oratio. Cui rei fidem quoque facit epistola quædam Marci Tullij Ciceronis ad Quintum fratrem, qui tum cum Iulio Cæsare in Britannia militabat. Sic etenim libro tertio scribit: *De Britannicis rebus cognoui ex tuis litteris, nihil esse nec quod metuamus, nec quod gaudeamus.* Quæ quidem verba aperte indicant Cæsarem nullam (quod isti insulse nimis gloriantur) de Britannis victoriam consecutum, aut si quam adeptus est, humilem eam & subobscuram exstitisse.

Alioquin non solum Senatus omnis, populusque Romanus, (quod fieri semper in maximis bellis consuevit) in gaudium atque lætitiâ sese effudisset, verumetiam Orator ille (omnium qui vnquam vixerunt) eloquentissimus, magnificentioribus verbis tantæ victoriæ famam exornasset.

Verum enim uerò operæpretium erit

Ee.ij. animad-



animaduvertere quemadmodum vbiq;  
prudens & persubtilis orator, rerum mi-  
nùs prosperè gestarum rumusculos ora-  
tionis subtilitate adumbrarit. Etenim eo-  
dem libro ad eundem Quintum fratrem  
hisce verbis perscripsit : *Sed me illa cura  
sollicitat, angitq; vehementer, quòd dierum  
iā amplius quinquaginta interuallo, nihil à  
te, nihil à Cæsare, nihil ex istis locis non mo-  
dò litterarū, sed ne rumoris quidem affluxit.  
Me autem iam & mare istuc, & terra  
sollicitat, neque desino ea quæ minimè volo  
cogitare. Et alio deinceps loco Cæsarem  
ex Britānia ad se litteras dedisse demon-  
strat, Satis commodas de Britannicis rebus.  
Quidnam (quæso) aliud causæ fuisse pu-  
temus, quam obrem huius summi artifi-  
cis in Cæsaris semper laude efferuescens  
oratio tantoperè refrixerit, nisi quòd res  
illæ quas in Britannia (vt Cæsaris ipsius  
verbis utar) satis tātūm commodè gessisset,  
Ciceroni non magnoperè illustrādæ vi-  
derentur.*

derentur. Quæ certè res (ni fallor) prudentissimū oratorē perpulit, vt in scriptis & orationibus suis, quæ ferè totæ Cæsaris laudibus circumfluunt, verbum tamen nullum, cū vndiq; omnes dicendi flosculos carpat atq; delibet, omnia vbiq; orationis ornamenta asciscat, verbū tamen (expressè) de Britannia nullum faciendum sibi existimarit. Sed hæc coniectura nituntur. Illud verò quale, ac quāti tādē momenti esse debebit, quod Cornelius Tacitus (& ipse quoq; Romanus) in historia sua de Cæsare scriptum reliquit, *Cæsarem ostendisse potius Romanis Britanniam quàm subegisse.* Et deinceps: *Recessuros Romanos, vt Diuus Iulius recessisset, modò Britanni virtutes maiorum suorum æmulerentur.* Suetonius itē Trāquillus nōne omnem fidem commentarijs Cæsaris detraxit hunc in modum scribens? *Pollio Asinius parū diligenter, parumq; integra veritate compositos (Cæsaris*



commentarios putat. Cùm Cæsar plerâq; & quæ per alios gesta erant, temerè crediderit, & quæ per se (vel cōsultò, vel etiã memoria lapsus) perperam ediderit: existimatq; rescripturũ & correcturum fuisse. Hæc ille.

Quid? mores quibus in prælijs vsi sunt, & belli gerendi ratio nōne insignem nostrorum hominũ fortitudinem, & incredibilem in periculis ineũdis audaciam declarant? Quam conflagendi consuetudinem Iulius ipse Cæsar, talibus verbis libro Commentariorum quarto explicauit. In prælijs plerunq; uti consueuerunt essedarijs. Genus hoc est ex esse-dis pugnae: Primo per omnes partes per-equitant, & tela conijciunt, atque ipso terrore equorum & strepitu rotarum ordines plerunq; perturbant: & cùm se inter equitum turmas insinuauere, ex esse-dis dissiliunt & pedes præliantur. Auri-gæ interim paulum è prælio excedunt, atque ita se collocant, ut si illi à multitudine hostium

stium premantur, expeditum ad suos receptum habeant. Ita mobilitatem equitum, stabilitatem peditum in prælijs præstant, ac tantum usu quotidiano & exercitatione efficiunt, ut in decliui ac præcipiti loco incitatos equos sustinere, & breui moderari, ac flectere, & per temonem percurrere, & in iugo insistere, & inde se in currus citissime recipere consueuerint. Illi etiam consultò plerunquæ cedunt, & cum paululum à legionibus nostros remouissent, ex essedis desiliunt, & pedibus dispari prælio contendunt. Equestris autem prælij ratio & cedentibus, & insequentibus par atq; idem periculum inferebat. Accedebant huc ut nunquam conferti, sed rari, magnisq; interuallis præliarentur: stationesq; dispositas haberet, atq; alij alios deinceps exciperet, & recètes defatigatis succederent. Huc usque Cæsar. Diodorus etiam Siculus, qui Augusti tempore scripsit, eundem bellandi morē honorificētissimis verbis expressit.

Britan-



*Britannicam colunt incolæ Aborigines, qui  
 priscorum more vitam degunt : Utuntur in  
 pugna curribus, veluti antiquos Græcorum  
 herôes vsos in bello Troiano ferunt. Vbe-  
 riùs istæc aliquantulum Gyraldus, sum-  
 mæ quondam dignitatis vir, ac scriptor  
 antiquissimus explicauit. Scribit enim  
 sic: Gens agilis, gens aspera, potiùs quàm ro-  
 busta, gens armis dedita tota: non enim no-  
 biles hic soli, sed totus populus ad arma pa-  
 ratus habetur. Bellica tuba sonante, non se-  
 gniùs ab aratro Agricola, quàm aulicus ab au-  
 la ad arma prorūpit. Nec enim hîc vt alibi  
 redit: Agricola labor actus in orbem.  
 Solum quippè Martio & Aprili semel a-  
 periunt ad auenas, nec bis in æstate, tertioq;  
 hyeme ad tritici trituram terras vertendo  
 laborant. Totus propemodùm populus ar-  
 mentis pascitur. Auenis, caseo, lacte, & bu-  
 tyro, carne plenius, pane parcius vesci so-  
 lent. Non mercimonijs, non nauigijs, non  
 mechanicis artibus, nec vlllo prorsus, nisi  
 Martio*

*Martio labore vexantur. Pacis tamen  
tutelæ student, & libertati: pro patria pu-  
gnant, pro libertate laborant, pro quibus non  
solum ferro dimicare, sed vitam dare dulce  
videtur, vnde & in thoro turpe, in bello mo-  
ri decus reputant. Et hij olim reliquæ Æ-  
neadum in ferrum pro libertate ruebāt. De  
his hoc etiam spectabile, quod nudi multoties  
cum ferro vestitis, inermes cum armatis, pe-  
destres cum equestribus, congredi non verē-  
tur: in quo plærunque conflictu sola sunt a-  
gilitate, & animositate victores: illisq; quo-  
rum Poeta meminit situ & natura haud  
dissimiles. Populi quos despicit Arctos  
Fœlices errore suo, quos ille timorum  
Maximus haud urget leti metus, inde ruēdi  
In ferrū, mens prona viris, animiq; capaces,  
Mortis, & ignauum est reditura parcere  
vitæ.*

*(Et alibi) Gens leuiter armata, & agili-  
tati potius quàm robustis viris confisa, si ho-  
diè victa sit, & cruentam in fugam turpiter  
Ff. conuersa,*



conuersa, cras nihilominus expeditionem parat, nec damni, nec dedecoris recordata, & si apertis congressibus bello indicto non praeualet, insidijs & nocturnis irruptionibus hostem grauat. Itaque cum nec fame, nec frigore grauata, nec martio labore fatigata, nec casibus aduersis in desperationem data, sed post lapsum statim resurgere prompta, belli quod discrimina denuo subire parata sit, sicut praelio facile, sic bello difficile vinci solet. Vnde & Claudianus poeta de gentis eiusdem natura sic loquitur.

Si corda parumper  
Respirare sinas, nullo tot funera sensu  
Prætereunt, tanti quod levis iactura cruoris.  
Hæc ille : Quas equidem laudes omnes  
Iosephus in Antiocheide eleganti carmine constrinxit :

Inclyta fulsit  
Posteribus ducibus tantis, tot diues alumnis,  
Tot fecunda viris, premeret qui viribus orbem:  
Et fama veteres: hinc Constantinus adeptus  
Imperium

Imperium, Romam tenuit: Byzantion auxit.  
Hinc Senonum ductor captiua Brennius vrbe,  
Romuleas domuit flammis victricibus arces.  
Hinc & Scæua satus, pars nō obscura tumultus  
Ciuilis, Magnum solus qui mole soluta  
Obsedit, meliorq̃ stetit pro Cæsare murus.  
Hinc celebri fato fœlici claruit ortu  
Flos regum Arthurus, cuius cū facta stupori  
Nō micuere minus: totus quid in aure voluptas  
Et populo plaudente fauus. Quæcunq̃ priorum  
Inspice Pelæum commendat fama tyrannum.  
Pagina Cæsareos loquitur Romana triūphos,  
Alcidem domitis attollit gloria monst̃ris.  
Sed nec pinetum cōrili, nec sydera solem  
Æquant, annales Latios: Graiosq̃ reuolue.  
Prisca parem nescit, æqualem postera nullum  
Exhibitura dies. Reges supereminet omnes  
Solus, præteritis melior, maiorq̃ futuris.  
Quæ cū ita sint, desinant posthac Poly-  
dori fautores, & si qui fortè sint qui eam  
hæresim sequantur, veterum Britanno-  
rum famam scriptis violare suis, neque



magni Cæsaris vmbra nobis amplius obijciant, qui aut nullam domum victoriam, laureamue nisi cruentam, & Romano respersam sanguine reportauit, aut potius quod nonnulli autumant, fusus, fugatusq; æternam post se dedecoris memoriam reliquit. Brennum potius meminerint Britannum, & Belini Britanniæ regis fratrem, ducem inuictissimum, qui eo animi robore fuit, vt cum Romanis in Italia depugnare nō dubitauerit, ea autē foelicitate vt tres simul Tribunos militū consulari potestate præditos, vno eodēq; momento cum ingenti strage in fugam verterit: ciuitatem postridiē cœperit, captam incenderit, Senatores omnes, vrbisq; primores in sellis curulibus cōsidentes trucidarit, mortalium nemini (perindē ac in captis vrbibus fieri consuevit) pepercerit: cæde, cruore, incendio, cuncta confuderit, nomen denique populi Romani & efflorescentem illam imperij maiesta-

maiestatem penitus pænè exstinxerit: adeò vt aduersa fortuna & desperatione debilitati, vastatam incendijs ruinisque Romam relinquere, & Veios urbem paulò ab ijs antè expugnatam migrare decreuerint. Meminerint Bundwicam foeminam, sed incomparabili fortitudine foeminam, quæ suis auspicijs septuaginta Romanorum millia prostrauit. Cuius tantus terror urbem Romanā (vt scribit Virunnius) peruaferat, & Italiam quoq; omnem, quantus nunquam antea neque in aduentu Brenni, neq; Pyrrhi, aut Hannibalis ciuitati inciderat. Meminerint Aruiragum Britannici imperij fulmen, libertatem inuitis Romanis rerum dominis conseruantem, atq; toties pro aris & focis fortissimè dimicantem. Denique tot belli duces præstantissimos, tot millia virorum fortium, tot legiones atque cohortes, tot reges militaris scientiæ laude florentes, qui à Bruto vsque ad Caduel-

Ff. iij. Iodaurum



Iodaurum (qui vltimus Britannorum in Anglia regnavit) meminerint: qui omnes grauissimis semper atq; periculosissimis impliciti bellis, cum Romanis, Pictis, atq; Saxonibus, (æternis Britannici nominis hostibus) decertarunt. Multa præterea (neq; enim omnia persequi in animo est) & hæc ipsa quæ dixi, singularem nostrorum hominum virtutem & admirabilem in bellis obeundis fortitudinem abundè satis demonstrant.

Neque minor certè gloria fuit Anglo-Saxonum, aut obscurior in re militari laus & industria, qui pulsis deuictisque Britannis clarissimis omnia victorijs triumphisque decorarunt. Etenim illud quantæ fortitudinis est? quantæ virtutis? quàm admirabilis audaciæ? non dicam quod sua defenderint, quòd domi bellis districti ciuilibus strenuè se gesserint, quòd foris externo Marte laceratis præclara militiæ facinora ediderint:

rint: sed quòd longinquas regiones per-  
agrauerint, quòd gentes ferocissimas  
contriuerint, quòd imperij fines Nor-  
uegiam vsque protulerint: quòd finiti-  
mas omnes insulas in potestatem rede-  
gerint, quòd denique multis & maximis  
prælijs cum acerrimis nationibus de im-  
perij dignitate contenderint. Ac ne for-  
tè cuiquam in istarum rerum comme-  
moratione magnificentius quàm par est,  
exultare videatur oratio mea, tabellis  
veluti obsignatis, confirmandi & testifi-  
candi causa agere decreui, quidque hac  
dere in vetustissimis Anglicanæ antiqui-  
tatis monumētis inuenerim demonstrare.  
Ad hunc igitur modum in antiquissimis  
diplomatibus, quæ multorum præsulum,  
principumque sigillis consignantur (si-  
cuti in archetypo videre licet) perscrip-  
tum reperitur. *Edwardus Dei gratia,  
rex Angliæ & Franciæ, & Dominus Hy-  
bernæ, omnibus ad quos præsentis litteræ  
peruene-*



peruenerint, salutem. Inspeximus chartam confirmationis, Domini Edgari quondam regis Angliæ progenitoris nostri, quam fecit Oswaldo Episcopo Wigornienſi, & Monachis Wigornienſibus in hæc verba. ✠  
 Altitonantis Dei largiflua clementia, qui eſt rex regum, & dominus dominorum, ego Edgarus Anglorum *Basileus*, omniumque regum, insularumque Oceani Britanniam circumiacentium, cunctarumque nationum quæ infra eam includuntur, imperator, ac dominus. Gratias ago ipsi Deo omnipotenti, regi meo, qui meum imperium sic ampliavit, & exaltauit super regnum patrum meorum, cui concessit cum Anglorum imperio propicia diuinitas, omnia regna insularum Oceani, cum suis ferocissimis regibus, usque Noruegiam, maximamque partem Hyberniae, cum sua nobilissima ciuitate Dublina, Anglorum regno subiugare, quos etiam omnes meis imperijs colla subdere coëgi.

Verum hæc antiquiora, diutinoque  
 supe-

superiorum seculorū silentio sepulta pænè atq; obliuione obruta iacent : illa verò recentiora quis pro incredibili gestarum rerum magnitudine satis comprehendere rit? Quæ etenim in terris natio, quod regnum, quæ gens, vel pacis artibus illustrior, vel militari laude gloriosior vñquam exstitit. Bella quæ à nostris regibus non ita multis ab hinc annis inaudita cū gloria suscepta, gesta, confecta sunt recordermur, tum demum intelligemus quanta fortitudine, virtute, audacia, addā etiam consilio, grauitate, prudentia, nostra semper regio redundarēt. Nullus etenim in tota ferè Gallia locus, templū pænè nullum, nulla vrbs, nulla paulò celebrior ciuitas, vbi non triumphorum suorum insignia, & victoriarū tropæa defixerunt. Mitto hīc Scotiam à nostris sæpè exercitibus direptam, vastatam, incensam: mitto captos reges : mitto in prælio interfectos : mitto stragem nobilium, cædem

Gg. militum,



militum, ruinas urbium, multaq; alia quę  
nostrę genti immortale decus, famamq;  
perennem pepererunt. Iam verò illa quā-  
ta sunt? quā admirabilia? quā omni  
laude, honore, prædicatione digna? quòd  
vno eodemq; momento nostri exercitus  
cum duobus potentissimis regibus con-  
fluxerint? quòd foris in Gallia Gallum,  
domi in Anglia Scotum fregerint? quòd  
nuper paucissimis cum militibus, & exi-  
gua bellatorum manu, absente etiam re-  
ge, formidolosissimoque bello in Gallia  
detento, influentes in Angliam Scotorū  
maximas copias tumultuaria pænè pu-  
gna represserint, exercitum ferè omnem  
deleuerint, regem denique ipsum intere-  
merint? Quid? maiores nostri? nōne  
Galliam vi ac armis sæpenumerò sube-  
gerunt? plebem procuresque in sua verba  
iurare coegerunt? cōditionibusq; quibus  
vellent, obstrinxerunt? maximi nominis  
atq; potentię Regem, in bello coeperunt?  
captum-

captumque in Angliam perduxerunt? Quibus rebus quid prestantius? quid excelsius? quid in omni pænè seculorū memoria magnificentius enumerari potest? Atq; hæc omnia publicis sunt litterarum consignata monumentis: tantumq; abest ego vt istæc ad libidinem meam cōfinxerim, vt nostrorū hominum res gestæ vel inimicis etiam nostris inuitissimis, singularis cuiusdam ac ferè diuinæ fortitudinis confessionem extorserint.

Quāobré ex hijs quæ breuiter exposita sunt (non enim sum copiam quam potui persecutus) cōcluditur profectò, Britāniā (quam hodiè Angliam nuncupamus) sicut vbertate agrorum, varietate fructuum, magnitudine pastionis, omniumque commodorū opportunitate & copia facile cæteris omnibus Insulis antecellit: sic rei militaris scientia, atque bellandi gloria insignem semper atq; admirabilem existisse. Quæ cū ita sint, cumque huic



militum, ruinas vrbiū, multaq; alia quę  
nostrę genti immortale decus, famamq;  
perennem pepererūt. Iam verò illa quā-  
ta sunt? quām admirabilia? quām omni  
laude, honore, prædicatione digna? quòd  
vno eodemq; momento nostri exercitus  
cum duobus potentissimis regibus con-  
fixerint? quòd foris in Gallia Gallum,  
domi in Anglia Scotum fregerint? quòd  
nuper paucissimis cum militibus, & exi-  
gua bellatorum manu, absente etiam re-  
ge, formidolosissimoque bello in Gallia  
detento, influentes in Angliam Scotorū  
maximas copias tumultuaria pænè pu-  
gna represserint, exercitum ferè omnem  
deleuerint, regem denique ipsum intere-  
merint? Quid? maiores nostri? nōne  
Galliam vi ac armis sæpenuerò sube-  
gerunt? plebem procereſque in sua verba  
iurare coegerunt? cōditionibufq; quibus  
vellent, obstrinxerunt? maximi nominis  
atq; potentię Regem, in bello cœperunt?  
captum-

captumque in Angliam perduxerunt? Quibus rebus quid prestantius? quid excelsius? quid in omni pænè seculorū memoria magnificentius enumerari potest? Atq; hæc omnia publicis sunt litterarum consignata monumentis: tantumq; abest ego vt istæc ad libidinem meam cōfinxerim, vt nostrorū hominum res gestæ vel inimicis etiam nostris inuitissimis, singularis cuiusdam ac ferè diuinæ fortitudinis confessionem extorserint.

Quāobré ex hijs quæ breuiter exposita sunt (non enim sum copiam quam potui persecutus) cōcluditur profectò, Britāniā (quam hodiè Angliam nuncupamus) sicut vbertate agrorum, varietate fructuum, magnitudine pastionis, omniumque commodorū opportunitate & copia facile cæteris omnibus Insulis antecellit: sic rei militaris scientia, atque bellandi gloria insignem semper atq; admirabilem existisse. Quæ cū ita sint, cumque huic



parti abūdè iam satisfactum arbitror : reliquum est, quoniam de insulæ nomine, situ, forma, magnitudine, fertilitate, rerumque gestarum fama cursim quædam (vt potuimus) perstrinximus, nunc deinceps de ciuitatibus locisque celebrioribus nonnulla dicamus.

Ac primùm vt à *Cantio* potissimùm exordiamur, quandoquidem ea regio opposita & obiecta Galliæ, à transmarinis partibus commodissimū præbet in Angliam traiectum : manifestum est regionem illam omnibus ijs rebus abundare, quibus florentissimæ quæquæ gentes circumfluere consueuerunt. Etenim præter soli vbertatem, frugifera & immēsa camporum spatia, vicorum, atq; vrbium frequentiam, maris finitimi non minùs utiles quàm iucundas opportunitates, portuum recessus tutissimos, quibus ex rebus, incredibile dictu est, quantum incolæ vtilitatis ac commodi percipiant, illic sunt

sunt fontes dulcissimi ac perennes, limpidissimis aquis profluentes : illuc sunt ouium, bouum, diuersorumque animalium greges passim per agros vberes & opimos discurrentes : illuc denique auium, piscium, cunctarumque paene rerum tanta copia, ut ad eam regionem commoditatum omnium, quoddam quasi mare affluxisse videatur. Princeps ciuitas *Can-  
tuaria* dicitur, (olim *Dorobernia* nomen fuit) vrbs sane perantiqua, & quondam diuitijs & opibus, & descriptione aedificiorum, & sacrarum aedium pulchritudine, in primis nobilis. Nunc vero vel vetustate, vel Calisij (quod ipsi queruntur) amissione, vel ciuium (quod plerique autumant) ignauia atque discordia, pristinum paene splendorem omnem decusque penitus amisit. Siquidem legulei, sartores, lanij, pharmacopolae, caeterique parui atque perangusti animi opifices, (qui in sordida arte versantur omnes) auidi lucri,

Gg. iij. dediti



dediti rixæ, inuidia & æmulatione sæpe-  
numerò ardentes, & leuissimis plerunq;  
de causis sæuis ( vt fit ) inter se nonnun-  
quam & immanibus irarum vndis ex-  
æstuentes , eos malorum fluctus in vr-  
bem inuexisse putantur , qui statum  
ipsius intestinis concussum dissidijs in-  
credibiliter dilacerarunt. Cæterum ha-  
rum rerum vtra magis rem Cantua-  
riensium publicam ( quondam vt di-  
xi florentem ) afflixerit, an simul om-  
nes ad perniciem & ruinam , tantæ ci-  
uitatis concurrerint : affirmare temerè,  
neque audeo certè, neque debeo. Proin  
rem integram : ijsque dijudicandam re-  
linquo , qui ciuium mores , vsitatamq;  
viuendi consuetudinem meliùs perspe-  
xerunt. Vna tamen in re , cæteris ad-  
huc omnibus Britanniae ciuitatibus an-  
tecellit. Illic etenim est Archiepisco-  
pi sedes , sicuti multis abhinc iam se-  
culis

culis fuit. Namque à primo vsque ad *Matthæum Parkerum* antistitem amplissimum (cui nunc quoque illius ecclesiæ cura incumbit) septuaginta Archipræsules exstiterunt. Restat igitur illud vnicum veluti diuinitus, afflictæ vrbi, ac pænè iam deploratæ solatium, quòd adhuc Archiepiscopali sede resplendeat, totiusque Angliæ & Cambriæ ciuitas Metropolis cognominetur.

Proxima Cantuariæ *Roffa* est: (Nam *Feuershamiam*, *Myltonum*, *Syttingburnam*, & interiecta nōnulla oppidula prudens certè prætereo) vetus & illa vrbs sicut murorum ruinæ, & quædam antiquitatis vestigia declarant.

Atque hæc quidem de *Cantio* breuiter dicta, sufficiant: Etenim sylvas, portus, villulasque, quæ hinc indè sparsæ circumiacent, (colitur enim vndiq; & habitatur frequentissimè) transire decreui,

ne



ne si curiosius aliquantulum in istiusmodi rebus persequendis substiterit oratio, peregrinari nimium, & immoderatus excurrere videretur. Itaque certum est, in cæteris hanc eandem rationem sequi, nimirum vt nominatis maximis vniuscuiusque prouinciæ urbibus, atque notatis tantum, reliquas breuitatis causa præteruolem. Quod eò libentius adducor vt faciam, quandoquidem *Gulielmus Lamberdus*, præstanti ingenio, eruditione, iudicio vir, nuper istæc vernaculo sermone non minus eleganter quàm copiosè descripsit. Qui (quod eum facturum magnoperè cōfido) si in via quam semel ingressus est, perstiterit, atque eodem penicillo iisdemq; coloribus quibus Cātium depinxit, Angliam nobis omnē expressam, depictamq; dederit: equidem non v. deo quid in eo genere ab aliquo alio politius poterit, perfectiusue proferri.

*Cantianis* proximi secundum Thamesis  
ripam

ripam meridionalem, sunt *Suthsaxones* & *Surreyenses*. Southsaxonum celeberrima ciuitas *Ciceſtria* est, Surreyensium *Guldefordia*. Quanquam & ipsa quoque *Craiduna* partim clarorū virorum cœtu qui eò quotannis semel iuris dicendi causa confluere consueuerūt, partim Archiepiscoporum Cantuariensium palatio nobilitata est: habent enim illic constructam magnificè, & plenam dignitatis domū. Quo nomine etiam *Lomethis*, (quæ vulgò *Lambyth* appellatur) atque in extremis Surreyensis prouinciæ finibus consistit, circunuicinis oppidulis clarior multum & illustrior existit. Etenim postquam V Vestmonasterij ab Archiepiscopis Cantuariensibus habitari desitū est, (ibidem enim vsque ad tempora regis Richardi, eius nominis primi, ædes habuerunt amplissimas ludo (qui nunc est) literario aduersas, V Vestmonasterio Lamhithum migrarunt. Vbi cū de

Hh. locorum



locorum quorūdam permutatione cum monachis Roffensibus transegissent sibi ac successoribus suis palatium magnificentissimum exædificarunt. Quod inchoatum à *Baldwino* anno. 1183. dein ab alijs auctū antistitibus, postremò a *Mortono*, *Warhamo*, & *Polo* Cardinali renouatum amplificatumq; , ad hanc tantam peruenit ( qua hodiè conspicitur ) magnitudinem. Atq; hic quidem ( pace tanti antiquarij dixerim ) *Johannes Leylandus*, si non per errorem lapsus est, at certè titubauit aliquantulum, & ignorance veritatis de via deflexit. Ait enim Archiepiscopos Cantuarienses à tempore aduentus Normannorum in Angliam, *Lambithi* sedem ac domicilium habuisse. Quod secus esse ex ijs quæ superius dicta sunt quis non videt? nisi fortè plus vni *Leylando* ( homini quod non infitior apprimè docto, & in harum rerum studijs non mediocriter

ter versato ) credendum sit , quàm vetustissimis antiquitatis Anglicanæ monumentis, quæ certissima huius migrationis testimonia continent. Addam ipsius *Leylandi* verba , ne qui mihi fortè vitio dent , quod homini multis laudibus claro , & quod familiam ducit antiquario , ignoratæ antiquitatis crimen inflixerim. *Lomithis* ( inquit ) id est *sinus luteus* siue *Lamithis*, vulgò *Lamehyth* notissimus *Tamesinæ* ripæ locus , de quo nihil antiquius legi , quàm quod *Canutus Fortis rex Angliæ* hîc inter conuiuia & pocula , vt refert *Henricus Venantodunensis*, diem obiuerit supremum. In confesso est, *Archiepiscopos* à tempore aduentus *Nortomannorû* in *Angliam*, hîc sedem habuisse.

*Baldwynus* & *Hubertus Archiepiscopi* , nobile fanum *Lamhythi* erexerunt, decreueratq; præbendarios ( vt vocât ) ibidem constituere. *Durouernēses monachi*

Hh.ij.

hoc



*hoc ægrè ferentes, cum Romano pontifice de fano diruendo egerunt. Postremò Monachis victoribus, ruinam locus passus est, & quidem magnam. Hæc Leilandus.*

Southsaxonibus finitimi sunt *Atrabates*, (quos nunc *Barshirenses* vocamus) quorum vrbs primaria *Caleua* olim, hodie *Wallingforda* cognominatur. Nam de *Segentio*, *Pontibus*, *Spinis*, *Cunetione*, quæ nunc *Cilcestre*, *Reding*, *Newbery*, & *Malborow* dicuntur (antiquis sanè oppidulis) plura fortassis dicerem, si non ad alia maiora festinaret oratio.

Inter hos & mare siti sunt *Simeni*, quos *Hamshirenses* hodie nūcupamus, quorū amplissima ciuitas *Venta* est, quæ multis abhinc annis fama percelebri fuit, & à Britannis, (qui eo tēpore regionem hanc incolebant) *Caerwynt* dicebatur: nūc autem à nostris *Wynchestre* appellatur.

Vndè nō longè distat Portus magnus, (hodiè nomen *Portsmouth*) in cuius ostio  
ciuitas

ciuitas erat *Caerperis* olim , iam verò *Portchestre* nuncupata. Est etiam in eadem prouincia *Trisantonis* : portus pulcherrimus atque peramplus: antiqui adhuc nominis vestigia retinens, *Southbāpton* enim hodierno die dicitur. Ex aduerso sita *Vectis* est : Insula clara, fertilis, opima, & Romanorū monumētis celebrata: de qua *Leylandus* sic scribit: *Vecta* siue *Vectis* *Britannicè*, *Gueid* vel *Guith*, *Anglicè* *VVight*, insula tūm *Latinis* tūm *Græcis* scriptoribus cognita. In primis autē *Ptolomæo*, *Plinio*, & *Antonino*. *Samuel Beulani* discipulus, qui annotationes in *Nennij* *Britanni* historiam scripsit, hæc dum *Vectæ* interpretationem significanter excutit, refert : Quam *Britones* insulam *Gueid* vel *Guith* vocabāt, quod nomē *Latinè* diuortium dici potest. Forma insulæ ouo simillima : longa quidem est viginti passuum millia, lata verò decem. Rupes habet litus horrentes. Terra frugum fertilissima,



*ne syluæ indiga. Amniculis aliquot com-  
modè alluitur. Neoportus aliàs Medena,  
vnicum insulæ emporium. Villæ prætereà  
plus minus. 24. in quibus vt plurimum non  
vicatim, sed sparsim habitatur.*

Locus hic admonet vt quod initio fa-  
cturum me receperam, id nunc demùm  
præstem. Etenim de Insulis Britanniam  
circumiacentibus dicturum me aliquid  
pollicebar : quod quidem libenter face-  
rem, si aut susceptæ historiolę ordo atque  
natura pateretur, aut non aliò ad se in-  
uitaret, & quasi raperet oratio. Ne tamẽ  
hanc partem intactam prorsus relinque-  
rem, aliquid hac de re dicẽdum mihi hoc  
tempore existimaui, hortans nihilò tamẽ  
seciùs omnes, qui talium rerum desiderio  
tenentur, auctores vt consulant eos, qui  
istęc plenius & vberius in commentario-  
lis explicarũt suis.

Est igitur Anglia (quemadmodum su-  
perius demonstratũ est ) multis clarissi-  
mis

mis insulis circumdata, quarū aliæ remotiores sunt, & longiùs disiunctæ, alię verò veluti parvæ filiolæ, matri magnæ circumfusæ. Harum omnium maxime sunt, *Vectis* (cuius paulò antè mentionem fecimus) *Menevia* (quam Ptolomæus *Monada* appellat: nostri *Man*) & *Mona*, de qua deinceps dicemus. Nam de *Teneta*, *Sheppeia*, *Ely*, *Axholmia*, *Avalonia*, & cæteris, (quæ quò angustioribus definitæ terminis sunt, eò fama semper minori exstiterunt) hoc tantum in oratione ponam mea, insulas illas fertiles esse & peramœnas, & rebus pænè omnibus ad vitā necessarijs redundantes.

*Mona* itaq; ea est quā *Angleseiam* hodiè nominant: cuius Cæsar commentariorū libro quinto meminit, *Monamq;* eam appellat. Quanquam *Polidorus* ex *Mona*, *Manam* fabricare conetur, homo utique non indoctus, sed qui vel ignoratione & inscitia, vel (quod pleriq; putant)



putant) maleuolentia, & nescio qua gloriolæ cupiditate occæcatus, densissimis identidem errorum nebulis veritatem inuoluerit. Quæ res mouit *Humfredum Lhuid* & *Iohannem Leilandum* (summæ equidem in antiquitate perlustranda, industriæ viros) vt immoderatâ istam *Polidori* in vrbium, locorum, ciuitatumq; nominibus deprauandis licentiam hisce verbis perstringerët. Ac primùm *Humfredus Lhuid* eleganti quadam epistola, quam nuper cum suo totius orbis terrarû Theatro *Abrahamus Ortelius*, (præstantis & eruditionis & ingenij vir, coniunxit, sic scribit: *Restat* (inquit) *de Monæ insulæ nomine & situ, quæ apud antiquiores, & modernos authores obseruavi, quæque ipse ex experientia & ex linguæ Britannicæ cognitione didici, tibi cui aliquid denegare quod vires meæ præstare possint, apud me piaculi loco erit, aliquid scribam, quamuis scio me hoc facitando nomē meum multorum*

*multorum calumnijs exponere, quia errores  
semel imbibiti difficillimè euelluntur, ma-  
ximè cum Polidori Virgilij viri docti, &  
non vulgaris eloquentiæ autoritate confir-  
mentur, sed pace eorum dixerim, virum hūc  
annales suos manifestis erroribus & mille  
mendis impleuisse, idq; non solū ei accidisse  
ob imperitiam linguæ Britannicæ, sine qua  
nec nomen ipsius insulæ rectè intelligitur, cū  
alij per p, alij per b, alij per ph, litteras scri-  
bunt: sed etiam quòd meliores authores non  
legerit, vel quòd inuidia Britannici nominis  
tumens, Gulielmi cuiusdam & re & no-  
mine Parui, (spretis melioribus, eorumque  
authoritates paruipendens, sibi que nimium  
tribuens) cæcutientis, cæcus vestigia secutus  
sit: Sed crepat licet Britannicæ gloriæ velli-  
cator impudentissimus: dum exstant inter  
Græcos Diodorus Siculus, Dion Cassius  
bis Consul, Herodianus, Plutarchus, Pau-  
sanias, Ptolomæus, & Strabo: inter La-  
tinos Cæsaris commentaria, Cornelius  
Li. Tacitus*



Eutropius, Suetonius, Orosius, Ælius Spartianus, Iulius Capitolinus, Ælius Lampridius, Flavius Vopiscus, Aurelius Victor, Amnianus, Marcellinus, Sextus Rufus, Panegyrica Mamertini, & aliorū: Plinius, Antoninus, Mela & Solinus, *præter annales antiquissimos Britannicè scriptos, Gildastres, Nenum, & clarioris eruditionis multos alios, qui res Britannicas scriptis suis illustrauere: Asserius, Obbernus, Felix, Monumetensis, Huntingtonensis, Malmesburiensis, Anno-uillanus, Iscanus, Necchamius, Giraldus Parisiensis, Triuettus, & infiniti alij. Crepat (inquam) licet imperiosus Urbinas, & clarissimis Britānorū rebus gestis oblatret, dū hi classicū Britannicæ gloriæ cātēt, nusquā poterit mēdacissimis suis calūnijs Britāniæ decus & nominis famam à tot clariss. viris decantatā, vel obscurā reddere, vel aliqua infamia inurere. Iam ad Monā redeūdū est, quā Polydorus satis pro imperio notissimo antiquo priuauit, anonymāq; reliquēs,*

Menauia vtroq<sup>ue</sup> decorauit: quod facile, & ex Romanis, Græcis, & Britānicis scriptoribus, & incolarū lingua hunc in modum probatur. Eundē in finem, sed mitiūs aliquantulū Leylandus: Mona, Britannica terræ Mone. Hæc ab Anglis vi occupata, Anglesey dici cœpit, id est, Anglorū insula. Polydorus Virgilius cōtēdit miris modis ex Meuania Monam facere: si nomen quod vel adhuc retinet, si vrbs quæ è regione sita est, vnde & nomen Aruone, pro Ar-Mone habet, si traiectus breuissimus quidē ille, cuius & Romani scriptores meminerūt, si Penmona promōtorium, quæ dictio caput Monæ significat. Si arborū ingentes trunci ac radices sabulo obtectæ, quæ latè per Monæ litora eruūtur. Si abietes miræ lōgitudinis in vliginosis cāpis, passim sub terra inuentæ, nō satis probāt eā Monā fuisse, quæ nūc Anglesey vocatur: nihil amplius in præsētia dicā, nisi quòd decimo quarto apud Tacitū libro hæc legerim. Excisiq<sup>ue</sup> luci sæuis super-



stitutionibus sacri. Ego verò (& meritò) as-  
surgō Polidoro. Præstitit in historia quæ  
potuit optima, si meliora potuisset, facile  
quidem voluisset. Quo nomine & posteritas  
multum illi debebit. Sed ut conuiueam in  
meridie, & indulgeam manifestis errori-  
bus, qui frequentiusculè erudito occurrunt  
lectori, siue ille per ignorantiam, siue ut can-  
didus interpretor per incuriam peccauerit,  
mihi nec commodum nec æquum videtur.  
Quando amor erga patriam meus, & veri-  
tas ne faciam, prohibent, & quidem seuerè.  
Mihi quidem si esset cum eo familiaritas  
ulla, libere eum, at opportunè, interim nec  
minus candidè & modestè admonerem, ut  
sexcetas eiusmodi maculas in historia quam  
edidit, elueret. Hucusque Leylandus.

Quam eandem Polidori temeritatem  
seu mauis petulantiam reprehēdit etiam  
Priseus scriptor politissimus: Mona  
(inquit) insula, quam Angli nūc Anglesey  
appellant, etiam nunc antiquum nomē inter  
Brytan-

*Britannos Cæbrenses retinet, nempe Môn dicta. Tametsi Polidorus ob linguæ Britænicæ ignorantiam, & quia alia non multum distans Insula (Man) apud Anglos nunc vulgò appellatur, illam videlicet Mônam eandem quam (Man) nunc Anglicè vulgò appellant, fuisse putat, interim nescius, quod & hæc quæ (Man) Anglicè dicitur, Mônada olim à Ptolomæo, & antiquis, & nunc etiã à Britannis (Manaw) affini vocabulo vulgò dicitur. Vndè videre est, utramque insulam antiquitatis expressa vestigia adhuc retinere apud Britannos.*

*Quid quod Plinius harum quoq; trium insularum mentionem fecerit, & duas suis nominibus appellarit, tertiam, (quanquã obscurè) aliquantulum tamen subumbrarit: Inter Hyberniam & Britanniam sitæ sunt (inquit) Mona, Manapia, & Vectis insulæ. Monam & Vectim antiquis nominibus insigniuit: & eã quã nos hodie Mân appellamus, Manapiam nū-*



cupauit. Prætereà *Cæsar* scribit eam in medio cursu esse inter *Angliam* & *Hyberniam*, suoque nomine *Mônâ* appellat, quo quid dici potest apertius ad reprimendam scriptoris inconsideratissimi vanitatem? Tres itaque (quod antea dictum est) propè *Britanniam* insulæ sunt, finitimarum omnium insularum maximæ. *Man* (veteri adhuc nomine insignis) *Mona*, (quam *Angleseyam* hodiè appellamus) & *Veddis*. De quibus *Henricus Huntington* ad hunc modum scribit: *Tres maiores insulæ Britanniae sunt Orchades, Man, Mona, (Liseuboniam, vel Euboniam, vel Eufoniam vocat) quæ in umbilico maris inter Hyberniam & Britanniam sita est: Tertia Guith cōtra Normannos, de quibus dicitur in prouerbio, iudicabit Britanniam cum tribus insulis. Hæc Henricus.* Videamus nūc quid de remotioribus insulis veteres scriptores tradiderint. *Antonius* ait: *In mari Oceano, quod Gallias*

Gallias & Britanniam interluit, sunt in-  
 sulæ Orchades, Glota, Vierione, Vecta,  
 Riduna, Sarnia, Cæsaræa, Barfa, Bifia,  
 Andium, Sicdelis, Vixantisma, Vindelis,  
 Siada, Iga. Sunt (vt inquit Plinius) qui a-  
 liàs prodant, Scandiam, Dumnam, Ber-  
 gos, maximamq; omnium Nerigon, ex qua  
 in Thyle nauigetur. Addunt etiam non-  
 nulli numerum, inter quos est M. Ca-  
 pella, qui sic scribit. In ultimo eius, sylua  
 Caledonia, insulæque quamplures, inter  
 quas Orchades sunt, quadraginta pænè  
 iunctæ. Et Mela, cuius hæc sunt verba:  
 Quadraginta sunt Orchades, angustis in-  
 ter se diductæ spatijs: Insulani statura sunt  
 procera, semper sano fermè corpore, pa-  
 riter atq; mente, quo fit vt longissimam vitã  
 degant, etsi piscibus plurimum victitent,  
 nam terra cõtinuò propemodùm frigore ob-  
 sita, multis in locis vix frumentum fert, ar-  
 borem verò pænè nullam. Consentit cū v-  
 trisq; Plinius: Quadraginta sunt (inquit)  
 Orchades



Orchades modicis inter se discretæ spatijs. Solinus item de Hebudibus hæc tradit: *Multæ sunt circa Brytanniam insulæ, è quibus Thyle vltima, in qua æstiuo solstitio, sole de Cancridere faciente transitum, nox pænè nulla brumali solstitio, dies adeò conductus vt ortus coniunctus sit occasui. Ultra Thylem accepimus pigrum esse & concretum mare. Inde à Caledonio promontorio Thylem petentibus bidui nauigatio est. Inde excipiunt Hebudes insulæ quinque numero, quarum incolæ nesciunt fruges, piscibus tantum & lacte viuunt. Rex vnus est vniuersis, nam quotquot sunt, omnes angusta interluuie diuiduntur. Rex nihil suum habet, omnia vniuersorum, ac ne auaritia diuertat à vero discit paupertate iustitiam, vtpotè cui nihil sit rei familiaris, verum alitur è publico. Atque hæc cursim strictimq; de Insulis, nunc ad reliqua denuò reuertamur.*

*Simenos ordine consequuntur Seueriani*  
nunc

nunc *Wylshiremen* dicti, horum nobilissima ciuitas *Caerfeuerus*, alijs *Caercaradoc*, à nostratibus hodiè *Seuerisbury*, vel corruptè *Sarisbury* cognominatur. Inter hos est nobilitatus ille Britannorum herotum clade locus, qui *Mons Ambrosij* appellatur, hodiè *Stoneheng*: vbi immensæ magnitudinis saxa conspiciuntur, modo tam incredibili constructa coagmentataq; vt omnes (qui vnquam conspexerunt) in admirationem tantæ ac tam inauditæ structuræ conuerterint. De quibus *Henricus Huntington* quodam in loco sic scribit: *Quatuor autem, sunt quæ mira videntur in Anglia, primum quidem est, quod ventus egreditur è cauernis terræ, in monte qui vocatur Pec, tanto vigore, vt vestes iniectas repellat, & in altum eleuatas procul eijciat. Secundum est apud Chedernhole, vbi tam magna cōcauitas est sub terra, vt eam multi sæpè ingressi sunt, & ibi spatia magna terræ, & flumina pertransierint, nunquam ta-*



men ad finem eius venire potuerint. Tertiū est, quod in quibusdam partibus, pluuia videtur eleuari de montibus, & sine mora per campos diffundi. Quartum est apud Stanengs, ubi lapides miræ magnitudinis in modum portarum eleuati sunt, ita ut portæ portis superpositæ videantur, nec potest aliquis excogitare, qua arte tanti lapides adeo in altum eleuati sint, vel quare ibi constructi sint. Hucusque *Huntingtonus*. Præterea in *Seueria* est etiam & altera non minùs ferè nobilis vrbs, quæ *Shaftesbury* nominatur, à Britannis olim *Caerbaladin*, & *Caersepton* dicebatur. Hijs finitimi sūt *Durotriges*, *Brytānis Durugueir*, *Anglis Dotsetshyremen* dicti : à quibus non longè absunt *Damnonij*, (*Deuonshyremen* hodiè vocantur) quorum amplissima ciuitas *Isca* est, cui olim *Augusta* nomen fuit, & *Caermyck*, nunc à nostratibus *Excestre* cognominatur.

Proxima & vltima omniū *Cornauia* est,  
inco-

incolis *Cernico*, ab Anglis *Cornwallia* dicta. Suprà *Damnonios* sita est *Murotrigū* regio, quæ Britannis *Guladarhaf*, Anglis verò *Somersetshyre* dicitur. Huius provinciae urbes primariae sunt, *Ilcestre*, *Bristou*, & *Bath*, in qua sunt aquae calidae, è terræ quasi venis atq; visceribus mirabiliter ebullientes, humanisque corporibus, tabifica lue aut morbo contactis, admodum salubres. Ab hijs non longè absunt *Dobuni*, siue *Claudiani* (*Glocestrenses* nostri nuncupant) tribus ciuitatibus, *Glocestria*, *Cicestria*, & *Malmsburia* insignes.

Regiones quæ ad australem *Thamesis* orā sitæ sunt indicauimus omnes, reliqua nunc eodem quo cœpimus ordine, conſectabimur. Et primò contra *Cantium* ex altera parte *Tamesini* fluuij sunt *Trino- uantes*, qui hodiè à nostratibus *Estſaxones*, & *Mediosaxones* appellantur, quorum princeps ciuitas *Londinum* est,



olim *Trenouantum* dicta, vrbs Anglicarū  
 omnium maxima, pulcherrimaq;. Nam  
 & situ est tūm egregio, tūm ex omni ad-  
 itu, vel terra, vel *Tamesi*, (qui fluuius vr-  
 bem præterfluit) ad aspectum præclaro:  
 dein templis, ædificijs, locisq; tam priua-  
 tis quàm publicis, ita ornata atque distin-  
 cta, vt longè ceteris omnibus ciuitatibus,  
 & specie & magnitudine antecellat. Nec  
 me certè mouet, quòd *Polydorus*, (vir vt  
 sæpè iam dixi, in rebus nostris explican-  
 dis minùs castè integreq; versatus) aliter  
 aut senserit, aut se sentire finxerit, præser-  
 tim cū tot vbique præstantissimorum  
 hominum scripta illius commentitias fu-  
 tilesq; coniecturas, atque ineptias (plus  
 pænè quàm aniles) detexerint. *Trinouan-*  
*tibus* proximi sunt *fceni*, quorum ciuitas  
*Venta* est, ea, quā nostrates hodiè *Nor-*  
*wycum* nuncupant. Quam quoniam or-  
 nandam quoad potero, meisq; scriptis  
 celebrandam suscepi : non committam,

vt quas laudes illius pulcherrimæ vrbis  
 perpetua oratione (cùm ad id loci per-  
 uenero) persequi decreueram, eas nunc  
 in hoc rapidissimo orationis meæ cursu,  
 festinantiùs quàm par est, explicem atq;  
 profundam. Quàquam mirari satis cer-  
 tè non possum, quid *Polidoro* in mentem  
 venerit, regionem vt hanc *Nordouicen-*  
*sem*, ciuitatem verò *Nordouicum* appel-  
 landam existimaret, atque ex *Ordinico*,  
 peritissimus proculdubiò vrbium archi-  
 tectus) vnica tantùm litterula adiecta,  
*Nordouicum* tam subitò construeret.  
*Vna solummodò præter Londinum ciuitas*  
*Ordouicum* (inquit) *nomen vetus retinet,*  
*tametsi nos addita N. littera in principio,*  
*Nordouicum vocamus.* Hunc in modum  
 purus ille scriptor, & rerum (quod  
 profitetur) Anglicarum fidissimus inter-  
 pres, ea quæ certis locis, temporibus,  
 atque nominibus distincta sunt, singulari  
 quadã temeritate atq; audacia permiscet



semper atque confundit.

Prylæus (auctor sanè grauiſſimus) in historia sua hac de re sic scribit: *Quale est illud quod de Ordouicibus Polydorus cēset, hanc videlicet ciuitatem solam, præter Londinum, antiquum nomen, videlicet Ordouicū in hæc tempora retinuisse, quod de Norwycō ciuitate, nunc ad orientis insulæ extremum latus posita innuit, cum Ptolomæus Ordouices planè ex Diámetro, videlicet ad extremum Occidentis insulæ Britanniaë constituit. Nec ipsa loci longitudinis aut latitudinis ullo modo ratio patiatur eos ubi Norwycum est, constitui: Nec dum tempore Ptolomæi Saxones, unde hoc vocabulum Norwich, dubio procul originem traxit, in hanc insulam applicuerant, videlicet à (North) & (VVich) quod Latinè sonat, Aquilonaris vicus, quod Polydorum minimè obseruasse plurimùm admiror. Ordouices etiam non ciuitatis, sed gentis nomen erat.*

*Nec*

*Nec omninò verum est, quod cætera loca omnia sua antiqua nomina penitus amisere, ut Polydorus in suggillationem historiae receptæ asserit. Quippè Londinum quod London, & Eboracum, quod non ita pridem Euerwyck: Venta, V Vinchestre, Trifantonis hostia, Sowthampton: Cantium, Kent: Sabriana, Seuerne: Corinij, Cornismen: Dannonij, Deuonshyre men: Tamesis, Tames: multiq̃ue alij loci atq̃ vrbes palàm faciunt, non omnia vt Polydorus censet, huius insulæ loca sua antiqua nomina amisisse. Hæc ille. Sed de Polydoro satis: Nos eò, vndè defluxit oratio reuertamur.*

*A Norwicensibus non longè distant Cantebrigienses, quorū ciuitas olim Britānis Caergrant, & ab antiquioribus Anglis Grātecestre (à flumine urbē præterlabēte) dicebatur, nūc verò vulgò (sed corruptè) Cambridge appellatur. Academia omniū celeberrima, eruditissimiq̃; semper hominibus*



minibus atq; liberalissimis bonarum artium studijs florentissima. Cuius & urbis & Academiae antiquitatem, & cum antiquitate dignitatem, *Ioannes Caius* nuper eleganti volumine complexus est. Nec procul indè disitæ sunt hæ gētes, *Catychlauni*, siue *Hertfordienses*, *Buckinghamenses*, *Huntingtonenses*, *Bedfordienses*, *Oxonien-  
ses*, & post hos, *Lincolnienses*, *Leicestrē-  
ses*, *Nortauondunenses*, *Staffordienses*, *War-  
uicenses*, *Wigornien-  
ses*. Hertfordiensium ciuitas fuit *Verolanium*, vrbs per antiqua, & *Saxonum* furore funditus excisa, cuius etiam adhuc vestigia quædam manent, & mœniorum ruinae, cis amnem non longè à fano diui (vt vocant) *Albani*. Nunc inter cæteras eius prouinciæ vrbes, *Hertfordia*, (nationis insignita nomine) principem locū obtinet. Eodem modo *Buckinghamensium*, *Huntingtonensium*, *Bedfordiensium*, *Oxonensium*, *Lincolniensium*, *Leycestren-  
sium*, *Nortauondunensium*,  
*Warui-*

*Waruicēſium, Staffordienſium, Wigornienſium*, primarię vrbes omnes (*Staffordienſium* duntaxat excepta, quę *Lychfeldia* nuncupatur, gētium nominibus inſignuntur, ſiue (nam id quoq; incertum eſt) gentes ſibi vrbium, an vrbes gētium vocabula contraxerunt. Inter has maximi nominis vrbs *Oxonium* eſt (ſecūdum *Cātebrigiā*) nobiliſſima, & antiquiſſima totius pænè terrarum orbis Academia. Sequuntur *Salopienses*, quorum antiquiſſima ciuitas *Vricouium*, Saxonico perculſa bello, funditùs concidit : hodiè *Salopiam* habent vulgò dictā *Schreusbury*, urbem non multò minùs nobilem & illuſtrem. Dein ſunt *Deuani*, ſiue *Ceſtrenſes*, & non procul ab hijs *Doruentani*, qui nunc *Derbienses* dicuntur. *Deuanorum* ciuitas maxima ea eſt, quam in hunc diem Britanni *Caer Lheo Ddourduw* nuncupant, veteres Latini *Deuam*, Angli *Leganceſtre* appellarunt, quam eandem hodiè breuius e-



quidem sed multò corruptiùs) *Chestre* cognominamus. *Derbiēsum* vrbi *Dorguent* quondam nomen fuit (ab albis aquis sic dicta:) quæ vox longo tēporis intervallo, inflexa nonnihil, atq; paululùm immutata, à *Dorguent*, ad *Derby* iam tandem deuenit. Vltimi omnium sunt *Snottingomenses*, nunc *Notyngamenses* dicti, *Eboracenses*, *Northumbrenses*, *Westmerlandenses*, *Cumberlandenses*, *Lancastrenses*. *Notyngamenses* ciuitatem habent suo nomine percelebrem atq; insignem, (*Notyngamia* etenim nuncupatur) positaque est in summo colle, pellucidis vndique amnibus ac riuulis circumflua. Ea autem est vicinorum vrbi natura locorum, siue amœnitatem agrorum, siue vbertatem spectes, vt illic potissimùm constituti ciues videantur, quò omnibus tùm vitæ commodis, tùm voluptatibus circumfunderentur.

*Eboracenses* olim *Brygantes* dicebātur,  
 pugna-

pugnacissima gens, & Romanorum, *Pictorum*, *Scottorum*, *Saxonū*, atq; *Danorum* aduersa semper, atque inimica tyrannidi, adeò vt perpetuò illorum rapinis obstituerint, neq; vnquam ne assiduis quidem fracti bellis conquieuerint. Horum ciuitates *Ptolomæus* nominat, *Eboracum*, *Bynionium*, *Calatum*, vel *Calcaria*, *Rhygodunum*, *Olicana*: quæ hodiè à nostris *Yorckæ*, *Bynecestre*, *Tadcastre*, *Rippon*, & *Haligfex* denominantur. Harum omnium maxima, amplissima, atque augustissima ciuitas *Eboracum* est, totius provinciae Metropolis, atq; Archiepiscopali nobilitata sede, quæque secundum *Londonum*, summæ est & dignitatis, atq; magnitudinis: multis clara triumphis, atque nobilium regum ducumq; illustrata victorijs. A Britanis olim *Caerfroc*, ab Anglis verò (vt antea dixi) *Everwick*, & nūc (contractiùs aliquantulū, sed corruptiùs) *Yorck* appellatur. *Northambymbrenses*,  
Ll.ij. *Westmer-*



*Westmerlandenses, Cumerlandenses*, atque *Lancastrenses*, has habent præ cæteris principes dignitate vrbes, Northumbrēses *Nouum castrū*, VVestmerlandij, *Applebeiam*, Cumerlandij *Carliolum*, (ciuitatem nobilem, antiquam, & splēdidam, (olim *Luguballia* nomen fuit) Lancastrenses *Mediolanum*, quæ *Lācastre* dicitur, & *Mancuuium*, cui nunc *Manchester* nomen est.

Neq; miretur hic quisquam, quòd vetera vrbium nomina obliuio iam pænè obruerit, præsertim cùm *Saxones*, postquam per vniuersam pænè Angliam, longè lateque victorias disseminarunt suas, cunctis locis aut noua prorsus nomina indiderint, aut antiquiora ob lingue (vt fit) inscitiam penitus deprauauerint. Patet hoc ex ijs quæ *Henricus Huntingtonius*, (scriptor grauiissimus) hac de re memorię mādauit: cuius ex verbis liquidò perspicui potest, non solùm quemadmodum

*Saxones*

*Saxones antiquissima vrbiũ nomina immutarũnt, verumetiam vtpotè regnum vniuersum in prouincias atque pagos distribuerunt. Hæc igitur ille : Ciuitatum nomina quondã hæc erant, Britannicè Caer Ebranc, Eboracum : Caer Chent, Cantuaria : Caerguragon, Wigornia : Caer Londone, Lundonia : Caerlyrion, Leicester : Caercollon, Colchestre : Caer Glow, Gloucestre : Caercey, Gicestre : Caeroder, Bristow : Caercery, Cirecestria : Caergwent, Wyncestria : Caer Grant, Granteceastria, (quæ modò dicitur Grantebrigia:) Caerlion, quam vocamus Carleuil : Caerdauri, Dorocestria : Caer Dorin, Dormecestria, quæ sita est in Hunthedun prouincia, super flumen quod vocatur Nen, penitus destructa est : Caerlothiot, Lincolne : Caermardin, quæ nunc quoque sic vocatur, Caer segent, Sylcestre. Hæc erant nomina ciuitatum tempore Romanorum & Britãnorum. Prætereà*



Caerguercon, Caer Gucerat, Caer Gortegrin, Caer Vruac, Caer Celemiō, Caer Megniad, Caer Licilid, Caerperis, Portchestre, Caerlegion, *in qua fuit Archiepiscopatus tempore Britonum, nunc autem vix mœnia eius comparent, ubi V sca cadit in Sabrinam.* Caer Draiton, Caer Marcipit. Et alio deinceps in loco: *Britannia etiam ciuitatibus quondam nobilissimis viginti nouem insignita fuit, præter castella innumera, quæ & ipsa muris, turribus, & portis, ac seris erant instructa firmissimis.* Quando autem Saxones hanc terram sibi subiugauerant, reges septem statuerunt, regnisq; nomina pro libitu imposuerunt. Primum regnum vocatum est Kent, secundum Sudseax, in quo sita est Cycestria: tertium Estanglia, in quo sunt prouinciæ quæ vocantur Nordfolc, & Sudfolc. Quartum est VVestseax, cuius caput erat VViltonia, (*quæ nunc data est sanctimonialibus*) in quo sunt vrbes VVinceastria, Salef-

Salesberia, & plures aliæ. Quintū Nord-  
humbriæ, in quo est Eboracum. Sextum  
regnum est Eastsex, quod non durauit diu,  
sed certis regnis subiugatum est. Septimum  
Merce, in quo est Lincolnia, Leicestria,  
& aliæ complures. Postquam autem reges  
VVestseax cæteris præualuerunt, & mo-  
narchiam obtinuerunt, terras per viginti  
quinque prouincias sibi diuiserunt, quarum  
situs & nomina scribere nō piguit, quamuis  
habitatoribus notissima sint. Deueniet enim  
forsitan, ut quemadmodum nomina ciuitatū  
prædicta, quæ olim grata & excelsa erant,  
modò in barbariem & risum vertuntur, ita  
etiam decursu temporum, quæ modò notissi-  
ma sunt, incognita & incredibilia fiant: vn-  
dè patet quàm miserè & frustrà nominis  
nostri famam incolæ prouinciarum appeta-  
mus, cū nec ipsarum urbium, vel prouin-  
ciarum durare possunt. Atq; hæc de sep-  
tem regnis & ciuitatibus, videamus vi-  
cissim quid de prouincijs tradiderit.

Prima



*Prima prouincia (inquit) Kent, in qua Archiepiscopatus est Cantuariæ, & episcopatus Roueceastræ. Secunda est Sudseax, in qua est episcopatus Ciceastræ: Tertia Sudrie: quarta Hantshyre, in qua est episcopatus VVintceastræ: quinta est Bercshire: sexta VViltshire, in qua est episcopatus Salesbyrie: septima est Dorset, octaua Somerset, in qua est episcopatus Badhe: nona Dauenshyre, in qua est Episcopatus Exceastræ: decima est Cornuallia: vndecima est Essex: duodecima, Middelfex, in qua est episcopatus Lundoniæ: Tertia decima, Sudfolc: quartadecima, Nordfolc, in qua est episcopatus Norwici: quinta decima Cantebrigeshyre, in qua episcopatus Ely: sextadecima Lincoleshyre, cuius caput est Lincolnia, cui subiacet sex aliæ prouinciæ, scilicet, prouincia Leicestriæ, & Hantoniæ, & Huntyndonæ, & Hertford, & Bedford, & Buckyngham, & Oxenford, extenditur enim Episcopatus*  
 Lincol-

Lincolnia à magno flumine Humbri, us-  
 que ad flumen Tamesis. Vicesima quar-  
 ta est Gloucestersyre, vicesima quinta  
 Wyrecestresyre, in qua est episcopatus  
 Wigornia: vicesima sexta Hereford-  
 syre, in qua est episcopatus Herefordia:  
 vicesima septima, Salopsyre: vicesima o-  
 ctava Ceastrsyre, in qua est episcopatus  
 Cestria: vicesima nona, Warwic: tri-  
 cesima Stafford. Post trigesimam prima est  
 Derby, secunda Nottingham, tertia est  
 Euerwycksyre, in qua est episcopatus E-  
 boraci: quarta est Nordumberland, cui  
 praest Episcopus Dunelmia: quinta illa  
 regio, in qua est nouus episcopatus Carluil.  
 Sira verò Anglicè, Latine prouincia dici-  
 tur, igitur decem & septem episcopatibus  
 insignita nostro tempore florescit Anglia.  
 Vrbes verò multò plures sunt quàm episco-  
 patus, ut Gloucestria, Leicestria, Oxen-  
 fordiam, & alia plures Episcopis carentes.  
 Quamuis nunc vtraque ciuitas & Glou-  
 Mm. cestria,



*cestria, & Oxenfordia* suos habēt Episcopos. Ex hijs omnibus liquet, quantum post deuictos *Britannos*, in rebus suis cōstituendis *Saxones* elaborarint : quam curam in propagandis imperij sui finibus adhibuerint : vtpotē nominibus nouis, vrbibus, atq; prouincijs impositis, vetustiora deleuerint: denique quemadmodū regionatim, viciatimque gentem omnem dispertiuerint. Quid quod non minori etiam cura publicæ vtilitati prospectum est, cū vijs quatuor, latis atq; perpetuis, itinera trans *Angliam* pænē omnia distinguerent, eiusq; facinoris perpetuitatem atque memoriam solennibus edictis decretisque deuincirent? Qua de re ad hunc modū libro primo *Henricus Huntington* scribit: *Tantæ autem gratiæ inhabitantibus fuit Britannia, quod quatuor in ea calles, à fine in finem construerent, regia sublimatos autoritate, ne aliquis in eis inimicum suum inuadere auderet. Primus est*

*ab Oriente in Occidentem, & vocatur I-*  
*chenild. Secundus est ab Austro in Aqu-*  
*lonem, & vocatur Ermingestrate. Tertius*  
*est ex transuerso à Dorobernia in Cestri-*  
*am, scilicet, ab Euroaustro in Zephyrum*  
*Septentrionalem, & vocatur VVatling-*  
*strete. Quartus maior cæteris, incipit in*  
*Catnes, & desinit in Totnefs, scilicet à*  
*principio Cornwalliæ, in finem Scotiæ, &*  
*hic callis vadit ex transuerso, à Zephyro*  
*Australi, in Eurum septentrionalem, & vo-*  
*catur Fossa, tenditq; per Lincolniam. Hij*  
*sunt quattuor principales calles Angliæ,*  
*multū quidē spatiosi, sed nec minus speciosi,*  
*sanciti edictis Regū, scriptisq; verendis legū.*  
*Hæc ille. Vnde facilè quis animaduerte-*  
*rît, quibus (veluti) ex fontibus ad laudem*  
*atq; eternā nominis gloriā, antiqui Reges*  
*profluxerunt. Etenim si perenni fama*  
*digni sunt ij qui res in bello maximas, ad-*  
*mirabili cum virtute atque audacia defi-*  
*gnauerunt: (sunt autem dubio procul*  

Mm.ij.
dignis-



dignissimi) quantis honoribus eos cum-  
mulabimus, qui, quæ alij cruento Marte  
pepererunt, dulci pace, atque diuini cu-  
iusdam consilij grauitate, cōseruauerint,  
auxerint, defenderint. Veruntamen hijs  
de rebus non est hic dicendi locus, & cer-  
tè si esset, subtiliùs ista persequi superua-  
caneum foret, præsertim cùm *Gulielmus  
Lamberdus* (is cuius paulò antè mentio-  
nem feci) multorum nuper antiquorum  
regum priscas leges, è vetustatis tenebris  
in lucem veritatis vindicauerit. Ad alia  
nos maiora rapimur, & sæpenumerò an-  
te oculos *Norwici* imago obuersatur  
nostros, quæ nos ad se identidem reuo-  
cans, promissi laboris fidem atque con-  
stātiā efflagitat. Etenim cùm illius cau-  
sa suscepta institutaque sunt hæc omnia,  
iamq; tanquam è scrupulosis cotibus e-  
merferit atque enauigarit oratio, cumq;  
vniuersam ferè *Britanniam*, (eam præ-  
sertim quā hodiè *Angliam* nūcupamus)  
breuiter

breuiter enucleateq; descripserim, eiusq;  
 nominis rationem, situm, speciem, ma-  
 gnitudinem, fertilitatem, rerum gestarū  
 famam, finitimas insulas, mira, prouinci-  
 as, vrbes primarias, vias denique (pingui  
 quamuis vt aiunt Minerva) dilucidè ta-  
 men satis, (vt mea fert opinio) aperteq;  
 depinxerim, cūcta q; (quoad potui) gra-  
 uissimorum, atque antiquissimorum au-  
 thorum testimonijs cūfirmauerim: quid  
 restat, nisi vt quibus astrictus teneor, ijs  
 me continuo vinculis exsoluā. Quocirca  
 quandoquidem hunc in modum celeri-  
 ter per omnem pænè *Britanniam* cucur-  
 rimus, maria q; immensa oratione pera-  
 grauimus, iamq; propè, atq; in ipso planè  
 cōspectu nostra *Normycus* est, cuius dū-  
 taxat causa tam latè euagati sumus, passis  
 eō velis cursum confestim dirigamus.

I. Tres igitur partes erunt huius histo-  
 riolæ: primo loco Urbis vt nunc est, for-  
 mam, descriptionemque instituemus,

Mm. iij.

qui-



quibusque initijs creuerit, donec ad hanc tantam peruenit (quâ hodiè visitur) amplitudinem, ostendemus. 2. Tum consequetur Pontifices, qui sacris ac religioni præfuerunt: 3. ac post hos Prætores. Semper autem vt quid memoria dignū inciderit, id ordine, & (vt poterimus) aptè, in illorum vitas ac tempora includemus.

*NORWICVS* ciuitas *Angliæ*, vna inter multas celeberrima, ad oriētis insulæ latus extremum, propter *Baradenum* fluuiū sita est: qui à mari *Hyermuthico* (in quod profluit) sexaginta millia passuum abest. De nominis ratione, atq; origine, variæ sunt & multiplices diuersorū hominum opiniones. Siquidem qui ea de re scripserunt, (scripserunt autē permulti) in dubias & ancipites sentētias distrahuntur. Quidam enim à regulo quodam seu duce *Noro*, (nam id imprimis traditur) nomen ciuitati impositum putant. Non-

Nonnulli à *Norico* (antiqui sanè nominis fluuio) cæterùm & fluuius, & fluuij nomen (perindè vt mortalia quæq;) vetustate iam penitùs exaruit. Alij de piscinibus quibusdam nescio quid nō minùs fabulosè, quàm ridiculè & perinsulsè comminiscuntur. Sunt qui ex hijs duobus *Saxonis* vocabulis (*North & Wich*) simul iunctis, ac si dicas *Aquilonarem vicum*, (talis enim Latino si exprimantur sermone, istorum verborum vis est,) (*Norwicum*) nuncupatam, autument. Hos vt sequar potissimùm (quandoquidem de fluuio nihil constat) inclinat animus.

Hęc in leui collis deiectu posita, & magnitudine, & situs opportunitate, cæteris omnibus Angliæ ciuitatibus (paucis dūtaxat exceptis) lōgè antecellit. Latè patet ab ortu in occasum; hoc est, à mōtis radice, quam flumē alluit ad summū verticē passus ferè mille: vnde sensim crescēdo, in  
maxi.



maximam amplitudinem diffunditur: in longitudinem verò à meridie in Septentrionem mille quingenta passuū & paulò amplius protenditur.

Forma eâdem quæ arcui vehementiùs intento, cùm sagittarius pleno nisu incūbit, iam iam sagittam emissurus, cuiusmodi apud Astronomos signi cœlestis, (cui nomē fecêre *Sagittarij*) arcus est: nisi quòd hic figurâ habet Scythici, ille Britannici: hoc est, non incuruantis mediū, nec extrema tenosue flectentis in aversum. Ad hanc formam ab angulo incipit, & se paulatim hinc ædificiorum latè efferentium tractu, inde murorum arcuato flexu extendit, dilatatque, ad maximam ipsius amplitudinem. Tum sensim se cogit arctatque, ac tandem lateribus ex diuerso propè cœuntibus, alium facit angulum, sed priori ampliorem. Hanc in formam cùm fluminis naturâ, tum manus artificum urbem cogeabant.

Fluvi-

Fluuius etenim ab occasu ex duorū fontium, quasi ad *Wymondhamiam* confluxu profluens, ( quorum alter suprā *Derhamiam*, alter suprā *Attilburgum* æquali ferè semper spatio decurrit, ) mediam urbem partim interluit, partim præterfluit, itaque è ciuitate deuolutus, latus vrbs quod ad solem exorientem spectat lambens, præcingit & alluit. Naturam iuuat ars, & ciuiū sollers industria, qui firmissimo muro urbem circumcinxere, cuius ea ratio est, vt nec ad eius defensionem quicquam munitius, nec ad speciem ornatius cogitari potuerit. Nam & lapide quadrato, siliceque elaborato construxerunt, itaq; crebris pinnarum interuallis, fornicibus, speculis, frequentiq; turri distinxerunt, vt & defensionis opportunitati, & intuentium voluptati cū primis prospexisse videatur. Et certè si non ad vsum ciuium, & peregrè aduentantium commoditatem, plurima porta interrū-

Nn.

pere-



retur, nusquam non perpetuus foret. Nā  
quā urbem deserit flumini coniungitur,  
& paulatim assurgendo per vniuersum  
montis cacumen porrigitur, indeq; sen-  
sim denuò deueexus, amni (qua ex ciuita-  
te ad septentrionem emergit) committi-  
tur. Vnde fit, vt quod fluuius propter lo-  
ci celsitudinem naturali munimento de-  
fendere nequirit, id murus artificum in-  
genio tutissimum reddiderit. Occiden-  
talem enim & præruptissimā vrbis par-  
tem murus, murum fossa præalta, fossam  
agger ambit. Latus Orientē versus mu-  
rū habet nullū, sed profluentem tantū  
qui cum muro sibi (vt antea dixi) qua ex  
ciuitate effluit, commisso, ac in septentri-  
onem ad portas vsq; *Magdalineas* proie-  
cto ita se habet ad reliquam vrbis arcuatę  
formam, vt neruus adductus ad arcum.  
Ergo quia id latus nullū habet artis bene-  
ficio, sed naturę tantū (habet enim  
propter se amnem, propter amnem pra-  
tulum,

tulum , pro anni tempestate viride semper satis & amœnum : nonnunquã tamẽ fluidum & vndosum : quem mons alius asper, & densissima vestitus sylua, indẽ se attollens, atque ex aduerso urbem respectans , suo sinu excipit receptatque , ) quã ergo ( vt dixi ) nullum habet artis præsidium , duo prostant propugnacula, duarum turrium instar erecta, quæ plena foraminibus ad tormenta exercenda affabrè excauatis, & ferreis machinis ad bombardas sustinendas instructa, & vrbi decus, & hosti terrorem inferunt. Horum alterum trans amnem ad vrbis angulum , solido ex lapide in ripa positum : commune & aquæ & terræ patentium , nec debile munimentum est. Et ex hoc transmissas fuisse antiquitùs , in citeriorem ripam ( vt nunc in statione publica fit ) cathenas, & in opposita muri arce receptas , indicio sunt cathenarum reliquiæ , &

Nn.ij. turri-



turrium tùm recipientium, tùm emittentium ruinæ. Periculine ad prohibendum cymbarum aditum: an portorij causa (vt nunc fieri cōsuevit) incertū. Alterum ex aduerso vrbis vmbilico, quā amnis è ciuitate præcipitat, cis fluuiū ex cocto latere cōstructū: ea vrbis loca defendit, quę munimentorum (præterquā amnis ea ex parte vadosi, & præcipitiorum impeditissimorum) expertia, eorum exposita sunt iniurijs, qui ex Oriente vrbi periculum inferre possent.

Ad hunc modum partim natura loci asperi, montosi, iniqui, & syluestris, partim artis & ingenij machinationibus solerter ad defensionem excitatis, vrbs est vndequāq; munitissima, adeò vt hostiū quamlibet numerosam multitudinē (si opus fuerit) facilè ac nullo negotio disicerit.

Atq; quemadmodum situs, lociq; natura multum adfert vrbi roboris ac fir-  
mamenti,

mamenti, ita ingenium, ars, virtus, & industria ciuium plurimum addidēre & opportunitatis ad vtilitatem, & ad delectationem dignitatis & ornamenti. Etenim quamuis nunc ampla sit, nobilis, florens, celebris, & ciuitatum omnium, secundum *Londinum* (vniuersi regni emporium) multo maxima augustissimaq; tamē initia habuit (quemadmodum omnia) vt non vsque quaq; illustria, ita humilia fortassis, quā pleriq; homines arbitrantur: omnino tamen obscura nō ausim appellare. Nō enim Romā florētē (vt vulgō loquuntur) vidit vna dies: nihilq; simul inuentum idem, & perfectū: & abundē clara sunt initia quæ commēdarūnt foelicia incrementa: isque semper dicendus est benē coepisse, qui in instituta ratione rectē processerit. Quō magis laudi dabitur ijs, qui ex initijs humilibus clariora, ex paruis maxima, ex illustribus illustrissima fecēre. Nam cūm



insigni semper apud omnes gloria floru-  
 erunt ij, qui quæ à maioribus tradita sunt  
 conseruantes, ampliora eadem & orna-  
 tiora quàm acceperunt ad posteros trās-  
 miserint: quos & quantos honores tri-  
 buemus ijs, qui magnorum operum ve-  
 luti fundamenta ponentes, quæ pruden-  
 ter inchoarunt, prudentiùs multò per-  
 fectiusque absoluerint. Hæc enim sua  
 sunt: cætera quæ non fecimus ipsi, *vix*  
*ea nostra voco*, vt verissimè cecinit *Oui-*  
*dius*: nec merentur laudem: cùm tali-  
 um virorum industria sempiterna secu-  
 lorum omnium memoria vigeat. Ete-  
 nim vt pleræq; ciuitates (quarum prima  
 fundamēta posita sunt illustria) socordia,  
 inertia, luxu, & ignominia defluxêre, nec  
 virtute aut relligione (firmisimis ad æ-  
 ternitatem præfidijs) circunseptæ sese ex-  
 tulerunt, sed fœdos & perditos exitus ha-  
 bêtes, æterna se sceleris labe & ignominia  
 commacularunt: sic quæ ( minimis pri-  
 mum

mum ac languentibus viribus) ciuium industria tamen, virtute, cōtinentia, modestia, ac frugalitate paulatim auctæ, ad maximas tandem opes, & summum fœlicitatis gradū peruenēre, omnium vocibus & sermone celebrātur. Hinc veteres illi Heroës, *Moses, Cecrops, Cadmus, Romulus*, innumerabilesq; alij (magnarum autores rerū) tantam nominis sui amplitudinem, ad perennem ipsius memoriam, posteritati propagarūnt. Contrā verò *Reboboam, Sardanapalus, Creon, Sylla, Cinna, Nero, Heliogabalus*, omnesq; qui vel morum immanitate, & importuna tyrannide, vel noxijs & impuris libidinibus patriæ vastitatem & exitium intulerunt suæ, æternam sibiipsis, & nullo interituram æuo turpitudinem inflixerunt. Nec iniuria. Illi namque clades & interitus rerum publicarum fuisse, huj authores: illi longis duratura seculis, exiguo temporis momento pessum dedēre,



dedere, hij breui spatio virtute sua multa, ad innumerabilia secula permanfura perere. Respublica ab hijs incoepit, at in illis desijt. Siquidẽ amplitudini quasi vitã dedisse, multò magnificentius est, & ad nominis perpetuitatem gloriosius, quàm acceptam iugulasse. Itaq; si auium in nidis construendis prouidam industriam, si araneolorum in telis texedis subtilem sollertiã, si formicarũ perpetuos in victu parãdo labores, si apũ admirabilẽ in Republica sua administranda diligentiam, (multaq; prætereà, quæ parens natura paruis animalculis inseuit) tantopere admiramur & suspicimus: quid hĩc fieri conuenit? vbi non malleolis aut farmenis nidi, sed ciuitates: non leuiter suspensa ad muscarum interitum & insidias retia, sed leges ad concordia fiunt: vbi non naturæ imperio omnia, sed virtutis arbitrio geruntur: vbi denique non de fauis, aut aluearijs, sed de recta ciuium institutione,

tionem, rerum suarum conseruationem, vita beata disceptatur, & communi omnium salute. Quo quid humano generi utilius excogitari potest? Itaque quemadmodum familiam qui bene instituit, qui instrumento domestico, qui supellectile largè copioseque instruit, qui omnia in ordinem cogit digeritque, qui rem denique familiarem pertenuem, & angustam, amplam facit & magnificam, summo est apud omnes in honore, prudensque paterfamilias & *δίκονομος* perhibetur: sic qui res publicas ad eum modum moderantur atque gubernant, hi non uiui solum inter sapientissimos numerabuntur, sed post mortem etiam admirabili semper laude ac gloria circumfluent. Ergo ne longum faciam, rem paulò altius repetam. *Normici* primordia hæc erant.

*Æneas Anchisæ Venerisque* filius, Troianorum qui capta *Troia* profugerunt dux nobilissimus, cum per *Macedoniam* atque  
 Oo. *Siciliam*



*Siciliam* fedis quærendæ causa deuectus,  
*Laurentem* agrum ( qui locus est *Italiae*,  
 qua parte olim *Latium*, hodiè *Campania*  
 est ) anno ante Christi aduentum mil-  
 lesimo centesimo primo occupasset : ex  
*Lauinia Latini* regis filia , ( quam vxo-  
 rem duxerat ) *Ascanium* filium suscepit.  
 Is dein *Sylvium* , *Sylvius Brutum* pro-  
 creauit. *Brutus* autem vt in insulam  
*Albion* delatus est , ( eius ab origini-  
 bus fusis, se primùm regem insulæ con-  
 stituit , anno ante *Christum* natum mil-  
 lesimo centesimo tricesimo tertio, eamq;  
 ex suo nomine *Britanniam* ( *Albion* vt  
 dixi prius nomen erat ) appellauit : ac  
*Novam Troiam* ( hodiè *Londinum* ) ad  
*Thamesim* fluuium anno ante *Christum*  
 millesimo centesimo condidit. Quid  
 multis? Res *Brytannorum* iam inde pau-  
 latim propagari cœperunt, cùm tamen  
 neque *Norwici*, neque castelli quod in  
 eo visitur, vllum adhuc nomen ( ante  
*Gurgunti*

*Gurgunti Bellini* filij tempora ( qui à *Bruto Britanniam* vigesimus quartus rexit ) exstitisset. Is etenim postquam tributum quod *Bellino* patri , vectigales *Dani* pendere consueuerant, occiso *GutLaco Danorum* rege , anno regni sui sexto , illato genti foedifragæ bello recuperasset, rediensque per *Orchades*, *Hyberniam* prius incultam atque inhabitatam, *Parthalao* , *Cantabroque Hispanorum* ducibus , subditorum astrictam iure , stipendio insuper imposito , hospitij incolendi que causa concessisset : in ea *Brytanniæ* parte quæ ortum solis spectat , ( quam orientalem vocabant incolæ ) loci naturam arci condendæ satis idoneam conspiciens , castelli cuiusdam fundamenta posuit. Quod forma iam quadrata inchoatum, & ex albo lapide in collis excelsi vertice fundatum, ( ad flumen olim *Sydumanum* , nunc *Hierum*

Oo.ij. nuncu-



nuncupatum ) Rex fui vt videtur nominisationem secutus, *Kaier Guntū* (quod Latinè *Gunti castellum* rectè dixeris) appellauit. Sed in rebus humanis vt nihil est perpetuum, ita opere imperfecto auctor fati concessit.

Veruntamen *Guthelinus* ( qui proximus à *Gurguntio* numeratur) rex Græcæ & Latinæ linguæ peritissimus, opus inchoatum perfecit, idque muro, vallo, fossaque duplici circummuniuit. Quarum alteram monti ad eius radices vndique circundedit, alteram ante portam pontemque ita perduxit, vt in semicirculi figuram recuruata, atque ad interioris fossæ diametri ferè fines reducta, vtroque suo cornu cum ea tantum non coiret. Nisi iam vrbis purgamentis (vt aliquot nunc ab annis fieri coëptum est) & sordibus quæ ex ædibus indies exportantur, ciues eam compleuissent. Prætereà ad castellū testudines quasdam subterraneas, longo fornice

fornice, cœcoq; itinere duxit. Dein mutato cum suo *Gurgunti* nomine, *Kaier Guthelin* (quasi *Guthelini* castellum) Britannica voce loco nomen fecit.

Atq; ita re nomineq; integra ad multos annos arx permansit, nulla memoria digna (quæ scriptorum monumentis cōprehenſa eſt) acceſſione facta, niſi quòd *Julius Cæſar* omnium ferè gentiũ victor, quadraginta (vt fama eſt) ante *Chriſtum* natum annos, multa circà caſtellum ædificia exſtruxerit.

Veruntamen poſtea res Norwiciſes creſcere indies, atq; illuſtiores fieri cœperũt. Annus is fuit à partu virginis quadringentefimus, quadageſimus nonus, cùm *Vortigerus* Gerſeorum rex, Brytanniæ quoq; regnum per vim ac nefas occupauiffet. Is etenim vt quod immani nequitia, adeptus eſſet imperium firmiori tueretur præſidio, gentem Saxonum ſcleris ſibi ſociam aſciuit, quæ ducibus

Oo.iiij.

*Hengiſto*



*Hengisto* atq; *Horso* maximis copijs sese in *Brytanniam* infudit. Tenuère tum ad orientem maximam insulæ partem *Picti Scotiq;* (gens aspera & multū in sanguine & cæde versata) post hos *Anglosaxones*, dein *Dani*: tum *Normanni*: ultimò *Belgæ*: sed *Pictis* atq; *Danis* prorsus deletis, ad nostra vsq; tempora habitatum est in *Albania* à *Scotis*, in *Cæbria* à *Brytannis*, in *Saxonia* Orientali, Occidentali, Meridionali, & inter utrāq; media, à *Saxonibus*, à *Belgis* verò per vniuersam insulam cū *Normānis* mistim, tū præcipuè in *Wallia* occidentali. Inito igitur cū *Scotis*, *Pictisq;* contrà *Britannos* foedere, *Horsoq;* in bello quod cōtra *Aureliū Ambrosiū* gessit, interemto, superstes fratri *Hengistus*, homo feritate incredibili præditus, & bonitatis cœli soliꝑ; nō ignarus, regionisq; occupandę percupidus, quò facilius omnē *Britanniā* domesticis percussā dissidijs inuaderet, *Ibittos* (*Iutas* nōnulli: alij *Vitas* appellāt)

pellāt) gētē eius partis *Germania* quę hodiē *Alemania* dicitur, *Anglosq;* qui *Anglię* regionem inter *Saxones* & *Ibittos* positā incolebāt, huius fecit sui consilij crudelissimi participes. Quę barbara lues breui temporis interuallo, ita se per omnes regni partes diffudit, vt cūctis rebus immani rabie deuastatis, *Britannorumq;* viribus post longa bellorum incommoda fractis atq; contusis, vniuersa pænē regio in eorum ditionem concesserit.

*Ibitti* etenim *Cantium* occuparunt: *Saxones* prouincias quas nunc nostri *Westsexiam*, *Estsexiam*, *Sudsexiam*, & *Middlesexiam* nuncupant: *Anglosaxones* autem *Brytanniam* Orientalem, eam quę hodiē *Northfolcię*, *Suthfolcię*, & *Cantebrigię* comitatus continet.

Nec dum nouem expletis annis *Ibitti*, anno Domini. 457. suo *Cantio* regē pręfecerunt, & post hos (annis videlicet viginti quatuor ab illo tēpore elapsis, *Angli* quoque



quoque, suæ *Britanniæ* orientali suum.

Exin nouus rex *Guthelini* castellum sedem regiæ capit, Angliq̃ue circum arcem ædificare, ibiq̃ue deindè habitare, & piscibus capiendis operam nauare cœperunt. Tum ex insigniore duce *Noro*, (cuius auspicijs in *Britanniam* venerāt) natūraque loci piscatorij qui eorum lingua *Wices* dicebatur) *Normici* loco nomen dedêre, falsa quidem inueterata tamen opinio) castrumq̃ue *Burbeſtrum* nuncupauêre.

Ex hijs principijs tanta *Normicus* deindè incrementa cœpit, atque eô magnitudinis longo tandem interuallo deuenit, vt totius *Britanniæ* orientalis vrbs pulcherrima, florentissima, potentissimaque facilè existeret. Etenim imbecilla primum, & quasi in cunis vagiens, reges habuit illustrissimos, & insigni præditos prudentia pontifices: infantia (vt ita dicam) alumnos suæ, quorum admirabili bonitate

bonitate alta indies, & educata fuit, donec postmodum corroborata iam ætate, ciuium industria exculta, & ornata, eam adepta est (qua nunc quoq; fruitur) plenam opulētæ dignitatis senectutem. Tales namque habet magistratus annuos, quales hodiè Londinenses habēt, & numero, & dignitate pænè pares, eosdem ritus, eundem in muneribus delegandis ordinem, eandem Prætorij iuris descriptionem, ac viuendi disciplinam. Quamobrem vrbs est tum natura, situ, & ædificiorum pulchritudine apprimè nobilis, tum rebus ijs omnibus, quibus abundare solent benè moratæ ac constitutæ ciuitates, instructissima.

Atque vt opibus creuit, ita religione claruit, iam indè à *Sigeberto Orientalis Britannia Rege*, sub quo Christi fidem suscepit. Is enim interea dum in *Gallia* exulabat, (inita cum *Fælice* quodā *Burgundo* amicitia) mortuo iam *Corpuwallo* in  
 Pp. Angli-



Angliam reuersus, *Angliæ* orientalis (ibi enim habitabat) regno est potitus, *Fælicem*que principatus sui præfulem constituit. Qui dein suos ad *Christi* fidem conuertit, ac *Donuoky*, *Donmycum* nonnulli appellant, (ciuitas propter mare in orientali *Southfolciæ* parte posita, hodie *Fylchestown* dicitur) sedem habuit. Sunt tamen qui putant antè *Fælicem* *Angliæ* orientalis episcopos fuisse, qui *Sohami* iuxta stagnum *Eliensis* oppidi cōsederint. Vt-  
cunq; fuit (quis enim rem tam veterem pro certo affirmet?) constat certè hunc *Fælicem* postquam prouinciæ *Norwicēsi* & *Southfolcensi*, annos decem & septem præfuiisset, extremum obiisse diem, atque *Donmyci* sepultum. A cuius morte in episcopatum surrogati sunt *Thomas* quidam *Fælicis* Diaconus, ex *Giruiorum* prouincia oriundus qui quinque annos *Ecclesiam* rexit: & post hunc *Bonifacius*, qui totidem annos, quot *Fælix* vtri-  
usque

usque Ecclesiæ gubernacula tenuit. Post Bonifacium autem *Bysus*: sed *Byso* mortuo, duo eidem prouincię præsules præficebantur. Quorum alteri *Donwocy*, alteri *Elmhamiæ* sedes erat: Horum omnium nomina prout quisque munus pontificium obierat, ordine subsequuntur.

*Elmhamenses Episcopi.**Domwycenses.*

<i>Beadwynus primus.</i>	<i>Acceius primus.</i>
<i>Northbertus. 2.</i>	<i>Astwolfus. 2.</i>
<i>Headeulacus. 3.</i>	<i>Aerdredus. 3.</i>
<i>Neathilferethus. 4.</i>	<i>Cuthwynus. 4.</i>
<i>Eanferethus. 5.</i>	<i>Aldberthus. 5.</i>
<i>Athelwolfus. 6.</i>	<i>Eglasus. 6.</i>
<i>Alcharus. 7.</i>	<i>Heardredus. 7.</i>
<i>Sybba. 8.</i>	<i>Aelphunus. 8.</i>
<i>Humferthus. 9.</i>	<i>Tydfferthus. 9.</i>
<i>Humbyrctus. 10.</i>	<i>Weremundus. 10.</i>
<i>Weremundus. 11.</i>	<i>Wylredus. 11.</i>
<i>Wylredus. 12.</i>	



Totidem erant à *Biso* vtriusque sedis Episcopi, quorum res gestę vetustate oblitteratę iam penitus euanuerunt. Nec mutata multum harum rerum conditio fuit, donec ad tempora *Humberti Elmhamsensis*, & *Wylredi Donwycensis* episcopi peruentum est. Horum enim ætas incidit in perturbationem ecclesiasticę discipline, regnantibus *Ludicano*, & *Egberto Merciorum*, & *Westfaxonum* regibus. Ab *Ludicano* enim afflicta Ecclesia, rebusque pontificijs vehementer perculsis, ad vnum denuo presulem episcopalis dignitas deuoluta est. Quam primum *Atthulfus* suscepit, ac sub *Edwyno* rege *Elhami* consedit. Huic successi sunt hi quorum nomina consequuntur.

*Alfridus*. 2.

*Theodredus*. 3.

*Theodredus*. 4.

*Atbelstanus*. 5.

*Algarus*. 6.

*Alwynus*. 7.

*Alfricus*. 8.

*Alyfreicus*. 9.

Cui defuncto, *Stigādus* successit, ascitus

in

in Pontificatum, & statim eiectus. Con-  
simili clade de sede pōtifica decidit *Grin-*  
*sbefalus*, honore ac fortunis exclusus am-  
plissimis. Hunc etenim postquā com-  
pertum esset aditū sibi ad eum quem ad-  
eptus est honorem mercede ac pretio pa-  
tescisse, denuò deturbarūnt, & *Stigandū*  
rursus in episcopali cathedra locarūnt.

*Stigando Ægelmarus* eiusdem *Stigandi*  
frater successit: atque hij omnes ad *Guli-*  
*elmi Normanni* tempora *Elmhamy* con-  
sedērunt. Huius tempore anno Domi-  
ni millesimo tertio, ciuitas *Norwicen-*  
*sis* subitis ignibus deflagrauit: qui casunē  
urbem inuaserint, an eos nefarij ciues clā-  
destino scelere tectis intulerint, incertū.

*Ægelmaro* episcopo *Gulielmus* rex facel-  
lanum suum *Arfastum* substituit: qui ex  
cōsiliij sententia sedem episcopalem *Elm-*  
*bamo Thetfordiam* transtulit. Vbi is so-  
lus, ac qui illi surrogatur, *Gulielmus Gat-*  
*fagus* confedēre.



Proximus ab hijs *Gulielmus Herbertus*, pontificiæ dignitatis gradus conscendit, vir sanè illustris, ac (vt illa ferebant tempora) insigni eruditione præditus.

Veruntamen priusquam vltèrius progredior, hoc in loco, tacitis quorundam hominum reprehensionibus occurrendum mihi existimaui. Neq; enim defuturos quosdam suspicor, qui cùm ea quæ à me optimum in finem describuntur, (vt est talium virorum captus) inuidiosissimè detorserint, iniquum meis scriptis vel inscitæ, vel superstitionis crimen imponent.

Quid tu mihi (inquiet aliquis) hos *Beadwynos*, *Northbertos*, *Accios*, *Tydfert hos*, *Astwolfos*, *Weremundos*, & id genus alios, quisquillas veriùs quàm pontifices commemoras? quos aut nunquàm natos sanè oportebat, aut sempiterna obliuione sepultos? Enimuerò horum hominum proteruam insolentiam satis  
demi-

demirari nequeo, qui ardentibus inanīs  
gloriæ flammis perusti, vsque adeo se-  
metipfos diligunt, ac magnificè circum-  
spiciunt, vt ea solū scribi debere arbi-  
trentur, quæ illorum aures nescio qua  
inani ac futili delectatione permulce-  
ant. Nolumus (inquiunt) talia litera-  
rum monumentis prodi: Nolumus *Ro-  
manos* sacerdotes, templa, sacra, cære-  
monias audire: Nolumus denique ab-  
olitam illam iam pænè papisticæ tyran-  
nidis memoriam cuiusquā scriptis red-  
integrari. Cur quæso? Nimirū quia  
tempora illa impietatis, errorum, &  
ignorantiæ plenissima, immani vndi-  
que superstitione redundarūnt. Quasi  
verò nos istuc aut ignoremus, aut oc-  
cultemus, aut quouis modo oratione  
nostra illorum impuritati suffragemur.  
At fuerunt plerique omnes illius ætatis  
pontifices impij, crudeles, auari, indocti,  
& (quod caput est) papistę: Esto, fuerint:  
(quamuis



(quamuis hoc quoq; infitiri certè licebit) sed fuerint tamen improbi, fuerint sacrilegi, fuerint spurcissimis superstitionibus polluti, fuerint deniq; flagitiorum omnium vitiorumque antistites. Quid tum? Nōne ideò illorum exemplis alij à consimili scelere & nequitia deterrebuntur? Quid? hac duntaxat vna superstitionis lue, & superioris seculi labe excepta, an non multi exstiterunt præsules eruditionis laude alioquin insignes, virtute præstantes, vitæ disciplina admirabiles, tamen & horum filebitur?

Iam verò illud cuius est, nō dicam stultitiæ sed amētiae? arrogantiae, importunitatiq; tuæ, nescio quod cōscientiæ vulnus, ac superstitionis pestem prætexere, perinde ac si mētis castimoniam talium voluminum lectione coinquines. Itanē verò? *Herodotum, Thucididem, Cæsarem, Titum Liuium*, cū legimus, & veterū seu Romanorum, seu Græcorum res gestas remi-

reminiscimur, quos ad virtutem stimulos  
sentimus? quo inflammamur ardore?  
quanta denique suauitate perfundimur?  
& adeò ingrati erimus, nostros vt infra  
Ethnicos amandandos putemus? Quid?  
*Sacra Veneris, Orgia Bacchi, Solēnia ma-*  
*tris Berecynthæ, Iunonis, Dictinnæ, Flo-*  
*ralia, Eleusina, Saturnalia,* cū audimus  
quotidiē, legimus, manibus ferē atque o-  
culis vsurpamus, nonnē singulari odio  
& detestatione sceleris tam horrendi in-  
ardescimus? & nostrorum hominum ve-  
tusta volumina, ritus, mores, cērimonias  
perscrutantes, periculum erit, ne consci-  
entiæ nostræ illarum sordium cōtagione  
respersæ violentur? Quid? Poetæ? nonnē  
in istarum rerum descriptionibus crebri  
sunt ac frequentes? quis tamen vnquam  
illorū carminibus relligionem suam la-  
befactari sensit, aut mentem perfidię ma-  
culis contaminari? Tres illi *Marci Tullij*  
*Ciceronis* de natura Deorū libri, omnibus

Qq.

verbo-



verborum ac sententiarum floribus conspersi: ecquos recordari possumus, quorum ex animis aureum illud orationis flumen diuini numinis cognitionem eluerit? *Augustinus* ipse, qui horum omnium sacrilegiorum portenta vno volumine complexus est, ecquem illius oratio, gentium spurcissimis ritibus implicuit? Veteres illi Christianæ Ecclesiæ antesignani, ac martyres gloriosissimi, *Tertullianus*, *Cyprianus*, *Cyrillus*, *Arnobius*, *Lactantius*, innumerabilesque alij, quanta eloquentia, arte, ingenio, copia, horum cultus, sacra, cæremónias, mores, inuenta, institutaque persecuti sunt, cum tamen in omni pænè seculorum memoria ne vnus quidem vnquam inuentus fuerit, cuius animum illorum scripta deprauauerint? Pleni sunt omnium philosophorum libri, talibus ineptijs, annales vetusti, & antiquorum scriptorum monumenta huiusmodi fabulis

ac monstrosi referti, qui tamen ubique  
absque periculo, incredibili certè cum  
legentium voluptate, teruntur, legun-  
tur, ediscuntur. Nec tamen adhuc  
quisquam existit adeò sceleratus & ex-  
cors, qui ex horum voluminibus virus  
aliquod superstitionis exfluxerit, aut tam  
impuræ religionis guttula in aliquam in-  
animum suum illabi siuerit, sed eò ma-  
gis ab illorum diris sacris, ac nefandis  
mysteriorum deliramentis abhorruerit.  
Ergo in horum libris euoluendis castius  
versabimur quàm in nostris? & ab illis  
nihil damni metuentes, perniciem, ab  
his & conscientiae pestem perhorresci-  
mus? Equidem ea semper mente fui, ut  
istius sententiae homines, aut bonorum stu-  
dijs aperte inimicos & infensos existima-  
rem, aut papistarum sceleribus occultè &  
insidiosè prauaricari. Nam qui ista ferre  
nequeunt, nescio ob quam putidam & de-  
licatam curiosae mentis puritatem, quam

Q q.ij. stulti-



stultitiæ suæ prætendunt, superbas medi-  
us Fidius aures habent, & morbo quo-  
dam mentis ac iudiciij quo laborant, po-  
pularium scripta fastidientes, ingenij sui  
vanitatem, & cordis virulentiam depro-  
munt. Qui autem omninò tanquam in  
obscuritatis cœno, iacere veterum mo-  
numenta volunt, neque ex occultis ea te-  
nebris in lucem vindicari, non tam relli-  
gionis amore id exoptāt quidem, (quàm  
fortassis funditùs deletam & extinctam  
cupiunt) quam impuritatum conscien-  
tia, quas sempiternis silentij latebris atq;  
integumentis inuoluere conātur. Vterq;  
fanè & cœlo solem, & nocti diem inui-  
dent: & manifesta mentis deprauatæ in-  
dicia dantes, insignem sibi vel perfidiæ,  
vel inuidiæ notam inurunt, dū ea obrue-  
re & opprimere nituntur, quæ cognita  
cunctis summam importabunt salutem,  
Sathanæque atq; Antechristi insidijs atq;  
sceleribus detectis, gloriam Dei optimi  
maximi

maximi mirificè illustrabunt.

Quapropter hoc maneat semper, ac fixum sit: harum rerū lectionem, vt multis iucundam, ita nemini in utilem futuram: solosq; eos pollui ac commaculari, qui picem impietatis tetigerint, id est qui vel praua voluntatis consensione papisticis fecibus sese foedarint, vel maleuolentia & inuidia cæcati, mentis oculos, & ingenij lumen amiserint.

Neq; verò velim quisquā me arbitretur hoc in loco, vel hominibus, vel illorū temporum relligioni, seu potius superstitionissimis sacris quicquam honoris imperiri. Nō me latet quā coeca & horribilis nox, illa ætate orbem terrarum opprimeret, quāque crassis obducta & circumfusa tenebris, ipsa veritas, ac relligio Christiana iaceret. Verū si in tanta ac tam illustri Euangelij luce qua hodie Dei benignitate circūfundimur, horum hominū sanctimoniam, vel si mauis super-

Qq.iiij.

stitio-



stitutionem intuentes, illorum exemplo ad virtutem inflammemur, ecquis iure reprehenderit?

Sint igitur ista nobis semper ad imitandum proposita, eoque simus animo, ut si quæ temporum illorum antistites pietatis monumenta ad posteros transmiserint, ea nos non hominum voluntate, sed naturæ regula, & rei ipsius magnitudine metiamur. Parum etenim iam nostrâ interest, quo consilia sua direxerint, quemque sibi benè aut secùs agendi finem proposuerint, dummodò illorum pro sua conscelerata relligione suscepti labores, mentes nostras ad virtutem & sanctitatem exacuant. Nihil enim nobis oberit, clarorum hominum exemplis, ad pietatis officia incitari, si in virtutis studio defixi, actiones nostras omnes sensusque, ad fratrum utilitatem, & Christi gloriam conferamus. Proin scelus omne, impietatemque;  
ac

ac superstitionem ex animo execremur,  
talium verò factorum memoriam, sum-  
ma semper beneuolentia prosequamur.  
Verùm vteò vnde egressa est, denuò se  
referat oratio.

Fuit igitur *Herebertus* iste (de quo  
anteà diximus) *Oxonij* natus, & *Ro-  
berti* cuiusdam de *Losinga*, *VVintoni-  
ensis* Abbatis filius, quem *Fiscani* tum  
*Normanniae* Monasterio præpositum  
(Priorem vulgò nuncupant) *Guliel-  
mus Rufus* in *Angliam* acciuit. Cui  
cùm in aula versaretur assiduus, om-  
nibus in rebus ita se probauit, vt & il-  
lum Rex non solùm magnoperè dili-  
geret, sed & præmijs etiam cumlaret  
amplissimis. Vnde factum est, vt infrà  
triennium tantos nummorum aceruos  
construxerit, vt & sibi pontificatum (di-  
citur enim sedem suam à *Gulielmo Rufo*  
1900. libris obtinuisse) & patri cœno-  
bium turpissimo mercatu coëmerit.

Cuius



Cuius execrandæ Symoniæ labem ac maculas multi scriptis suis ambitiosissimo præfuli sempiternas asperferunt, & eius delicti causa, eam quam mox dicam templorum exstruendorum necessitatem ad tanti facinoris poenam à Papa *Paschali* inflictam, monumentis perscriptum veteribus reliquerunt.

Illud certè cōstat, fuisse eum cæteroqui virum (vt temporibus illis) pereruditū, & haud vulgari doctrina excultū. Quò magis miror, quænam ratio ipsum ad hanc tantam turpitudinem impulerit, vt cum artibus se instruxisset optimis, quæ semper hominibus ad decus & dignitatem præsidio esse cōsueuerūt, nihilominus tamen aditū sibi ad eam quā animo cōplexus est amplitudinē, tam immani flagitio munierit. Enimuerò illius inexplēbile vt ita dicā pecunię sitim, ac insaturabilē ambitionis ingluviē *Gulielmus Malmsberius* huiuscemodi verbis perstrinxit.

*Tres*

*Tres sunt in Anglia Episcopatus, qui ex antiquis sedibus in alias transferunt. VVellensis, per Iohannem in Bathoniam, Cestrensis per Robertum in Couentreiam, Thetfordensis per Herbertum in Norwicum. Omnes nummorum maleficio, omnes venalitatis ambitu, ac sacrilegio. Deniq̃ ut primū de postremo dicam, Herebertus cognomento Losinga, quod ei ars adulationis impeggerat, ex Abbate Ramsey emit Episcopatum Thetfordensem, patre suo Roberto eiusdem cognominis in Abbathiam VVintoniæ intruso. Fuit ergo vir ille magnus symoniæ fomes in Anglia, Abbathiam Episcopatumq̃ nummis aucupatus, pecunia scilicet regiam sollicitudinem inuiscans, & principum fauori promissiones nō leues assibilans. Vnde quidem egregiè tunc temporis versificans, sic ait:*

*Surgit in Ecclesia monstrū, genitore Losinga,  
(Symonidū secta Canonū virtute resecta)  
Petre nimis tardas, nā Symon ad ardua tētat.*

Rr.

Si



*Si præsens esses non Symon ad alta volaret.  
 (Proh dolor) ecclesiæ nūmis vendūtur & ære:  
 Filius est præsul: pater abbas: Symon vterq;  
 Quid non speremus si nummos possideamus?  
 Omnia nūmus habet: quod vult facit: addit, &  
 aufert.*

*Res nimis iniusta nummis fit præsul & Abba.*

En qualis in iuuentute exstiterit, videamus nunc vicissim quemadmodū seni hęc tam immensæ gloriæ atq; pecuniæ cupiditates deferuerint, atq; id ipsum quoque eiusdē *Gulielmi* testimonio comprobeamus. Eodem igitur in loco institutā narrationem hunc in modum persequitur.

*Veruntamen erroneum impetum iuuentutis aboleuit pœnitentia, Romam profectus senioribus annis, vbi loci dalmaticam, & baculum & annulum deponens, indulgētiā clementissimæ sedis iterum recipere meruit. Quod Romani sanctiūs & ordinatiūs obseruāt, vt Ecclesiarum omnium sumptus suis potiūs marsupijs inseruiant, quàm quorumlibet*

bet regū vsibus militet. Itaq; Herbertus domū reuersus, sedē episcopale quæ quōdā fuit in Helmhā, & tūc erat apud Thetford ad insignem mercimonijs & populorū frequentia vicum transtulit nomine Norwycum. Ibi monachorū congregationem numero, & religione percelebrē instituit, omnia eis necessaria ex nūmis mercatus domesticis. Prouidens suorū successorū querelæ nullos de episcopatu terras monachis largitus est, ne illi Domini famulos fraudarent victualibus, si quid donatū offendissent, quod suis cōpeteret rebus. Prætereā apud Thetford monachos Cluniacenses instituit, quod sint illius cœnobij professores ubiq; penē gētium dispersi, locupletes in seculo, & splēdidissimæ religionis in Deo. Ingēti ergo & numerosa virtutū gratia præteritarū offensarū molē obumbravit, disertudinis et litterarū copia, nec minus secularū rerū peritia ratione quoq; celsitudinis suspiciendus. Fuitq; Herbertus mutatus vt Lucanus de Curione dixit momētū &

Rr.ij.

mutatio

12



*mutatio rerum sicut tempore istius regis symoniae caufidicus, ita posterius propulsator inuidus, nec ab alijs fieri voluit, quod à se præsumptum iuuenili feruore indoluit, prae se semper (ut aiunt) ferens Hieronimi dictum, Errauimus iuuenes, emendemus senes. Postremò, quis in illius facti laudem dignè pergat, quod tam nobile monasterium Episcopus multum pecuniosus fecit, in quo nihil frustra, deside, vel in ædificiorum sublimium specie, vel in ornamentorum pulchritudine, vel in Monachorum religione, & sedula ad omnes caritate. Hunc & viuum spe fœlici palpabant, & defunctum (si non vana fides pœnitentiæ) super æthera tulerunt. Hæc ille.*

Sedenim ô verè miseram illorum temporum conditionem, cum diuini numinis ignoratio cuncta densissimis erroribus obsepsisset, cum homines non vitæ integritas, sed turpitudine summa & indignita: non pietatis ardor, sed ambitionis flammæ: nō sacrarum rerum scientia, sed sceleratissimæ

lestissimæ libidines, ad ecclesiasticas dignitates eueherent. Quantò nos fœliciori fortuna nati sumus, qui Dei benignitate ex hoc superstitionis veluti orco, ad cœlum & vitam æternam emerimus. Alia siquidem iam nostræ Ecclesiæ species & dignitas, alia Romanæ, alia Christianorū ratio alia Papistarum, non idem religionis splendor, impietatisque tenebræ: lux denique longè alia est Euangelij, & lych-norum, quibus illorum tenebricosissima templa collucent. Iam verò illud cuius tãdem stupiditatis ac dementiæ fuit, quòd cùm iuuenis tam diris se flagitijs dedecorasset, decursa iam propè ætate, non ad Christum (vnicum æternæ salutis fontem) sed *Romam*, ad lutulentas impuri pontificis lacunas cōfugeret. Qua profectio tātum abest vt illius facinoris dedecus deleuerit, vt ad symoniæ potiùs infamiam (meo iudicio) perfidiæ quoque scelus adiunxerit.

Rr.iiij.

Vt-



Vt cunq; se res habet domum reuersus, extremis pænè ætatis temporibus ita vixisse dicitur, vt tum Regi charus, tum iucundus omnibus esset. Etenim postea episcopatus sui munere magna cum laude perfunctus, & sibi metipsi perennem gloriam conflauit, & posteros consimili virtutis ardore flagrantibus, exemplo suo non mediocriter ad studia pietatis incendit. Nam cum *Romæ* (vti supràmemorauimus) beneficio Papæ, eam esset, quam opinionis errore sibi cōfinxerat peccatorum impunitatem consecutus, omnesque symoniæ sordes, in cœnoissimis Romanæ curiæ puteis abluisset, nihil post reditum in *Angliam* priùs, neque antiquiùs habuit, quàm vt eam pecuniam quam iuuenis rapinis coaceruauerat, senex, in sacris ædibus construendis collocaret. Ac primùm non ferens vagæ pro hominum arbitrio sedis molestiam, certum aliquem locum, ac  
veluti

veluti domicilium episcopali dignitati  
cōstituere decreuit. Et quoniam eo tem-  
pore *Normycus* ciuitas esset Orientali-  
um omnium, & ad aspectum pulcherri-  
ma, & ad vitæ necessitatē instructissima,  
idcirco vrbs ea maximè præ cæteris op-  
portuna visa est, quæ & pontificij splen-  
doris amplitudinem, & tantę sedis digni-  
tatem sustineret. Quod cum ciues om-  
nes libentissimis excepissent animis, Re-  
gesq; *Gulielmus*, & *Henricus* primus, Pa-  
paq; *Paschalis* (vti temporibus illis fieri  
consuevit) diplomatibus suis confirma-  
sent: omni cogitatione in curam ecclesia-  
stici muneris incumbendū sibi existima-  
uit. Itaq; primū ædē Cathedralem suis  
impensis exstruendam locauit, areamq;  
pulchrā coēmit (locū quem veteres *Com-  
holme* appellarūt) inibiq; tēplū augustis-  
simū, & monachorū domus exēdificauit.  
Cuius fūdamēti lapidē primū ipse suis ie-  
cisse manibus dicitur, paucisq; maiusculis  
litteris



litteris lapide incis, eius rei memoriam posteris sempiternam tradidisse. Eæ autē erant huiusmodi. *HUNC PRIMVM HVIVS TEMPLI LAPIDEM DOMINVS HERBERTVS POSVIT: IN NOMINE PATRIS, ET FILII, ET SPIRITVS SANCTI. Amen.* Dein templum Sanctæ Trinitati dedicavit, locupletissimiq; prædijs donavit, adeo vt agrorū fructus quos quotannis perciperent, sexaginta monachis, atque amplius alendis sufficerent. Tum libris, omniq; sacra supellectile instruxit, breuique effecit, vt nihil nec ad Monachorum vsum, nec ad tanti templi splendorem maiestatemq; deesset.

Hanc tantam publicæ utilitatis curam, excepit haud minor domesticę dignitatis cogitatio. Itaq; ex Aquilonari parte Ecclesiæ palatium ipse sibi construxit: quod prudens à monachorum cellulis secre-

uisse

uisse dicitur, ne crebrò hominum huc & illuc discurrentium tumultu, illorum solitariae mentes à coelestibus rebus cōtemplandis abstraherentur.

Quinque insuper fana exstruxit, quorum vnum sancto *Leonardo* consecrauit, idque in summo colle cathedrali ecclesie aduersum, (interiecto flumine) constituit. Alterum *Norwyci*, *Elmbami* tertium, quartum *Lhynni*, quintum ad ostium *Gerni* fluminis. Ea fana perpetuò Monachorum potestati subiecit, quosdamque ex eo coetu ac numero semper esse voluit, qui votis concipiendis alternatim vacantes, Romanos ritus ceremoniasque indies obirent.

Fertur etiam *Thetfordiae* Monachos Cluniacenses instituisse, multaq; alia designasse, quibus plebis imperitę animi (vt illa fuerunt secula) rudes, superstitionū laqueis implicarentur.

*HÆC* à me eò referuntur, non quòd

Sf.

illa



illa probem : (Quis enim tantā impietatem nō aspernetur & oderit?) Sed vt nostri homines horum in Romanis sacris ac ritibus asciscendis sollicitam industriam contemplant, illorumq; exemplis excitati, ad Dei optimi maximi amorem, & veræ pietatis cultū flagratiū exardescāt. Etenim cū homines anili superstitione, & in expiabili fraude cōstrictos, eo diuini numinis metus impulerit, vt maximas facultates in res peruersas ac impias profundere non dubitarint : quo nos tādē animo esse debemus, qui dispulsa erroris nube, cœlesti disciplinæ solē dispicimus? Quapropter quemadmodum hij in templis construendis, & sacrificulorum cœtibus conflandis, nullo neq; labori, neque sumtui pepercerint : sic nos vicissim miserorū hominum inopiam egestatemq; subleuemus : & nuda Christi membra mœrore ac luctu perculsa, māsuetudine ac misericordia (vt par est) cōplectamur.

Huius

Huius pontificis tempore (anno Domini millesimo centesimo duodecimo) pestis magna omnium ferè ciuiũ domus peruagata, multos mortales absumsit.

Obijt. a. d. XI. Kal. August. m. regnãte *Henrico* primo, atq; *Norwici* in ecclesia cathedrali ad altare summũ sepultus est.

Defuncto *Hereberto*, successit *Euorardus* Archidiaconus *Sarisbyriæ*, qui cõsecratus fuit à *Rodolpho* Archiepiscopo Cantuariensi, anno Domini millesimo, centesimo, vicesimo primo. Sed iniuria temporis factum est, vt huius pontificis memoria, abolita pænè vetustate, perierit. Nam cùm annos viginti nouem Episcopatu præfuiſſet, perfecit eadem quæ omnia delet vetustas, vt nulla eius ingenij monumenta mandata litteris, nullũ opus otij, nullum dignitatis munus ad pietatis gloriam exsistat.

Hoc tantum in pontificijs cõmentariolis perſcriptũ reperitur, quod cùm totidẽ

Sf. ij.

quot



quot antea diximus annos orientalem rexisset ecclesiam, regnante *Stephano*, idibus Octobris vitam cum morte commutauerit.

Hunc consecutus est *Gulielmus* cognomento *Turbus*, genere *Normannus*, & ineunte ætate Noruicensis Monachus, post Prior, demum à conuentu (sic enim religiosorum coetum & frequentiam nuncupant) electus Episcopus, atque à *Theobaldo* Archiepiscopo Cantuariensi consecratus. Huius tempore combusta fuit ecclesia Norwicensis. Obijt anno pontificatus sui vicesimo quinto, & a.d. XVI. Calend. Feb.

Huic successit *Iohannes* primus (dictus *Oxonienſis*) anno Domini millesimo, centesimo septuagesimo. Hic inceptam prius, & inchoatam ab *Hereberto* Ecclesiam perpoliuit, & infirmorum hospitia exedificauit. Templum prætereà Trinitatis *Gipwyci* exstruxit, & ædes quamplurimas

mas incendio consumtas, restaurauit. Mortuus est anno pontificatus sui vicesimo sexto, quarto nonas Iunij, & sepultus est ante altare summū cum *Hereberto* & *Gulielmo*, anno Domini millesimo, ducentesimo: & regis *Iohannis* secundo. Huius tempore (anno ab humano genere redempto suprā millesimum, centesimū, septuagesimo primo) *Norwic* templum sanctæ Trinitatis igne fortuito incensum, denuò deflagrauit.

Huic suffectus est *Iohannes* de *Grey*, vir illustris & eximius, Reipublicæ administrandæ, ac Iuri interpretando) Iusticiarius vulgò nuncupatur) à rege præfectus. Hic in omni vita eam adhibuit, sanctitatem, religionem, prudentiam, & in legibus æquitate explicandis integritatem, ac fidem, vt illum Rex ad Archiepiscopatū Cantuariensem (tanquam ad summum honoris culmē) euehere decreuerit. Sed immatura mors desponsam iam, & de-



stinatam præfui amplissimo dignitatem præripuit. Aulam & omnem illam (quæ hodiè *Gaymodiæ* visitur) molē exstruxit. Obijt anno pontificatus decimo quarto, & a.d. Kal. Nouemb. sepultus *Norwici*. Post hunc autem ab Episcopo per septēnium vacua fuit pontificia sedes.

Quo temporis spatio decurso, *Radulphus* (quem alij quoque *Pandulphum* appellant) episcopi Romani legatus, *Norwicensis* Præsul factus est. Hic à conuentu electus: *Romæ* ab *Honorio* insignia pontificia suscepit: anno Domini millesimo, ducentesimo, vicesimo secundo: & Regis *Henrici* tertij, sexto.

Multa monachis dedisse fertur, ac insigni semper sapientiæ laude floruisse. Verum nomen eius, nec præstās naturæ bonitas, nec tanta ingenij magnitudo, ab interitu vindicare potuerunt. Namque factorū famam vetustas ita afflixit, vt funditus illorum omnium memoriam peruertere-

uerterit. Obijt anno Episcopatus sui quinto. a. d. XVI. Kal. Septemb. A cuius morte Pontificia sedes, annos tres absque Episcopo permansit.

In qua tandem (vt nonnulli volūt: quidam enim huius nullam omninò mentionem faciunt) *Thomas de Blondeuilla* à *Stephano* Archiepiscopo Cātuariensi cōstitutus est: qui quoque cū per decennium eo munere perfunctus esset, ex vita migrasse dicitur, anno Domini millesimo, ducentesimo, tricesimo sexto.

Triennio exacto (totidem enim annos prouincia sine Episcopo fuisse perhibetur) *Gulielmus de Ragble* ecclesię gubernacula suscepit: anno Domini. 1239. In qua cū Regi specimen pietatis ac prudentiæ suæ dedisset, tertio pontificatus anno Rex eum *Wintoniensi* ornauit Episcopatu.

Vnde factū est, vt *Gualtherus de Suthfield* illi (haud dum defūcto) succederet:

vir



vir totius diuini ac humani iuris peritissimus. Hic Hospitale (vt appellant) *Ægidij Norwici* construxit, & possessionibus ditauit amplissimis. Insuper sacellum Beatæ virginis in Ecclesia Cathedrali ædificauit: vbi postea sepultus fuit, anno pontificatus sui decimo tertio: a.d. XV. Kalend. Iunij, & anno regis *Henrici* tertij quadragesimo primo.

Nec ita multò post *Symon* de *Wanton* Regis *Henrici* sacellanus, & iudiciorum ac iuris publici interpres summus (vulgò Iusticiarium appellant) episcopalem dignitatem consecutus est. Sed vt omnia humana fatali quodam temporis impulsu, ruunt & concidunt: sic huius res gestas, ætas labefactauit omnes atque peruertit. Igitur cùm annos octo Ecclesiæ præsedisset, ex hac misera & caduca vita migravit, corpusque *Norwici* in eodem sacello (quod paulò antè *Gualtherus* cōstruxerat) compositum est.

Huic

Huic successit *Rogerus de Skermyng*, anno Domini millesimo, ducētesimo, sexagesimo quinto, & *Henrici* tertij quadragesimo nono. Huius Pōntificis nomen ad sempiternā memoriam temporis calamitas propagavit. Etenim illo Ecclesię præsidente, grauis ac funesta clades urbē *Norwicēsem* afflixit: quæ leuissimis profecta initijs, exitus habuit lugubres & perhorrendos.

Et quoniam aliorū casus ac ruinas contemplantes, sepe numero cohorrescimus, & sceleris odio ac detestatione perfundimur: iccirco visum est rem paulò altius repetere, operæ pretium me facturū sperans, si saltem aliquos, mente & animo minùs benè constitutos, harum calamitatum intuitu, ad pacis studiū & amorem instigem.

Euenit igitur vt cū quodam fortè diē nundinę (pro porta Prioratus) *Norwici* celebrarentur, ac multi illuc iuuenes ex

Tt. circun-



circūvicinis oppidulis villulisq; conflue-  
rēt, lis acerrima inter ciues, & religiosorū  
famulos exoriretur. Quo in certamine  
vtrinq; ita animis exarserant, vt à verbis  
ad vim versi, totis inter se viribus tumultu-  
osissimè cōfligerēt. Ibi in turba (vt fit)  
multi ciues grauisimis affecti vulneri-  
bus, cōplures verò crudelissimè peremti.  
Cumq; arbitri, qui quæstioni de nece per  
vim, aut casum cuipiā illata præesse con-  
sueuerunt (coronatores vulgò appellan-  
tur) pronuntiaissent ciues illos à religio-  
forum famulis nefariè per vim ac scelus  
trucidatos videri, vicorum submagistris,  
ac lictoribus negotium datū est, vti fon-  
tes ( si fortè in urbem venirent ) primo  
quoque tempore comprehenderentur.  
Eius rei veluti indignitate permoti Mo-  
nachi, ira vehementer accensi, inuidia &  
odio in ciues immani flagrare cœperunt.  
Et primū diris execrationum fulmini-  
bus in eos tonantes, miseram plebeculam  
per-

perterrefaciunt. Dein verò vt concep-  
tus animo furor acriùs efferbuerat, sce-  
lere & nequitia deflagrantes, vrbi pe-  
stem & exitium machinantur. Itaque  
cùm se gladijs, fustibus, scutis, ac omni fe-  
rè telorum genere instruxissent: clausis  
cœnobij valuis, transeuntes crebris bali-  
starum ictibus conuulnerare cœperunt.  
Die vero Dominica ante festum Diui  
*Laurentij*, effusi omnes è portis infestis  
clamoribus, urbem ingenti terrore per-  
culerunt. Etenim noctem illam totam  
(quæ insecuta est) circa urbem armati  
debacchantes, nihil prætermiserunt ne-  
fandi sceleris, & nequitiae quod non  
conceperint. Nam & mercatores quos-  
dam miserè diuexatos, & bonis exu-  
tos omnibus, crudelissimè interemerunt,  
& ciuium domus perscrutantes, ac quic-  
quid vsquam nancisci potuerunt diripi-  
entes, tantum pauoris cunctis incusse-  
rant, vt (tanquam in capta vrbe) ciues  
Tt.ij. hostilia



hostilia omnia metuentes, lamentabili clamore cuncta replerent. Tantaque nefarios homines & humani iuris, & diuini (quo se deuinxerant) coepit obliuio, ut cum onusti præda, & pænè humano respersi sanguine, è ciuium tectis recessissent, omnem vndique urbem (quacunque incedebant) impio latrocinio exsultantes, importunis vlulatibus ac insanis permiscerent. Demùm à scelere ad scelus dilapsi, in tabernam cuiusdam *Hugonis de Bramholm* irrumpentes nihil illic vini reliquerunt, quod non aut turpiter exhausserint, aut dolijs cōfractis & pertusis sceleratius effuderint. Hanc tantā ac tam inauditam in omni genere crudelitatis libidinem exosi ciues, cum illos immani rabie præcipites ad vim ac cædem ferri cōspicarentur, cōmuni consilio illorum pestiferis conatibus obsistere decreuerunt. Itaque missis celeriter nuntijs, qui maiestatem regiam de hoc tā nefario tumultu certio-

certiorem facerent, quique de religioso-  
rum iniurijs grauissimis verbis conque-  
rerentur: ipsi conuocatis vndique auxi-  
lijs, se ad vrbis defensionem accinxêre.  
Sed vt sunt hominū plerunq; mentes ac  
naturæ, in inimicitijs persequendis effræ-  
natæ nimium ac præcipientes: sic isti iracun-  
dia & vlciscendi desiderio intemperan-  
tius (quàm par fuit) elati, consimili se sce-  
leris atrocitate constrinxerunt. Etenim  
cū vndique omnibus ex locis hominū  
concurfus fierent, vrbisque præfecti pa-  
lām edixissent, vti cuncti in foro ad horā  
decimam conuenirent, tanta multitudo  
armatorū ciuium confluxit, vt pænè iu-  
sti exercitus speciem præberent. Qui ira  
& odio ardētes, tam violento & horribi-  
li impetu de foro ad Prioratū cōuolaue-  
runt, vt vno eodemq; momento diuersis  
locis ignem iniecerint. Vnde factum est,  
vt campanile, portæ, Monachorū cellu-  
læ, stabulum Prioris, pistrinum, hospitia



pauperum, denique templum ipsum, & propinqua templo loca cuncta, acerbissimo incendio deflagrarint. Vt verò exustis valuis aditum ipsi sibi in coenobium patefecissent: magna religiosorum strages facta est, multique mortales ferro vtrunque absumti. Quo in certamine superiores ciues, à cædibus ad prædam dilapsi, memores crudelitatis & iniuriarum quibus eos pridie Monachi affecerant, nihil intactum relinquere decreuerunt, adeo vt libris, vasculis argenteis, sacre suppellectili, cunctisque religiosorum thesauris sacrilegas manus admouerent. Tantusque stupor seu potius furor omnium animos tenuit, vt cum mutuis cædibus urbem hij, Prioratum illi afflixissent: neque hij tatarum calamitatum sensu ac recollectione, neque illi (in grauissimis malis) diuini numinis metu ac reuerentia, à tanti sceleris dritate reuocarètur. Quinetiam tantum abfuit monachorum vt annios aut tædium

tædium malorū, aut vr̄bis, templū de-  
flagrantis commiseratio subiret, vt Prior  
ipse (sic religiosorū antistitem appellant)  
ex *Geremutha* armatorū subsidia accer-  
fierit. Qui infesto agmine vr̄bē intrantes,  
cū omnia tubarū sono, & hostili clamore  
cōplessent, cūcta ferro ac flāmis miscētes,  
vt religiosorum animos nōnihil ad spem  
salutis erexerant, ita ciuium mētes incre-  
dibili luctu perculerūt. Nec defuere sanè  
horrēda prodigia, præsagaq; iræ cœlestis  
indicia, quæ fatalem illā vr̄bi cladem de-  
nuntiauerunt. Etenim eodem anno, im-  
mò eodem pænè mense, quo hæc patrata  
sunt, cū Monachi (vt fieri consueuit)  
de re dubia deliberabundi, frequentes  
conuenissent, tantæ subito ortæ tempe-  
states sunt, cum magno fragore tonitri-  
busq;, vt turrin̄ excelsā & duas colūnas  
lapideas deturbarēt. Quo repentino casu  
cū ingens cunctis esset terror iniectus,  
monachi de templo vniuersi diffugerūt,  
(tribus



(tribus duntaxat exceptis) qui præ metu exanimis conciderunt.

Præterea formidabilis & inaudita aquarū vis regiones vicinas inundauerat, tantumq; vastitatis & agris & vrbibus inuexit, vt domus, & obuia quæque lamentabili ruina peruerterit. Multaque alia euenerunt, quæ maximarum semper solent esse calamitatum prænuntiæ.

Veruntamen diuina non solum monita ingruente fato spreta sunt, sed humana insuper consilia neglecta. Nam priusquam cædibus, rapinis, ferro, flamma, & mutua internecione ipsi alternatim se funestassent, re adhuc integra multi sancti ac prudentes viri, tam perniciosorum consiliorum exitus, longè antè animis prospicientes, ab vtriusq; vehementer contenderūt, vt sese ad aliquam otij & tranquillitatis conditionem traduci sinerent. Excepta res primū est omnium consensu, arbitrique ex vtraque parte delecti, quibus permis-

permissum vti de re tota statuerent atque deliberarent. Verum enimvero cum horum hominum mentes erectæ in spem pacis, nihil aliud percuperent, votisq; omnibus exoptarent, nisi vti res primo quoquo tempore transigeretur, cumque iam veluti fœderis leges, quibus vtriq; parti caueretur, descriptæ forent, eæq; tabulis comprehensæ palàm recitarentur: tātum afuit vt ad pacem & concordiam mutuis sensibus conspirarint, vt ipse Prior (quod antea se facturum sponderat) pacificationem illam sigillo suo confirmare recusaret, vnde omnes illi fl. 3. tus postea in rempublicam redundarunt. Et certè nisi rex ipse *Henricus* (eius tum nominis tertius) profligatorum hominum consilia aduentu suo dissipauisset, fieri nō potuit quin vrbs vna, (omnium pænè pulcherrima) tātò labefactata motu funditus cōcidisset. Veruntamen is celeriter nefariorum pestiferos coetus profligauit, &



ruenti ciuitati subuenit, eamque ferè è  
flammis eripuit: demùm solutos nimi-  
um & fluentes ciuium mores iudicij se-  
ueritate constrinxit. Etenim postquàm  
ad illius aures istius tanti tumultus fama  
peruenit, statuit ipse *Norwicum* profi-  
cisci, atque in sceleribus vindicandis boni  
Regis munere atq; officio defungi. Quo  
cùm omnium opinione celerius venisset,  
illicque miserabilem vrbis ac templi de-  
flagrationem conspexisset, cædem, vasti-  
tatem, rapinas, & quicquid prætereà mali  
vel prædæ cupiditas, vel odij acerbitas  
ciuitati inflixisset, tam incredibilis erat  
is, quem & oculis vsurpauerat, & hau-  
serat animo dolor, vt vix sibi Rex opti-  
mus temperasse dicitur, quin eum lachri-  
mis exprimeret. Itaque confestim *Ni-  
colaum Triuetum*, litium ac iudiciorum  
moderatorem summum, ad causam ad-  
hibuit, illique inquirendi munus coràm  
delegauit, iussitq; vti poenam unicuique  
pro

pro criminis atrocitate infligeret. Interea Rex ipse ciuitatem omni iure ac libertate priuauit, veteres immunitates abrogauit, leges dissoluit, magistratus, senatum, publicū ex vrbe consilium sustulit, imaginem nullam Reipublicæ reliquit. Nimirum hoc voluit sapientissimus princeps, vt quæ ciuitas illustrissimorum Regum benignitate ad vim & scelus abusa foret, ea careret ijs rebus omnibus quibus cæteræ florentes ad maximam amplitudinem conscenderunt. Dein Episcopus *Roffensis* (fortè enim hic quoque aderat) omnes qui hanc perniciosorū flagitiorū societate coissent, diris ominibus, & execrationibus publicis deuinxit.

Attamen Monachi è iudiciorū laqueis elapsi, rem integram *Romam* reijciunt. Ea etenim illius temporis calamitas, & Regum miseranda conditio fuit, vt ne Principi quidem ipsi ius suos in ciues foret, nisi accessisset nefanda impu-



rissimi sacerdotis auctoritas. Vnde factū est, vt sæpenumerò perditī homines, ijs soluti legum vinculis, quibus alij astricti tenerentur, (velut ferè è custodia emissè) omni se nequitia ac foeditate commacularet. Quemadmodū Monachi, qui cū auctores scelerum, principes tumultuum, euocatores *Yeremuthensium*, & hominum profligatissimorum concitatores exstiterunt: tamen ad *Papam* prouocādo, viri teterrimi, fallacissimi, crudelissimi, ac omnium impuritātū libidinumq; maculis notatissimi, id consecuti sunt, vt ijs se iudiciorum flammis eriperent, quibus miseri ciues conflagrauerūt. Etenim oppidanorum magna multitudo, qui se ijs tumultibus immiscuerant, multiq; mortales qui in patrandis cædibus, templis inflammandis, sacris auferendis, diro se scelere contaminassent, ad equorum caudas deligati, & per plateas ac viarum strata ignominiosissimè tracti sunt: ac  
acer-

acerbissima demùm morte mulctati.  
Mulier etiam quæ princeps ignem por-  
tis subiecisse dicitur, combusta fuit : di-  
gnam factis passa poenam, vt quæ ignem  
ad sceleratæ mentis libidinem explendam  
adhibuisset, eadem ambusta quoque flā-  
mis igne interiret.

At Monachi ( vt antea dixi ) cùm ad  
Pontificem Romanum prouocassent, eo  
artificio in *Romanorum* mentibus delini-  
endis vfi sunt, vt nō solùm furorum sup-  
plicio sese expedirent, verùm etiā in po-  
sterum ( vt videbatur ) flagitiorū omni-  
um impunitam licentiam consecuti sint.  
Etenim cùm alij capitali poena plectun-  
tur, alij tanquam criminis immunes sup-  
plicij terrore liberantur, quis non videt  
flagitiosissimo sceleri, insidiosissimā pa-  
cem concedi? Monachi igitur cùm duos  
è coetu suo *Romam* misissent, *Geruasium*  
*Fordhamium*, & *Richardum Bramtonum*,  
qui procuratorum vice fungerentur, ijsq;  
Vv. iij. quatu-



quattuor (vt appellant) suffraganorū ec-  
clesiæ *Cātuariensis* litteras ad *Papam* de-  
dissent, quibus in litteris totius tumultus  
historia perscribebatur, tātū opibus &  
gratia valuerunt, vt Maximus Pontifex  
cognitionem de postulatis Monachorū  
contrā ciues *Norwiceses*, ad Antistites  
*Eliensem* & *Londinensem* diplomate suo  
reiecerit. Sed *Londinensi* alienissimo  
tempore, in ipso ferè huius relligiosissi-  
mi certaminis initio extincto, Monachi  
re infecta, cum *Eliensis* litteris ad sacro-  
sanctum Pontificem denuò *Romam* re-  
uertuntur. Verū non ita multò post  
contigit, vt (cū *Edouardus*, eius nominis  
primus (pater enim recens obierat) è ter-  
ra *Sancta* in *Angliam* rediens, in itinere  
*Romam* venisset, ibiq; honorificentissimè  
à *Papa* & purpuratis suis exciperetur)  
Monachi à *Romano* Præsule facilè im-  
petrarūnt, vt totius litis æstimandæ po-  
testas Maiestatì Regiæ permitteretur.

Qui

Qui demùm deprecante, atque adeò instigante *Rogero Norwycensi* Episcopo, secundùm Monachos sic decreuit.

1. Primùm vt utrîque in perpetuum inimiciæ ac similitates omnes, omnium ex animis radicitus extirparentur.

2. Tum vt ciues ad reficiendam Ecclesiam, & ea instauranda, quæ vel flammæ vis, vel hominum furor diuastasset, millia mercarum tria infrà sex annos persoluerent: videlicet quotannis quingentas.

3. Deinde vt vas aureum septem pondo confestim fieri curent, quod Christi corpori sustinendo, (sic enim Cererem illam suam Papistæ nuncupant) perpetuò deseruiret.

4. Prætereà vt ex quacunque ciuitatis parte collibitū foret, in cœnobium vtrò, citroq; comedendi potestas detur, portasque vbi velint constituent, dummodò detrimento neminem, aut grauiore incōmodo afficiant.

5. Vltimum fuit, vti proprijs sumtibus



sumtibus ciues, homines idoneos *Romā* mitterent, qui summum Pontificem de tota re certiores facerent, ciuibsq; suis deuotis iam, & admissorum conscientia constrictis, pacem ac veniam demissè deprecarentur. Hæc uti ciues præstitissent, Rex eos pristinae dignitati restituit, magistratus reddidit annuos, Senatum, consilium publicum, omniaq; ea quæ Pater dudum ademerat. *Ærarios* tamen esse iussit, utpote qui ab illo tempore in hodiernum usq; diem, ad perpetuam eius rei memoriam, quadraginta solidos quotannis Regi persoluerint.

Atque hunc exitum habuit ciuium temeritas: & Monachorum nefandū scelus: qui etsi in vrbe violanda fraudes in-expiabiles concepissent: auctoresque eius tumultus existerēt: tamen operæpretiū erit animaduvertere, quemadmodū præsulum iniquitate supplicio sese subtraxerint, & miseros ciues in flammam illorū

tempo-

temporum coniecerint.

Visum est autem nobis sempiternis literarum notis, testata hæc atque expressa ante omnium oculos ponere, ut mali exemplo admoniti, poenaque deterriti, meliores efficiantur : boni verò in virtutis via quam semel ingressi sunt alacrius insistant. Quæ certè cogitatio longius orationem prouexit, quam aut opinio tulerit, aut voluntas mea, sed dum omnia nō quo decet iudicio, sed legentium cōmodo metimur, factum est, ut verbosiores fortassis hac in parte quàm par est, exstiterimus. Quapropter his omisis, reliqua eādē qua instituimus breuitate, persequamur.

Restincto igitur (ut paulò antè memorauimus) hoc funesto fatiliq̃ue incendio, *Rogerus Skeruyngus* (solutis demùm caducæ carnis vinculis) ex hac fragili turbulentaq̃; vita migravit. Post cuius obitum ad *Gulielmum Mideltonum* Archidia-



diaconum Cantuariensem, Pontificius honos deuenit.

Hic Ecclesiam *Norwicensem*, crudelibus nuper deformatam flammis, restaurauit, eamq; nunquam antea dedicatam, conceptis sollenniter de more votis, rege *Edwardo* præsente, multisq; regni antistitibus, atq; proceribus consecrauit. Cessit è vita anno Pontificatus sui vndecimo: pridie Kalend. Sept.

Cui Monachi communi consensu *Radulphum* de *Walpoole* suffecerunt, qui sacris insignibus ab Archiepiscopo *Ioanne Peckamo*, *Cantuariæ* susceptis, *Norwicensis* Præsul factus est, anno à Christo nato millesimo, ducentesimo, octuagesimo octauo: (& Regis *Edwardi* eius tum nominis primi) septimo. Quã cū annos vndecim prudenter satis, ac piè gubernauisset, à *Norwicensi* ad *Eliensem* Episcopatum à *Bonifacio Romano* Pontifice euectus est. A quo tempore non ita diu  
super-

superstes fuit: Etenim secundus à translatione (vt loquuntur) annus nouæ dignitatis, vitæque finem fecit.

Idem *Bonifacius* qui *Radulphum* extulerat, illumque *Eliensi* (vt modò diximus) Ecclesiæ præposuerat, *Ioannem* quendam eiusdem Ecclesiæ præfectum, *Norwicensi* pontificatu insigniuit. Hic diplomata quædam & codicillos de primis fructibus, à *Clemente* Papa impetrauit: *Ædiculam*que quandam ad occidentalem cathedralem Ecclesiæ partem cōstruxit: quattuorque sacerdotes instituit, qui inibi Romanos ritus, sacraque peragerent. Magnam insuper aulam & sacellum in Palatio Episcopi, impensis proprijs exædificauit. Obijt in cœnobio Monachorum de *Folkstane* iuxta *Doueriam*, anno Domini millesimo, trecentesimo, vicesimo quinto, pridie nonas Iulij.

Inter hunc & *Gulielmum Ayerminum* numerant nonnulli *Robertum Baldockum*,  
Xx.ij. Regis



Regis *Edoardi* Cancellariū, primarium sanè virum & illustrem. Veruntamen hic Monachorum renuntiatus suffragijs tantū, cū eam dignitatem intellexisset, nemini, præterquā ad Romani pōtificis libidinem ac nutum delatam iri, sponte sua celsit, ne fraudi Monachis foret, quod eum inscio *Papa* (& fortassis inuito etiam) delegissent.

Quapropter *Gulielmus* (is de quo paulò antè mentionem fecimus) paucis interiectis diebus, ex Romani Præfulis auctoritate, episcopalem prouinciam obtinuit. Fama est hunc plusquam anili superstitione implicitum, ducentas libras duobus Monachis dedisse, nimirū vt illi, & qui in posterum eo munere (quod illi tum fortè habebant) fungerentur (erant autem cœnobio à vinis) perpetuò defuncti memorię, missis & scelestissimis ritibus parentarent. O admirandam illorum temporum cœcitatē! Sperabat videli-

videlicet prudētissimus pontifex his nefandis peractis sacris, diuinū numen placari posse: perindē ac vitiorum omnium labes, mortalium mentibus suffusæ (talibus tanquam piaculis) puriter expiatae, diluerentur. Obijt *Sharingia* iuxta *Londonum*, anno pontificatus vndecimo: & Cal. Apr. sexto.

Huic successit *Anthoni* de *Beck*, sacrae Theologiae professor, qui cum *Romae* diu in aula summi antistitis, & in illis pontificijs fordibus vixisset, seque ibidem in sacrarum rerum nundinationibus per aliquot annos quæstuosissimē exercuisset: facilē tandem scelestus, à scelestiore praesule, praesul impetrauit, vt eum *Norwicensi* Episcopatu praeficiendum curaret. Nunquam effluxerant illi ex animo ea quæ *Romae* dudum didicerat, itaque importunam tyrannidem & immanem in Ecclesia sua exercuit, itaque se gessit, vt nihil illo insolentiùs vnquam existerit.



Omnem siquidem Monachorū in rebus domesticis administrādis potētiam infregit, & imminuit, eamq; totā ad semetip-  
sū insidiosissimè transtulit, neq; passus est  
quenquā munere aliquo defungi, quē nō  
ad id, ipse prius designauisset. Cūq; *Robertus Winchesleus Cantuariensis* Archi-  
episcopus, *Norwicensem* diocēsim (de  
more) peragrarē decreuisset, quo sordes  
que huius cōtaminatissimi sacerdotis do-  
minatu in Ecclesiā influxerāt, disciplina  
ecclesiastica exhaurirētur: apertè restitit,  
cōfirmans, nullubi se nisi *Romæ*, respon-  
surū, monachosq; alios spe, metu alios ita  
deuinxit, vt cōiunctis animis ad vim ma-  
nifestā & apertā consenserint. Sed diuini-  
tūs cōtiguit, vt qui flagitiosā vitā vixerat,  
non nisi flagitiosissimo scelere cōciderit.

Etenim veneno à domesticis de medio  
sublatus, sempiterno nobis terrori debet  
esse, & exemplo, vt si quando vitiorū im-  
punita libertate lætemur, irā tamen sem-  
per diuinā, maximorū quotidie facinorū  
spe-

speculatricē ac vindicē pertimescamus.

*Becko* à domesticis (ita vt diximus) per-  
emto, *Gulielmus Batemannus* iuris ciuilis  
doctor, *Norwici* natus, indidēq; Archi-  
diaconus, Romanēq; curiæ arbiter & in-  
terpres, omniū monachorū suffragijs pō-  
tifex declaratur. Huius antistitis tēpore,  
nimirū anno post natū Christū eterne sa-  
lutis authorē. 1348. dira pestis perniciosis-  
sima lue urbē quaquauerfus peruasit. E-  
tenī turpis morbi cōtagio per vulgus im-  
prouidū sensim serpēs, horribilem ubiq;  
mortaliū stragē edidit, adeò vt in ciuitate  
assiduis exhausta funeribus, nemo peni-  
tus exstiterit, ad quem nō ex tāta tabe, aut  
mœror, aut morbus, aut mors deniq; per-  
uenerit. Fama siquidem est (religiosis &  
monachis pauperioribus exceptis) à Ca-  
lēdis Ianuarij vsq; ad Calēd. Iulij, 57104.  
homines, ea clade concidisse. Enimuerò  
ingentem pestem esse oportet, & ad me-  
moriā illius tēporis semper insignem,  
quæ



quæ tam exiguo spatio, tantam hominum multitudinem tam miserabili interitu deleuerit.

Erat *Batemannus* iste ecclesiæ suæ propugnator acerrimus, adeoque se in eius libertate tuenda inuictum præbuit & magnanimum, ut ne iram quidem Regis, nedum magnatum minas metueret. Etenim tantum afuit ut ecclesiæ suæ concessa iura, & consuetudines, procerum libidine conuelli aut labefactari fineret: ut ipse permultos talia conantes, constanti semper mentis robore compesceret ac coerceret. Veluti cum tempore quodam Dominus *Robertus Morleius*, famulos quosdam illius (forte ut fit) iniuriosius tractauisset, & in damarum septis feras quoque nonnullas per luxum atque lasciuiam, iuueniliter confixisset: adeo implacabili iracundia mitissimus pontifex exarsit, ut nunquam conquieuerit, donec nobilissimum adolescentem, turpissimam poenam subire coegisset.

Nudo etenim & capite, & pedibus, cum funali cereo, (quem incēsum manu magnum tenebat) per plateas (cūctis inspe-ctantibus) ad templum incedere coactus est, ibique ad altare summum magna corona ciuium circumfusus, conceptis sol-lemniter votis, pacem diuinam exposce-re, & pontificis à se odium ac simultatem deprecari. Quod eò mirabilius videri debet, quandoquidem infenso grauitè Rege, ac planè inuito, neq; id solum: ve-rum literis etiam, ac Regijs interdictis id ne faceret imperante: tum carceris inter-dum pœnam, ac omnium bonorū amif-sionem denuntiante, in sentētiæ suæ pro-posito nihilominus persisteret. Prætereà Episcopalem auctoritatem litibus & cō-trouerfijs valdè implicatam, & inuolu-tam expediuit, & à *Clemente* Antistite Romano (eius tum nominis sexto) om-nium ecclesiarum *Norwicensium* vacā-tium (vt vocant) fructus, sibi ac successo-



ribus suis impetrauit. Quæ contentio inter Præsulem & diocesim agitata diu, & forensi iactata strepitu, sic demùm à pōtifice Romano repressa, conquieuit. Iurisconsultorum amantissimus fuisse perhibetur, utpote illorum, quorum è disciplina ipse, totus ad hominum famam, & eam quam consecutus est dignitatē profluxisset. Proprijs itaque sumtibus *Cantabrigiæ* collegium exstruxit (eam quam hodiè *Trinitatis* aulam nuncupant) prædijsque nonnullis locupletauit. Neque hoc solum, sed illius etiam hortatu, & impulsu, *Gunuylus* quidā sacræ Theologiæ professor, aliam itidem ibidem instituit, & ex suo nomine aulam *Gunuylensem* appellauit: quam nuper *Ioannes Caius* vir omni literarum genere præstans, ac medicinæ scientissimus, suis impensis auctam mirificè, amplificatamq; illustrauit.

Incidit intereà inter *Angliæ* & *Galliæ* reges, grauis de totius *Franciæ* hereditatis iure

iure contentio, qua de re cum mittendi essent *Romam* homines idonei, qui pontifici Regis nostri causam probarent: hunc potissimum Rex deligendum sibi putauit. Quo in munere obeundo *Auinionem* mortuus est, anno salutis nostrę millesimo, trecentesimo, quinquagesimo quarto.

Quo sepulto, *Henricus Lancastrię* dux, qui *Thomam Perceium* comitis *Northumbrię* fratrem magnoperę dilexerat, ab Antistite Romano, absens, per litteras vehementer contendit, vt eum honorem ei deferendum curaret. Quibus importunissimis flagitationibus breuı perfecit, vt Pontifex ipse (quandoquidem Monachi id facere recusauerant) eundem *Thomam Perceium* *Norwicęsis* ecclesię pręsulem constitueret.

Hoc pōtifice peratrox tēpestas & sæuior quàm vnq̃ antea per id anni tēpus homines meminisset, subito coorta est, cœlūq;



tam horribili fragore & fremitu intremuit, vt toti penè terrarum orbi extrema clades impèdère videretur. Etenim certantium inter se ventorum tanta fuit rabies, vt transuersis flatibus domibus, ac templis incidentes, celsiora quæq; miserabili ruina prosternerent. Qua procella multis ædium tectis impulsis & euerfis, cathedralis Ecclesiæ quoque campanile, eodem turbine disiectum concidit, maximamq; templi partem vicinaque templo ædificia deturbauit & afflixit. Quibus detrimentis resarciendis, non solum ipse quadringētas marcas dedit, sed à clero etiam magnam pecuniæ summā impetrauit. Decreuit hic quondam decanatus omnes qui propriè ad Ecclesiam cathedralem pertinebant, sacello sanctæ *Mariæ* ( vt Iurisconsultorū verbis vtat ) appropriare, sed cū Monachi id neuiquam licere ostendissent, facilè à sententia destitit. Migravit ex hoc seculo anno ponti-

pontificatus sui decimo quarto. A cuius morte, (id enim uti fieret testamento cauerat) ijs quibus ea cura demandata fuit, defuncti Episcopi nomine, domum & terras quasdam in villis de *Kymerle*, *Carlton*, *Fowrhow*, *Gromthorp*, & *Wikelwood*, Norwicensis Ecclesiæ præcentori (ut loquuntur) in perpetuum dederunt. Ea nimirum lege, ut Antistitis de mortui manes, profanis precibus expiarentur, missæq; funestæ (quo enim alio nomine mortuorum sacra designem nescio) in Cathedrali templo ad illius animæ salutē quotidie conciperentur. Lubet ergo exclamare cum *Lucretio*:

*O miseras hominum mentes, o pectora cæca,  
Qualibus in tenebris vitæ, quâtisq; periclis?  
Degebāt veteres, quos somnia dira Paparū  
His mersere malis?*

Celerius opinione omnium defuncti Antistitis fama *Alpes* peruolauit, *Romam*que ad aures superbissimi Pontificis



peruenit. Erant tunc, vt & hodiè sunt, semperq; fuerunt, *Romani* Præsules, ambitione, & illius intollerandæ potentiaæ cupiditate adeò districti, vt intermissis sacrarum rerum studijs, perpetuis sese bellorum tumultibus implicarent. Itaq; semper maximis militum copijs circumfusi, vim & terrorem vicinis vrbibus inferunt, neque vnquam consistere possunt, quamdiu aut in inimicijs persequendis, naturæ acerbitas stimulos admoquet, aut in imperij finibus propagandis nefariæ eos cupiditatis aura prouehit.

Sub hoc igitur *Papa* stipendia tum fortè merebat *Spencer* adolescens sanè nobilissimus, qui cognita morte *Antistitis* *Norwicensis*, *Papam* adit, rogat vt *Henrico* fratri (fortè & hic quoq; aderat) illius prouinciæ pontificatum deferri sinat. Fit voti compos adolescens, fraterq; confestim ex milite *Antistes* creatur. Itaque  
proti-

protinùs magnis itineribus in *Angliam* contendit, ibiq; a.d. XVII. Kal. Aprilis, anno Domini. 1370. in Ecclesia sua ab Archidiacono Norwycensi consecratus est.

Fit magna mutatio non viri, sed vestis: etenim qui ab ineunte ætate sic vitã instituit suã, vt sese perpetuò militiæ assueuerit, quid mirum si huius menti bellandi semper ardor inexplebilis infederit? Itaq; accepta ab *Vrbano* sexto, inaudita potestate contrà schismaticos (sic appellabantur qui à Pontifice Romano iniuriosius tractati, illius imperium aspernabantur,) quarto nonas Maij instructa classe, cum ingenti exercitu, inuito tamen Rege in Belgium traiecit, vbi fuis profli-gatisque triginta hominum millibus, septem autem interfectis atque concisis, *Dunkirkum*, *Neoportum*, *Burburgum*, *Poringum*, *Grauelingum*, cæterasque maritimas vrbes funestissimis flammis



flammis deleuit. Atque hæ fuerunt illæ pontificiæ cohortes, ex flore scilicet ac robore superstissimorū hominum delectæ, sacрати (si dijs placet) religionē milites, ac croceis crucibus insigniti, quorum dux fuit & antesignanus Episcopus *Normi-*  
*censis*, vir equidem ferocia insigni, atque inaudita spiritus immanitate præditus. Qui (vt paulò antè memorauimus) ne Regi quidem ipsi reclamanti, atque adeò per litteras sæpenumerò ne in *Belgium* transmitteret denūciantī, obsecūdauerat.

Nec domipacatior quā foris fuit: quip-  
pè qui Monachis atrox & inexpriable bellū indiceret: eosq; omni iure antiquo, ac libertate priuare conatus sit: adeò vt per annos quindecim multis vexatos iniurijs, incredibiliter affligerit. Diū tamen restiterunt Monachi, sed tandem forensi decertatione fracti, ac debilitati, omnis ille repugnandi feruor ac impetus ita refrixit, vt eò demum deuentum fuerit, vt  
sponde

sponte quadringentas marcas antistiti dare consentirent. Huiusmodi terrenorum tumultuum tempestatibus per omnem ferè vitam, tanquam in medio ambitionis mari iactatus, demùm, cùm Ecclesiæ triginta septem annos præfuiſſet, ex huius miseræ vitæ vinculis euolauit. Vir Marti magis quàm Christo consecratus atque deuotus.

Huic successit *Alexander*, ecclesiæ quōdam *Norwicensis* Prior, cunctis monachorum suffragiis pontifex renuntiatus: sed Regi inuisus, qui tantum afuit vt dignitate illa perfrui potuerit, vt per annū ferè integrum *Windsorix* Rex carceris eum custodia coereret. Biennio post, deprecante *Thoma Arundelio* Archiepiscopo *Cantuariensi*, & alijs regni proceribus, pristinam dignitatem recuperauit. A quo *Glaucestrix* consecratus est, anno Domini millesimo, quadringentesimo, octauo. Hoc de Pontifice nihil memo-



ria dignum, in Antistitum annalibus reperitur, præterquam quòd illo Ecclesiæ præsidente maxima pars ciuitatis fortuitis perusta flammis deflagarît.

Obijt sexto pontificatus sui anno, sepultusq; est in ecclesia cathedrali, in sacello beatæ Virginis *Mariæ*, ad pedes *Gualtheri* eiusdē quondā prouinciæ Episcopi.

Illustri familia natus *Courtneius*, vtriusq; iuris peritissimus, ac Oxoniensis Academiae Cancellarius, rege *Henrico* (eius nominis quinto) vt id fieret magnoperè contendente) *Alexandro* sepulto, cōmuni monachorū cōsensu pōtifex delectus est. Ac nō ita multò post ab Archiepiscopo Cātuariensi, præsentē Rege *Henrico Cātuariæ*, in maxima nobilissimorū hominū frequētia, pontificijs fuit velatus insignibus. Nobilitatē generis exornauit decorafacies, & erecti corporis cellus honos, quapropter Regi quoad vixit ita charus ac iucūdus existit, vt eū semper implicatissimis.

tissimis regni negotijs interesse voluerit. Sed vt optima quęq; (flosculorū ritu) celeriter defluunt, sic hūc nobilissimū antistitem tū primū ad gloriam & dignitatē florescētem, mors immatura (tanq̃ turbine aliquo, aut subita tēpestate) peruertit. Etenim in *Normādia* secundo post cōsecrationē anno acerbissimo fato extinctus est, vndecimo Kal. Septemb. anno Domini millesimo, quadringentesimo, decimo quinto. Verū cadauer perhorrificētissimē in *Angliam* delatū, *Westmonasterij* inter Regum sepulchra, tumulo magnificē illatum, conquiescit.

Pietate, prudentia, māuerudine, beneficentia, vitæ integritate, omniq; virtutū laude redūdauit, *Ioannes Wakeringus*, qui post *Courtneium* proximus in Norwicēsi ecclesia pontifex consedit. Hic regij sigilli custos, à Monachis electus fuit (anno ab orbe redempto, millesimo, quadringētesimo, decimo sexto) & ab *Hērico Chichleio*

Zz.ij. Cantua-



*Cantuariensi* Archiepiscopo sacris (vti tū vulgò videbantur) ornamentis de more circumdatus. Horribilis eo tempore tempestas Ecclesiam *Romanam* afflixit : siquidem tres simul Papæ vno atque eodē momento, inter se de dignitate pontificia inimicissimè depugnarunt. Quorum diræ, execrationes, anathemata, pugne, tumultus, bella, omnesq; intolerandi illius dominatus procellæ, tanto impetu (velut sæua diuersorum ventorum rabies) conflixere, vt totum penè terrarū orbem vehementer concusserint. Ideoq; celebratum fuit concilium *Constantiense*, quo *Ioannes* cum multis alijs *Angliæ* antistitibus, à Rege missus fuit.

Qua in legatione ita boni pastoris munere perfunctus est, vt omnes illi pietatis atq; prudentiæ summæ testimoniū perhiberint. Claustrum quod hodie in palatio pontificis visitur, construxit, idque versicoloribus saxis strauit, magnificè  
sanè

sanè, & ad oculorum voluptatem eleganter distinctis. Demùm perfunctus omnibus huius ærumnosæ vitæ molestijs, decessit, humatusque est in Ecclesia cathedrali ante altare Diui *Georgij*.

*Gulielmus Alnwyckus* legum doctor (& ipse quoq; regij sigilli custos) Episcopalis imperij dignitatem adeptus est, anno salutis humanæ. 1426. *Londini* in tēplo beati *Pauli* ab Archiepiscopo Cātuariensi consecratus fuit. De hoc nihil memoria dignū litterarum monumentis proditur, præterquā quòd portas occidentē versūs, in Ecclesia cathedrali, & fenestrā magnā fieri fecerit, quodq; decimo pontificatus anno, Cātuariensis Præsul eū à *Norwicēsi* episcopatu ad *Lincolniensem* transtulerit.

Fuit eo tempore in concilio *Basiliensi* *Thomas Brounus*, antistes *Roffensis*. Huic omnium consensu, absenti tunc, ac nihil tale expectanti, delata est *Norwycēsis* Ecclesiæ dignitas. Quo sacris præsi-

Zz. iij. dente



dente, contigit vt ciues Norwicenses cōiunctis sensibus, ad subuertendam ecclesiæ libertatem denuò conspirarent. Multa igitur conati sunt, multa in pestem & exitium Ecclesiæ machinati, sed huius Pontificis animi excelsi atq; inuicti, magnitudo ac robur, omnes illorum impetus retardauit atque repressit. Verūmenim uerò cū nouem iam annos in sede pontificia cōsedisset, vita functus est, exulceratis adhuc ciuium animis, & Ecclesiæ infestis. Anno Domini. 1445. & Regis *Henrici* eius tum nominis sexti, vice-mo septimo.

Quem subsecutus est *Gualtherus Hert*, sacrae Theologiæ professor, cuius grauitati ac cōstantiæ ascribunt nonnulli, quòd illius prudētia delinita demū plebe, exacerbatę ciuium mentes conquieuerunt. Cruci sustinendę (taliam enim supersticiosa illa tēpora desiderarūnt) templo transuersum pegma fieri fecit: pauimētumq;  
Eccle-

Ecclesiæ saxo sternendum curauit. Duo-  
decim scholasticis *Cantebrigiæ* in hospitio  
quod tum *Fischwyck* dicebatur (quoad  
vixit) omnia vitæ necessaria suppedita-  
uit. Cessit è vita decimo sexto Maij,  
1472. atque sub pegmate, quod vt antè  
diximus, cruci sustinendæ construxerat,  
tumulo conditus est.

Proximi ab illo numerantur *Facobus*  
*Goldwellius*, & *Thomas Ian*, de quibus  
memoria dignum nihil certè accepimus,  
nisi quòd alter cùm viginti quinq; annos:  
vnum alter Ecclesiam rexissent, ex hac  
luce migrauerint.

*Goldwellio* tamen pontifice (neq; enim  
id silentio prætereundum videtur) a. d.  
V. Kalend. Ianuarij. 1480. per vniuer-  
sam ferè *Angliam*, terra tremuit motu tã  
vehementi, vt celsarum domuum pinnae,  
turresq; templorum, tum innumera fu-  
mi receptacula (quæ suprà ædium culmi-  
na tubo atq; calathò attolluntur,) quassu  
diuulsa



diuulsa in vias, ipsaq; in tecta corruerent. Præterea multarum vrbium domus (si quidem longinquus is terræ tremor fuit) pleræq; omnes non sine ingenti incolentium interitu, ruinam traxerunt. Sic ut cunctis pænè in locis prostrata fanorum atque ædium cadauera, miserabilisq; villularum strages conspicerentur.

*Fano Nixus* surrogatur, cuius vitæ nescio quas libidinū labes vulgi sermo impressit. Etenim illius turpitudine ac impuritates spurcissimæ, in hodiernum vsque diem omnium ferè linguis ac vocibus celebratur: adeò ut nemo pænè sit, ad quem cæci Norwycensis Episcopi fama non peruenerit. Tenebricosissima tamen ætatis illius tempora, ortus præstantissimi Præfulis illustravit *MATTHÆI PARKERI* Cantuariensis Archiepiscopi: qui nuper ex hoc impuro lacrymabiliq; hospitio, ad cœlestem & immortalem gloriam auolauit.

1575.  
XVI. Kal.  
Iunij.

QVO

*QVO DE VIRO* dicendū mihi  
aliquid hoc tēpore existimaui, non quod  
illius dignitas egeat oratione mea, aut ego  
me eū esse putem, qui tāti viri laudes scri-  
ptis meis celebrare queam: sed quoniam  
res Norwicensis explicandas suscepi, si  
huius nominis memoriam silentio præ-  
termissem iure reprehēdendus viderer.  
Quid enim vel ad ciuium gloriam mag-  
nificentiū? vel ad vrbis splendorem illu-  
striū? quā eius viri nutricem ac alum-  
nam existisse, qui ingenio, doctrina, pru-  
dentia, probitate, omnibūq; semper ma-  
ximarum virtutū ornamentis abūdauit?  
Habuit profectō ciuitas illa multos quō-  
dam duces, belli gloria insignes, habuit  
viros optimarum artium disciplinis im-  
butos, habuit Præsules religionis inte-  
gritate præstantes, sed habuit externos:  
habuit alienos: non habuit domesticos,  
nec in vrbe natos. Itaque factum est, vt  
non tantū vrbem illi, quantū vrbs illos



decorauerit. Huic verò *Normici* honestissima stirpe orto, vrbs illa contigit veluti altrix dignitatis sedes: cui sicut adolescēs, gloriæ semper fuit & honori, ita quā senex meritis adeptus est dignitatem, ad sempiternum patriæ nomen, & amplitudinem transfudit.

Ac ne illud quidē vereor, ne velle fortē videar cuiusquam in aures verborū blāditijs influere: præsertim cū & meæ sēper ab ineunte ætate, vitæ susceptæ rationes, has ineptias respuerint, & omnes, quorū mentes inuidia non sunt & maleuolentia suffuse, multo illi maiora, & ampliora ijs, quæ ego dicendo consequi possum, virtutum testimonia tribuerint.

Quanquam certē nō ignoro quā petulanter, ne dicā sceleratē & impiē, in hūc eximie virtutis virū improbæ plebis rumor acerbitalis & maleuolentiæ suæ virus profundat. Sedenim, ecquis viuit mortaliū cuius ad laudes nihil allinierit inuidia?

Num

Nū quos fortes viros? quos claros? quos de republica benè meritos reminisci possumus, popularis quos leuitas, & circumuolitantes fabulæ nec viuos læserint, nec mortuos perstrinxerint? Multæ sunt (vt ait poeta nescio quis) insidiæ bonis: virtutisq; comes (corporis vt vmbra) inuidia: porro principibus viris aduersaria semper fuit & infesta vulgi temeritas: tum optimi cuiusq; vita facinorosorum perpetuò linguis patuit atq; libidini. Cæterum qui cūctis mortalibus in hoc magno malorum mari, ad bonam famam bonorum (quæ sola verè gloria nominari debet) vela dantibus, odij, simultatis, inimicitiarū, & inuidiæ reflantes veluti venti ac turbines cōcitari solēt: ij si huic vni tādiu in his turbulētissimis offensionū fluctibus iactati, ac iam panē portum ingresso inciderūt, nū cui mirū videri potest? Perinde ac si magno, & deuexa iā ætate viro, & terrena oīa infracta habētī, & contēmentī,

domus

Aaa. ij.

dum



dum nullos pro suis labores & pericula defugeret, dum curiosorum, atq; omnia perturbare cupientium leuitatem, grauitate sua perfringeret : dum redundantes nonnullos, & immoderata licētia superfluentes, reprimeret: dum quorundā hominum (nouitati atq; ineptijs indulgentium) impetus & conatus nefarios legū laqueis irretiret : deniq; dum omnes curas, & vitæ rationes omnes, ad Christi gloriam, & Ecclesiæ commoda conuerteret: illud vitio verti debeat, quod popularis iracundiæ & maleuolentiæ tempestatem deuitare nequierit. Quasi verò id aut optarēt vnquam, aut sperarēt sagacissimus senex, & planè veterator in communi vita : aut quas inuidiæ, & offensionū acerbitates in hoc terrestri exilio pro Christi gloria susceptas, mortalis pōtifex negligeret, eas nunc demùm vita lapsus, immortalis, & inter cœlites aeternū a scriptus ciuis reformidet.

Quamob-

Quamobrem tantum abest vt assen-  
tādi crimen reforeshidem, quod huic cla-  
rissimo viro, & licet suo, nec Reipublicæ  
tamē nec nostro tempore extincto seni,  
debitū probitati præconium scriptis im-  
pertiuērim meis, vt certē nisi id fecissem,  
sceleris aut inscitix ignominia mihi sube-  
undā existimarem. Nam cum Deus op-  
timus maximus, huic præstatissimo præ-  
suli hanc mentem dederit, vt in omni sua  
vita præter virtutē, ac pietatem nihil ad-  
mauerit, sceleratū eum sanē esse oportet  
bit, & ab omni prorsus humanitate auer-  
sum, qui tam claro & illustri viro virtutū  
ornamenta inuiderit. Quis enim illo aut  
morum sanctitate illustrior vnquam ex-  
stitit? aut vllō generā laudis præstantior?  
Quā laudabiliter se gessit in omni æta-  
te, quā constanter, quā piē, quo ma-  
ximarum semper artium defilebio fla-  
grauit? quo virtutum ardore? quā ad-  
mirabili, ac pænē diuinis moribus



*Canterburgia* diu vixit, liberalibus disciplinis vehementer deditus: & ita vixit vt in illo maximorum ingeniorum celeberrimo theatro, cunctos industriae ac eruditionis admiratione commoueret. Fuit postea tempore Regis *Henrici* (principis inuictissimi) in aula, & *Annæ* Reginae à sacris, quid illo prudentius? quid sanctius? quid humanius? quid non modò in studijs, in moribus, in conuictu, in sermonibus, sed in ipso planè aspectu iucundius? Quis fuit quem non fama tantarum virtutum incenderit? Quis denique qui non intimis cum sensibus dilexerit?

Delatus est illi *Stokensis* decanatus, ac non ita multò post *Lincolniensis*, quo in munere fungendo, cum incomparabili pietate, singulare humanitatē coniunxit. Nam & frequenter concionando multorum mentibus sanctitatis amorem infudit, & rem familiarem benigne largiendo misero-

miserorum inopiam subleuauit. Unde factum est, vt quam sacrarum literarum studio consecutus est scientiam, eam vita magis ac moribus, quàm oratione, aut verbis expresserit.

*MARIANA* tēpora cōsecuta sunt (tēpora omnium quę nostra vidit ætas calamitosissima) cū rege *Edouardo* omnium regū optimo, crudeli funestoquę fato extincto, *Mariæ* peruerfitas institutā à patre, & fratre Christianæ religionis disciplinā peruerisset, & Romanorum ritus ac sordes denuò in ecclesiam inuexisset. Enimuerò tū virū optimū omni ecclesiastico munere priuatū, cunctisq; fortunis exclusū, graues cōmuniū temporū calūs perculerunt. Quid igitur? nū quis eū fracto, vidit animo ac debilitato nū qua sceleris aut superstitionis labe respersum? Nihil minis. Itaque in ijs rerū asperitatibus, cū Romanorū scelus, nefas ritibus cūcta coinquinasset, omnesq; boni eadē flammam



flammam & horrenda quæque metuerent, ita aduersos temporum fluctus excepit, vt & omnem illam immanem Papistarum rabiem prudenter deuitaret, & se tamen semper ab impietatis lue purum immunemq; conseruaret.

Moritur interea Regina, cui succedente illustrissima sorore *Elyzabetha*, subuersis omnibus superstitionum portentis, atque sublatis, pristinum Ecclesia decus recuperauit. Tum verò huic amplissimo Præfuli, non defuere diu quæ nunquam sperauerat, multò minùs optauerat tãtis debita virtutibus præmia. Nam eum ita viueret, vt omnes semper spes in vno Deo defigeret, cæteraq; quæ tanto perè suspiciunt homines, & admirantur, perindè ac caduca & inania negligeret: ita manauit fama de admirabili eius prudentia, temperantia, doctrina, cæterisque virtutibus, vt ad aures demum Regiæ Maiestatis accederet. Noluit illa pati  
diuti-

diutiùs iacere, tantam, & tam excellentem, in omni genere virtutem. Itaq; protinùs eum non petētem, non sperantem, propè etiam recusantem, ad Cātuariensem Archiepiscopatum euexit, nimirū vt in amplissimo munere amplissima virtus, campum haberet in quo commodius posset excurrere.

Parem itaque iam propè voluntati facultatem nacta præstans naturæ bonitas, omnem illam protinùs effudit, quæ intimis semper infixis sensibus infedit humani generis iuuandi cupiditatem. Ab hoc studio fluxerunt illa ( quæ vtinam tam imitarentur multi, quàm cupiunt, & laudant omnes) in consilijs grauitas, in Ecclesiæ muneribus obeundis sedulitas, in tractandis rebus prudens cōsiliorum integritas, nihil in potestate insolens, nihil sublime, nihil in opum abundantia dissolutum, sed arctissimis cuncta temperantiæ vinculis astricta. Hinc illæ diurnæ,  
Bbb. noctur-



nocturnæq; curæ in optimarum rerum cogitatione defixæ : hinc eruditorum hominum quotidiani complexus : hinc rei literariæ amor incredibilis : hinc in claris fouendis ingenijs excellens liberalitas : hinc Antiquitatis tanta notitia : hinc affectæ iam pænè ætatis insignis auctoritas : hinc deniq; omnia illa quæ per sedecim ferè annos luxerunt inauditæ virtutis & ingenij ornamenta.

Iam verò illa quanta sunt? In summa fortuna summam tamen humanitatem exhibere? neminem aditu, neminem congressu, sermone neminem excludere : rebus aduersis ac calamitate pressis opem ferre, Christi profugos misericordia prosequi : Gallos, Hispanos, Belgas, Venetos, tam viros quàm fœminas omnium rerum inopes ac egenos singulari caritate complecti? Neq; hoc solum sed annuam insuper nonnullis peregrinis stipendium dilargiri, alios domi suæ liberalissimè sustentare,

stetare, omnes beneficentia, & facultatibus  
iuvare: adeo ut nullus paene sit quem vel  
fortunae calamitas vehementius affligeret,  
vel iniqui temporis procella peruerteret,  
cui non aliquid opis & auxilij contulerit.

Quid hic commemorem quos quan-  
tosq; labores ac sumptus in antiquissimo-  
rum scriptorum codicibus conquirendis  
exhauserit? quot libros vel hominum in-  
curia vel temporum calamitate corruptos,  
typis quam emendatissimos peruulgari fe-  
cerit? quemadmodum Academiam *Cate-  
tebrigensem* bonarum omnium discipli-  
narum matrem impensis proprijs ornauerit?  
quam eleganti muro scholas publicas pre-  
cinxerit? quanta sacrorum voluminum  
multitudine bibliothecam nuper instru-  
xerit? quibus deniq; beneficijs Corporis  
Christi collegium (cui ipse quondam  
multis abhinc annis praefuit) illustrauerit?  
Sint haec in illius laudibus minima: non  
quod si spectetur singula, maxima videri



non debeant, sed si ad illa quę dudum dixi, mentem conuerteris, multa & maiora & clariora videbis, quorū lumine hę virtutes, sicut luce solis sydera, obscurantur.

Atq; his tantis splendidissimarum virtutum ornamentis, cū omnis anteacta ætas redundaret, tantum abest vt se illarū intuitu, elatius efferret, aut popularem auram, & vulgi rumusculos ardētius cōcupisceret, vt ab aspectu se pænē mundi & mortalium oculis subducens, omnia illa veluti inania seculi deliramenta contemneret.

Siquidem domesticis otij sui finibus cōtentus, terrestrium tumultuum expers vixit, non tam comitatu stipatus famulorum suorum honestissimo (quos habuit sanē quāmplurimos) quā optimarum cogitationum ac virtutum cohorte (quę ei semper comites fuerūt & administræ) circumseptus. Itaque hoc consecutus est, vt cū glorię causa nihil fecerit, incredibili

bili tamen apud omnes gloria circūfluat,

Hæc igitur intueantur adolēscētes, qui patriæ, qui hominibus iuuandis, qui verę laudi, qui gloriæ, qui Deo deniq; vitæq; perenni, non desidię, non somno, nō delitijs, aut vitæ huius breuissimis inanibusq; oblectamentis natos sese arbitrantur. Ad hæc se studia conuertant : talium virorū facta imitanda sibi proponant : horū exemplis atque adeò vestigijs insistant. Hæ sunt veræ laudes, quas nulla delebit obliuio : hic splendor perpetuus, cuius memoriā anni consequentes excipient, & obstupescant : hæc certissima virtutum decora : quæ omnium & litteris & linguis celebrabuntur.

Atq; hunc in finem ista à nobis breuiter decursa sunt, nimirum vt huius illustrissimi Archiepiscopi exemplo, hominum mentibus veluti faces ad virtutem admouentes, quàm plurimi (si fieri posset) ad eius studium incenderētur. Quæ



quidem sapientibus haud iniucunda futura scio, ineptis autem & maleuolis, suspecta videbuntur fortassis, & inuisa. Verùm quid fieri expediat non vulgi arbitrio nos, sed prudentium semper iudicio, metiri consueuimus: & optimorum authoritate contenti, insipientium vocalas, & maledicta cōtemnimus. Quæ cū ita sint, ad historiam vnde paulisper defleximus denuò reuertamur.

Defūcto ergo *Richardo Nix*o, *Gulielmus Ruggus* surrogatur anno salutis humanæ. 1536. De quo viro nihil proditum memoriæ, præterquā quòd extremo sui pontificatus anno Norwycenses (Ketto quodam duce) conspirantes, hostilia cōtra maiestatem regiam arma induerent. Qui quidem maximis perditissimorum hominum gregibus conflatis, tantas tragœdias excitarūnt, totam vt pænè *Angliam* eo motu concuterent. Quem tumultū quoniam nos vno volumine cōplexi

plexi sumus (quod cum isto libello coniunximus) eo lectorem harum rerum cupiditate flagrantem remitemus. Quo autem iudicio id fecerimus, huius est neque temporis, neque instituti commemorare: consilium certè fuit eius coniurationis casus omnes atque euenta explicare, plenamque & perfectam Norwycensis tumultus historiolum posteris relinquere: quæ perpetuò cunctis, vitæ dux, & magistra foret, ut quo illi corruerent scelere cernentes perfidiam omnem, & prodicionem (authoribus exitiosam semper & fatalem suis) perhorrescerent. Legant igitur qui volent, & diligenter animaduertant, quæ tandem præmia homines perniciosissimi pro scelere tanto, atque patriæ perturbatione consecuti sunt.

*Ruggo proximus fuit Thomas Thurlbeius, legum doctor, à VVestmonasteriensi episcopatu, ad Norwicensem (ut loquuntur*



quidem sapientibus haud iniucunda futura scio, ineptis autem & maleuolis, suspecta videbuntur fortassis, & inuisa. Verum quid fieri expediat non vulgi arbitrio nos, sed prudentium semper iudicio, metiri consueuimus: & optimorum autoritate contenti, insipientium vocalas, & maledicta cōtemnimus. Quæ cum ita sint, ad historiam vnde paulisper defleximus denuò reuertamur.

Defuncto ergo *Richardo Nix*, *Gulielmus Ruggus* surrogatur anno salutis humanæ. 1536. De quo viro nihil proditum memoriæ, præterquā quòd extremo sui pontificatus anno Norwycenses (Ketto quodam duce) conspirantes, hostilia cōtra maiestatem regiam arma induerent. Qui quidem maximis perditissimorum hominum gregibus conflatis, tantas tragœdias excitarunt, totam vt pænè *Angliam* eo motu concuterent. Quem tumultū quoniam nos vno volumine cōplexi

plexi sumus (quod cum isto libello coniunximus) eò lectorem harum rerum cupiditate flagrantem remitemus. Quo autem iudicio id fecerimus, huius est neque temporis, neque instituti commemorare: consilium certè fuit eius coniurationis casus omnes atque euenta explicare, plenamque & perfectam Norwycensis tumultus historiolum posteris relinquere: quæ perpetuò cunctis, vitæ dux, & magistra foret, ut quo illi corruerent scelere cernentes perfidiam omnem, & prodicionem (authoribus exitiosam semper & fatalem suis) perhorrescerent. Legant igitur qui volent, & diligenter animaduertant, quæ tandem præmia homines perniciosissimi pro scelere tanto, atque patriæ perturbatione consecuti sunt.

*Ruggo* proximus fuit *Thomas Thurlbeius*, legum doctor, à *Vestmonasteriensi* episcopatu, ad *Norwicensem* (ut loquuntur



quuntur) translatus.

Quem virum si ingenij, prudentię, grauitatis, consilij laudibus priuare conarer, amēs certè videri possem, præsertim cū eas illi naturæ atq; industriæ dotes oratione præriperem mea, quas semper huic (vno propè cōsensu) vniuersi tribuerint. Verū enim uerò istuc in illo si non magnopere admirandum, at certè dolentiùs deplorandum fuit, quòd cū vir talis, ac tātus exsisteret, omnes nihilominus mētis atque ingenij neruos ad Romani Pōtificis gloriam illustrandam conuerteret. Cuius tam acerrimū se propugnatorem præbuit, vt *Maria* defuncta, honores potiùs omnes, quàm errores deponere maluerit. Vno se scelere commaculauit, quod quidem nō patiar silentio præteriri. Etenim cū gloriosissimus Iesu Christi martyr *THOMAS CRANMERVS* (Cantuariensis quondam Archiepiscopus) vir quo nihil sol cōspexit vnquam

quam illustrius) summo illū amore, gratia, beneuolentia complexus, multis ipsum sibi beneficiorum vinculis (quibus eum astringerat arctissimis) deuinxisset, nefariæ quæstioni quæ vitæ integerrimi pontificis constituebatur, nō interfuit solum, verumetiam quod multò sceleratius est, & ad eius facinoris memoriā diuturnius, cum **BONERO** (cruento illo christianorū Busiride) crudelissimè præfuit. Quod facinus siue volens admisit, siue inuitus, necesse est omni se vituperio dignum fateatur, qui præfulem tanto honore, eruditione, prudentia, pietate præstantem, dignitatis etiam suæ authorem, & (quod caput est) innocentem, sententia sua perfidiosissimè opprimeret: illiq; qui eum omnibus in rebus fulsit, ornavit, sustinuit, cuncta (quantum in se fuit) pristini decoris insignia detraheret. Tantū autem abest vt aut temporis, aut necessitatis excusatione istius criminis labem ac



inuidiam à se deprecari potuerit, vt potius meo iudicio nominis sui famam in æternū beatissimi martyris sanguine cruentarēt. Nam quòd fœdo illo atque flagitioso die lachrimas profudisse dicitur, utiq; hæ non tam testes doloris quàm cōscientiæ indices exstiterunt. Quanquam quid mirum si vel mentis angor, & cōscientiæ sollicitudo: vel nobilissimi & optimi de se meriti senis misericordia, illi qui vultum illū tum verè diuinum cōspexit, & præsens (quod aiunt) præsensem contemplaretur inuitissimo (& quod credere fas est) magnopere reluctanti, lachrymas expresserit, præsertim cū mihi istec scribenti, atque illius gloriosissimi Antistitis casum longo iam post temporis intervallo recordanti, subitò exciderint. Quid enim illo homine vixit vnquam in terris sanctius? quid innocentius? quid humanius? quid omni laude, gloria, honore, immortalitate dignius?

Cæterum

Cæterum hoc nescio quo fato *Thurlbeio* contigit, vt quamuis in optimū Præsulem ingratus nimis atq; beneficiorum omnium immemor exstitisset, *MATTHÆVM* tamen *PARKERVM* Cantuariæ quoq; Archiepiscopum (in signi certè probitate virum) non minùs erga se clementem atque propitium expertus fuerit. Nam cum extincta *Maria* orbis reipublicæ subito conuersus foret, ac *Thurlbeius* dum pertinaciter nimis immanem Papæ tyrannidem tueretur, vnà cum alijs antistitibus omni exclusus honore (erat autem tum temporis Episcopus Eliensis, & defunctæ reginæ à cōsilijs) in Turrim Londinensem conijceretur, facilè à clementissima Regina quidā amici eius impetrarunt vt domi apud Pontificem esset. Vbi cum *Boxallo* (qui *Mariæ* quoq; à secretis fuit) diu certè vixit, cum interim præstantissimus Præsul in maximis occupationibus nūquam



salutis tamen illorum curam intermitteret, verum omnes ingenij māsuetudinis, & industriæ machinas adhiberet, quo animos illorum pessimarum superstitionū spinis ac sentibus expediret. Sed altis defixæ radicibus, adeò funditùs inheſerant, vt nullius certè (quod deflendum fuit) ingenio extirpari potuerint. Lamhithi obiit anno post natum Christum millesimo quingentesimo septuagesimo, in domo Archiepiscopi Cantuar. & in ecclesia Lamhithensi sepultus est.

*Thurlbeio* (ita vti suprà diximus) ad Eliensem episcopatum euecto, *Iohannes Hoptonus* sacræ Theologiæ professor, successit, anno Domini. 1554. De quo hoc tantum perscriptum inuenio, quòd cùm annos quattuor Norwicensem rexisset ecclesiam, eodem quo *Maria* regina huius molestissimis vitæ ærumnis perfuncta obierat anno, ipse quoque repentino (vt nonnulli suspicantur) dolore percul-

perculsus interiit.

Vltimus ordine, sed meritis princeps, fuit reuerendus in Christo pater *D. Jo. Parkhurstius*, clarissimus & spectatissimus vir, qui quotquot ante illū Norwici exstiterunt Pontifices, vnus ferè omnes virtutis laude superauit. Tempore *Mariæ* reginæ, multa passus est, grauissimisq; iactatus periculis: ex quibus deinceps Dei clemētia, ad eam (qua dudū fruebatur dignitatem) emerfit. Etenim anno tertio Reginæ *ELIZABETHÆ*, præsul Norwicensis factus, ita vixit vt omnes in illius vita ac moribus expressā veri Pontificis imaginem intuerētur. Quanta autem doctrina, iudicio, prudentia, ingenio sit, semperq; fuerit, quā subtili, quā acuto, etsi neminē qui illū nouerit ignorare arbitrer, tamen ex illius scriptis manifestò deprehēdi queat. Obijt Norwici anno salutis humanæ suprā millesimum, quingentesimo septuagesimo quarto.

Ccc.iiij.

Hactenū



Haftenùs Urbis initia, atq; incrementa, res gestas Norwicensium, & Præsulū vitas, qui Ecclesiæ præsiderunt, breuiter explicauimus. Restat nūc vt (quod vltimo nos loco facturos spondimus) Præfectorum urbis, quos Balliuos nuncupant, tum Prætorum, atque Tribunorum plebis, (quos Vicecomites appellant) nomina subiungamus. Quæ vbi notis atque figuris (pro temporum ratione aptè adhibitis) distinxerimus : huic tandem volumini finem imponemus.

Eodem itaque iure (vti suprā memoriauimus) vtuntur Ciues Norwicenses, iisdemque ritibus atque institutis in Ciuitate gubernanda sua, quibus Londinenses vtuntur : Prætoremq; (Maiorem ipsi nuncupāt) Regis permissu quotannis deligunt : cui (quemadmodum Londinensi) more per antiquo atq; solenni gladius præfertur.

Diu tamen, sicuti quōdam Londinum  
quoq;

quoque, cæteræq; celebriores huius In-  
sulæ Ciuitates, Præfectos seu Vicoma-  
gistros habuere suos (nostra lingua Bal-  
liuos appellamus) cæterum anno mille-  
simo, quadringentesimo tertio, is admi-  
nistrandæ ciuitatis ordo primùm immu-  
tatus est, isq; quem nunc retinent insti-  
tutus. At Balliuorū nomina ne fortè  
delicioribus fastidiò sint, prætereun-  
da putauī : Prætorum verò & Vice-  
comitum, quandoquidem legentium  
plærisq; (perindè vt obsoleta nimis  
atque plebeia) minus præbitura  
voluptatis existimem, breui-  
ter summatimq; sicuti  
in fastorum codicillis  
antiquitùs per-  
scripta inueniuntur, demon-  
strabo.

## NOMINA



# NOMINA PRÆTORVM (QVOS Maiores vocant) & Vicecomitum Nor- vvicensium ab anno primo Henrici quarti ad decimum sextum Elizabethæ Reginae.

<i>Anni Do- mini.</i>	<i>Anni Re- gum.</i>	<i>Anni Pō- tificum.</i>	<i>Balliva seu Praefectorum Urbis nomina ad 4. annos.</i>	
1309	<i>Anno pri- mo Hen. 4.</i>	<i>An. 29. H. Spencer Pō.</i>	Walterus Daniel. Rob. Dunstan. Rich. V White. G. Eton.	
1400	2	30	Rog. Blickley. Barth. Blackney. Tho. Gerrard. H. Skeyt.	
1401	3	31	Io. Daniel. Edm. V Varner. G. Applyard. Gul. Euerard.	
1402	4	32	Rob. Hunwoorth. Io. Harlston. Gul. Sedman. Io. Coppin.	
1403	5	33	<i>Guliel. Applyard.</i>	<i>Rob. Brasier. Iohannes Daniel.</i>
1404	6	34	<i>Guliel. Applyard. 2.</i>	<i>Sampson Barker. Io. Skie.</i>
1405	7	35	<i>Guliel. Applyard. 3.</i>	<i>Io. Harleston. Rich. Spurdance.</i>
1406	8	36	<i>Gualter. Daniel.</i>	<i>Edmundus V Varner. Rich. Drue.</i>
1407	9	<i>An. primo Alexandri.</i>	<i>Ioannes Daniel.</i>	<i>Thomas Garrard. Io. V Vurlyke.</i>
1408	10	2	<i>Edmund. V Varner.</i>	<i>Thomas Parslet. Io. Bixley.</i>
1409	11	3	<i>Gualterus Daniel. 2.</i>	<i>Gualt. Mozley. Io. Manning.</i>
1410	12	4	<i>Robertus Brasier.</i>	<i>Ioannes Scotham. Gaufr. Audley.</i>
1411	13	5	<i>Gul. Applyard. 4.</i>	<i>Ioannes Leuerech. Io. V Wake.</i>
1412	14	6	<i>Gul. Applyard. 5.</i>	<i>Rich. V White. Io. Grunthorpe.</i>
1413	<i>Anno pri. Henrici. 5.</i>	<i>An. 1. Ric. Courtney.</i>	<i>Richardus Drue,</i>	<i>Guliel. Sedman. Rob. Luffielde.</i>
1414	2	2	<i>Ioannes Bixley.</i>	<i>Thomas Cock. Henricus Raffman.</i>
1415	3	<i>An. 1. Ioā V Vakering</i>	<i>Ioan. Manning.</i>	<i>Rich. Mozley. Thomas Occle.</i>
1416	4	2	<i>Henricus Raffman.</i>	<i>Ioannes Asgar. Ioan. Miche'.</i>
1417	5	3	<i>Ioan. Daniel. 2.</i>	<i>Gul. Roose. Hen. Jacques.</i>
1418	6	4	<i>Gul. Applyard. 6.</i>	<i>Robertus Baxter. Io. Cambridge.</i>



*HOC* anno nefandam diri facinoris societatem contra regem ineunt, Ioannes Holandius dux Excestriae. Io. Montacut Sarisburiensis, Tho. Cantij, Hugo Spencerius Glocestria comites, nimirum uti regem ludorum statuto die, Oxonij, de improviso opprimerent, sed detectis insidijs omnes perfidiae pœnas luerunt. Nam Cantianus, & Sarisburiensis ad Cestriam quo confugerant, interfecti sunt, Dux verò in Estsezia comprehensus securi percutitur.

2 Hoc anno atrox pugna salopia fuit, in qua interemptus est Tho. Perciuss comes Vigorniensis, qui contra regem conspirauerat: Henricus autem comitis Northumbrorum filius, multiq; alij capti ultimo supplicio afficiuntur.

5 Hoc anno navalis pugna fuit inter Anglos & Britones, sed Britones incensis ac depressis navibus penè omnibus fusi, profligatiq; sunt.

6 Hoc anno fuit Monomachia Londini in Smythfield, inter Edmundum Cantij comitem, & Marrensem comitem Scotum, quo in duello Anglus Scotum magnifice superavit.

8 Hoc anno Richardus Scrup Archiepiscopus Eboracensis capite ob initā contra regem coniurationem Eboraci plectebatur, ac non ita multo post Comes Northumbrorum, & Dominus de Bardolf, multiq; alij (qui contra Eus multis tam Anglorum quàm Scotorum millibus, regi bellum inferre decreuerant) tumultuaria pugna in agro Eboracensi devicti, confestim capti sunt, Eboracumq; perducti, ibiq; capitibus mulctati.

9 Hoc anno tanta erat frigoris vis, ut per quindecim hebdomadas, cuncta continuo astricta gelu obriguerint.

14 Hoc anno rex Hierosolymam proficisci decreuerat, verum repentino morbo implicitus, annū agens quadragesimū sextū, ex hoc seculo migravit.

1 *HOC ANNO* Robertus Stuartus, vnicus Iacobi Regis Scotiae filius ab Anglica classe capitur, quo ex casu tantū pater doloris accepisse feratur, ut infra paucos dies postquam id accidisset, vehemens eum luctus ac mæror exstinxerit. Eodem etiam anno maxima pars ciuitatis Norwycensis repentinis ignibus deflagavit.

2 Hoc anno legati ad Carolum Regem in Galliam mittuntur, qui regnū Francia Edoardo tertio, ac posteris Angliae Regibus debitum, repeterent: verum Carolus adeo regem nostrum contempsit, ut per iocum ac ludibrium doliolum ad ipsum lusorijs pilis repletum per legatos suos transmiserit: cuius tamen petulantiae Gallum non ita multo post magnè perè pœnituit.



<i>Anni Do- mini.</i>	<i>Anni Re- gum.</i>	<i>Anni Pō- tificum.</i>	<i>Maiores.</i>	<i>Vicecomites.</i>
1419	7	5	Gual. Daniel. 3.	Hen. Pecking. Io. Scotlan.
1420	8	6	Rich. Spurdance.	Thom. Ingham. Rob. Asger.
1421	9	7	Gul. Sedman	Gu. Niche. Symon Cooke.
1422	<i>An primo Henrici. 6.</i>	8	Io. Manning. 2.	Io. Gerard. Tho. Daniel.
1423	2	9	Io. Daniel. 4.	Io. VVrightus. Io. Hodkins.
1424	3	10	Thomas Baxter.	Guliel. Gray. Petrus Brasier.
1425	4	<i>An. 1. Gu. Anwyck.</i>	Tho. Inghaym.	Tho. VVeybie. Rob. Chapleyn.
1426	5	2	Io. Asger.	Io. Copping. Io. Gleder.
1427	6	3	Tho. VVetherby.	Io. VVylby. Rich. Pilbye.
1428	7	4	Rich. Mozley.	Io. Alderford. Gregor. Draper.
1429	8	5	Robertus Baxter. 2.	Gul. Iselham. Io. Sypater.
1430	9	6	Io. Cambridge.	Rob. Toppys. Io. Penningus.
1431	10	7	Tho. Ingham. 2.	Gul. Astwel. Tho. Grafton.
1432	11	8	Tho. VVitherbey. 2.	Io. Dunning. August. Bang.
1433	12	9	Rich. Spurdance. 2.	Rob. Langley. Gul. Hempsted.
1434	13	10	Io. Garrard.	Rogerus Boten. Tho. Ball.
1435	14		Robertus Toppys.	Edmund. Breton. Petrus Roper.
1436	15		Rober. Chapleyn.	Rich. Brasier. Gualt. Crump.
1437	16	<i>An. primo Th. Brown.</i>	Io. Cambridge. 2.	Symon VValsoker. Clemens Fishm.
1438	17	2	Io. VVellys gubernat.	Gualt. Eton. Io. Lingford.
1439	18	3	Io. VVellys. Custos.	Gualt. Eton. Io. Lingford.
1440	19	4	Io. Clyfto. mil. custos.	Io. Brosierd. Io. Spicer.
1441	20	5	Io. Clyfton. Custos.	Io. Gosleyn. Hen. Styrmyrn.
1442	21	6	Gul. Hempsted.	Tho. Aleyn. Robertus Seygrym.
1443	22	7	Guliel. Astwel. 2.	Io. Intwood. Rob. Aleyn.
1444	23	8	Robertus Topys. 2.	Io. Brosiard. Rob. Spicer.



Regnavit Henricus quintus annos. 9. Henricus textus. 39.

3 Hoc anno Richardus Cantabrigie Comes, Dominus Scruppus, & Thomas Graius, mortem Regi optimo nefarie machinantes ad Southamtonensem portum in conspectu Regis, regni procerum, & totius exercitus, perfidie pœnas dederunt.

4 Hoc anno nobilis ad Dagincurtum pugna commissa fuit, quo in pralio flos panè omnis & robur Gallica nobilitatis interijt.

5 Hoc anno .a. d. V 1. Kalendas Augusti, cum ingenti navium classe Rex in Galliam trajcit, qui quaquaversum incedit, captis omnibus urbibus, munimentis, atque castellis, Gallo fuso victoria decus mirifice propagavit.

6 Hoc anno Rotomagum (opulentissima Gallie ciuitas) obsidebatur, & tandem per deditionem in potestatem Regis nostri peruenit.

7 Hoc anno inter nostrum & Francie Regem fœdus initur: quod matrimonio Catherina (Caroli filia) qua Henrico Regi nupserat, firmatum fuit.

8 Hoc anno Catherina ad Wyndesorium castrum filium enixa est, qui patris nomine Henricus sextus appellabatur: ac non ita multo post Rex Angliae fuit. Etenim eodem anno pater iniquo fato extinctus occidit, tricesimo sexto ætatis anno, vir omni maiestatis regie splendore circumfluens.

1 HOC ANNO Carolus Gallorum rex vita functus est, à cuius morte confestim vtriusq; regni proceres Henricum sextum Angliae regem, communi omnium consensu Regem quoque Gallia renuntiant.

2 Hoc anno Dominus Rogerus Mortimerus lese maiestatis conuictus, proditorum communi supplicio afficiebatur.

3 Hoc anno gravis incidit contentio inter Bedfordia ducem & Wyntoniensem Episcopum.

9 Hoc anno Rex Parisiis coronatur.

14 Hoc anno diem obijt supremum Dux Bedfordia, vir tam pacis laude quam belli gloria insignis, cuius morte res nostra mirifice perculsa atq; afflictæ, tandem funditus conciderunt.

17 Hoc anno ad quadriënium ciuitas Norwycensis libertate priuata, omne magistratum ius amisit.

21 Hoc anno restituta denuò libertati fuit: Eodemq; anno Londini ictu fulminis Templum Diui Pauli deflagavit: verum ciuium industria ignis celeriter restinctus fuit.



<i>Anni Domini.</i>	<i>Anni Regum.</i>	<i>Anni Episcoporum.</i>	<i>Maiores.</i>	<i>Vicecomites.</i>
1445	24	9	Io. Clyfton.	Io. Intwood. Robertus Alleyn.
1446	25	an. i. Gual. de Hart.	Guliel. Ashwel. 3.	Io. Intwood. Robertus Alleyn.
1447	26	2	Thomas Catworth.	Io. Intwood. Robertus Alleyn.
1448	27	3	Thom. Catworth. 2.	Robertus Furbusher. Io. VVighton.
1449	28	4	Georgius Draper.	Robertus Brown. Io. Droll.
1450	29	5	Thomas Alleyn.	Io. Chyttock. Robertus Machin.
1451	30	6	Radulphus Seygrym.	Gul. Barley. Io. Gylberd.
1452	31	7	Robertus Toppys. 3.	Thomas Elys. Robertus Lyred.
1453	32	8	Io. Droll.	Edwardus Culter. Io. Clerck.
1454	33	9	Richardus Brown.	Richard. Beer. Galfridus Quinch.
1455	34	10	Georgius Draper. 2.	Gulielmus Norwich. Rich. Alboon.
1456	35	11	Richard. Brasier.	Thom. Buckingham. Io. Blunt.
1457	36	12	Io. Chyttock.	Galfridus Ioy. Io. Hunsworth.
1458	37	13	Robertus Toppys. 4.	Thomas Oxwold. Gul. Riuer.
1459	38	14	Io. Gilbert.	Gualter Godfrays. Edm. Colman.
1460	39	15	Thomas Ellis.	Rogerus Bestus. Io. Aubery.
1461	An primo Edward. 4.	16	Gulielm. Norwich.	Io. Northal. Io. Cooke.
1462	2	17	Io. Butt.	Io. Burton. Rich. Hoste.
1463	3	18	Richardus Brasier. 2.	Henricus Spencer. Gul. VVylls.
1464	4	19	Io. Gylberd. 2.	Gul. Swayn. Robertus Portland.
1465	5	20	Thomas Ellis. 2.	Gualth. Fornfield. Rich. Aniel.
1466	6	21	Io. Chyttock. 2.	Io. Roose. Io. Beckles.
1467	7	21	Rogerus Bestus.	Io. Lawse. Robertus Hyckling.
1468	8	22	Gualt. Fornfield.	Rich. Farror. Thom. Veyl.
1469	9	23	Io. Aubery.	Tho. Buckingham. Gul. Peper.
1470	10	24	Edwardus Culter.	Io. Haruy. Hen. Oxwold.
1471	11	25	Io. Butt. 2.	Io. VVellys. Rob. Aytmer.



Regnauit Henricus sextus annos.39. Henricus quintus.9.

25 Hoc anno Anglia tota terra motu horribili contremuit.

29 Hoc anno Gulielmus de la Poole dux Suffolciae Domeria subito ab aduersarijs captus interficitur. Eodemq; anno Cantiani Ioannem quendam cognomento Caddum ducem sibi constituunt, infestisq; agminibus Londinum versus contendunt, quò cum venissent, cuncta spoliant, vastant, incendunt, diripiunt, quosdámque de Nobilitate viros ( & inter illos Dominum Sayum principem totius Anglia quæstorem ) securi percutiunt. Nihilominus ad extremum ( diuina benignitate ) fusi profligatiq; dignas scelerum pœnas pertulerunt.

31 Hoc anno ad Fanum Albani acerrima fuit pugna inter Regem & ducem Eboracensem, vbi Neuylorum ( patris ac filij ) Sarisberia, & Varuici Comitum virtute, atq; consilio, regia copia fusa fugataq; sunt, ac Rex ipse comprehensus.

32 Hoc anno Ars Typographica in Germania primùm inuenta fuit, ars vna omnium excellentissima, cuius beneficio bonarum literarum disciplina sese per omnem panè terrarum orbem diffuderunt.

37 Hoc anno denuò ducis Eboracensis copiae ad Northamptonum cum regijs cohortibus conflixere: vbi iterum maximo praelio rex vincitur: captiuusq; Londinum ducitur.

38 Hoc anno in agro Eboracensi iuxtà castellum Middleham Regina ducem Eboracensem aggressa maximo praelio deuicit. Qua in pugna dux ipse cum Edmundo filio Rutlandiae Comite interfectus fuit. Et Richardus Neuylus (pater) comes Sarisberienensis captus, aliquanto post cum nonnullis alijs capite multatur.

39 Funestissimus fuit hic annus, & civili clade insignis, quæq; mirabilem in modum regni vires imminuit. Etenim duo validissimi exercitus iuxtà Eboracum inter se atrocissime depugnauerunt. Quo in certamine triginta panè millibus ex vtraq; parte interfectis, victoria tandem Edoardo Marchiae Comiti cecit: qua potitus Henricum dignitate regia priuauit, sibiq; principatum asciuit.

3 Hoc anno Norwyci Cathedrale Templum repentinis ignibus exustum est.

9 Hoc anno Dominus Wellys in comitatu Lincolniae tumultus quosdam conciuuit, qui quidem celeriter repressi sunt, atq; is merito affectus supplicio.

10 Hoc anno inter Cantianos noui motus fiunt, qui Londina ac circumvicinis vrbibus multum damni attulerunt.



<i>Anni Do- mini.</i>	<i>Anni Re- gum.</i>	<i>Anni E- piscoporu.</i>	<i>Maiores.</i>	<i>Vicecomites.</i>
1472	12	26	Rogerus Bestus. 2.	Edmundus Staty. Tho. Storm.
1473	13	An. 1. Io. Goldswcl.	Rich. Farror.	Io. Cooke. Gul. London.
1474	14	2	Thomas Ellys. 3.	Iacobus Goldbeter. Io. Bright.
1475	15	3	Gul. Swayn.	Tho. Cambridge. Rob. Lound.
1476	16	4	Io. VVellys.	Hamo Claxton. Robertus Cooke.
1477	17	5	Io. Portland.	Greg. Clerck. Philip. Curson.
1478	18	6	Rich. Farror. 2.	Rob. Osborn. Tho. Beasfield.
1479	19	7	Tho. Buckingham.	Robertus VVellys. Tho. Philips.
1480	20	8	Io. Awbry. 2.	Rich. Gardyner. Tho. VVurth.
1481	21	9	Gul. London.	Rich. Ballys. Radulp. Est.
1482	22	10	Gul. Sylmer.	Rob. Belton. Io. Denton.
1483	An. pri. Rich. 3.	11	Rich. Farror. 3.	Gul. Rosa. Gul. Farror.
1484	2	12	Io. Cooke.	Io. Ebbes. Gul. Curteys.
1485	An. pri. Hen. 7.	13	Hamo Claxton.	Io. Tylles. Io. Swayn.
1486	3	14	Tho. Buckingham. 2.	Io. VViskins. Io. 'oswel.
1487	4	15	Io. VVellys. 2.	Io. Pichamor. Io. Castyn.
1488	5	16	Tho. Beasfield.	Io. Reed. Rich. Howard.
1489	6	17	Rich. Ballys.	Tho. Cause. Nich. Dauby.
1490	7	18	Rob. Gardyner.	Nich. Cowlych. Gul. Gogoon.
1491	8	19	Gul. London. 2.	Steph. Brayn. Tho. Cock.
1492	9	20	Rob. Sylmer. 2.	Io. VVarnes. Io. Rightwif.
1493	10	21	Rich. Farror. 4.	Robert. Long. Barth. King.
1494	11	22	Steph. Bryan.	Io. Horsley. Rob. Burrow.
1495	12	23	Io. VVellys. 3. Tho. Cause. }	Rich. Brasier. Robertus Bestus.
1496	13	24	Io. Reed.	Io. Francys. Io. Pethode.
1497	14	25	Nic. Cowlych.	Greg. Clerck. Thomas Aldych.
1498	15	26	Rich. Farror. 5.	Gul. Ramsey. Thomas Hennyng.



Regnavit Edoardus quartus annos.22. Ric.tertius.2. Hen.sept.24.

11 Hoc anno inter Regem & Richardum Neuylum comite m'Waruicensem ad Barnetum pugnatum fuit, quo in certamine Comes ipse (vir inuisitissimus) ac Ioannes (frater illius) Marchio Montacutensis ceciderunt: & Rex ipse non incruentam victoriam adeptus est. Eodem anno ad Tewksberiam infestis armis denuo concursum fuit, quo in certamine Regina vincitur, suis ferè ad vnum casis, aut captis. Eodem etiam anno Edoardus Princeps filius Henrici sexti, adolescens praestantiss. à Duce Glocestriae (ut fama est) crudelissimè confoditur.

12 Hoc anno Rex Henricus in turri Londinensi, ab eodè Richardo Glocestria duce (ut constans fama est) miserrimè trucidatur.

14 Hoc anno Edoardus rex Norwycum venit, paxq; inter Angliam & Galliam paulo post facta est, quae ad septennium duratura foret.

17 Hoc anno Dux Clarentia (imperio fratris) pessimo in omni memoria hominum exemplo Caleti in dolio (ut aiunt) vini cretici exstinctus est. Cuius mortem horribilis pestis insecuta, quae omnem Angliam quaquauerus peruagata est.

19 Hic annus insignis fuit clade civium Norwycensium ex pestilentiae lue: qua inibi incredibilem hominum multitudinem absumsit.

20 Hoc anno mense Iulij, tanti terra motus in agro Norwycensi, totaque panè Anglia facti sunt, ut multa in diuersis locis aedificia eorum vi labefactata corruerint.

22 Hoc anno rex Edoardus cessit è vita, annum agens aetatis circiter. 50.

1 HOC ANNO Edoardus Princeps eiusq; frater (filius Edoardi regis nuper defuncti) immani ssimo scelere Richardi Ducis Glocestrensis in turri Londinensi, contrucidantur: qui eius flagitij diritate regiam sibi maiestatem acquisiuit.

2 Hoc anno in Tyrannum cōiuratio Nobilium facta est, cuius princeps existit Henricus Buckinghamia Dux, cui ob id postea capto, Sarisberia caput amputabatur. Nobilis hic quoque annus fuit interitu Richardi, (Regis post natos homines scelestissimi) qui apud Pagum Bosworthum paullo ultra Leycestriam, in praelio contra Richmondia comitem, inter confertissimos hostes pugnans confoditur.

3 HOC ANNO novum, & in omni sanè aetate prorsus inauditum morbi genus, per totam Angliam peruasit, (qui sudoris lues nuncupatur) dira equidem pestis, quaeq; innumerabilem mortalium multitudinem exstinxerit.



<i>Anni Do- mini.</i>	<i>Anni Re- gum.</i>	<i>Anni Pō- tificum.</i>	<i>Maiores.</i>	<i>Vicecomites.</i>
1499	15	<i>Anno pri. Tho. Ian.</i>	Robertus Gardyner. 2	Io. Randolph. Robert. Pichamor.
1500	16	<i>An. pri. Rich. Nycx.</i>	Io. VVarnes.	Gulfr. Steward. Io. Crome.
1501	17	2	Io. Rightwyse.	Rich. Aylmer. Gul. Drake.
1502	18	3	Gul. Ramsey.	Simon Reed. Io. Smyth.
1503	19	4	Tho. Cause.	Tho. VVarnes. Thomas Chaunt.
1504	20	5	Robertus Burrow.	Gul. Hart. { Io. Henry. Io. VValters.
1505	21	6	Greg. Clerck.	Tho. Large. Gul. Godfrye.
1506	22	7	Robertus Gardner. 3.	Tho. Clerk. Io. Swayn.
1507	23	8	Tho. Aldrich.	Io. Clerck. Robert. Farror.
1508	24	9	Gul. Ramsey. 2.	Ed. Reed. Robertus Broome.
1509	<i>Anno pri. Henrici. 8.</i>	10	Robertus Long.	Henricus Mein. Rob. Iannys.
1510	2	11	Rich. Brasser.	Io. Marsham. Radul. VVylkins.
1511	3	12	Richardus Aylmer.	Robertus Bell. Steph. Stallon.
1512	4	13	Gul. Hart.	Steph. Stawn. Io. Corpusby.
1513	5	14	Ioannes Rightwyse. 2.	Io. Busting. Tho. Pickerel.
1514	6	15	Greg. Clerck. 2.	Henricus Schoolehowse. Io. Terry.
1515	7	16	Io. Clerck.	Robert. Barker. { Rich. Farrome. Gul. Broome. { Tho. VVilkins.
1516	8	17	Tho. Aldrich.	Tho. Bawber. Greg. Cause.
1517	9	18	Robertus Iannys.	Rob. Green. Tho. Cory.
1518	10	19	Io. Marsham.	Rob. Hemyng. Hamo Lynsted.
1519	11	20	Gul. Hart. 2.	Io. Brown. Barth Springwel.
1520	12	21	Io. Clerck. 2.	Nic. Syphat. Io. VVestgate.
1521	13	22	Edwardus Reed.	Tho. Moore. Robertus Haul.
1522	14	23	Io. Terrey.	Reginal. Listelpro. Gul. Norfolk.
1523	15	24	Robertus Iannys. 2.	Steph. Raynbow. Hen. Salter.
1524	16	25	Tho. Pickerel.	Rob. Leech. Io. Swayn.



Regnavit Henricus octavus annos. 36. Edoardus sextus. 6.

2 Hoc anno Rex Henricus Norwycum venit.

3 Hoc anno ingenti denuò terra motu. Anglia conquassata fuit.

7 Hoc anno natus fuit inuictissimus princeps Henricus, rex eius nominis octavus.

16 Hoc anno Arthurus princeps duxerat in uxorem Catherinam Hispania regis filiam.

17 Hoc anno mortuus est Arthurus princeps summa spei adolescens.

19 Hoc anno 10. VVindamius miles securi percutitur. Eodemq; anno ciuitas Londinum incendio panè absumpta fuit. Praterè aſidui imbres, tonitrua, fulgura, procella vbiq; exstiterunt.

20 Hoc anno sexto Augusti & ipso die transfigurationis domini nostri in parochia sancti ſervatoris Norwyci natus est Mathæus Parker in Theologia Doct̃or, vltimus decanus collegij de Stoke iuxta Clare, poſteà decanus de Lincolne. Tandem Archiepiſcopus Cantuariæ ſub Eliſabetha Regina: qua regnante, ſato conceſſit. 17. May.

23 Hoc anno. 25. Aprilis horribile incendium Norwycenſem urbem afflixit, adeò vt continuos quattuor dies funeſtis ignibus ciuitas conflagrauerit. Eodemq; anno quarto Iunij conſimili caſu denuò incenſa fuit.

24 Hoc anno 10. Colettus Diui Pauli decanus, ſuis ſumtibus magnificam ſcholam exſtruxit in ea parte cæmiterij Paulini, qua ad orientem ſpectat. Eodem anno mortuus eſt Henricus eius nominis ſeptimus, cui ſucceſſit filius eius illuſtriſſ. Henricus octavus.

1 HOC ANNO Iacobus Scotia Rex hoſtili exercitu Angliam inuadens, cum magna Scotorum ſtrage proſtigatur. Eodemq; anno magna pars templi Norwycenſis cum libris panè omnibus ac Eccleſiæ ornamentis combuſta fuit.

5 Hoc anno rex in Gallia proſperè bella geſſit, Tornacum & Turwynum oppida munitiſſ. vi cepit: domi verò Regina dnce Comite Surrebio Scotos debellauit.

7 Hoc anno Greenwyci nata eſt Maria, qua poſteà Angliæ Regina fuit.

8 Hoc anno tanta fuit glacies, tantuſq; tamque perpetuus niuiũ rigor vt omnia vbiq; flumina congelauerint, ac equi carriq; onuſti Tameſim tranſierint. Eodem etiam anno fuit dira illa Dies May Londinenſibus lugubris & infelix, quam & hodiè atram & infauſtam vulgò nuncupant.

10 Hoc anno vniuerſa panè Anglia ſudoris lue, & fame afflicta fuit.

Ecc.



<i>Anni Domini.</i>	<i>Anni Regum.</i>	<i>Anni Episcoporum.</i>	<i>Maiores.</i>	<i>Vicecomites.</i>
1525	17	26	Rob. Farror.	Aug. Steward. Gul. Layer.
1526	18	27	Rob. Burrow.	Gul. Russell. Io. VVats senior.
1527	19	28	Rad. VVylkins.	Tho. Grew. Io. Clerck.
1528	20	29	Gul. Rome.	Tho. Cranck. H. Fuller.
1529	21	30	Tho. Greene.	Io. Curat. Io. Corbet.
1530	22	31	Tho. Baswber.	Tho. Naughton. Nic. Sotherton.
1531	23	32	Edoard Reed. 2.	Rich. Cattlyn. Gul. Rogers.
1532	24	33	Reginal. Littleprosv.	Io. Groot. Gul. hast.
1533	25	34	Tho. Pickerel. 2.	Adam. Lawe. Rog. Cosper.
1534	26	35	Aug. Steward.	Gulielmus Lyn.
1535	27	36	Nic. Syphat.	Robertus Brown. H. Crooke
1536	28	An. primo Gul. Rug.	Rob. Farror. 2.	Edmun. VVoodd. Tho. Thetfort.
1537	29	2	Gul. Layer.	Rob. Rug. Robertus Palmer.
1538	30	3	Th. Pickerel. 3.	Nic. Osborn. Io. Humberston.
1539	31	4	Nich. Sotherton.	Iacob. Marsham. { Tho. VValters. Io. Tracye.
1540	32	5	Tho. Grew.	Thomas Cod. Io. Spencer.
1541	33	6	Robertus Liech.	Felix Puttock. Io. Quash.
1542	34	7	Gul. Rogers.	Tho. Cock. Rich. Dany.
1543	35	8	Eduardus Reed.	Rich. Ale. { Gul. Morrants. Tho. Marsham.
1544	36	9	Henricus Fuller.	Edmund. VVarden. Rob. Marlyn.
1545	37	10	Rob. Rug.	Rich. Suckling. Robertus Lyng.
1546	38	11	Aug. Steward. 2.	Rob. Michles. Bernard. Vdbird.
1547	An. primo Edoardi. 6.	12	Robertus Rich.	Tho. Dowling. Gul. Heed.
1548	2	13	Edmund. VVod. 2. Gulielm. Rogers. 2.	Hen. Bacon. Io. Atkins.
1549	3	14	Tho. Cod.	Rich. Fletcher. Gul. Ferror.
1550	4	An. primo T. Thulbey.	Rob. Rug. 2.	Tho. Morley. Io VValters.

Regnavit Henricus octavus annos. 36. Edoardus sextus. 6.

- 11 Hoc anno diluvium fuit, ad diem (quem vocant Sancti Leonardi) quod hodierno etiam die Divi Leonardi diluvium appellatur.
- 12 Hoc anno Duci Buckinghamie ob proditionis scelus, cervices securi incisa sunt.
- 13 Hoc anno Imperator Carolus quintus in Angliam venit, & à Rege nostro magnificentissimè excipitur.
- 14 Hoc anno in Angliam venit Christernus Dacia rex.
- 17 Hoc anno ob religionem maximi motus fiunt in Germania.
- 20 Hoc anno multis in locis mortalium corpora denuò letali illo sudore diffluxère, sed præcipuè Londini.
- 21 Hoc anno intollerabilis illa Antistitis Romani potestas edicto regio diminuta fuit.
- 23 Hoc anno omnium ordinum consensu Rex Anglicana Ecclesia supremum caput renuntiatur.
- 24 Nobilis fuit hic annus ortu excellentiss. principis Elisabethæ (Reginæ nunc nostræ illustriss.) quæ septimo die Septembris Greenwyci nata fuit.
- 25 Hoc anno Romani Pontificis execranda Tyrannis penitus ex Anglia profligata fuit.



<i>Anni Do- mini.</i>	<i>Anni Re- gum.</i>	<i>Anni Po- tificum.</i>	<i>Maiores.</i>	<i>Vicecomites.</i>
1551	5	2	Rich. Dauy.	Io. Aldrich. Tho. Gray.
1552	6	3	Thomas Cock.	Rob. Norman. Io. Bungey.
1553	An. pri. Re. Maria	4	Henricus Thomas Croock.	Nic. Norgat. Io. Howse.
1554	2	Anno pri. Io. Hopto.	Thomas Marsham.	Tho. Malbey. Gul. Minge.
1555	3	2	Felix Puttock. 2. Tho. Codde. 2.	Tho. Green. Io. Bloome.
1556	4	3	August. Steward. 3.	Thomas Sotherton. Leonardus Sotherton. }
1557	5	4	Henricus Bacon.	Edmund. VVolfsey. } Tho. Lyn. Io. Beniamyn.
1558	An. 1. Re. Elyzabeth.	5	Io. Aldrich.	Thomas Parker. And. Quash.
1559	2		Rich. Flecher.	Tho. Culley. Tho. Tesmond.
1560	3	An. 1. Io. Parchurst.	Robertus Michels.	Tho. VVhall. Rich. Heede.
1561	4	2	Gul. Myngey.	Rob. VVood. Tho. Peck.
1562	5	3	Gul. Ferror.	Tho. Ferror. Tho. Beomand.
1563	6	4	Rich. Dauy. 2.	Chrstoph. Some. Elisaw Bate.
1564	7	5	Nic. Norgate.	Rob. Sucklyng. Io. Gybbes.
1565	8	6	Thomas Sotherton.	Io. Sotherton. Tho. VVynter.
1566	9	7	Henricus Bacon. 2.	Tho. Petes. Io. Suckling.
1567	10	8	Tho. VVhall.	Io. VVorley. Tho. Layer.
1568	11	9	Tho. Parker.	Io. Reed. Symon Bond.
1569	12	10	Rob. VVood.	Chrstof. Layer. Rich. Baat.
1570	13	11	Io. Aldrich. 2.	Tho. Gleane. Robertus Gostlyn.
1571	14	12	Thomas Green.	Henry Greenwood. Edoardus Pye.
1572	15	13	Robertus Sucklyng.	Nic. Sotherton. Franciscus Rag.
1573	16	14	Tho. Peck.	Georg. Bosweon. Tho. Stokes.
1574	17	15	Chrstoph. Some.	Nich. Baker. Tho. Gooeche.

